

I A N I N I C I I
 E R Y T H R Æ I
 O R A T I O N E S .
 V I G I N T I
 D V Æ .

BIBLIOTECA NAZ.
 ROMA
 VITTORIO EMANUELE.



COLONIÆ VBIORVM.
 Apud IODOCVM KALCOVIVM
 & Socios, C1D1DCXLIX.

Orationes hæ viginti duæ lucem aspiciant,
autorisque eloquentissimi nomen adhuc ma-
gis celebrent. Coloniae, x v Novembr.
CIC IDC XLVIII.

Henricus Francken Siersstorpffius,
S. Theol. D. librorum Censor.

STEPHANO VAIO

Episcopo Cyrenensi,



& Archihospitalis S. Spiritus in Saxia
Præceptori vigilantissimo,

IANVS NICIVS ERYTHRÆVS

S. P. D.



*E*n in me, Prasul optime, jam inde usque
ab adolescentia, ad eloquentiam, à na-
tura, jacta esse visa sunt semina, ut ab
iis, à quibus erudiebar, summa data sit
opera, ut ea ad frugem pervenirent. nam,
quacunque mihi ingenii declarandi au-
gendique se se dabat occasio, eam ut arriperem, coge-
bant; & si cuiquam ejus artis, cui studerem, laudanda
partes essent demandanda, non alteri potius quam mihi
committerent. ne multa, annos natus non amplius tre-
decim, ita de laudibus eloquentia dixi, ut, qui aderant,
(aderant autem viri, omnium doctissimi eloquentissimi-
que) indolem admirarentur, ingenium laudibus effe-
rent, & uberem illam verborum effervescentium, & paulo
nimium redundantium, copiam, ab jugi quodam eloquen-
tia fonte manare, omnibus audientibus, dicerent. sed,
nondum ex ephebis excefferam, cum ab humanitatis stu-
diis, parentum coactu, discessi, & ad graviores discipli-
nas me contuli. ac primum, in Peripateticorum spatiis
triennium consumpsi; tum ad Theologos abii; quorum di-
vinitus hausta sapientia non plus attingi, quam quantum
parentum eorundem voluntas tulit; à qua non erat fas

A 2

mibi

mibi recedere ; cui parentes iidem Iurisprudentiam , tanquam puellam quampiam , desponderant ; quia maiores ab ea , quam ex ceteris artibus , percipi fructus aiebant , sive ad opes , sive ad honores , sive ad gloriam . itaque ab aliis studiis abstracto , vir doctus & familia nostra amicissimus , prima Iurisprudentia rudimenta tradendo , eam mihi quasi sponsam commendavit , & in manum dedit . quod ubi apud quosdam , quorum erat magnum in Iurisconsultis nomen , quique me in filii loco diligebant , increbuit , magna eos affecit voluptate . gaudebant enim , meum illud discendi studium , quo tum eram incensus , ad jus civile transferri . quamobrem illud adveniens , exceperunt , amplexati exosculatique sunt , foverunt , acrius inflammaverunt . videbant etiam , me non illuc , in omni genere honestarum artium rudem , ut non nulli faciunt , sed Latinis literis doctum , nec omnino Græcarum expertem , præterea multiplici rerum scientia instructum atque ornatum , accedere ; ideoque sperabant fore , ut ex eorum ludo , tanquam ex officina quadam , quasi Myronis aliquod opus , vel Phidia signum , exirem . ac fortasse minime hæc eos frustrata spes esset , si longius vitam protrahere contigisset . verum illi celerius multo , quam mihi necesse erat , finem vivendi fecerunt . nam si diutius huius usuram lucis usurpare potuissent , meliore loco res nostra , quam nunc illa sunt , essent . etenim , cum jam , magistris illis usus , totum jus civile penitus cognovissem ; vel meam , ad illud interpretandum , operam contulissem , vel ad Remp. cui illud natum est , capeffendam , animum adjecissem . sed , ducibus ac moderatoribus studiorum meorum è medio sublatis , sive dolore animi , quem illorum mors mihi attulerat , sive odio fori , à cuius strepitu , homo natura quietissimus , abhorrebam , ardor ille Iurisprudentia , quo flagraveram , primum imminutus , deinde exstinctus est totus . neque tamen , eos annos , quibus Iurisconsulto operam dedi , mihi penitus perperam abiisse , jure conqueri possum , quod

veterum

veterum responsa prudentum, qui sunt omnes praeclare
 lecuti, legendo, quomodo, qua ejus sunt artis propria, le-
 pide, eleganter, Latineque dici possent, edidici; tum plura
 in veterum scriptis (qua, quoniam à juris notitia ab-
 eram, tanquam ignotum hominem, praecebam,) coe-
 perunt esse mihi perquam familiaria; ac capiebam vo-
 luptatem, Ciceronis Topica ad Trebatium, ejusdemque
 orationem pro Caccina, in qua, de verbis interdicti Vnde
 Vi, omnis est quaestio, mihi magis esse ad intelligendum
 apertam, quam cuiusvis Grammaticorum, quibus nullus
 ad jus civile aditus patuit, & tamen suis eam commen-
 tariis interpretari sunt ausi. deinde, quid fuit lucri,
 quorundam, non magis juris scientia quam omni erudi-
 tione principum, virorum notitiam habuisse? quos antea,
 prae Alciatum ac Budeum, natos esse nesciebam; nimi-
 rum, Connani, Duarenii, Cujacii, Donelli, aliorumque
 ejus nota autorum; ex quorum abundanti doctrina, tan-
 quam à fonte, non pauca, qua meis scriptis aspergam,
 exhaurio. Omni igitur Juris civilis cogitatione abjecta,
 cum, etiam tum adolescens, sederem domi otiosus, po-
 tius quam me voluptatibus constringendum darem; quid
 facerem honestius, quam ut revocarem animum ad hac
 liberalissima & humanissima studia, quorum amoenitas
 pulcritudoque, jam inde ab ineunte aetate, meum ad se
 amorem attraxerat? Hac occasione, sumsi iterum in ma-
 nus orationes, quas adolescens, vel potius puer, habue-
 ram: quas quum doctis quibusdam viris ostendissem, om-
 nibus idem unum convenit, ut eas emitterem; fore enim
 iis, qui legissent, non ingratum, aspicere? quid natu-
 ra in puero, nullo fere artis auxilio sublevata, potuisset
 efficere. Scis, quam facile sit adolescenti, laudis praesertim
 studioso, sinere se ab inanis gloria aestu abripi, & quocun-
 que ille traxerit, abstrahi. itaque nihil à me factum est
 prius, quam ut, impressa, in hominum conspectum prodirent.
 quamquam, ob orationem de Episcopo, qua longior

est ceteris, prope fuerit, ut ejus mihi rei potestas à Superic-
ribus non fieret; qui, non esse equum, aiebant, pati, ad-
lescentulum præcepta Episcopis dare, qui summum in Ec-
clesia locum teneant, eisdemque velle præscribere, quem-
admodum in sui muneris functione se gerant. sed tandem
justa illorum causa, ab nostro est odio & importunitate de-
victa, verum continuo mea, vel temeritatis vel auda-
cia, poenas dedi. nam, ejus potissimum culpa, qui has sibi
partes sumserat, suamque in eo fidem interposuerat, ut
liber, diligenter cognitus emendatusque, ex impressoris of-
ficina prodiret, adeo ille turpiter deformatus, adeo men-
dis refertus corruptusque, in conspectum mihi se dedit, ut
non agnoscerem, eundem esse qui fuerat. quamobrem com-
motus, cum non possem ab eo, qui peccaverat, poenas, ut
meritus erat, exigere, in librum, qui nihil commuerat,
iram omnem evomui, eumque perpetuis tenebris vinculis-
que mandavi. Iam anni quadraginta intercesserant, ab
hoc infortunio, quo illas mactaveram; cum coeptum est ex-
cogitari de aliis imprimendis, quas post eas, variis tempo-
ribus, vel habuisssem vel scripsissem; sed, quia pauciores
illa erant, quam ut justum unum corpus possent refficere,
petiit à me typographus, num alias haberem, quibus au-
geri illarum numerus posset. ac statim illarum mihi soli-
tudinis ac sordium venit in mentem; atque abii, vincula
miseris detraxi, fecique lucis aspicienda potestatem; tum,
sordium illarum maculas elui, hoc est errata correxi; ne-
que, in corrigendo, verbum quidem unum commutavi;
ut prorsus appareret, qualis in me prima illa eloquentia vis
atque conatus extitisset; atque ita emendatas, ceteris,
quas, grandior natu, siue habuisssem siue scripsissem, ad-
junxi. qua, si fortasse quaratur cur non ita longo inter-
vallo superiores inveniantur iis, quas primus ille adolescen-
tia fervor effudit, causa reperientur verissima dua. pri-
mum, quod exercitatio illa studiumque fuerat remissum,
quo à puero flagrabam. nam eloquentia, magis etiam
quam

quam cetera res alia, exercendo augetur. at quis nam mihi exercitationi huic locus pateret in aula, ubi ludus sunt procectones, cathedra, sella, ibidem ad ornatum quietemque disposita; theses, non illa philosophica, Sit ne virtus finis, Regaturne providentia mundus; sed illa magis, An vir ille princeps, vel privatus, in gerenda repub. vel privatis rationibus administrandis, fecerit aliquid superbe, intemperanter, libidinoſe, avarę; declamationes mea, aliorum fama detractioes & maledicentia? deinde, cum jam totum mutatum eſſet ſcribendi dicendique genus, ac longe aliud eſſet, atque illud, quod, pueris nobis, vigebar; ſi placere vellem, illo mihi modo dicendum erat, quod mirabantur adoleſcentes, ſed non probabant ſenes. at ego, tum quia nollem, tum quia fortasſe non poſſem ſi vellem, ea uti ratione dicendi ſcribendique, ſatius eſſe duxi, me continere, quam illud aggredi, quod facerem, vel invitus, quia non probarem, vel peſſime, quia non auderem. quid? ego ne illud ſcribendi genus adamarem, fractum, conciſum, membris minuticribus captum, crebro incidens, ſententioſis vibrantibus, ſeu potius eclogariorum carbonibus pictum, rebus (ſi tamen res appellanda ſunt illa) magis quam verbis, frequentatum, & ob id obſcurum? itaque raro, idque coactus, in Academia Humoriſtarum, verba faciebam; ita tamen, ut meo, non eo more qui tum increbuerat, dicerem. ſed animadvertēbam, morem illum, audientium ſignificatione nutuque, non improbari. tanta vis eſt veritatis. neque tamen idcirco recipiebam animum, quem abjeceram. duabus igitur hiſce de cauſis factum eſt, ut antea ego decurſi mea vita ſpiritus prope metas attigerim, quam illud, quod in me natum erat, quantulumcumque illud erat, quodque non minimum excreverat, canoſceret, & ſenectutem ſuam haberet. Ad orationes vera quod attinet, viſum eſt doctis viris, in quorum manus illa pervenerant, typographo imprimendas dare. cumque, ut moris eſt, nomini cujuſpiam dicata, eſſent emittenda,

quum illis nomen apposui ; quod meminissem , eas olim tibi , cum legeres , dignas commendatione visas fuisse . quid enim optare vehementius debeam , quam , ut *Navianus Nessler* , laudari abs te pater ? nam , quem vituperatorem metuam , si laudatorem te habeam ? te , inquam , singulari sapientia virum , ingenio eximio , Iurisconsultiissimo , poetæ summo , iudicio singulari . sed , alius erit de te dicendi locus . interim munus , quod tibi offero , orationum mearum , ea animi alacritate complectere , qua mea omnia soles . quæ orationes non sunt ita ambitiosæ , ut summis efferrî laudibus expetant (satis enim per se ipsa intelligunt , quantum absint à summo ;) sed , si laude aliqua digna videbuntur , laudari volunt , ut affabre dolatum opus , non ut plane perfectum ; ut viridis quadam seges ac lata , quæ annum illum in vilitate annonæ futurum ostendit , non ut præpinquis , perrumpens horrea , messis . ac fortasse eos , quos pollicebatur , fructus , nostra ex se dedisset oratio , nisi ea , de qua diximus , calamitas intervenisset ; quæ spes omnes , etiam tum florentes , evertit . Vale , & , cum erit voluntas legendi , si forte in orationem incides , de Episcopo , (quæ , non temporum ordine , sed dignitate materia , præficitur ceteris ,) oculos per universa ecclesiæ oras circumfer , ac vide , num multi sint Episcopi , qui possint in eam formam , quam explicamus , includi . Roma , Kal. Novembr.

CICCO XLVI.

I A N I N I C I I

E R Y T H R Æ I

O R A T I O I,



D E E P I S C O P O .

*Ad Sodales B. M. V. Assumptæ, in
domo professa Societatis I E S V.*



T vestra, Sodales mei, autoritas, quam
in me semper habuistis, imperat, & præ-
sens hic dies hortatur, quo sacra illa cæ-
rimoniam, solemnem religionem, & sanctam
Christianorum memoriam, celebratur, qua
Divus Basilius, Cæsariensis Episcopus,
sacris Episcopalibus initiatus est, & Pon-

tificiis insignibus decoratus; ut in partem aliquam curæ
Episcopalis campi, tam late patentis, excurram. Quem
ego sane laborem, utpote imparem ingenio, neque ætati
habilem meæ, facile declinarem, si alio loco dicendum
mihi fuisset, vel, aliorum jussu, hoc meis primum hume-
ris gravissimum onus imponeretur. tamen vererem, ne
suspicionem temeritatis evitare non possem, vel impru-
dentiam crimen effugere, si ego, nullius prope autoritatis
homunculus, ea de re verbum facere ausus essem, de qua
vix illa veteris eloquentiæ & sanctitatis lumina, Basilii,
Chrysostomi, Ambrosii, satis commode dixisse, & pro
rei dignitate satis graviter egisse, existimantur. Verum,
quum pro nostro vetere instituto, quo ad socios impellen-
dos cohortatione sua in studium virtutis, & ad celebra-
nda egregia sanctorum virorum facta, indocti, infantes
sapenumero, vocantur, multa mihi vobis exponenda sint,
quæ sanctorum hominum monumentis includuntur, &
quasi dispersa incertis sedibus evagantur; vestra pietate
& benevolentia, eam tacite securitatem irrepsisse sentio,

A 5 .

qua

quæ animum addere , timorem depellere , atque omnem animo suspicionem videatur evellere. Accedit illud quoque causæ , quod , si in hac re liberius forte quippiam dixerò , quam mihi dicere per ætatem liceat , quum domesticis hisce parietibus , quibusdam quasi custodiis , nostra contineatur oratio , vel exire nunquam poterit , vel , si quando dimissa in vulgus emanaverit , non tam ex meo sensu deprompta esse , quam ex vestro , qui id mihi imperastis , ore prodiisse , videri fortasse poterit ; quod vobis certe molestum esse non debet , plurium rerum voluntatem , atque licentiam , quam vobis vestra sponte præcidistis , nunc jam oratione quoque vestra , immo potius lege , ac conditione , ereptam esse. Neque existimaverit quicumquam , nostris sacrosanctos compungi aculeis Episcopos ; immo omnes plane , qui nunc sunt , tanquam Dei munere hominibus datos , vehementer colimus , observamus , admiramur , & virtutibus pontificiis omnibus præditos esse credimus. Illi illi nostris jaculis expetuntur , nostra in illos tela vibrantur , qui , ne cogitantes quidem quam sit præceps & lubricus is , quem plerique expetunt , amplitudinis locus , tanto ad eum ardore animi & contentione feruntur ; ut gravissimos suscipiant labores , subeant fortunarum & capitis pericula , ut tanquam mercedem rerum gestarum consequantur. Istorum tantam remorari celeritatem , objecta salutari ratione , tentabimus : hos , tanquam ferocis & exultantis equi effrenatos impetus , proposita periculi magnitudine , reprimere ac retardare , Deo bene juvante , conabimur. Sed ad rem tandem propius accedamus. Intuenti mihi sæpenumero , fratres mei , in summorum hominum res gestas , qui per singula tempora dati sunt Ecclesiæ divinitus , quærendum esse visum est , quid esset , cur recusatos à Basilio , Nazianzeno , Gregorio , & cæteris hujus notæ viris , summa vi summaque constantia Episcopatus , aliis sæpe tempestatibus , tantopere plerique concupiscerent. sed , diu cogitanti , nihil occurrat , nisi existimare , animos , honoris & divitiarum cupidos , quæstus tantummodo rationem habere , magnitudinem rei , ad quam tanto impetu feruntur , non expendere. Quas enim , nisi has potissimum , si recte ratiocinari volueritis , tam præcipitis consilii causas esse , reperietis ?

Quum

Quum enim videatis, viros omnium sanctissimos & prudentissimos, non modo, omnium prope consensu & voluntate Pastoralis officii sibi onus impositum repudiasse, verum etiam, arrepta repente fuga, sese è conspectu illorum proripuisse, quorum iudicio studioque, tam insigni dignitatis gradu decorabantur; at hos contra, ignavos plerumque homines, cum iis certe, quos diximus, nullo modo comparandos, cœca ac temeraria honoris cupidine concitados, minimeque reputantes, onera se imparia viribus suscipere, locupletes Ecclesias & pingua sacerdotia vehementer expetere, summa ope conquirere, cuncta miscere ut assequantur, assecutos, in eorum bona atque fortunas irruere: nonne vobis maximo argumento esse debet, istos, officii duntaxat exteriorem honorem æstimantes, illudque non re ipsa sed utilitate metientes, ad id certatim sibi studio omni adnitendum putare, ubi aut spes uberior existeret, aut præmia, vel ad opes vel ad dignitatem, ampliora proponerentur? Denique, nonne deimens inconsiderataque istorum temeritas ita vobis clara & illustis ostenditur, ut aciem vestræ mentis effugere nullo modo possit, si recordemini, viros omni virtutis laude cumulatissimos, qui sacræ Christi navis gubernandæ summa scientia præditi essent, ne, vehementissimis laborum & molestiarum quasi flatibus, in illa pericula ac tempestates impellerentur, iactis anchoris constantiæ & fortitudinis, in tuto tranquilloque animi demissionis & modestiæ portu confedissee, & ejus regendæ potestatem aliis tandemque concessisse; contra, istos intueamini inscientissimos gubernatores, nulla commendatione virtutum, nescio qua honoris specie captos & utilitatis, Ecclesiarum gubernacula, vi, gratia, precibus, arripere, quas postea vel misere evertant vel ad saxa scopulosque appellant? Ac ne illud quidem verum est, Episcopatum, otio, pacis diuturnitate in Republica Christiana, confirmato, non esse amplius illis fluctibus, quibus pæne antea mergebatur, objectum, sed periculis omnibus liberum, rem quandam esse in medio positam, & industriæ singulorum accommodatam. Etenim, quantumvis veterum sanctorum virorum, quos jam antea nominavi, sapientia atque virtute, ita fractæ ac debilitatæ

sint

sint impiorum vires atque potentia, ut jam nullum ab illis tam acerbum diuturnumque bellum expectari posse videatur; tamen, non solum reliqui fere omnes manent in præsentia labores atque molestiæ, quæ clarissimos illos homines deterrebant, sed alia etiam addita sunt illis multo graviora impedimenta, quæ currentem retardare, & à proposito susceptoque consilio revocare, vel maxime possint. Nam, quo plus Ecclesia periculis & metu magna ex parte levata est, eo amplioribus divitiis atque opibus est aucta: quæ quum sint pronis ingeniis maxima ad ignaviam atque ad luxuriam incitamenta, verendum est inmaxime, ne fortissimum quemque & severissimum, à labore & continentia, ad otium voluptatemque traducant. Ergo deinde corrupti hominum mores, his præsertim temporibus, prolapsi corruerunt, ut, qui refrenandos coercendosque suscepit, sibi omnium difficillimam provinciam procurasse censeatur. Quæ si cui parva & contemnenda videantur, Deoque bene juvante, veterem in novum statum continentiam ipse proferre se posse confidat, & nefarios sceleratorum hominum impetus cohibere, quis regimen animarum, quod nunquam ab Episcopali vigilia sejungitur, quodque primum in eo munere spectatur, arduum omniumque difficillimum negotium non esse arbitretur? Aspice multorum patrem natorem, in quantas volvatur assidue sollicitudines, ita ut, distracto in varias curas atque multiplices animo, quæta nunquam mente consistat, & accelerantibus senectutis incommoda molestiis, adhuc juvenis, consenescat: & quisquam poterit occupationes & curas Episcopales, quasi leves & nullius operis, contemnere? quibus si totas, nec ideo suffecturas ponderi, vires obrulerit, adeo earum magnitudine premi se sentiet, ut onus Ætna gravius sustinere se dixerit. Etenim Episcopo tot sunt liberi, quot subjecti; quibus singulis debet, si probus atque perfectus est, celestium epularum alimenta suppeditare, & virtutum ornamenta comparare; ita semper anxio vigilique intentus animo sit necesse est, ut, somnum rporantibus sollicitudinibus, nullam partem quietis capere queat. Quis unquam illam maximam atque incredibilem vigilantiam, qua excubare debet animo Episcopus, muneris, quod

quod affectat, præstare se posse polliceatur? Nam, si in Principe vitium vel maximum est, qui, quum unus re omnia gubernet, tot undique curis afficitur, non ad multam noctem vigilare; quod dormienti Agamemnuoni sapienter in somniis Homericus ille Nestor objecit: quanto id magis turpe erit in Episcopo, qui non quidquam aliud est, si interpretari velis, nisi Christi gregis observator, speculator, explorator, & custos? cui non jam propter se ipsum, sed propter illos quos conservandos suscepit, suspicione metuque suspenso, in perpetua quadam quasi precationum assiduorum vigilia manendum est; cui insolita illa atque inusitata amantis Iacob vigilantia sollicitudoque, gregi Laban exhibita, Christi ovibus protegendis æmulanda est. Ponite vobis ante oculos, summam ac pæne incredibilem illius in frigore & fame & siti ac vigiliis perferendis patientiam, in laboribus sustinendis tolerantiam, ac perpetuam in proposito susceptoque consilio fortitudinem atque constantiam. videor mihi illum videre, dies noctesque concursantem, semper excubantem animo simul & corpore, nec partem ullam capientem quietis, & modo canes in venientes feras immittere, captas modo oves ex luporum faucibus eripere, modo eas ad pascua ducere, aut pastas inde reducere, nulla detrectare pericula, nullo labore terreri. Quæ si tibi, desidi & negligenti, iuaudita fortasse & tuas longe vires superantia videbuntur; jam, quoniam te esse hominibus inferiorem agnoscis, diligentissimas vigilum canum excubias intuere, obstupescere, admirare: neque, quum te similem quadrupedibus vitio tuo reddideris, pigeat ab iisdem discere, quod tibi prodesse aliqua ratione possit. inspice, quantâ sit, in custodiendo grege, fide, vigilantia, ne præsentia sua illum desertum esse patiantur, cunctisque sopore torpentibus acres noctu vigilias agitent, nec prætereuntium modo strepitu audito, sed quovis etiam spirantis auræ sibilo percepto, latrent, venientes fures luposque significant, insectentur, comprehendant. Multo magis providi diligentesque animarum pastores adesse semper, vigilare, nascentes hominum cupiditates infringere, & ab ovili circumquaque frementes lupos arcere, debent; neque solum, quum peccaverint

homines,

homines, vel fures advenerint, clamare, sed, quum verisimile erit eos peccasse, vel fures adventasse, etiam in suspicione, latrare. at si à tuis ovibus punctum quidem temporis oculos dejeceris, certo scias, à dæmonum eas, quasi rugientium leonum, turmis invadendas. Verum, quum à Dæmone hæc tam pestifera tibi tui gregis deferendi cogitatio injecta est, nonne subiit illico admirabilis illa canum sollicitudo atque solertia? nonne tunc pudet te, hominem, rationis participem, quemque ad consilium omnia, non ad appetitum, referre par esset, in tuo munere, in tua vigilia, in conservandis iis, quos Deus, velut in arce tutissima, in tuis posuit manibus, quorum spiritus ex te pendet, à bestiis, à canibus, rationis expertibus, longo intervallo superari? Iam vero, quis illam summam atque exquisitam rerum ac disciplinarum omnium notitiam, quæ una vel maxime, mole ruentem sua sustentat Episcopum, velut inane quiddam ac leve irridere valeat, ac pro nihilo putare? Si nemo ad Persarum imperii magnitudinem aspirare posse putabatur, qui non Magorum disciplinam ante percepisset, nos illos hoc fastigio dignos arbitrabimur, qui numquam fere sint in bonarum artium studiis doctrinisque versati? in quibus, & ad extirpandas falsas de rebus divinis opiniones, summa sacrarum literarum scientia, singularis occultissimorum mysteriorum & à communi sensu abhorrentium notitia, requiritur, & ad populos regendos perfecta juris legumque pericia, & plurima rerum humanarum cognitio atque experientia, necessaria est. Tolle è mundo hunc, qui omnia collustrat, solem; nonne, luce detracta, pulcherrimum etiam hunc rerum aspectum oculis mortalium eripi subito dixeris? Sic etiam in Episcopo multarum ornamenta virtutum jaceant in tenebris necesse est, nisi literarum lumen accendat. Quis demum summam illam sapientiam, ac prope divinam, qua non plurimorum privatorum modo sed universæ Christianæ Reipublicæ salutem maxime contineri statuo, & de qua nunc breviter, omiſſis ceteris, dicturi sumus, non sine gravissima temeritatis culpa sibi vendicare audeat, aut potius arrogare? Quum enim Episcoporum labor & industria copræsertim referenda sit, ut, quos regendos susceperint, eisdem

eosdem ad Dei cultum, ad veram Christi imitationem, ad modestiam, mansuetudinem, ceterasque virtutes, erudiant; profecto nefas erit, quemquam, veluti tantæ moli imparem, tantum onus non modo subire, sed impuras etiam illi manus admoveere, qui non in unoquoque virtutis genere præstantissimus revera sit & habeatur. Nam, quum actiones unusquisque suas ad illorum instituat & moderetur exemplum, quos imitandos sibi proposuerit, quis repente non videat eum in id injustitiæ genus esse illapsurum, in quod eos irrepsisse norit quos imitatur? Sunt mores hominum animique illi quidem per se asperi, & flexuosis tortuosisque quasi angulis inæquales; Præsum tamen justitia, temperantia, ceterisque virtutibus, adæquandi. at, si, perversos improbosque morum & disciplinæ magistros adepti, ad illorum sese rationem accommodaverint; non suis modo exæquatis asperitatibus, & ad boni æquique planitiem redactis, quam par est æquabilitatem non consequentur, sed illorum insuper iniquitatibus inflexionibusque etiam atque etiam detorquebuntur. Perspicuum est enim. tales fore semper lineas, qualis erit regula ad cuius normam diriguntur. Quis enim non putet, impurissimum semper eum & scelestissimum evasurum, ad cuius improbam perversamque naturam accesserit etiam disciplina? quis illum existimet vitia radicitus evulsurum, qui eadem exemplis illo ipso tempore aluerit, confirmaverit, auxerit? Vt præclare dixerit Plato, non ante humanum genus peccandi finem facturum, & eam, quæ ex conscientia recte factorum exoritur, beatitatem consecuturum, quam Principes, à quibus gubernantur, totos se ad Philosophiæ studium contulerint. Quum enim illam, quam sibi ipsi unusquisque votis omnibus exoptat, felicitatem, non in pecuniarum copia, non in voluptatum illecebris, non in splendore imperii & gloria, non in opum magnitudine atque potentia, consistere, sapientissimus quisque censuerit, quod hæc imbecilla & commutabilia, eisque, à quibus possidentur, luctui sæpe sint atque dedecori, sed eam vere sitam esse in imperando cupiditatibus, & recte honesteque vivendo; nequaquam, singulari sapientia vir, dubitandum esse duxit, si princeps animum ad Philosophiam adjecisset, quin posset

posset illico , languentem labentemque populum , vel ad idem sapientiæ studium excitare , vel à consuetudine peccandi deducere. Quid ? nonne in xij tabulis scripta est lex illa prope divinitus , qua senatorum & magistratum ordo jubetur vitio carere , & ceteris specimen esse virtutis ? Intellexerunt nimirum viri omnium prudentissimi , talem semper statum civitatis futurum , quales principes essent civitatis. Quid est deinde , tur non existimemus , rem tantam , ac prope divinam , egregium quendam hominem atque admirandum efflagitare , qui hoc unum opus , ut ita dicam , noctes & dies urgeat , ut , vitiis radicitus extirpatis , singulorum animi , in omni virtutis genere , omni ex parte perfecti exornatique reddantur ; ut sapienter , æque ac cetera , Salvator hominum Christus salem dixerit terræ discipulos suos , quum sui eos officii admoneret : ut nimirum ii , quos omnium sibi regnorum & provinciarum Episcopos elegerat , intelligerent , quam arduam difficilemque provinciam sustinerent. Nam , ut cibi sale condiuntur , ne putrescant , vel ut sint ad gustum per jucundi , ita delicati mores hominum , Episcoporum doctrina , sapientia , probitate quodammodo saliantur , ne vitiorum corruptelis depraventur , iisdemque , maximarum virtutum quasi conditione perfectis , cæleste illud beatorum animorum convivium exorneretur. Atque ut convivii dominus , quum cibos non bene conditos rejecit à mensa , cœnarum artificis , eive ad quem id ministerium videatur pertinere , succenset ; ita Deus , communicata peccantis cum Episcopo noxa , tanquam in autorem delicti , implacabili contra illum exardescet iracundia , quoties sua desidia atque inertia , è sibi subjectis aliquem , sceleribus atque flagitiis coopertum , sempiterni supplicii poena multari contigerit. Sed inter plurima eaque gravissima detrimenta , rebus publicis per pravos antistites importata , præcipue hæc à Gregorio enumerantur. ait enim primum ; quod si , repetitis memoria , non solum inde usque ab Ecclesiæ Christianæ primordiis sed etiam à primis mundi nascentis incunabulis , plagis omnibus gravissimis , à Deo regnis & civitatibus inflictis , divinæ animadversionis origo atque principium investigetur , eandem semper ab illis , tanquam à suis fontibus emanantia flumi-

na ,

na, descendisse reperietur. Quam itaque justus ille iudex Deus, graves & acerbis à nobis scelerum poenas reprensens, eluvione, pestilentia, vastitate, bello, ac seditionibus, humanum genus afflixerit; præcipuam publicæ populorum calamitatis originem, Episcoporum ignavia ac negligentia referendam plerumque esse, ex Gregorij sententia, quis dubitet? quibus cum ea demandata sint partes, ut piis nos Deo precibus & sacrificiis conciliatos, ex imminetibus suppliciis eripiant; si à suo munere eo tempore destiterint, quis non videat, fore ut illico, Præsulum patrociniis destituti, scelerum poenas Deo repetenti justas debitasque persolvamus? Quoties Deus populum Israël, gravissimis calamitatibus afflictum, nec tamen resipiscensem, funditus delere constituerat? quod certe perfecisset, nisi Moyses, summa ope atque ingenti studio, populi defensione suscepta, ad Deum supplex orasset, ut aut veniam populo daret aut sibi vitam eriperet; quasi furentis impetum cohibuisset, & graviter in sententia permanentem, à suscepto consilio discedere quodammodo coëgisset? Quem sane eximia illa ac propè divina Pauli caritas adversus eos, quos ad Christi fidem adjunxerat, maximam in admirationem non impellat, qua adeo amantis animus destagavit, ut omnem doloris & acerbis sensum excurrente membris incendio, non modo ultima pro illis sese passurum affirmaverit, sed ut mortifera ab illis Anathematis pestis averteretur, Christi exemplo, quem ipse tantopere imitari studebat, eundem in se transferri, constanti voluntate concupierit? Sic se profecto res habet, ut, nisi secundis Præsulum deprecationibus cohibeatur, divina fere sit, propter hominum immania facinora, implacabilis iracundia. Quare tibi, quem Deus ex hac communi nostra humilitate detractum in proximum sibi in terris locum evexit, ut ceteris propinquior, auxilium ab illo imploraturus, præsentia populi tui pericula sibi omnia deferas, & imminetium malorum felicem quæras eventum; tibi, inquam, exonerata peccatorum mole conscientia tua, & reconciliata tibi ipsi Numinis voluntate, pax est à Deo pro tuis ovibus exquirenda; jam non est amplius tuis tibi commodis consulendum, sed omnibus animi oblectationibus

nibus nuncius remittendus; risus, cantus, omnisque inanis abjicienda lætitia: sed, ut singulorum universorumque peccata deplores, luctus, moeror suscipiendus est, & perpetuis lacrimarum fontibus deductis, animabus, quæ tuæ sunt fidei creditæ, illuvie peccatorum æternisque sordibus squalidis, salutaris quasi lavatio præparanda est, precibus lacrimis ira cælestis propulsanda; his armis nostra causa tutanda, hac vi irruentia in nos mala inhibenda; nullus est tibi dies, nulla hora, tot curis urgentibus, non ad voluptatem modo, sed ne ad quietem quidem (prope dicam) concedenda. Nec mirum: magna res agitur; tua enim ac nostra salus in te uno sita est, tecum una periclitatur; si ruas ipse ad interitum, eos etiam, qui imperium nutumque sequuntur tuum, trahis in casum. quisquis nostrum perit, tuo maximo damno perit: tu pariter unus communis culpæ reus substitueris; prope uni tibi tanta jactura tribuitur. Vide igitur, si cessaveris, si à precibus, si à lacrimis, si à sacrificiis jejuniisque destiteris, quid misero tibi, quid nobis omnibus, futurum sit. Age vero, alterum etiam damnum, quod pernicioso Episcoporum exemplo Christiana Respublica contrahit, cognoscamus; quod sane non est superiore aut minus grave aut minus acerbum. Vetus Diabolo mos est, quemadmodum spiritales viri, qui cum illo sæpius conflixere, testantur, ut fere non se nobis palam inimicum esse profiteatur, neque provocatos ad pugnam aperto æquoque loco cominus aggrediatur, sed ex occulto & de insidiis per occasionem adortos, acerrime infestis tentationum telis invadat. Quum enim se nobis, auxiliis de cælo comparatis, robustioribus longe viribus imparem esse sentiat, minime veretur, quin, si infirmissimo etiam cuique occurrerit, ea vi repellatur, ut protinus cedere pedemque referre cogatur: itaque in genus humanum hac sæpe via grassatus est, ut mortalium plerosque funesta clade depresserit. Verum, ex multis ad nos decipiendum idoneis opportunitatibus, nullam avidius arripit, quam eam, cum Episcopos, ad otium voluptatemque conversos, in aliquod vitium delapsos animadvertit: imo, nulla Dæmonum ope ac ministerio persæpe contingit, ut, quæ illi vitia conceperint, eadem per se ipsa in om-

in omnes infundant. nam, quemadmodum exceptum ore venenum se statim in cor recipit, & venis inde contractum, in omnes sese corporis partes illico diffundit; ita, ubi scelus est imperantis animo conceptum, tanquam diluta venenis potio, in vulgus, velut in corpus, illabitur, serpensque per omnium propemodum pervadit animos, & probos illorum mores sanctissimosque corrumpit. Quid enim tam deforme reperiri potest, quam illos, quorum exemplo atque virtute, ex iis quibus obstringimur, vitiorum laqueis, exolvi nos oporteret, iisdem turpiter ipsos obligari? Quid tam foedum existere, quam illos ipsos, quorum integritate vitæ & innocentia, effrenatæ cupiditates hominum contineri deberent, in aliqua libidine se totos effundere? Quid constantiæ tam contrarium inveniri, quam, institutionibus atque præceptis, se virtutis amicum & vitiorum hostem profiteri, moribus autem cum istis conjunctissime vivere, & vero cum illa acerrimum crudelissimumque bellum suscepisse? Quid magis illa oratione ridiculum excogitari, cujus mira sit cum dicentis vita incredibilisque dissensio? Qua fronte, quo vultu, aliorum frangere libidines audebunt, qui cupiditatibus iisdem teneantur? Quo animo, qua mente, de contemnenda gloria, & de rerum humanarum despicientia, verba facturi sunt, quorum animos insatiabilis & infinita illa honorum & divitiarum cupiditas excecavit? Quid, si permulta sunt crimina, quorum tanta cum illo, quem persequeris, societate copuleris, ut reo non minus perditus ac nocens videaris? quid facies? idne alteri objicies, quod multo in te gravius retorqueri atque conjici possit? idne alteri crimini dabis, in quo te turpiter versari illo eodem tempore arguaris? audebis ita alterius demonstrare peccata, ut tua quo minus indices recusare possis? Tunc (dicat fortasse quispiam, etiamsi honestati non convenienter, satis tamen ad rei veritatem apposite,) tunc me, inquam, tanta vocis contentione, & verborum gravitate majori, ad virtutis amorem inflammare, & ad temperantiæ studium excitare conaris, quum omnis apud te prorsus temperantia jaceat, omnisque propemodum virtus extincta sit? sperasne, aliquid momenti orationem tuam ad impellendas, quo velis, voluntates,

aut unde velis deducendas, habituram, quum tua impurissima vita, inquinatissimique mores, quaecumque doceas, evertant? putasne, speciosissimas illas tuas rationes, quibus persuadere mihi conaris, ingenti alacritate, ardentissimo studio, infinito assiduoque labore virtutem esse amplectendam, apud me plurimum valituras, quas à te non verbis sed re ipsa, non contrariis sententiis sed factis, non modo contemni sed etiam infringi & labefactari conspiciam? Talem ipsum te antea præsta, qualem me esse vel maxime cupis. Vis, me ad tuæ admonitionis præscriptum morès meos accommodare? tuos ante ad tuorum normam præceptorum informa. Quascumq; tu mihi leges imposueris, tute easdem subire ne recuses. Ut enim currentis equi impetum reprimere non facile poteris, si eundem summa corporis & vocis contentione, laxatis habenis admotisque calcaribus, ad cursum concitaveris: ita neque, ferocitate exultantes, longiusque evagantes animos intra recti terminos continueris, quos exemplis, quibusvis stimulis acutioribus, incitatos ad peccandum incenderis. Si quid avaræ, libidinose, vel crudeliter factum à viro religioso intelligeres, nonne subito armari jura gladio imperares? nonne parum, in poenam improbitati illius & audaciæ, putares esse omnes omnium suppliciorum acerbitates, vel quidquid tormentorum summa tyranni alicujus excogitavit immanitas? Si igitur tam severe in illo scelus aliquod vindicandum esse censerēs, cui non est aliud quippiam in vita propositum, quam eniti atque contendere, quam maxime possit, ut summam perfecti viri laudem consequatur; credis tibi homines temperaturos? putasne, tibi defensionem ullam patrocinatorum, quo minus communi judicio condemneris, si non modo, in avaritia atque libidine, indomitas cupiditates atque effrenatas habueris, verum etiam, si in aliquo ejusmodi vitiorum genere vel minimum à religione officii declinaris? quum non tibi jam, communi voluntate virtutis & officii, recte sit honesteque vivendum, sed ea magis ratione, quod, propter singularem opinionem sanctitatis & innocentiae, tamquam arcem perfectionis quandam, tot virtutum præsidio tantoque comitatu, tenere te vulgus existimat, quorum inde non modo viribus atque poten-

poten-

ANNO 1771
MAY 10
1771

potentia, verum etiam conspectu signorum & armorum, effuse invehens sese vitiorum agmen propulsetur. Atque adeo verum est, animarum pastores divina pæne virtute & omnibus numeris absoluta egere sapientia, ut, quæ vitia in privatis hominibus, quasi in obscuro delitescen-
tibus, tolerari soleant, & probabili plerumque excusa-
tione defendi, eadem, quum insunt in Episcopo, intole-
rabilia, & omni prorsus indigna defensione judicentur.
Quis est enim tam iniquus adversus nos iudex, qui, si
quid iracundia nos privati deliquerimus, addo etiam, si
ea nimium elati longe modum exceßerimus, propter de-
pravatæ naturæ conditionem non id nobis condonandum
putet? At nullus ita indulgenti erit animo, qui Episcopo,
effervescentis iræ impetum non cohibenti, ignoscendum
existimet? Scilicet, iracundiæ vitium ejus aggravante
fortuna, & in superbiam crudelitatemque vertente, quum,
modum hominis excedens, omni prorsus fere etiam su-
pra humanæ naturæ vires debeat animi perturbatione
carere. Fabulati sunt Poëtæ, tanta proceritate è terra
montem excrescere, ut propter immensam pene altitudi-
nem, qua cælo finitimus videtur, Olympum vocaverint;
in cujus cacumine tamen latera nubibus, ventis, imbri-
bus, ceterisque tempestatibus assidue pulsantur, tanta
semper est quies, ut, quas in pulvere vel in cinere notas
insculpseris, easdem longo intervallo, eodem revertens,
integras illibatasque reperiās. Eadem plane ratione tan-
tam debet Episcopus, qui apex est hominum, omnibus in
rebus tranquillitatem constantiamque servare, ut, cum
illa pars animi, quæ rationis est expers, digladiantium in-
ter se cupiditatum conflictu verberetur, nunquam illa, in
qua quum ratio insit, est altera excelsior atque sublimior,
perturbationum vi motuque perculsa frangatur, & opti-
mæ ac salutares in ea leges inscriptæ, gratia, metu, cupi-
ditate, aliisque animi motibus deleantur. Quid enim aut
turpius fieri aut dici potest, quam illos, qui hanc perso-
nam susceperint, ut ira laborantibus succurrant, ægris
cupiditatum morbo medeantur, gravibus vitiorum one-
ribus profligatos extollant, quive quasi montium, nubes
excedentium, cacumina, aut editæ in mari rupes, vim
ventorum tempestatumque, infra se furentium, vel eo-



rum infima verberantes undas aspiciant, eosdem inquam cupiditatum æstus, sicut cæteros, sentire, totosque perturbationum fluctibus operiri, denique in ira, cupiditate, ita labi, ut aliis miserandi, aliis irridendi, aliis etiam omni supplicio digni esse videantur? At incidunt sæpe tempora, quum objurgationes suscipiendæ sunt, & improbi ac facinorosi, nisi dicto audientes sint, Ecclesiasticis etiam censuris & poenis persequendi. sed omnibus animi moribus ita vacandum est, ne aut ira existat aut odium, aut acerbitas aliqua in castigando objurgandoque appareat; atque adeo in universum, non tam præceptis ad severitatem, quam propensus ad misericordiam esse debet; à qua non est sine gravi causa discedendum. Quapropter sapienter facturos eos existimo, qui, in hoc genere castigandi, medicorum consuetudinem sibi imitandam duxerint, qui, quoties alia spes reliqua est, nunquam ad urendum vel secandum accedunt. Quid enim tam periculosum est, quid saluti magis contrarium, quam, quum relictus est lenitati locus, objurgationes ceteraque acriora remedia ægrotis animis adhibere? Nam ita difficile est viro, prudentia quantumvis prædito, ubi objurgationis acerbitate velut aculeis quibusdam fodicatur, ira non efferrî, vel, quum contumeliarum quasi facibus aduritur, non exterreri, ut fieri vix potest, læsum quempiam tacere, quum doleat. At eo, inquit, nos necessitas adduxit, ut omnino expediat, objurgationibus uti. Veruntamen, quoniam multa ad objurgantis similitudinem à medicorum arte sumuntur, ad illorum mediocritatem temperantiamque referenda esse omnia arbitrarer. nam, quemadmodum illi, in iis medicatis potionibus, quas pharmaca vocant, non amaros tantummodo liquores infundunt, sed saporis etiam dulcissimos instillant, quibus haustis id, quod est etiam amarum, quodque est per se ipsum reformidandum, absorbeatur: sic castigationis asperitas ita est clementiæ lenitate temperanda, ut ejus lenocinio libenter etiam illud ipsum, quod acerbitatis habet objurgatio, suscipiatur. Quod in cælesti illo animarum medico optime licet contemplari: qui, cum agræ illius Samaritanæ mulieris sanandæ partes suscepisset, non est illico, quum posset, in impudicos ejus mores invecus; sed, suavitate sermo-

sermonis, quasi castigationis amaritudinem permulcens, eo illam adduxit, ut palam ultro errorem suum ipsam fateri coegerit. At videte, quanto hæc artificio conflata sit & constet oratio. *Bene dixisti, quia non habeo virum; quinque enim viros habuisti; & quem nunc habes, non est tuus vir.* Scilicet, quam prius, tamquam veritatis amantem, laudaverat, eandem, ut parum honeste pudicitiam habentem, reprehendit. Sed ut eo, unde digressi sumus, aliquando revertamur; quid est ad humanam societatem tuendam accommodatius, quid aptius ad conciliandos inter se hominum animos, quid ad relaxandos utilius, quam quum amicis crebra convivium? maxime si nec profusa nec immoderata sint. at hæc sunt, autore Gregorio, Episcopis interdicta. Quod si, quæcunque sacrarum litterarum monumentis consignantur, ita sunt divino spiritu quasi succo repleta, ut, sub narrationum corticibus, plurima spiritalia sensa, quasi medullæ, contineantur, ita frugifera & fructuosa, ut exinde non modo valeat antiquitatis memoria & rerum gestarum ordo teneri, sed plurima etiam possint ad Christianam vitam nobis necessaria documenta depromi; profecto, quid aliud Spiritum sanctum voluisse putamus, quum uequissimum humani generis hostem filios Iob, viri sanctissimi, in fratris domo natu maximi, nec splendida nec lautissima convivium celebrautes, ædium ruina oppressos, necavisse prodiderit? nisi, nos cautos providosque Dæmonis astutiæ & calliditatis efficere, qui nullam sibi æque idoneam facultatem ad hominum subditorum animos, perturbationum pondere, confringendos necandosque oblatam existimat, atque illam, quum præfectos illorum, luxui se & inertiae dedidisse animadvertit. At enim, quid arctam tantaque religione adstrictam Episcopi vitam amplius contrahis, in angustumque deducis, ut illi, tanquam iniquus iudex, hisce animi oblectationibus, jure omnibus concessis, interdictum esse velis? nonne Basilium, Nazianzenum, aliosque quam plurimos, amicorum inire convivium olim solitos fuisse, accepimus? nonne homines, etiamsi curarum plenissimi, etiamsi occupatissimi sint, tamen, si homines sunt, interdum animis relaxari oportet? Equidem, Episcopos gravissimos atque

sanctissimos, modicis interdum conviviiis usos, non negaverim; sed eadem ita rara, ita imoderata erant, ita cum honestatis ratione conjuncta, ut non tam essent libidinis, luxuriæ, intemperantiæ testimonium, quam modestiæ, parsiimoniæ, frugalitatis exemplum. Quæ divinitus in illis dicebantur, quæ cogitabantur, quæ sapienter tractabantur? sacrorum mysteriorum arcana, obscuritate, quasi tenebris, obducta, illustrabantur; multa adversus hæreticos copiose & erudite disputabantur; ad illud cæleste convivium, ubi beati deliciis sempiternis perfruuntur, mente & cogitatione ipsa rapiebantur: ita ut non tam corpora escis reficerentur, quam animi spiritalibus colloquiis, & cælestium rerum cogitationibus, alerentur. Quod vero minimæ etiam noxæ, & levissima Episcopi delicta, optimum civitatis statum labefactare, omnemque sanctiorem morum disciplinam evertere queant; res est consideranti non obscura. nam, quum debeant, vitæ asperitate & sanctimonia, naturalem humanæ cupiditatis quasi impetum cohibere, eidemque, conanti prorumpere, undequaque eruptionis iter intercludere; si quem illi aditum, pristinæ illius innocentie & austeritatis remissione, quanvis angustum, ipsos aperire contigerit, futurum est, totus ut illico, summa vi summoque conatu, ruptis fere undique impedimentis omnibus, erumpat; ea plane ratione, ac si è molibus, in amnium ripis ad coercendos fluctus extructis, exiguus licet lapis detrahatur, quis non videt, illos quantumvis ingentes, saxorum lignorumve oppositu diu retentos ac retardatos, aperta ad effluendum via, acrius, quam si libero cursu mearent, evasuros, & circumjectos undequaque campos magno strepitu aquarum inundaturos? quæ deinde eadem magnis validisque aggeribus contineri; aut aliorum averti vix poterunt. Iam vero, quid est corruptis Præsulum moribus, ad irritandas illicitasque immodicas voluptates, accommodatius? Quid ita? quod cum vita illorum in conspectu populi ita posita sit, ut, tanquam excelso atque illustri sita loco, oculos omnium nihilo magis effugiat, quam impositum candelabro lumen, vel urbs in summo montis cacumine collocata, idque sibi imperite hominum multitudo, quasi suo jure, vindicet, in quod,

tanquam

tanquam in possessionem suam, eos irruisse, qui imperant, suspicantur, & natura sic se habeat, ut vitiis facilius, quam virtutibus, mortalis animus imbuatur. ex his efficitur, ut Pontificum cupiditatibus, quasi morbo, tota civitas inficiatur. Sed, sit ita sane ut narras; appetitum, inquires, libidinis meum, & inquibatam vitiorum sordibus vitam, mortalium aspectui subductam, simulationum latebris atque recessibus abscondere & occultare quid me prohibebit? Tua te scelera prohibebunt, tui te corrupti mores indicabunt, tua ipsa flagitia, suis ex latibulis in apertum prodeuntia, se non modo in animis aliquorum, sed etiam in oculis conspectuque omnium exponent. Putasne, facile tibi futurum, in potestatibus temperare, quum in privata vita luxuria omnique intemperantia difflexeris? Quid est profecto, ad cupiditates hominum illustrandas palamque faciendas, instructius, quam publica munera? Nam, dum in privata vitæ quasi tenebris delitescit, facile est, sua cuique vitia suppressere: ubi vero in editissimo fastigio, ut luceat omnibus, collocatur, sic se ipsa prodant necesse est, ut ex eo simulationis specu, in quo se occuluerant, erumpentia, omnium oculis luce clarius conspiciantur. Immo vero, ut perdifficile est, perito quantumvis homini, cognoscere, utrum vitiosa sit amphora, antequam humore aliquo repleatur, quo per rimas egrediente, quidquid insit in ea vitii, significetur: ita etiam cupiditates eousque nostras facile dissimulaverimus, donec illa, quam magistratu vel honore nacti erimus auctoritatem atque licentiam, per pravæ alicujus consuetudinis quasi hiatus quosdam, dilabatur. Quare hoc sæpe usu venire solet, ut, quæ mala ab Episcopo in vulgus emanarunt, quæque ab initio minima ac tenuissima videbantur, ita paulatim, parvis hisce initiis orta, peccandi consuetudine corroborentur & crescant, ut maxima ac validissima, nescio quo pacto, brevi temporis spatio efficiantur. Si enim è summo illorum montium fastigio, quos perpetuis obsitos nivibus intuemur, parvus nivium globus, vi ventorum evulsus, ad ima decucurrerit, adeo, dum deorsum præcipiti fere lapsu devolvitur, multarum collectione nivium excrescit, ut, antea quam ad montis radices devenerit, in immensum prope orbem



conglobetur : ita etiam, quodcunque in Episcopo vitium extiterit, cujus dignitatis celsitudo, pane in immensum evecta, ceteris omnibus humanis honorum gradibus infra ejus fastigium subsidentibus, eminent, ad inferiores repente descendit, & tum usu & exercitatione, tum etiam quia vulgus inolescere per licentiam solet, ita in dies ingravescit, ut ex parvo tolerabilique maximum ac plane intolerandum evadat. Quid potest nebula rarius quidve subtilius inveniri, quæ toto diffusa cælo, & ad veli similitudinem extensa; dispergitur? aut quis non illam ad arbores fructusque recreandos immissam potius arbitraretur, quod sit illi tanta cum rore pruinaque similitudo, ut nihil præter humorem continere videatur? ea tamen natura prædita est, ut, quasi abditis inclusisque sub contrariæ naturæ specie ignibus, frugibus & fructibus, depravando vel exiccando, plurimum possit obesse. Ita etiam, quum frequentibus ludis conviviisque delectatur Episcopus, ut nihil aliud, præter animi oblectationem honestam, quæsisse videatur; iisdem tamen non sine magna pernicie populorum utetur. Vt enim terræ sterilitas sive fecunditas cælo accepta refertur; nam, maturis imbribus mollita, & solibus tepesacta tempestivis, magno semper cum fœnore reddet quod acceperit; at contra, si perpetuis tempestatibus obrueretur, vel de cælo tangeretur, non modo fructus nullos procrearet, sed illico ipsius quoque terræ deflagratio atque extinctio consequeretur: ita uberes seu steriles animorum fructus Episcopo jure erunt optimo tribuendi, qui cum cælo non incommode æquiparatur à Gregorio, quod non solum, deletis prorsus ex animo rerum fluxarum imaginibus, totus debeat in cælestium bonorum cogitatione defixus hætere, sed etiam, sicuti cælum, quod cuncta, quæ infra ipsum sunt, sua luce lustrat & complet, erroris & ignorantie tenebras suo lumine discussurus, clarissimum quasi jubar doctrinæ sanctitatisque præferre. Moyses, ille summus Hebræorum Antistes, quum Sacerdotes & populum Israël universum ad concionem advocasset; quibus aut Dei voluntatem aperiret, aut obfirmatas in scelera voluntates, constitutarum improbis poenarum formidine, ad virtutem permo-

permoveret ac flecteret : *Attende calum*, inquit, & lo-
quar ; & *audiat terra verba oris mei*. Quid enim , ait
Gregorius , per calum nisi Sacerdotalis ordo , quid per
terram , nisi reliqua civium multitudo , designatur ? Qua-
re , quidquid inerit in Episcopo vitii , id ab ipso , veluti è
cælo , in populum , tanquam in aliquas terras , delabi ne-
cesse est , quo universus corrumpatur . Maximum illud
invidiæ , quo Christus conflagravit , incendium , quod
nec suo ipsius sanguine potuit nec ipsa morte restingui ,
quid aliud profecto , præterquam impius Iudæorum fu-
ror , excitavit , Sacerdotum & Phariseorum furoribus in-
flammatum ? qui tentatis rebus omnibus , ubi spes cunctas
conspicari sunt in irritum vertere , nihil æque efficax ad
vulgi odium concitandum invenere , atque suæ impieta-
tis exemplum . Quid enim aliud impia vox illa significa-
vit , *Numquid aliquis ex principibus credidit in eum , aut ex*
Phariseis ? sed turba hæc , quæ non novit legem , maledicti
sunt ; nisi , quocumque illi incubuerint , quorum dignitate
& autoritate , sacrarum litterarum notitia & divinæ le-
gis scientia sustineatur , eodem ceteros inclinare necesse
esse , quoque illi , quos sibi morum magistros depoposce-
runt , vitæ duces acclamaverint , arcanorum mysteriorum
interpretes elegerint , iverint , contenderint , vela pande-
runt , eo sese cunctis incitato studio conferendum esse , ad-
mirabili consensu conspirandum , ac prope constata vo-
luntate velificandum ? Quasi iis , qui insolita illa ac pla-
ne pusillas humani ingenii vires excedente doctrina vi-
ctos se esse faterentur , ita responderint : Nos , qui in Syn-
agogis quasi clavum tenemus , ex Ecclesiæ navi dejectum
illum in turbulentissimos popularis invidiæ fluctus detur-
bavimus ; vos autem eodem , unde præcipitem eum ejeci-
mus , humeris reportatis ? nos , in obscuris abditisque le-
gis mysteriis illustrandis , divino quasi lumine perfusi , il-
lius doctrinam velut inanem , falsam , & Mosaicis san-
ctionibus contrariam , jamdudum explosimus ; quid vos ,
nulla scientia divinarum rerum exculti , nec ullis legis
præceptis imbuti , illam tantopere amplectimini ? nos ,
qui , Dei beneficio ac munere , tantam ejusdem effecto-
rum peritiam callemus , ut hic in terris nescio quid divi-
nitatis jam habere videamur , tanto ante denunciavimus ,
hæc

hæc Christi miracula non ab ipsa divinitate prodire, sed, diabolicis ex artibus manantia, mortalium, & maxime imperitorum, oculis illudere; quid vos, horum omnium ignari, has repente nugas ita vehementer admiramini? Vos perfidi legis antiquæ religionem vestro scelere violabatis, cujus vos tamen verbis defensores acerrimos profitebamini, vestra tamen plurimum à factis distabat oratio. vos miseros vestra illudit impietas, quos, tamquam si offusa oculis sempiterna nox esset, clarissima Christi divinitatis luce privavit. vestra temeritate atque superbia effectum est, ut, quod vos illustrare debebat lumen, illud à vobis tamquam ab indignis averteretur, totumque ad humiles atque abjectos homines effunderetur à patre luminum: ita ut cæca, ac perpetua caligine vestra obducta mens, non modo jam nulla fidei Christianæ mysteria perceperit, sed, qua prædita erat, rerum divinarum notitiam amiserit. Sed, quid ego his testibus utor, quasi res dubia aut obscura sit? Quorundam Episcoporum vita, libidinis & avaritiæ sordibus inquinata, tantam Christianis rebus plagam imposuit, quantam insequentes, liberalitate & temperantia, sanare per multa secula non potuerunt. Doleris, mortalium plurimos, varios in errores inductos? pravus induxit Episcopus. Ingemiscitis, regna atque nationes à fide, à religione, à veritate defecisse? eadem quoque Episcoporum culpa defecere. quæ, dissolutis suorum Antistitum moribus atque licentiæ, nimis pertinaciter infensæ, & ægre ferentes, ei se capiri subjecisse à quo in reliqua membra nihil nisi pestiferum illaberetur, absciderunt se ipsas à corpore Ecclesiæ, eique, per scelus & audaciam, impium atque nefarium bellum indixerunt. adeo ut Gregorius, cognomento Theologus, Præfulum vitia, mortalium animos tanquam venenis malis imbuentia, pestilentia & fullonum coloribus comparaverit: neque enim citius rudis aliquis pannus colore, quem combibèrit, infici, aut animantium corpora, pestilentis cæli aspiratione, furentis ac debacchantis morbi gravitatem in venis atque visceribus concipientia in mortiferam tabem incurrere, quam corrupti Pontificum mores in intimos animorum nostrorum sensus atque recessus penetrare, seseque infundere, soleant. Verum,

antiquus

antiquus humani generis hostis, ad impediendos Christianorum in solida virtute processus, nondum iisdem nos criminibus, quorum conscientia summo sacerdotio præditi constricti tenentur, obnoxios reddere studet, sed, ex ipsis pietatis actionibus, in delicta gravissima turpissimaque impellere flagitia non veretur. Etenim quum ceteris mortalium adhibenda sit quædam reverentia adversus homines, & curandum magnopere, quid unusquisque de se sentiat, tum haud scio an alicui magis, quam Episcopo: verum hoc ipsum, ut fere cetera omnia, quæ pertinent ad mores recte componendos, cautionibus quibusdam, quasi cancellis inclusum, retinetur: nam quotiescumque Christi gloria, & salus animarum, concurrere cum gloria & salute nostra videatur, subeunda nobis potius est qualibet vel acerba conditio, quam committendum, ut nostræ existimationis & incolumitatis ratio, quam divinæ gloriæ & proximorum utilitatis cura, nobis potior & carior fuisse videatur. Porritne quisquam sanctior vel innocentior Christo Domino reperiri? quem porro unum sacræ litteræ sanctitatis exemplar extitisse testantur, ejusque ope & auxilio cunctos, qui se in studio castitatis exercent, voluptatis illecebras & carnis incitamenta contemnere didicimus. deinde quibusnam divina illius virtus notior esse poterat atque perspectior, quam ipsis Apostolis? quibus quotidiano ejus convictu fruentibus, castissimos ejus mores, & virginalem illum oris pudorem, perpetuo contemplari licebat. unde postremo, misso tamquam in jam maturam messem divino gladio eloqui, uberores animarum fructus reportavit, quam ex Samaria, Samaritanæ illius mulieris ad Deum conversionis occasione? quum idem ipsæ Samariæ regiones Evangelium non repudiaturas, segeti spicis uberrimis, & annua maturitate albescentibus, confertæ comparaverit: magnam tamen Apostolorum animis insolitus ille cum muliercula congressus admirationem excitavit. Ex quo maxime id, quod diximus, emergit, debere Episcopum, quoad ejus fieri possit, & recta ratio patiatur, non modo crimen ipsum sed criminis etiam suspicionem effugere, quum eidem bene gesta, & summa cum animarum utilitate perfecta, nonnumquam vitio & culpæ tribuantur.

Quare

Quare, si sanctissimos viros, & optime de Christiana Republica meritos, dum maxime ad homines juvandos incumberent, in suspicionem perpetrati criminis venisse comperimus; profecto, quem nam tam dissoluto fore putamus animo, qui res atrocissimas omniumque suppliciorum gravitatem præponderantes, ab illis perpetrari cum videat, tacere ac negligere possit? quem porro tam durum & inhumanum, qui rei indignitate non exterreatur, quum illos, qui in suam se fidem, atque tutelam, unicam Christi sponsam recepiſſe jactantur, quam, propter hanc causam, uni viro virginem castam exhibere sese deberent, non modo impuris Christi hostibus omni flagitio violandam reliquiſſe, sed eandem ipsos, detractis ornamentis pulcherrimis quibusque, ceteris denudandam sive potius dilacerandam dedisse, animadverterit? Quæ quum Bernardo partim acerba & indigna, partim etiam intoleranda videantur, sic ex animi sui sensu atque dolore vociferatur: Cujus est illa pecuniæ vis ingens, cujus sunt locupletes illæ magnificæque domus, in urbium modum exstructæ, ebore auroque fulgentes, tabulis pictis signisque refertæ, quibus non modo ipsi, sed infimæ etiam sortis amici & familiares abundant, nisi sponsæ? quæ funditus bonis omnibus eversa, hæc illa tanta tamque præclara, ex ejus inculento patrimonio, tanquam è naufragio, collegerunt: tanta illa auri & argenti cælati, tanta gemmarum multitudo, tanta tapetium & conchyliatæ vestis & peristromatum copia, quantam potentissimorum Regum luxuria ex infinitis locis collectam coacervare una in domo vix posset; quid aliud est nisi sponsæ infelices ornatus miserandaque spolia, quæ nullo vestitû contecta, sed calamitatibus omnique miseriarum genere cooperta, illuvie & squallore obsita, contumelias & turpitudines omnes subire compellitur? tot illa varia & exquisita ciborum genera, quibus magnificæ illorum mentis complentur, cujus sumtibus nisi locupletissima sponsæ ejusdem dote comparantur? quæ, macie deformata, perpetuo cruciatu famis sitisque conficitur. nec sane quidquam excogitari potest acerbius, quam se in bonis Ecclesiæ ad virginum inopiam, ad viduarum solitudinem sublevandam, collatis, certos eorum administratores sumtuosius insolentius.

lentiusque jactare, illas vero miseras, de spe omnis prorsus humani præsidii dejectas, eorum opem implorare, ad fidem frustra confugere; hos patrimonia pauperum effundere, fortunas abligurire, illas orare ut vivere ipsorum misericordia liceat; hos in avaritia & cupiditatibus neque modum neque modestiam habere, Deum illas hominesque testari, suam sæpius concussam pollicitationibus impurissimorum hominum pudicitiam, nisi Ecclesiæ opibus sustineatur, labefactari; à quibus illis nimirum inmanissimis sumptibus, quos in muris parietibus, in stipitibus inanimis ornandis, quos in equis in canibus alendis, ut alios quibuscumque etiam bestiis scediores homines taceam, insumunt, tam indignum facinus averteretur. Sed, ceteris in rebus perfidi, in uno fideles esse reperiuntur; in omnibus sponsæ eversores crudelissimi, sunt tamen in uno, in suo scilicet jure persequendo, ejusdem pii atque optimi conservatores. nam, ubi primum ejus in bonis vestigium posuere, statim vetera illius altaris aut Ecclesiæ monumenta revolvere, aliis litern intendere, aliis negotium facessere, aliis possessionem adimere, ab illo prædium abjudicare, summo jure agere, æquitati, misericordiæ locum non esse; ut satius plerumque sit, inter sceleratos, inter barbaros homines, inter feras, ætatem degere, quam in hac istorum tanta immanitate versari. Denique, eo tandem miseriarum devotum esse, idem Bernardus affirmat, ut præclare de illa meritos esse eos arbitremur, qui, si, quam male negligenterque custodierint, non etiam eandem in ultimum discrimen & miserandam omnibus conditionem adduxerint. Quod si eloqui misera posset, non modo, ad suam tantam calamitatem deplorandam, durissima hominum corda compelleret, sed lapides ipsos flere quodammodo cogeret & lamentari. Me miseram, fortasse diceret, dum inops eram, dum parvis opibus & facultatibus prædita, benigne me omnes excipiebant, humaniter tractabant, in deliciis habebant; nec recusabat optimus quisque pro dignitate, pro salute mea, pro meis commodis, suam non modo operam, studium, & laborem impertire, verum ad pericula etiam accedere, inimicitias suscipere, omnes acerbitates, omnes dolores cruciatulque, perferre; omnium

nium denique rerum egentem nihil prorsus deficiebat ; jam vero, summis opibus auctam, ingentibus divitiis ornata, omnes boni repudiant, viri sanctissimi, ne contaminentur, reformidant : solum nescio qui (quo eos nomine appellem nescio) ubi me conspexere, ferociter propter prædam invadunt, oppugnant, spoliis causa vexant ; itaque pro se quisque trahentes, distractam dilaceratamque diripiunt, ut, in summa rerum omnium abundantia, vitam misere cogar in solitudine & egestate degere : & , quod acerbius videri debet, ipsæ meæ opes, tantas mihi facessunt injurias, mea ipsa commoda tanta hæc pericula creant ; quod sane si ii, qui me tot bonis locupletarunt, prospexissent, ea, tanto mihi luctui futura, flammis fortasse tradere maluissent. Quare mea omnia cuivis optima fide concesserim, iis æquo animo caruerim, ex omnibus rebus me ipsam nudam, nec præterea quidquam, exceperim, libenter aliena misericordia vixerim, dummodo omnia mea pristina commoda recuperem, vel certe tanta à me pericula injuriasque propulsem. Quapropter, ut omnis improbis viris eripiat, illius infantis vexandæ licentia, ita debet Episcopus, cui illa tamquam in matrimonio certo stabiliq; locanda est, in virtutibus omnibus præter ceteros excellere, ut qui non multis ab hinc annis arctiorem vitæ morumque disciplinam subierit, & in maximis summisque virtutibus comparandis plurimum operæ temporisque consumserit, non modo Episcopatum debeat non expetere, verum etiam ultro delatum recusare. Quid ? nonne Bernardus sciscitanti Brunoni, utrum sibi, paulo ante ad studium perfectionis ingressus, demandatam Colonensem Ecclesiam suscipere an recusare fas esset, aperte rescripsit, ut omnino caveret, ne ad illius seu ad alterius Ecclesiæ regimen capeffendum accederet, quod nondum illius curricula metam potuisset attingere, in quo mox versari cœpisset. Extat Gregorii Magni, Neapolitanos graviter objurgantis, epistola, quod nescio quem in illius Ecclesiæ solium, cum magna virtutis commendatione, recipere vellet, qui filiam ex concubina susceperat, ætate nondum adultam : Si enim, inquit, ex ætate puerulæ, tam commendatæ probitatis ratio subducatur, nec credi nec existi-

existimari quidem potest, id quasi repente consequitum esse eum, quod vix multorum annorum laboribus, sudore, vigiliisque colligitur. & valde, electi illius Episcopi fiduciam increpat, quasi majora, quam caperet, optantis recipientisque, quibus salva conscientia non deberet temerarias manus admoveere. Quum enim jam oporteat eum, cui Ecclesiæ gubernandæ provincia tradenda ac demandanda est, inchoato perfectionis operi quasi fastigium imposuisse, eo ne unquam cujusvis industriam pervenire posse credideris, quem non diu multumque spectata virtus, & exquisitæ probitatis fama, commendaverit? tu ne tantum tamque perfectum tibi opus exædificasse & ad summum perduxisse videaris, qui si recte volueris animadvertere, fundamenta vix jeceris? tu ne gregem tuum, per rerum terrenarum despicientiam, ad Christianæ vitæ perfectionem traduxeris, quum illam, quam alteri monstraturus es, viam non modo nunquam ipse confeceris, sed ne ingressus quidem aliquando sis? tu ne aliorum animi ægritudinum sanandarum partes susceperis, quarum ipse insanabili intestinoque morbo labores? quam sane ad edomandas cupiditates idoneam ceteris medicinam præbueris, qui in tui ipsius animi moribus sedandis, nihil operæ studiique posueris? quod si te ita cæcum reddiderit avaritia atque cupiditas, ut hæc intueri, quamvis clarissima, non possis, anteaquam vitam consule; hæc dabit tibi jam tacite contra te ipsum firmum & grave testimonium. Si ad parietes fulciendos tantopere cavemus, ne quam recentissime cæsas ab arboribus trabes adhibeamus, quod maxime veremur, ne succo à radicibus deducto adhuc molles, sese flectendo, aut deinceps, dum exsiccantur, decrescendo, vitiosarum ædium ruinam non tam reparare quam accelerare possint; parum ne referre putabimus; si labantes, & jam prope ruentes, hominum mores, sustentandos eidem tradiderimus, qui nuper à peccandi consuetudine, tanquam à radice, revulsus, veteres illos spiritus quasi intra venas inclusos retineat, nec maximas sibi virtutes ab adolescentiâ comparaverit, quas perpetua constantia studioque roboraverit? ita ne vero, quod in stipite, in trunco, requiritur, id in homine, in Episcopo, negligetur? nam, Episcopo omnium esse onera sub-

C

eunda,

eunda, factum est jam tritum sermone proverbium. at, quæ tandem graviora irâ, invidiâ, ceterisque perturbationibus onera sustinemus? quorum gravitate ita premimur, ut etiam opprimamur interdum. hæc quum adversus illum concitantur in nobis, ita sunt Episcopo toleranda patienter, ut & facienti injuriam ignoscat, & simul misereatur errantis. cui majus est cum improbis negotium quam Episcopo? in quem melius, popularibus procellis agitaturn, falsæ criminationes confinguntur quam appositissime ad veritatis imaginem, quam in Episcopum? in quo plura magis patent, invidorum libidine ferienda, quam in Episcopo? igitur, qui nulla recte factorum conscientia sustentatus, sed solum arrogantia subnixus, tantæ rerum moli cervices obtulerit, quis dubitet, eum & sibi ipsi interitum struere, & ceteris perniciem ruinamque moliri? Sed quid? inquires; non debeam rogatus, non imperio superiorum adductus, necessitate præsertim urgente, oblatos ultro Episcopatus accipere? Profecto divum Thomam illum, qui, quum ob singularem innocentiam, ob excellentem doctrinam, ob incredibilem sapientiam, ac pæne divinam, dignus propemodum præ ceteris esset, qui ad Ecclesiæ gubernacula sederet, à Deo vehementissime efflagitavit, ne ullo unquam tempore ad Ecclesiasticos honores eveheretur; sanctissime doctissimeque docuisse non inficiabor, debere eum, qui tantæ sit capax rei, summo jubente Pontifice, quacunque sui commodi ratione posthabita, impositum hoc sibi laboris onus totis viribus excipere, quum non solis nobis sed etiam, atque adeo multo potius, nati Reipublicæ sinus, qui igitur est operi abunde sufficiens, nec communis officii pondere opprimi se ita facile posse sentit, hic, inquam, ad principatus Ecclesiæ, jussus, accedat; hic præbeat muneri cervices inaximo atque gravissimo. quod si cum fide diligentiaque obierit, habeat pro comperto, fore, ut pro ipso etiam à Deo præclarissimum illud usurpetur elogium: *Euge serve bone & fidelis, quia super pauca fuisti fidelis, super multa te constituam; intra in gaudium domini tui.* sed omnis mihi tecum contentio est qui solum propter nimiam opum cupiditatem Episcopatus affectas, exquiris, per ignes,

ut

ut ajunt, ferrumque petis, qui non oblatos solum invadis, sed vix etiam ostensos, ne te celerius alter arripiat, prope per vim abducis, quum nulla habeas vel à natura vel à labore adjumenta rerum gerendarum, quum totus undique peccatis mēdisque scateas, quum tuorum scelerum conscientia, sacrosanctum illud diadema capiti nequissimo non convenire, vociferetur. ut pulchre Hieronymus, summam prope sanctitatem, & sacerdotalis capitis insigne, una eademque Hebraicæ vocis comprehensione devinci & colligari animadverterit. quasi arcta ac prope individua inter se societate conjuncta, nisi adhibita quodam modo vi quadam, dissociari sejungique non posse videantur. at nonne suis ipse te stimulis fodiat, imo potius laceret atque cruentet pudor, quum illud tibi diadema, cunctis tacite reclamantibus, imponitur, quod tua à te sordida vita, omnium cum plausu, rejiciat? an tu, quem omnia tuo commodo medientem spes tantum utilitatis pæne præcipitem in hanc cupiditatem impellit, cogitasti, non solum quid oneris in præsentia tollas, sed quantum in omnem vitam negotii suscipere coneris? numerasti ne omnes ad unum animas, quæ tuæ diœcesi continentur? Quid loqueris de animabus? ego scio, quot prædia habeat; & simul illud teneo, maximam uno anno ex eorum fructibus pecuniam confici posse. At Basilius; Ambrosius, Augustinus, accurate capita perensebant, & parem exhibentes muneri, quod subierant, diligentiam atque laborem, quotidie, quasi expensi & accepti rationes, integre conficiebant, & cum Deo consolidabant. Nimis antiqua, & jam obsoleta commemoras; hæc laus egregiæ virtutis & innocentia, fuit, non solum hominum, sed temporum illorum propria. Quid ais? utrum existimas, Christum, curæ assiduitate atque labore defatigatum, omnem à suo grege cogitationem abjecisse? an putas, multo eum diligentius ab illis, quam à te, vitæ rationem repetiturum? in utroque vehementer deciperis; namque adeo sua sibi sponsa adhuc cordi est, ut illius incolumitas existimatioque præcipua divinæ ejus providentiæ cura contineatur, teque ita omnibus custodiis subjectum, severissimo Dei judicio tradidit, ut neque in

ejus bonis administrandis, neque in agris colendis, neque in vectigalibus exigendis, neque in faciendo neque in omittendo, ne minima quidem libella, sine tua maxima poena, durum possis dominum fraudare. Verum, inquires, ad id perfectionis culmen se divinorum hominum perduxit industria, ut desperanti mihi, consequi posse id quod ipsi sunt assequuti, omnem prorsus eripiat persequendi voluntatem. fortissimum, ut tibi videtur, propugnaculum nullo negotio ex tua defensione dejicitur. nam & hi, quos nominavi, etiam homines ipsi fuerunt, eodemque Dei præsidio muniti, ac tu ipse, si velis. cupis tu quoque summum virtutis illorum adæquare fastigium? eorundem vestigia persequere. quis enim eo se posse pervenire desperet, quo multorum impressa vestigiis, & frequentibus contrita itineribus via, ac percussa appareat? Sed video, quid sit, quod tua vehementer studia retardat, teque à laudabiliore vitæ genere revocat atque deducit. Etenim non desperatio imitandæ veterum innocentiae & sanctitatis, sed incitatum atque propensum ad effrenatas libidines studium, & is, quo maxime virtus pretio comparatur, & quem plerique fugimus, labor tibi bene fortasse animato languorem affert, & spem maxime debilitat. Erras plane, si putas, aliis gradibus, quam plurimo labore atque sudore, multis diuturnisque vigiliis, ad summa contendere. in maxima rerum omnium despicientia, caste admodum & liberaliter sancteque vivitur; hæc omnium virtutum familiam ducit. pone tibi ante oculos unumquemque eorum, qui fuerunt Ecclesiæ lumina, qui rebus gestis atque virtutibus, perpetuæ Ecclesiæ pacis fundamenta jecerunt, Athanasium, Basilium, Ambrosium, Augustinum, reliquosque permultos, horum similes: num arbitraris, fuisse aliquid aliud amplissimis viris in vita propositum, præter Dei gloriam, præter fidei catholicæ propagationem, præter officium fortis atque constantis Episcopi? num eos existimas, liberalitatis & continentiae remis affluentes, undique divitiarum undas propellentes, tanquam ad aliquem libidinis scopulum, erectam in cælum mentem appulisse? num ullam rationem habuisse reperies, aut auri argente ad avaritiam, aut amoenitatum ad delectationem, aut supellectilis ad delicias,

cias, aut epularum ad voluptates? domos suas non tectoriis aureis inducebant, sed splendore virtutis illustrabant; non tabulis pictis, non signis ornabant, sed rerum gestarum gloria decorabant; non filicatis frequens patris convivium, non Corinthiis operibus, non vasis ex auro vel è gemma factis, instruebant, non mensas conquisitis cælo marique epulis onerabant; sed contra, summa parsimonia, complebant; non hæreditates ingentes trans mittebant ad posteros, sed innocentiae famam relinquebant. Verum, Pontificum maximorum salutaribus decretis & institutis, atque adeo incredibili hujus optimi principis diligentia, & prope singulari vigilantia, improborum hominum cupiditati obstructa est via, ut jam omnis fere nostra supervacanea sit & abundet oratio. At video, quorsum recidere, quove tanquam ad arcem confugere, istorum defensio possit, qui cupiditatem non modo suam excusare, sed cohonestare etiam, consueverunt, ad omnes enim meos impetus, quasi quidam murus, Pauli Episcopatus opponitur; qui tunc, quum ejus maxime furor in Christi discipulorum cæde bacchantis efferveres ceret, quum acceptis à summis Pontificibus literis in Christianos, qui Damasci per id tempus commorabantur, irrueret, dum infesto animo atque minaci, ad Ecclesiæ pestem, ferrum flammamque præportaret, quum illius jam jam crudelis & pestifer adventus timeretur, ejus offusa oculis animoque insolita divini splendoris luce, ita mentis caligo depulsa est, ut susceptum illico furorem abjecerit, &, ex acerbo crudelissimoque Christiani nominis hoste, omnium repente gentium magister evaserit, quo in munere ita versatus est, ut unus fere existerit, in quo omnium sollicitudo Ecclesiarum inhaereret atque adeo salus niteretur, & ad occasum ab ortu solis Evangelii semine diffuso ac propagato, suas ipse res gestas atque virtutes iisdem, quibus solis cursus continetur, regionibus terminisque concluderet. Quam levis est ista defensio! quid? non ne potuit Deus Paulum, aut quemvis alium, quamvis impurum, quamvis improbum; quamvis impium, quamvis omnium scelerum luto demersum, inde abreptum extrahere, &, vitiis perpurgatum, summis repente virtutibus exornare? at te, jam

divino ejus munere è cœno peccatorum emerſum, ſine longo uſu & diuturna exercitatione in nullo voluit virtutis genere expolitum eſſe, planeque perfectum. Sed proſecto non intelligis, tuam iſtam temeritatem maximum eſſe contra te ipſum teſtimonium, te nunquam in ſtudio perfectionis elaboraſſe? His itaque de cauſis Epiſcopalis dignitas tanta, cum laborum & periculorum, tum vitæ & exiſtimationis, ſocietate, copulata eſt, ut in re magis ardua difficilique verſari videatur, qui uni tantum Eccleſiæ præſit, quam, qui civitates omnes atque provincias, terra marique ſummo cum imperio regendas adminiſtrandaſque, ſuſceperit; immo, ut Chryſoſtomus ait, tantum intereſt inter utrumque, quantum inter levem cymbam, quæ velis remiſque inſtructa, & multorum jugi conatu, placidiſſimo flumine, ſecundis conſpirantium ventorum flatibus impulſa feratur, & navim onuſtiſſimam, quæ, adverſa in alto tempeſtate jactata, tenebris offuſis, fractis remis, demerſis remigibus, gubernatore metu percuſſo, eo adducta eſt, ut verendum maxime ſit, ne è tantis unquam enavigatura periculis, aut uni ex imminetibus ſcopulis appulſa, frangatur, aut vorticibus hauſta, in profundum detrudatur. nam, qui, orbi terrarum univerſo, cum ſummo præeſt imperio, ut ingenti undique negotiorum mole urgeatur, multorum tamen ope, quaſi humeros eidem oneri ſupponentium, maxima laboris parte levatur; ad hæc, adverſus multitudinis levitatem, contra perditorum temeritatem, ſuorum caritate munitur, armatorum præſidio ſtipatur, imperium detrectantes & pernicioſos cives, multa, vinculis, verberibuſque coercendi, liberam habet à lege poteſtatem: contra vero, Epiſcopos hiſce omnibus ſere auxiliis deſtitutos eſſe reperies. O conditiones miſeras regendarum animarum! ô rem, periculorum inſidiarumque pleniffimam, in qua rectores vel egregii, ab amicis inimicisque, promiſcue ſubjectis invidiæ facibus, falſis criminibus circumveniuntur, ubi tum ſuorum, tum exterorum inſidiis expetuntur, ubi, ſi ſeveritas adhibeatur, odioſa futura eſt, ſi lenitas & clementia, ne contemptum pariat verendum eſt; ubi ſeveritatis acerbitas ita eſt lenitate clementiæ mitiganda, ut non, aut deſperatis animis, caſtigationis acerbis-

acervi-

acerbitate, dolor nimius inuratur, aut, dissolutis clementiæ licentia, peccandi auctoritas tribuatur. Quid multa? jactantur illi, ut in vastissimo mari, adverso turbine, quassata navis, aut mox ab eodem misere discerpenda, aut infesto gurgite devoranda. Neque tamen infestus humani generis hostis, tanta tamque atroci adversus sacros populorum rectores tempestate commota, quiescendum sibi esse ducit, sed novis procellis atque turbinibus excitatis, coortam tempestatem augere sæpe conatur. quoties enim cum illis graves inimicitias sceleratos homines adire compellit, dum pro suo munere, ad corruptos civitatis mores emendandos; omnes nervos intendunt! quoties ad augendas vel conservandas pauperum facultates intentis, varia ac multiplicia pericula proponit! quoties, pro imperio vel Ecclesiastica dignitate provocatis, cum multis, audacibus, improbis, nonnunquam etiam potentibus, adfert dimicandi necessitatem, ut, quod Ecclesiæ vel bonorum patrocinium susceperunt, cogantur deinde aut propter potentiam adversariorum abicere, aut propter infirmitatem animi deponere! Quod si quis innumera sanctorum Patrum præclare gesta ex veteri memoria reperierit, & procellas omnes ac tempestates, quibus à suis inde usque primordiis Ecclesia Christiana jactata atque afflicta est, cogitatione pervolverit, non ne semper illos, quum cupiditatibus Principum restitissent, hæreticorum opes infirmassent, opinionum monstra debellassent, pro Ecclesiastica libertate acerrimè decertassent, in medium rerum omnium discrimen devenisse, & in maximas invidiæ & molestiarum turbulentissimas tempestates, concitatis iniquorum animis, incidisse cognoverit? quis sane infinitos labores atque pericula, cum Episcopali splendore conjuncta, non reformider, si Basilii Cæsariensis Episcopi, quas sæpe perpeffus est pro Catholica Religione injurias & incommoda, legerit? in quem unum ut sacra Catholicorum templa, ab Imperatore Valente impuræ superstitioni hæreticorum addicta, ad veterem cultum deduceret, & nefarium servitutis jugum à cervice Christianorum repelleret, omnes illi fluctus redundarunt, quos à communi peste depulerat: quis innumeris profecto & multiplicibus, contractis

ab Arhanasio, insectationibus ærumnisque, perspectis, ad tam turbidos honores concitato impetu sese ferentem cupiditatem, quasi à medio cursu non avocet in tutumque perducatur? ad cujus interitum, omnium generum atque ordinum consensus, omnium gentium conspiratio conjuravit, denique omnium fere miseras, & fortunæ ludibria, in unum illum auxilitem optimum, immanissimorum hominum efferata rabies cumulavit. nam cum, à Constantini temporibus usque ad Valentis imperium, contra inter horum Principum ætates interjectos Imperatores, veram germanamque Christi fidem protexisset, quum ad Ecclesiæ navis, tunc maxime fluitantis in alto tempestatibus Arianorum, gubernaculum accessisset, tot perpeffus est insidiarum & malorum omnium fluctus, ut male jactatum nullus in toto terrarum orbe tutus à persequentium furore angulus, quasi portus, exceperit. per similes fluctus ac procellas perpeffus est Chrysostomus, qui, post egregiam in rebus divinis navatam operam, in exilium ejectus est; ubi, ærumnis miseriisque confectus, excessit è vita: ut vere dici possit, eorum plures, qui in hanc ejusmodi honorum navim conscenderint, tempestate coorta absorberi, quam, eadem sedata, tutum in portum tranquillumque deferri. Quæ cum ita sint, non est, quod tantopere Gregorios, Ambrosios, Augustinos, admireris, quod eam in summa virtute & eruditione modestiam retinuerint, ut non modo oblatos sibi ultro Episcopatus rejecerint, sed, ne ad eos capeffendos inviti coherentur, sese in silvas & desertissimas solitudines abderint. nam etiam si in Christiana Republica per id tempus nulli re vera ad id aptiores invenirentur, tamen, ut acres & intelligentes rerum æstimatores, tantæ molis gravitate perpenfa, longe imparem suam esse imbecillitatem oneri, judicavere; & jam perspicientes quanto tutius esset, sacerdotale regnum respuere, quam accipere; quasi cautiùs duxere, corpus feris obijcere, quam se populo, multorum capitum belluæ, & omnium ferarum immanitatem superanti, committere. Quis enim, nisi inconsideratus ac demens, se talem esse putaverit, ut jure tantæ rei præficiatur? quis, nisi temerarius sibi que præfidens, in tam amplo latoque pastoralis officii pelago, ita
semper

semper rectum cursum tenere se posse confidat, ut nec urgentibus periculis procellis, nec humanorum commodorum aura leniter aspirante, de recto unquam tramite deflectat, neque ad dextram neque ad sinistram? at, si adhuc in ea mente persistas, ut pertinaciter hanc istorum Patrum in repudiandis honoribus tam constantem voluntatem admirandam putes, scias etiam, eandem fore tibi multo magis imitandam, quum ea nos præstantium virorum facta ad imitandum aptissima judicemus, ad quorum exemplar si omnis vitæ nostræ ratio referatur, maxima ad nos inde emolumenta, atque adeo salus certa, redundet. Verum non ideo hæc dixerim, quod hos honoris titulos, per se malos & improbandos esse, ducere, sed quod summum ac prope divinum hominem requirant; quorum similes paucos meminisse vix possumus. quos tamen Christianæ Reipublicæ necessarios esse, nemo est qui nesciat; nulla enim civitas, nullus hominum coetus, sine magistratu, sine imperio, sine lege, potest, tanquam spirans, sed vitali sanguine destitutum, corpus, nec ad modicum quidem tempus perdurare, quum imperantium æquitate & civium obedientia omnis Respublica contineatur: immo vero, eo magis venerandos à nobis atque colendos censeo, quod in Ecclesia, ad ordinem & personarum discrimina retinenda, sunt inducti divinitus. Quapropter Episcoporum imperio ita nos subjectos obedientesque præbeamus, ut simul virtutes eorum imitemur, &, quum Christi personam inter homines sustineant, tanquam è cælo delapsos, intueamur. Sic enim fiet, ut, si quis vestrum aliquando ad hoc celsissimum dignitatis fastigium vocetur à Deo tanquam Aaron, eo dignior, qui imperet, habeatur, quo ceteris submissus modestiusque paruerit,

O R A T I O II,
A D
A C A D E M I C O S
P A R T H E N I O S.

Reprehendenda vobis fortasse, Auditores, prudentissima Patrum meorum consilia videbuntur, qui me, qui non sum cum tot clarissimis eruditissimisque adolescentibus, quorum frequentia hunc confessum exornari videtis, vel ætate vel ingenio comparandus, primum omnium, in hodierni-diei lucem & pulverem, initium annuis Academiæ nostræ exercitationibus facturum eduxerint. quum enim communis sit omnium fere opinio, in constituendis ordinandisque rebus, quæ firmissima sunt, ea prima collocari debere, ut expectationi hominum quam celerrime occurratur; quis est adeo hebes, qui non intelligat, graviter ab ipsis in hujus tam celebri Academiæ existimationem peccatum esse, quoniam me, in quo minimum omnes putant esse, primum voluerint dicere? Etenim quum omnes, etiam acres & intelligentes rerum æstimatores, ut plurimum ex initiis de universa re judicare soleant, sine dubio, si initio satisfactum non sit, tot viri doctissimi, qui frequentes ad nos audiendos convenerunt, male se de ingenio nostrorum adolescentum habere existimabunt, è quibus, statim ut inchoari Academia cœpta est, nemo me eloquentior vel eruditior prodire potuerit. Quapropter sapientius facturos eos fuisset dicent, si me, aut nunquam dicere voluissent, vel, quando exaudienda mea vox erat, in mediam turbam, vel in gregem, conjecissent. Verum aliter res se habet, Auditores, atque fortasse existimatis. abundat Academia nostra præclarissimis adolescentium præstantissimorum ingeniis; floret eloquentia atque optimarum artium studiis; prudentissima sunt Patrum sapientissimorum consilia, adolescentes optimi; qui non me potissimum delegerunt,

gerunt, quo summam apud eos, qui audiant, de vobis opinionem diminuerent, sed quo melius vestro nomini existimationique servirent. horum enim alterutrum even-
 turum arbitrati sunt, vel me, benevolentia vestra fretum, dicturum aliquid, dignum expectatione omnium, vel, ingenii mei tarditate retardatum, ab eadem longo inter-
 vallo superatum iri; quorum si primum contigisset, quid illis reliquum fore, nisi ut summopere gauderent, etiam in hac mea tenuitate ingenii, aliquid inventum esse, quod summam expleret desiderii vestri expectationem? at si alterum omnino, quod erat sperandum, consecutum es-
 set, ut minor videlicet opinione hominum inveniret, non ideo se hominum reprehensionem offensuros existi-
 mati sunt, quum eandem, quam natura sequitur, viam ipsi tenuissent. quid est in natura rerum omnium, quod se universum profundat, nec suo quodam itinere à pri-
 mis inchoatisque initiis in ultimum perfectumque exi-
 tum terminetur? quid est in iis, quæ à natura procrean-
 tur, tam altum tamque excellens, quin id quoque levio-
 ribus principiis natura ipsa prætexuerit? quod & in stir-
 pibus, & in omni animantium genere, sed præcipue in ipso homine, qui altissimo rerum, quæ à natura profi-
 ciscuntur, gradu continetur, intueri licet. hic enim, pri-
 mum imbecillus, elinguis, consiliiique expers, in lucem editur; verum ita vires in dies sumit, ut firmissimus, di-
 sertus, ac prudentissimus evadat. neque tamen erit quis-
 quam adeo stultus, qui tam solertem providamque pa-
 rentem non aliis quidem nominibus reprehendendam existimet, quam quod huic plane admirabili ac pane di-
 vino animanti, non summam à principio rationem ac sa-
 pientiam tribuisset: citius dixerit, eandem alta quadam
 mente atque consilio præditam fuisse, quum voluerit
 idem, non nisi annorum decursu, quasi longa quadam via
 spacioque confecto, sapientie ejusdem metam attingere.
 Atque adeo verum est, in quacunque rerum institutione
 esse aliquid primum & inchoatum, deinde subsequi ali-
 quod extremum atque perfectum, ut ars quoque ipsa, na-
 turæ, ut ita dicam, æmula, hoc eodem itinere ad id, cui
 nihil absit, quodque aptum atque perfectum expletum-
 que sit omnibus suis numeris & partibus, progrediatur.

Etenim

Etenim, ut cætera exempla missa faciamus, quis non videat, in inchoatis picturis nihil aliud nisi horridum quoddam atque incultum cerni? quæ picturæ deinde paulatim coloribus ita illustrantur, ut, quum ad illud ultimum atque postremum absoluti operis effectum pervenerint, ita sæpe res ad vivum exprimant, ut res ipsæ, non rerum effigies, videantur. Ex quo profecto intelligi facile potest, quam apte quamque sapienter ab Academiæ nostræ moderatoribus ego delectus sum unus ex omnibus, à quo intermissæ aliquot mensibus exercitationes nostræ instaurarentur; ut nimirum veluti primas quasdam descriptiones ducere ejus præclaræ picturæ, quam alii deinde eruditissimi adolescentes, summa elaboratam industria, omnibusque numeris absolutam, vobis ante oculos proponant; nihilque aliud me hodierna schola, tanquam rudi quodam penicillo efficientem intuebimini, quam umbras quasi quasdam atque recessus ducentem, quo aliorum, qui me sequuntur, doctrina, suis coloribus perfecta, magis eniteat. Adeste igitur animis, auditores, atque adeo vestræ aura benevolentix toto Adriatici maris tractu, cujus nunc quidem fluctus perhorresco, cursum orationis meæ dirigite, ut aliquem portum tenere possit. Neminem habiturus sum eorum, quæ dixero, adversarium: nulla mihi erit cum strenuis aliquibus viris colluctatio. ita fortasse visum est Patribus; quippe qui optime norint, quantum sit in me virium & facultatis. libero igitur campo mea excurret oratio, non vehemens non pugnax erit, sed lenis atque placida, eaque ut non ad vulnus sed ad vires evocandas conferat. nam, quemadmodum in gladiatorio vitæ certamine à pugnantibus ita primæ illæ hastæ jactari leniter solent, ut & lacertum concalescenti serviant, & reliquis viribus suis consulant, ita in hac quasi contentione doctrinæ, qua literis decernitur, nonnulla fient à me, quæ non ad feriendum hostem, sed ad virtutem, his proximis feriis, quasi diuturna pace, languentem, excitandam, valere videantur.

O R A T I O I I I ,
D E L A V D I B V S .
G E O M E T R I Æ .

NVnquam omnino in me ipse sum expertus , Patres religiosissimi , ceterique Auditores ornatissimi , quod præclaris oratoribus multis aliquando usu venisse cognovimus , ut rei , de qua dicturi essent , magnitudine terrentur , & , in summa rerum ubertate & copia , verborum inopia laborarent . id quod contigisse mihi hoc tempore , sentio , quo tempore de laudibus Geometriæ apud vos dicendum est . Etenim , quum , de singulis dicere , plane infinitum sit , quas potissimum ex tot maximis atque gravissimis , quibus abundat , laudibus celebrandas accipiam ? Si enim , aliquibus tantum insistere , mihi erit in animo , & ceteras omnes prætermittere ; jam in eam dubitationem adducor , ne quis me , non tam illam exornandam , quam suis ornamentis & honoribus spoliandam , suscepisse conqueratur . sed neque idcirco , mihi laborem prorsus ademptum , vel molestiam omnem ereptam , crediderim , si in uno tantum aut altero laudis genere versari statuerim ; nam , quæ fuerit primam ista in præstabilioribus deligendis prudentia , quum omnes æquo inter se jure contendant , & magnitudine atque præstantia simillimæ , pari splendore ac dignitate mirabiliter fulgeant ? præterea , quum earum singulæ sane , quæ multis nominibus celebrentur , dignæ sint , majores claritati earum tenebras offudisse silentio , quam easdem dicendo illustrasse , videbor . Quare his angustiis undique circumclusus , quo me vertam , aut quid potissimum consilii capiam ? Despondebone animum ? id minime vero . An , timore debilitatus , quod mihi onus imposuistis , cum perfidia abiciam ? ne id quidem . Quid igitur agam ? id , quod vere mihi videor esse dicturus , ut nihil existimer de gloriæ illius summa detraxisse , si non statim omnia , quæ dici de illa possint , effuderim , nam qui laudata magis
existere

existere illa res potest, quidve prædicari de eadem honorificentius, quam ingenue fateri, jam esse in confesso apud omnes, tantam in illam multitudinem laudum confluisse, ut non modo una, sed ne pluribus quidem actionibus explicari satis commode possint? qui melius occurrî fatietati audientium potest, quam, rem illam suscepisse tractandam, cujus multitudo laudum atque ornamento- rum tantam oratori facultatem & copiam largiatur, ut, si sæpius de illa sit dicendum, semper novus accedat? Sed, quæ longe mihi præstare ceteris ejus ornamentis omnibus videantur, eas esse duco, de quibus, quum scientiæ alicujus dignitas in disceptationem adducitur, quæri potissimum solet; scilicet utilitas, & voluptas: quæ duo ita sere semper natura distraxit atque sejunxit, ut, quemadmodum in ceteris rebus, sic in præclaris facultatibus multis atque artibus, ne minima quidem inter se societate conjunxerit. aut enim semper utilitas abesse cernitur à voluptate, aut certe voluptas ab utilitate secerni. Quæ porro haberi voluptas etiam in summa juris civilis cognitione atque prudentia potest? quid in ea plane dignum inveniri, quod aut jucunda quadam varietate ac delectatione ad se mentes alliciat, aut animum, abstrusarum rerum atque admirabilium investigatione & comprehensione, retineat? tanta tamen quotidie ex illa ad nos beneficia fructusque proveniunt, ut, qui omnium inde maximas ad vitæ communis usum utilitates & commoda depromi negaverit, tanquam hominum societate indignus, in aliquam solitudinem inter feras amandandus videatur. Etenim continuo ex illa, veluti perenni fonte, deducitur, æqui bonique notitia, justî atque injusti scientia; hæc est fundamentum libertatis, fons æquitatis; hæc vitis pœnas, & virtutibus præmia decernit; hac una retenta, civitates cœtusque hominum, jure sociati, conservantur, bona, nobis à majoribus tradita, retinentur, res, domus, uxores, à flagitiosorum hominum libidine, & à nefario perditorum scelere liberantur, perpetua ejus custodia ac vigilantia. denique hac eadem, non solum privatorum plurimorum dignitas, non univerforum utilitas, sed etiam Reipublicæ totius salus, hominum generis universi & mundi ipsius conservatio, maxime continetur. Iam vero

vero quis locus in tota Philosophia, si cum ceteris ejus partibus, semper quidem uberrimis ac feracissimis, conferatur, est minus fertilis ac fructuosus, quæ ulla pars ejus minus culta, vel minus utilitati hominum deserviens, quam ea, quæ naturæ obscuritate involutas rerum causas evolvit, in mediumque proponit? & tamen fere nulla ars est, quæ arripiatur avidius, cui plures ardentiori studio sese penitus dederint, vel majore cum delectatione jam homines ad ea, quæ ejus abditis atque reconditis è fontibus hauriuntur, scientia & cognitione comprehendenda, commoveantur. quid est enim aut tam admirabile, quam, quæ natura longissime à communi hominum intelligentia sensuque disjuncta esse voluit, quæque, ne scilicet eruerentur, profunda quasi nocte suppresserat, mentis acumine celeriter adipisci, & lumine rationis investigata, ab illis, in quibus jacebant, tenebris evocare, & in lucem proferte; aut tam jucundum cognitu atque auditu, quam occultæ tot rerum admirabilium causæ, abditæque rationes; aut tam singulare, vel prope divinum, quam posse vulgi stuporem & admirationem eludere, & captas vana formidine mentes imperitorum, ratione, soli sibi percepta, dissolvere, ac, torpentes, ad spem ac fiduciam rursus excitare? Solam igitur Geometriam esse dico, qua nihil propemodum generi hominum à Deo immortali sit datum utilius, neque aliquid, ex quo major percipi voluptas possit, oblatum. Atque ut à voluptate, qua maxime sensus hominum afficiuntur, ordiamur, quid potest ad delectationem homini jucundius accidere, quam dimensis astrorum cursibus, maturitates temporum singulorum & varietates mutationesque cognoscere? quæ insatiabilior voluptas, quæ pulchrior, quæ præstantior ad intelligentiam, quam scientia & cognitione comprehendere, quanto tempore, tum errantium, tum aliorum siderum orbes, conversiones suas efficiant? quid præclarius excogitari, quam, ex infinito hominum numero, vel solum, vel cum paucis, in tot disparibus astrorum motibus, quotum alia quædam antecedere, subsequi alia deinde cernuntur, quædam moveri celerius, quædam tanta cum tarditate sua spatia conficere ut pæne insistere videantur, suos quædam paulatim cursus advertere, vel
ad

ad septentrionem, vel ad austrum, quædam spatiis immotis ab occasu ad ortum commeare, atque adeo certa semper progredi via, ut nunquam vel ad dexteram vel ad sinistram vestigium sui cursus inflectant, in tanto cæli impetu admirabili cum celeritate sese vertente, in tanta quasi confusione naturæ, astrorum ortus, obitus, cursusque cognoscere, & de orbium numero, situ, motuque, habere non errantem & vagam sed stabilem certamque sententiam? quid esse admirabilius, quam civitatibus, provinciis, & generi hominum universo, artes, menses, annosque finire, ac multo ante præmonstrare, quas quæque stellæ effecturæ sint in suo cursu varietates, & defectiones solis, ac lunæ, investigatas & cognitæ prædicere in omne posterum tempus, quæ, quantæ, quando futuræ sint; demum, scire quodammodo, quid singulis diebus ac noctibus, singulis horis atque momentis, in illis illustrissimis domibus altissimisque domiciliis efficiatur? quo spectaculo quod putas esse pulchrius? quod magnificentius? quo contuentem hæc animum putas gaudio perfundi? qua delectatione teneri? qua suavitate duci? Quam enim majorem voluptatem invenerat Gallus, majoris Africani familiaris, qua voluptate, ut narrat Cicero, senectutis gravissima leniret incommoda, vel potius levaret, præter harum præclarissimarum artium studia? quibus adeo impense operam dabat, ut, ad extremam usque senectam ætate provectus, mori videretur in studio dimetiendi pæne cæli atque terræ, contingeretque sæpissime ut luce, noctu aliquid describere ingressus, & nocte, quum mane cœpisset, opprimeretur. Verum quid abest à Geometria, quod ad delectationem homini comparandam possit prodesse? potest ne major esse ulla in homine voluptas, quippe orto ad cælum aspiciendum & contemplandum, quam illa, quæ ex cognitione & scientia rerum cælestium abunde percipitur? quis enim adeo est hebes, quis sui immemor generis se ita prostravit ad terram, & cogitationes suas abjecit in res tam humiles atque contentas, qui si pulcherrimum hunc cæli ornatum aliquando suspexerit, non magnopere commoveatur, neque aveat plurimum, scire, qua ratione tanta ætheris moles, raris immutabilibusque cursibus circum terram, feratur, quanto

quanto tempore globi astrorum singuli sua spatia conficiant, quot partibus sol ipse, qui universo mundo tam longè lateque collucet, sit major atque amplior quam universa terra; qui incredibili jucunditate non teneatur, quum cognoverit, quædam esse astra, magnitudine adeo immensa, ut centum ac septem partibus, & eo amplius, magnitudine sua terræ ambitum superantia, cælo complexa, contorqueantur, quum didicerit, ut infinitæ siderum flammæ, quum terras nox opacaverit, cælo fulgere videantur, certum tamen ac definitum esse numerum astrorum? Sola Geometria occurrit innato hominibus tantarum rerum cognitionis amori, & scientiæ satisfacere sola potest, qua omnes ducimur & trahimur ad res altissimas cognoscendas, incredibilem cupiditatem explere, atque adeo earum perfectam accuratamque notitiam tradere, ut qui suam ab ea, tanquam à rebus incertis, assensionem cohibuerit, haud sane intelligas, cur non idem, sol luceat nec ne, dubitare possit. hæc igitur, quo cupiditati hominum satisfiat, cælum usque penetret, & circum altissimos illos, omnia cingentes & coercentes, cæli complexus, eodem atque astra motu cursuque revolvitur; neque solum celeri cuncta gradu pervadit, sed tantarum etiam rerum ordinem, numerum, motus, magnitudines, intervalla, brevibus demetata circumscriptionibus, & infinitam earum magnitudinem angustior bis spatio comprehensam, cælo digressa hominibus desert; deinde quum jubetur, terras omnes mariaque perlustrat, neque terra, undique in sese nutibus suis conglobata, soliditate sua est illi impedimento, quo minus ad ejus ultimum usque centrum permagnet; iterumque sub terras evadens, diametri longitudinem, mire dimensam; exportet: depressos in immensam pene altitudinem specus ingreditur, quantaque sit cujusque altitudo, talium rerum studiosis certa atque evidenti ratione demonstrat; ut jam nihil interrumpat, quo labefactari tanta ejus contentio possit, non strata supra terræ superficiem maria, non saxorum asperitates, non impendentium montium altitudines, immensitatesque camporum, non ille, qui fusus prope immensas cæli regiones occupat aër, expeditæ ejusdem velocitati moram ac tarditatem afferat, quin prorsus cuncta per-

Iustret, tibi que perfecte descripta atque dimensa, ut dissentire non possis, objiciat. Quas tu igitur corporis voluptates, quas animi oblectationes, tantarum rerum varietati & scientiæ anteferendas putes? quid non modo non comprehendere animo, sed ne suspitione quidem possimus attingere, quod majorem in se delectationis vim contineat, quam hac una, ut ita dicam, comite ac socia, commorantem hic adhuc in terris animum, mortalium membrorum laqueis irretitum, humanitatis pondere depressum, aliquando tanquam è custodia corporis evolare, seque ad illas occultissimas præstantissimasque cælestium corporum naturas contemplandas, motusque pernoscentes, erigere, & tandem eorum perfectissimam scientiam, ex altissimo cæli domicilio deductam, cum hominibus communicare? quæ nam contingere gravior oblectatio potest, summo ingenio & doctrina viris, quam vastissimas illas immensorum orbium moles, quarum infinitam vim & magnitudinem, non modo nullius scientia complecti, sed neque cujusquam mens & cogitatio capere posse videatur, incredibili velocitate percurrere, quasi manibus contrectare sapissime, easque ad arbitrium versare? quid jucundius, quam inclusum domo, nullo sumtu, nullo incommodo & labore, vel stantem, vel sedentem, in summo otio & tranquillitate, uno ad summum die, omnes terrarum oras obire, quarum vix minimam partem, per omne suæ vitæ tempus collustrare quam plurimi, urbes & provincias peragrando, vel maria transmittendo, potuere? tanta ac prope incredibilis hæc voluptas est, ut viri plerique doctissimi ac sapientissimi, quemadmodum etiam de Archimede accepimus, evocati à corporis sensibus, quum, Vrbe ab hostibus capta, cuncta, mulierum ac puerorum lamentationibus ululatusque, perstreperent, quum omnia planctu tumultuque replerentur, quum per omnes ordines ætatesque victoris crudelitas ac licentia grassaretur, quum subditis ignibus flagrantia tecta incendio personarent, quum jam in eorum domibus versarentur armati, quasi obstructis illa dulcedine auribus, quæ ex jucundissima orbium aut signorum cælestium, vel terrestrium regionum, descriptione instillabatur animis, nullam plane vocem, nullum omnino sonum,

num, in tanto armorum strepitu atque tumultu, petceperint. Nollem, in recensendis singulis voluptatibus, quæ semper ex præstantissimæ hujus artis studio, tanquam ex uberrimo quodam fonte, tam large & tam munifice fluxerunt, nimis vobis videri, quam præsertim ad alterum caput, scilicet utilitatis, quod maxime rem causamque continet, quemadmodum ab initio proposuimus, festinet oratio. De qua ut breviter pauca dicamus, quæ sunt, Deus immortalis, in hac præclarissima facultate atque hominum generi pernecessaria, utilitates! quæ opportunitates ad aliarum non mediocrium artium, sed plane maximarum, cognitionem! quas, cæsis undique vepribus, exustisque dumetis, vias, quam faciles, quam promptas, quam expeditas, ad illam laudandarum artium omnium procreatricem quandam & quasi parentem Philosophiam properanti suppeditat! ut jure quidem maximo Philosophorum longe omnium princeps gravissimus ac præstantissimus Plato, in disciplinam se tradentes suam, si Geometræ iidem essent, summo studio amplecteretur, nec injuria à se, tantæ hujus facultatis expertes ignarosque, repelleret, & tanquam ad id, quod profiteri vellent, minus idoneos, neque eo unquam, quo cursum intendissent, perventuros, ab omni doctrina, atque adeo à sui Gymnasi aditu vestibuloque, excluderet. Etenim, quid celem magis cogitationis motum impellere, quid aciem mentis subtilius exacuere, quid etiam maturius, torpentem animum, seque rerum humanarum curis advolvendentem, possit ad exquirendas rerum causas excitare? hæc præparat animum, ut agrum, non semel proficissum, sed novatum & iteratum, ad pulcherrimos sapientiæ quasi satus accipiendos, hæc se veritatis indagandæ, in tanta opinionum discrepantiâ, in tanto sententiarum quasi conflictu, in maxima rerum ignoratione delitescens, quasi ducem & magistram proficetur, seque, in tantis tenebris erroris & incitiæ, clarissimum lumen præferentem offert advenientibus. hæc, cum ceteræ fere artes nullo docente arripi possint, sola, propter rerum obscuritatem, subtilitatem, multiplicitatemque, doctoris industriam solertiamque desiderat. hæc, si Pythagoræ credimus, jactis quasi gradibus, ad summum intellectionis acumen,

tutum parat aditum, & lenem fruit ascensum. si denique impellere ad spem beatitudinis certam nitentium hominum vota, sola Dei cognitio potest, nemo sane unquam, nisi Geometra, plane beatus existet; cujus ad hoc præfertiū studium incitatur, atque ardor impellitur, ut Deum immortalem subtiliori ratione investiget atque perquirat, investigatum & inventum indicet in vulgus, eique palam colendum venerandumque proponat. Iam vero, si mente consilioque divino omnia, quæ sunt in mundo, ad salutem omnium conservationemque admirabiliter administrari cogitemus, si contemplemur animo, genus hominum universum, extremis terrarum oris, tanquam incensibus, comprehensum, velut magnam quandam urbem incolens, quam nos orbem terræ vocamus, Dei potestate atque sapientia gubernari, qui iudiciis constitutis, legibusque descriptis, recte factis præmia, peccatis supplicia, decernat; quid aliud ex tot ab illo affluentibus bonis, hoc uno genus hominum large magis effuseque rigare, quid inter illius maximas infinitasque virtutes, tanquam sidera ardentia, Geometricæ rationis splendore clarius elucere atque emicare videbitur? neque summopere Plato non laudandus in eo, quod, incredibili Dei providentia atque sapientia, qua quidem universum mundum regit, animadversa, optimeque perspecta, harum rerum effectorem & conservatorem Deum *γεωμετρεῖν*; hoc est, in hoc Geometriæ studium incumbentem, appellare non dubitaverit; ut ex hoc credi facile possit, præstantissimam hanc, sive caelestem potius, disciplinam è superno illo scientiarum fonte deductam, ad hominum cœtus defluxisse ac pervenisse. nam quum virtutem, non minus stulte quam impie, nemo ex veteribus unquam Deo acceptam retulisset, quod, quum propter virtutem jure nos laudari & in virtute recte gloriari putarent, nunquam id posse contingere existimabant, si id donum à Deo, non à nobis, haberemus; solam tamen Geometriam tanto ceteris virtutibus præstare, fere omnium erat opinio, ut crederent, tantam hanc, ac pene divinam, à Deo petendam, non à se ipso sumendam esse virtutem, nec aliquid nostræ laudi assumptum arbitrarentur, si egregiæ facultatis hujus originem à Deo duci, omni remota dubitatione, con-

ne, concederent. quis inventus est unquam diis hostiam
 vovisse, si justus, si temperatus, si sapiens effectus esset?
 at Pythagoras quum in Geometria quiddam novi inve-
 nisset; Musis bovem immolasse perhibetur à multis;
 quod profecto contra iudicium omnium mortalium non
 fecisset, nisi præclara ejusdem inventa, tanquam dona cæ-
 lestia, Deo immortali tribuenda existimasset. Verum,
 quid in eruendis colligendisque utilitatibus maximis ac
 necessariis, quæ latent in intima ratione Geometriæ, tan-
 toperè laboramus? quid ea re utilius esse, quid hominum
 generi fructuosius, potest, cujus consilio atque prudentia
 inter se homines civili conciliatione & societate conjun-
 gi, & mundum omnem administrari, confiteamur? quan-
 do non ejus semper, maxime in legibus condendis, & in
 Rebus publicis ordinandis, à summis & sapientissimis vi-
 ris habita ratio est? sine qua certe illa Iuris æquabilitas,
 quæ in tribuendo jus suum unicuique versatur, cujusque
 notitia, maxima atque præcipua Iustitiæ parte, contine-
 tur, ne intelligi quidem, qualis sit, ullo modo posse vi-
 deatur. Quid? non ne Lycurgus, vir ille summa pruden-
 tia atque sapientia præditus, qui Lacedæmoniis jura le-
 gesque præscripsit, quum Arithmeticam analogiam, falsis
 criminibus accusatam, quippe communem urbis perni-
 ciem, Rerumpub. pestem, & ad turbas maximas exci-
 tandas sane nimis aptam, condemnasset, à gubernaculis
 civitatum repulisset, & tota à Lacedæmone procul aman-
 dasset, Geometricam proportionem, tanquam utilissi-
 mam, & moderatæ atque legitimæ paucorum potentia
 accommodatam, ea in civitate retinuit, atque arcu iusti-
 tiæ, fortunis omnium tuendis, omni que Reipub. admini-
 strandæ, summo cum imperio ac potestate præfecit?
 equidem, qui potest in illa parte Iustitiæ, quæ poenas &
 præmia constanter pro cujusque meritis & dignitate dis-
 tribuit, medium illud quod est nimium inter & parum,
 quod æquum appellatur, indagari, nisi hac Geometrica
 ratione adhibita? sine qua in tantis tenebris, quodam
 quasi lumine destituti, à recta æquitatis via facile decli-
 naverimus, eive, cujus extant maxima in Rempub. me-
 rita, minorem fortasse quam ei qui non æque de eadem
 meritis sit, gratiam retulerimus. hinc graves in Repub.

querelæ, hinc criminationes existunt, hinc tumultus sæpe maximi, hinc seditiones turbulentissimæ excitantur, si, par virtute, non paria quoque præmia reportet, & rebus gestis ac gloria superior, æquo cum inferiori jure tractetur. Non ne, quum omnis Respub. è Solonis sententia duabus rebus, pœna & præmio, continetur, si, quum de iisdem referendis agatur, non adhibeatur in consilio Geometria, si rationi ejusdem illudatur, si per contumeliam abjiciatur, & in scholas Mathematicorum, in Philosophorum disputationes, tanquam in pistrinum aliquod, detrudatur & compingatur, virtutis extinctio, & Rerum publicarum strages ac ruina, consequatur necesse sit? Veniant igitur hujus sermonis irrisores, & simul illud doceant, quemadmodum sint pœnas & præmia, quæ meritis cujusque respondeant, largituri, nisi rationes illorum, qui pœna vel præmio digni sunt, seorsum à pœnis præmiisque posuerint, & inita subductaque ratione effecerint, ut, quæ fuerit rerum dividendarum inter se ratio, comparatioque, eadem sit eorum, quorum gratia adhibeatur? ut præclare dixerit Aristoteles, ejusmodi jus omne ex quatuor minimum constare debere; nam, quod æquum est, alteri sit æquum oportet: at quod est in proportionem positum, minimum in quatuor versari didicimus: si enim similitudo minimum est duorum, ergo proportio, quum sit similitudinum comparatio, ad quatuor usque progrediatur necesse est. Verum, ut rem satis explicatam exemplis quoque ex Romanorum jure depromtis illustremus; si, re duobus ab Imperatoribus bene gesta, quorum alter collatis signis infestoque agmine cominus hostem invaserit, & egregia edita pugna, ingenti ad extremum cæde prostraverit, alter vero, bello prædonum vel fugitivorum exultantem vana spe hostem, nullo certamine inuito, sola nominis fama deprefferit fugaveritque; si, inquam, ob hæc talia in Rempublicam merita, de honoribus utrique illorum decernendis in senatu referatur, quaeraturque, qualis hic honor singulorum meritis aptus habeatur, ne aut uni debito minor, aut alteri justo major laus, deferatur, sed suum cuique pro dignitate reddatur, duci recte ratio sic poterit: Quam habet rationem prædonum victor vel fugitivorum ad victorem hostium,

hostium, eandem habet civica corona ad triumphalem; ut igitur debellator hostium ad triumphum, sic prædonum victor ad ovationem; iustum igitur erit in partendis honoribus statuere, ut, qui hostem nullo fere negotio devicerit, ovans, qui autem plurimos labores susceperit, vitæ discrimen adierit, in medias peditum atque equitum turmas irruerit, nec magis ducis quam militis munera exsequens, vulnera etiam exceperit, opiflis hostium spoliis onustus, bellicis laudibus abundans, rerum gestarum fama perspicuus, curru sublimis in Capitolium ascendar. Et quemadmodum ei qui recte factis præmia sit daturus, ita etiam ei qui sit supplicia peccatis constituturus, eadem erit via progrediendum: Si, decurione poena relegationis affecto, in quæstionem venerit, quo loco atque ordine habendus sit filius, post patris relegationem ortus, sed paulo ante conceptus, an debeat propter ejusmodi causam ordine decurionum amoveri & à spe magistratum ceterorum consequendorum excludi; vel, si de poenis ob delictum imponendis agatur, an fustibus castigari, & in metallum dari tanquam plebejus possit: sine dubio hac Geometrica ratione cavebitur, ne patris perversitas improbitasque aliquod innocenti filio negotium periculumque facessat. ratio enim effici, concludique potest hoc modo: Quæ ratio est senatoris filii ad poenam deportationis, eadem est filii decurionis ad eandem; quum senator & decurio eandem inter se proportionem comparisonemque habeant; at senatore natus, & ante damnationem conceptus, nullam contrahit ex paterna ignominia turpitudinis notam; neque igitur quidquam decurionis filio patris damnatio nocere debet; dicendum igitur erit, etndem, eadem prorsus benignitate, ut senatoris filium, intueudum. Qua nam demum alia ratione, sublata hac Geometrica, recte dividi hæreditates inter liberos possunt? necesse enim erit, aut plus ad alterum pervenire quam per tabulas testamenti liceat, aut alterum debita testamento sibi portione fraudari. si enim ita à testatore scriptum reperiatur esse, ut, si filius sibi post mortem nasceretur, ex besse hæres esset, si filia, ex triente, uxor vero reliquam hæreditatis partem acciperet, & filius & filia nati sint; quid hic fa-

ciat iudex? nonne, tantis divisionum tenebris, Geometri-
cæ proportionis lumine occurrat? nonne totum assen in
partes septem distribuatur, ut quatuor ex illis filio, uxori
duas, filiæ unam tantum partem, assignet? ita enim,
quemadmodum Iulianus ait, secundum voluntatem testa-
toris, filius altero tanto amplius habebit quam uxor,
uxor vero, altero tanto amplius consequetur quam filia.
quæ enim est similitudo filii ad uxorem, eadem est ux-
oris ad filiam, scilicet dupla; at filius capere altero tanto
amplius debet quam uxor; æquum igitur erit, uxorem
duplum ejus, quod filiæ debeatur, accipere: quæ profe-
cto divisio ut recte fiat, totus erit assen in septem partes
distribuendus, & filiæ una, uxori duæ, filio quatuor assi-
gnandæ. Quid multa? Quot sunt optimæ & salutaris
civitati leges impositæ, totidem extant singularis Geo-
metriæ utilitatis, ejusdemque præstantiæ, gravissimi &
laudatissimi testes. Quot jura populis descripta reperiun-
tur, totidem etiam voces pane exaudiri videntur, quæ,
ejusdem ductu & auspiciis, ad augustissimum & religio-
sissimum justitiæ templum, ad intimam æquitatis sedem
ac penetralia, perveniri contendunt. Quare, si nihil no-
bis ad delectationem jucundius, nihil ad existimationem
honestius, ad vitæ fructum optabilius, ad rerum cogni-
tionem aptius, ad Reipubl. gubernationem utilius, ad
beatitudinem vitæ salutaris, potest accidere; quis, ut ita
dicam, voluptatis amator, quis rerum divinarum, hu-
manarum, causarumque quibus hæ res continentur, scien-
tiæ appetens, quis juris legumque studiosus, quis beati-
tudinis avidus, quis Reipubl. gerendæ atque orbis terræ
gubernandi, quis fere laudis cupidus adolescens, non
omnem sibi operam, curam, studium, in hac una disci-
plina, omnium maxima, sibi comparanda, desigendum
esse putaverit? Quamobrem pergite, ut facitis, ado-
lescentes, & in id studium, in quo estis, incumbite.
Quamquam non tam vos oratione mea cohortandos,
quam summis laudibus effereudos existimo, quod jam
tantam sitis facultatem adepti, ut brevi sperandum sit,
fore, ut ex hac nostra schola tanquam ex equo Trojano,
plures optimi clarissimique viri prodeant, qui vel ad
summam sapientiæ laudem consequendam, vel ad juris
scien-

scientiam illustrandam, vel ad Rempublicam capeffendam, summa cum laude & Reipublicæ Christianæ utilitate, se conferant. Interim vos oro obtestorque, ut me, propositum vobis *πρόβλημα* explicantem, attente, sicut facitis, audiaris.

O R A T I O I V, A D A D V O C A T O S C O N S I S T O R I A L E S.

ET ingenii mei tenuitas P. A. & brevissimæ ejus temporis angustia, quo mea continetur oratio, omnem prorsus mihi spem adimit, non modo beneficii vestri; aliquo sermonis genere adæquandi, sed prope ejusdem recensendi; quod, sententia quidem mea, ex se tantum est, ut, si mihi dies ipse ad dicendum daretur, si summa quædam celeritas ingenii, dicendique copia adderetur, nunquam tamen vim ejus maximam complecti verbis perinde possem; ut mecum ipse cogitans sentio. ita plane fit, ut in voluptate dolcam, ex ingenti quodam immensoque campo meam in accepto à vobis beneficio exornando gratulationem, in exiguum sane temporis gyrum esse compulsam. Etenim nihil mihi accidere poterat, vel hoc tempore optabilius, vel in hac mea ætate honorificentius, vel ad eam, quam de me ipso opinionem concitasset, non modo confirmandam, verum etiam augendam, præstabilius, quam, confecto laborum & studiorum meorum curriculo, eam laudem, judicio vestro gravissimo & maximo, mereri, quæ summo ingenio & doctrina viris debeat, qui enim honor deferri cuiquam potest, ex quo plures afferri hominum generi utilitates possint; quam sapientissimorum hominum sententiis dignum pronuciari, qui opem ferre supplicibus possit, excitare afflictos, dare salutem, patriam, vitam, estimationem, bona, atque fortunas, suis civibus conferre? quid homini prudenti jucundius esse, quam, in al-

tissimo gradu sapientiæ, quasi tabernaculum vitæ suæ collocare, habere domum suam refertam civium optimorum conventu atque frequentia, ad quam tanquam ad aram æquitatis justitiæque confugiant, postremo ea sapientia præditum censerî, nullæ ut sint tam afflictæ innocentis alicujus hominis fortunæ, quæ fidei ejusdem atque prudentiæ tuto committi nequeant, nec tam perditæ causa, quæ non ejus digna patrociniis videatur? quid denique homini ad claritatem amplitudinemque aptius existere, quam, omnium vestrum suffragiis, in numerum illorum pervenisse; qui recte judicentur posse administrare Rempublicam, in summis honoribus cum dignitate versari, civitatibus mores, leges, atque jura describere? Me igitur hodie P. A. qui neque mediocri aliqua doctrina valeo, neque in hoc publicum industriæ & eruditionis meæ discrimen, tantum ingenii, quantum vobis fortasse videatur, attuli, universus vester hic ordo in hoc celeberrimo gymnasio, duce benevolentia in me vestra, assentientibus cunctis, referente amplissimo viro, Decano vestro, præclaris hisce adolescentibus, quorum corona circundor, incumbentibus omnium plane suffragiis, in numerum Iurisconsultorum intulit, atque eum in locum, plane una voce, prope omnibus suis viribus, coëgit. At cujus, quæso, me disciplinæ doctorem & interpretem vestris sententiis pronuntiastis? ejus nimirum, quæ una, artium reliquarum cognitionem & scientiam complexa sit, quam qui profiteatur, non debeat ab omni doctrina rerumque majorum notitia procul abesse. Atque ut, ex his iuventutis meæ quasi nubibus, se aliquis saltem ardor vestrorum erga me meritorum exprimat, simulque mea vox hodie, tanquam in possessionem Iurisprudentiæ pedem ponens, officio functa doctoris videatur, liceat mihi breviter P. A. ejus definitionem, ad id quod volumus demonstrandum, usurpare. Iurisprudentia, ut definiit Iustinianus, nihil est aliud, nisi divinarum atque humanarum rerum notitia, justî atque injusti scientia. Si illam, inquit Imperator sapientissimus, præclaram & eximiam speciem Iurisprudentiæ & pulchritudinem adamatis, si præclaræ ejus artis ad summa contenditis, plura vobis sunt necessaria adjumenta doctrinæ; non paulum vobis aliquarum

quarum artium minimarum degustandum, sed, quid-
 quid divinarum humanarumque rerum reconditis in ar-
 tibus versatur, hauriendum; non rudis & adumbrata è
 singulis quibusque cognitio petenda, sed omnium re-
 rum, virtutum, officiorum, omnisque naturæ, quæ mo-
 res hominum, quæ causas rerum, contineat, origo &
 vis comprehendenda est. non habet hæc præclarissima
 omnium virtus definitam aliquam regionem, cujus ter-
 minis septa teneatur, sed prope in immenso omnium
 disciplinarum campo excurrit; non ibi habitat, ubi qua-
 lis qualis unius aut alterius rei notitia, tanquam seclusa
 aliqua aquula, teneatur, sed unde ex omnibus omnium
 disciplinarum atque artium fontibus universum flumen
 erumpat. Omnia igitur, quæcunque singularum discipli-
 narum libris includuntur, sunt ei complectenda qui
 hoc se posse profitetur, aut Iuris scientiæ nomen relin-
 quendum. E quibus liquido constat, parem vestris in
 me meritis posse gratiam referre, grati quidem esse
 optare, sed prorsus insipientis sperare. una me juber esse
 bono animo humanitas vestra, quæ sane tanta est, ut si-
 mul ac vobis de aliis benemerendi datur occasio, benefi-
 cium ipsi vobis accepisse videamini. Atque hæc quidem
 me maxima hujus oneris parte levaret, nisi novæ mihi
 essent meritorum vestrorum, & eorum quidem maximor-
 um, accessiones factæ, quum clarissimus vir, deque lit-
 teris optime meritus, Cinus Campana, princeps hujus
 vestri ordinis, quem omnes, & propter singularem ejus
 probitatem unice diligunt, & propter gravitatem, di-
 gnitatem, sapientiam, in primis colunt, ita me non so-
 lum vestro singulari beneficio exornaverit, sed suis et-
 iam prope laudibus cumulaverit, ut neque eloquentia
 majore quisquam, neque gravitate, neque studio, lau-
 dari, ornarive potuerit, quas sane omnes libenter excute-
 rem, nisi à magistris meis jam pridem didicissem, latius
 ingrati animi crimen manare, neque eum modo com-
 prehendere, qui beneficiorum immemor extitisset, sed
 illum etiam, qui, quod alterius in se meritis leviora sua
 officia omnia existimaret, omne à se beneficium rejice-
 ret. Quapropter, ne videar ejus quoque benevolentiam
 aspernari, voluntatem negligere, auctoritatem contem-
 nere,

nere, tantas illi ago gratias, quantas maximas agere possum. deinde, quæ in me laudum ornamenta concessit, deprompta è sua vera & solida gloria, non ad exiguitatem exilitatemque mearum virtutum velut accommodata, sed tanquam præ se ferentia, perspectam mihi quidem, sed tamen gratam & optatam benevolentiam suam, non solum grata mihi esse confiteor, sed etiam oblata esse gaudeo; interim ea omnia, & multo quidem majora, ejus virtuti tribuo, cujus sunt propria, & unde emanarunt. nam etsi egregia est ea laus, quæ à laudato viro proficiscitur; tamen si in iis, quibus defertur, non consistit, veluti solis radius eodem unde digressa est revertatur necesse est. Postremo sic eum existimare velim, quum à vobis mei exornandi autoribus discefferim, neminem esse, cujus in me officia oblivione aliqua minus velim deleri, aut quæ in omne posterum tempus, tanquam perpetuæ illius in me voluntatis pignus, testata esse omnibus malim. Denique, ut vela contraham orationis meæ, quoniam P. A. id, quod est in me ingenii & facultatis, quæ ego sentio quam sint exigua, tam excellenti munere prosequendum esse duxistis, polliceor, quantum in posterum litteris, quantum in studiis consequi poterò, me id omne ad arbitrium vestrum collaturum esse, simulque futurum apud me semper maximo in honore hunc diem, tanquam insigne muneris & beneficentiæ vestræ monumentum.

O R A T I O V,
D E
S P I R I T V S A N C T O,
A D
C L E M E N T E M V I I I
P O N T. M A X.

IN acceptis beneficiis atque muneribus, B. P. non tam esse largitionem ipsam liberalitatemque magni facientem, quam, large & liberaliter facientis animum ponderandum, merito semper optimus ac sapientissimus quisque judicavit. quis enim ad eorum æstimationem plurimum conferre negaverit voluntatem, ad nos mire propensam, & incredibili caritatis ardore flagrantem? etenim quamvis, conglutinata cum aliquibus amicitia, utilitates multæ & magnæ consequantur, tamen si perspicuum sit nobis, hæc omnia vel temporis causa orta esse, ut sit per quem assequatur quod quisque desideret, vel ab indigentia profecta, ut eadem, exigentes gratiam, scenerentur; certe tanti non erunt habenda, quanti, si essent ab illo nobili & generoso amicitiae ortu, scilicet ab amore & benevolentia, procreata. Maxima, insuata, & incredibilia sunt Dei quidem omnia in genus humanum beneficia; sed, si divina illa caritas, qua data sunt nobis, perpendatur, nullus adeo eorum æstimationi locus relinquitur, ut, qui eadem non ita magna esse dixerit, ut nullius mens & cogitatio capere possit, amens sit. Sed, ut cetera prætermittantur, quid sane aut excogitari admirabilius potest, aut, quod magis inauditam quandam & incredibilem vim beneficentiæ in se contineat, commemorari, quid est, nisi Christianæ fidei sic imperantis potestati judicii fasces submitteret, quod sibi minus persuadere humana mens possit, quam quod semel fide & audirione

tione constantissime credendum accepit? Deum optimum maximum, filium suum, ex sua mente & divinitate genitum, sibi æqualem, coæternum, ac consubstantialem, quo optime de hominum genere mereretur, adveniente maturitate temporis, ita pro hominum salute constituisse, ut eundem acerbissimis pœnis addiderit, turpissimæque morti devoverit; ita ut eundem ipsum tanti muneris autorem, hæc tam incredibilis beneficentia, tam inusitata liberalitas, inauditaque clementia, in admirationem adduxerit, & quum magnitudine beneficii ac pondere premeretur, illius ex ore dulcissimo suavissimam vocem illam expresserit: *Sic Deus dilexit mundum, ut filium suum unigenitum daret*; quasi vero, nec tantum facinus incipi, nec cœpto fastigium imponi, nisi amoris impetu jubente atque cogente, potuerit; ut nec ullius apud Deum autoritas plus valuisse, nec imperium eidem impensius prope vim attulisse videatur. atque adeo primæ partes, in hoc humanæ redemptionis opere, Dei in nos amoris tribuuntur, ut, si quis totum hoc beneficium ab ea caritate, à qua prorsus emanavit, sejunxerit atque distraxerit, si quis polluto ore atque nefario, in divinam ejus hypostasim, hanc verborum contumeliam intorserit, non modo in eo nullam utilitatis causam habiturus sit, sed etiam damni rationem maximam inventurus; quumque maximis calamitatibus adductus ad aram Crucis Christi confugerit, non tam sibi spem aliquam salutis & veniæ in ejus ope constitutam esse persentiet, quam exitii & damnationis reatum, ab illo eodem fonte derivatum atque deductum, intelliget. nam, qui dixerit verbum contra Spiritum sanctum, *non remittetur ei, neque in hoc sæculo, neque in futuro*. quum enim solus obstructam ad divinam clementiam nostris sceleribus viam patefaciat illustrem atque latam, neque modo inclinantem ad severitatem Deum inflectere, sed etiam adducere ad misericordiam possit; omnem divinam opem à se abdicat, qui defensori suæ salutis acerrimo obtrectare sit ausus, illudque propugnaculum à sua defensione repellere, quo resistente omnes frangi adversariorum impetus possint. ab ipso enim, quemadmodum Leo summus Pontifex ait, est advocatio Patris, ab ipso sunt lacrimæ,
ab

ab ipso sunt gemitus supplicantium. Quum igitur admirabilia & infinita Dei munera, amoris pondere, penduntur, si superiora omnia, quod ea de Spiritu sancto fluxisse compertum sit, nullum nobis in æstimando finem reliquisse judicabuntur, quis erit modus æstimationis in eo, quod hodie Ecclesiæ universæ large effusæ donatur? non jam amplius beneficia, à divina caritate prodeuntia, sed divinam ipsam caritatem accipimus; non delapsa è cœlo munera colligimus, sed eundem ipsum datorem munerum adipiscimur; non rivuli quidam amoris funduntur in homines, sed fons ejusdem & origo, divina ad nos liberalitate, perducitur; ut, quum jam reliqui nihil esset, quod quidem in cœlo, tanquam in arca divinorum thesaurorum, recondideretur, quod non totum Dei amor transfudisset in hominem, omnem plane modum liberalitatis excedens, ipsum se tandem habendum, possidendum, fruendumque, præbuerit. Quapropter muneris & munificentia istius largitas in eam latitudinem immensitatemque protenditur, ut mens hominis & cogitatio, infinitum ejus prope campum excurrens, nullum plane exitum, in quo terminetur, inveniatur. Sunt Dei quidem omnia quæ adhuc extant in genus humanum beneficia, maxima, singularia, & late patentia, ne ab illis quidem mentibus ab omni concreione mortali segregatis comprehendenda; sed hodierni beneficii vis tanta propemodum est, ut ejus magnitudine ac lumine reliqua fere omnia pæne obrui obscurarique videantur. Etenim illa, quamvis clarissima, quamvis admirabili luce prædita, in Christi mortalitate, velut in aqua, perobscurè intuebamur; itaque ea nemo conspicerè reformidabat, ut aliquo saltem modo eam ferre lucem posse oculis videretur; hoc autem tanta undique est luminis claritate perfusum, ut, quovis illud cogitatione tanquam oculis circumspexeris, aciem animi perstringat, & mentis quasi luminibus officiat, splendore magnitudinis & gloriæ. Verum, quum diximus, principium omnium bonorum uberrimo sancti Spiritus fonte contineri, efficitur, ex eodem ut plures utilitatum maximarum rivuli, tanquam à suo capite, deducantur, quos omnes conferat in illius animi fructum, cui semel insederit, de quibus quum singula-

singulatim dicere infinitum sit, leviter quosdam oratione mea perstringam. Hujus primum singulari munere, qui spiritali prius vita privati erant, fractis adamantinis mortiferorum scelerum vinculis, in interruptæ, letali peccatorum tabe, veteris vitæ initia revertuntur; cujus quidem beneficii, quod eo tota nostræ salutis ratio contineatur, tanta est dignitas magnitudoque, ut merito inter mirabilia Dei opera primum numeretur. quid enim videri admirabilius potest, quam, destitutos luce & spiritu animos, qui horrendum angelis spectaculum focerant, jacentes erigere? quid stupore hominum dignum est magis, quam eos ipsos, qui Deo nauseam moverant, odoris teterrimi intolerabili foeditate, cujus ita pestifera & intoleranda natura est, ut, si capi corporis sensibus posset, neque intra illud turpe flagitiosi corporis bustum, ne efflaret, cohiberetur, animalia omnia necaret, maxima odorum suavitate complere? quid est, in quo divina potentia progredi ulterius possit, quam projecta cadavera, quæ non modo vermium & rerum omnium spurcissimarum turpissimi recessus erant, sed immanium quoque ferarum, anguium, draconum, Dæmonum, impurissimæ latebræ, nobiliori vitæ reddere, & ex aridis quasi samentis, amputatis à vite, & perpetuis apud inferos ignibus ad exardescendum addictis, in eam arborem, unde exsecta erant, inferere, ac pæne iterum in spem celestis regni producere? Neque ejus hæc tam prodiga ac liberalis, divina nobis munera largientis, effusio, in peccatoribus exornandis, hosce, quamvis latissimos, suæ beneficentiæ campos finesque præscripsit; etenim, quos, ad extremum non modo infelicitatis atque miseriæ, peccati regnum adduxerat, ex morris faucibus ereptos reducit in vitam; & depulso à cervicibus illorum nefario servitutis iugo, vindicat in libertatem filiorum Dei: non solum flagitiis omnibus contaminatos, omnique coeno turpitudinis oblitos, deterfis sordibus expurgat, sed contractas à sceleribus maculas in eam speciem pulchritudinemque convertit, ut, ejusdem quasi lenociniis, ita Dei ad se amorem alliciant, ut cælum prope fastidiens, quasi in altissimis illis ac beatissimis domibus, vel in hac infelicissima & humillima valle miseriorum, nullus præter unum

unum hominem locus reperiri poterit, vel ad delectationem jucundior, vel ad requiem opportunior, suam in illos sedem transferat, æterna, nisi prius ab illis repudientur, cum eisdem hospitia conciliet, sempiternam & indissolubilem amicitiam connectat, dulcissima colloquia habeat, maxime illorum similia, quibus beatas cæli mentes ineffabili jucunditate lætitiæque permulcet, demum omnes sibi esse cum illis voluptates atque delicias perpetua deinceps cohabitatione & individua vitæ societate, significet. O vere beatum illum, cujus pectus sedes est divini amoris suavissima! poterit ne hic non beatissimus esse, cujus ille domicilio pectoris contineatur, ad quem, tanquam ad fontem, summa cæli felicitas, nullo interrupta labore voluptas, æterna beatorum gaudia, referantur? poterit ne hic, in tanta cælestium divitiarum affluentia, laborare inopia; vel mærore affici, circumfluentibus eum undique, dulcedinis immensæ, infinitæ lætitiæ atque æternarum voluptatum, quasi fluminibus? Verum, quid est quod tantopere admiremur, quum legimus aut audimus, effervescentem animum divini amoris incendio, & pæne eadem qua Deum vita viventem, tantam habere pulchritudinem, ut nulla species ne excogitari quidem possit ornatior, eosdemque vibrare effuso lumine radios, & quædam quasi tela conjicere, ut semper omnium patens jaculis cor Dei trajiciant, incendantque flammis, in illius amorem ardentibus; quum ob Dei familiarissimam conjunctionem Deus quasi alter existat? David enim, Dei amicos, deos sæpius appellare non dubitavit. quum enim id, quod bonum vere appellatur & est, ea vi præditum sit atque natura, ut, tanquam angustis terminis comprehensum, ipso se contineri nequeat, nec quodammodo inhiberi, quin exiens à se, & tanquam à sua sede digrediens, migret etiam in alios, seque totum illis adjungat; nihil certe repugnabit, quo minus Deus, ex Basilii sententia, qui summum bonum est, suam cum illis, quos unice diligit, speciem, lumen, sapientiam, bonitatemque communicet. quod si fere paulatim fit, ut ad illius morum societatem traducamur, quo cum vivimus, cur non frequens Dei usus in sui amicissimos speciem quandam divinæ illius bonitatis expresserit? cur felix

ille animus plane divinus non fiat , qui vinculo consuetudinis ita Deum arcte complexus est , ut jam nihil possit esse conjunctius ? Si sole reperiusta nubes , ejus item ardore conflagrat , vel si speculum , aut quævis perlucida res alia , solis quoque radiis accensa , ita ejus luce coruscet , ut par soli splendeat , aciem oculorum perstringat , lumen longe lateque diffundat , nos , tanquam re aliqua omnem excedente fidem intellecta , mirabimur , audientes , animum , vitiorum suorum maculis purissimo Christi sanguine ablutis , si in Spiritus sancti lucem incurret , mutuatis ab eo radiis , divina prorsus caritate fulgere ? Sed hoc tam singulare beneficium alia etiam amplissima ac præclarissima munera consequuntur. O Sanctissime ac beatissime Spiritus , quid profecto sine te vita hominum esse potuisset ? quis tantis errorum tenebris cæcisque nubibus & procellis inclusam Dei notitiam haberet , si non illam in veritatis lucem proferret , & , disjecta caligine , tuæ lumen claritatis accenderet ? quis animi nostri robur , miserandum in modum clade à peccatis accepta fractum & debilitatum , ad cupiditates edomandas , ad reprimendos impetus vitiorum , ad resistendum Diabolo , confirmaret , nisi tua idem virtus cælestibus auxiliis corroboraret , & adversus omnes spiritualium inimicorum insidias tot virtutum præsidio tantoque comitatu muniret ? Tu mederis animis , sollicitudines detrahis , cupiditatibus liberas , tranquillitatem vitæ largiris , & mortis terrorem adimis. nam si quem semel nactus eris , Sancti spiritus patrocínio firmatum , ejusque custodiis vigiliisque munitum , hunc tu mortis & tormentorum minis terreto si potes ; quidquid enim illi mali acciderit , non modo repugnanti , sed ne recusanti quidem , sed quid inquam recusanti ? imo etiam roganti , & se sponte suppliciiis offerenti , evenerit. Et erit quisquam tam stultus , qui in summa felicitate non ponat , posse cum rerum omnium effectore & moderatore Deo , hospitio amicitiaque conjungi ; tam crudelis & inhumanus , qui non tantummodo ad se venientem peregrinum & hospitem , non libenti animo suscipiat , verum à se etiam per contumeliam abigat , atque contemnat ? est ne credibilis tantus in ullo furor , ut , quem Deus ad tam excelsum dignitatis

dignitatis fastigium evexerit, ut quasi Deus alter, si velit, effici possit, sic se ipse abjiciat atque prosternat, ut quadrupedibus potius quam Deo similis esse malit? fieri ne potest, ut in eam venerit contemtionem ac despicientiam apud homines perversissimos & despiciatissimos divina Spiritus sancti majestas, & præclara ejusdem munera, quæ eos, qui accepere, in cælum ferunt, sic multorum æstimatione conciderint, ut, tanquam vilissima quæque & abjectissima, proterantur & conculcentur? Quum igitur hic sacratissimus Spiritus, linguarum ignitarum specie, ad inflammanda mortalium corda, è cælo ad nos hodie sic illabatur, ut, tanquam medicus, non modo iis qui gravibus periculosisque confluantur cupiditatum morbis, medeatur, sed ut stirpem malorum funditus eradicet & evellat, ut, tanquam doctor, nos discussis ignorantæ tenebris erudiat, ut, tanquam beneficus, Dei filios, & quod majus est, Deos efficiat; ne, quæso, animæ nostræ domicilio tantum hospitem excludamus; demus nos huic excolendos; patiamurque sanari ab eo. sic enim fiet, ut nos tandem aliquando virtutum omnium locupletissimos accipiat illis beatorum sedibus jucundissimis.

O R A T I O V I,

D E

C H R I S T I D O M I N I

A S C E N S V.

A D

C L E M E N T E M V I I I

P O N T. M A X.

Sacrofanctus hic dies, P. B. quo tandem Sol ille clarissimus, qui, toto cælo luce diffusa, ereptum funesta nocte mortalium generi diem, diei lucem, luci splendorem,

dorem , restituerat , nobis obductu suspicientium oculis
ademptus, per immensam cæli magnitudinem suum omne
in superos lumen evexit , tristitiæ atque doloris acerbissi-
mi facultatem nobis suppeditare quodammodo videtur.
Etenim hæc plane repentina decessio , nova terris nocte
circumsulis suam eripuit speciem, decoremque subtraxit.
idem hic omnia splendore ornamentisque omnibus spo-
liavit nudavitque dies. quis jam , consolando , luctum
doloremque levabit nostrum ? quis in rei alicujus igno-
ratione versantes erudiet ? quis unum dispersos in locum
congregabit ? Veniat nobis in mentem, quis abierit, quis
discesserit. etenim , ab illo nos relictos desertosque repe-
riemus , qui quum sit Dei filius , ex ejusdem mente & di-
vinitate genitus, in quem unum conversæ beatorum men-
tes affluentem bonis omnibus felicitatem & beatitudinem
assequuntur ; non satis habuit, ad nos miseros, inimicos ,
& divinæ severitati perpetuis poenarum vinculis obstri-
ctos , delabi , humanam speciem induere , nisi etiam se
propter nimiam caritatem morti , non crudelissimæ so-
lum sed etiam turpissimæ , devoveret , & reconciliaret
nos Patri , meritis in genus humanum singularibus. non
ne igitur is doleat , & vehementer doleat , ô bone Iesu ,
& , plusquam omnem deceat amicum alterius amici dis-
cessu , commoveatur , qui tua vincula , qui verbera , cru-
cem denique illam , recordetur , quam tua hominibus sin-
gularis humanitas atque benignitas testem benevolentiz
in eos esse voluit , & reconciliatæ gratiæ monumentum ?
Verum hic plane regius apparatus, solemnis hæc pompa,
hæc plena latantium vocibus symphonia , communis Ec-
clesiæ totips latitia , tua hæc P. B. vestis , insignis auro
ac purpura , atque triplex hæc imposita capiti corona ,
sanctissimo auro gemisque distincta , summam indicit
universis latitiam , & , omni expulso dolore , quasi nu-
bium confictu, admirabilem exprimit ingentis gaudiî ful-
gorem. sed , quod mirandum summo opere videri debet ,
Apostoli ipsi , qui neque à complexu ejusdem avelli , ne-
que ad breve tempus ejus absentis desiderium pati posse
videbantur , à quo ne semel distraherentur , ad supplicium
rapi , atque cum eo idem prope capitis discrimen subire ,
magis animosè quam fortiter postulabant , hoc tempore,
quum,

quum, inspectantibus ipsis, non jam infra paucos dies, sed exactis omnium temporum spatiis, & completis annorum omnium conversionibus, reversurus abierit, quum id Angelorum testimonio confirmatum haberent, non dolorem modo percipiunt nullum, sed, quum se ingens intra pectoris angustias non contineret hilaritas, erumpit, seque in ore omnium atque oculis diffundit, ita ut gaudentes, latantes, exultantesque, Hierosolymam revertantur. Quid ergo est causæ cur nobis tantopere lætandum sit? Quod multa videlicet ex hoc fonte in nos commoda redundarint. etenim, ut multa præteream, nostris erepta sensibus Christi discedentis humanitas, quædam quasi nube disjecta, grandia quæ latebant miracula demonstravit; atque inde prorsus abdita Christianæ fidei parvè mysteria. tum, certissimis argumentis palam factum est id, quod multis ante seculis, quibusdam velut involucris obtectum, humana mens nunquam evolverat, Christum Dei esse filium; & Patri prorsus æqualem: tum, luce clarius effulsit, tantam ac prope infinitam fuisse caritatis potentiam, ut divinam in Christo majestatem cum deterrima hominis conditione conjungeret, & geminam naturam in unam colligaret hypostasin. tunc est illis ereptus is, qui eos pertinaciter detinuerat, error, Christum, libidine dominationis impulsus, imperii cupiditate præcipitem abreptum, in has se se ærumnas demersisse; atque ea veritas insita, eundem de regalibus cæli sedibus, ac prope de sinu Patris, excussum, ut, everso mortis imperio, à nostris cervicibus servile jugum depelleretur, & depressa mortalium mens, ad spem immortalitatis certissimam, & consequendæ cælestis Regni hæreditatis, erigeretur. tunc Apostolorum in Christum amor, humanarum cupiditatum societate perpetuo coherens, segregato divinæ charitatis incendio, quidquid intus in eo vel terrestre vel humile continebatur, velut aurum ardenti fornace, purgatus est, planeque purus effectus, nec dici propemodum potest, ad alium finem tanta divinæ mentis relata consilia, ut Christus Dominus, qui velut ignis per cuncta pervadit, suoque ambusta consumit ardore, relictis in æternis ac felicissimis sedibus, ubi, tanquam in fornace, divini amoris perpetuis

flagrant ignibus , incensis beatorum spirituum mentibus ; in has ærumnas descenderet , nisi , ut adstricta frigore peccatorum durissima pectora mortalium , quas cælo extulerat , flammis relaxaret , atque ad sui ipsius speciem pulchritudinemque formaret. : quid aliud , inquit , è cælo , amore ardens Christus , in terras attulit præter ignem ? quid fœdus illud iniquissimum , & insidiarum plenissimum , quod cum infestissimo hoste , sua ipsius calamitate atque pernicie , humanum genus inierat , effractus , quid ad distrahendas oves meas quæ segregatæ à cœtu reliquarum errabant , ab illa misera & impura societate , qua perpetuo quodam vinculo se cum teterrimo monstro devinxerant , quam districtum in illos amoris gladium præportavi ? hic diuturnam hominum pacem perturbabit ; hic primum omnia miscebit , turbas excitabit maximas , & , spe omni compositionis adempta , rem ad certamen contentionemque deducet , eosque in libertatem filiorum Dei , facta hostium cæde , vindicabit ; hic eos rursus contra bellum , quod à carnis illecebris , & ab inferiori animæ parte , collatis in unum viribus , renovabitur , satis firmo præsidio muniet ; hic tandem , quod ego vehementer exopto , quodque me præter cetera unum in hos labores impulit , evellens omnes hominis ex animo cupiditates , eundem perpetuo mecum amore conglutinabit ; quæ tum erunt mihi cum illo deliciæ ! quæ in ejus pectore plena requies oblectationis existet ! quibus voluptatibus , quanta cum jucunditate , perfundar ! Verum non illico , velut alis , ad summum divini amoris fastigium evolatur , sed illuc paulatim , quibusdam quasi gradibus , pervenitur. neque enim subito , quum posset , Christus Apostolorum animos , ejusmodi omnino amoris rudes atque expertes , expolivit planeque perfecit : sed , ut cernimus in hominibus , in arboribus , in fabrica , vel pictura , naturam , vel æmulam naturæ artem , suo quodam itinere ad ultimum pervenire , nec , simul atque producantur vel inchoentur , habere absoluri operis effectum ; ita , inchoato in illis pulcherrimo amoris operi , non nisi multis antea ductis lineis adhibitisque coloribus , extremam manum imposuit. quumque horrida discipulorum pectora , divini ferro eloquii subacta atque mollita , sparsum caritatis semen

exce-

exceperant, quasi herbescere primum voluit, deinde adulescere paulatim, ad extremum truncos ramosque producere, & in eam quam par est altitudinem pervenire. Credo P. B. pro tua singulari pietate ac religione, in tuis matutinis ac vespertinis contemplationibus meditationibusque, à te sapissime cogitatum, quanta, non solum industria, sed prope excellenti quadam divinaque ratione, in hujus operis constitutione, æterna rerum omnium procreatrix sapientia progressa sit. principio, ut mortalis amor ad cælestem deduceretur, necesse prius erat, ut à ceterarum rerum consuetudine abduceretur; atque, ut exornari planeque excoli posset, ex luto, in quo altius hærebat, extraheretur oportuit. quem inde, propterea quod altissimis implicatus terræ radicibus tenebatur, arctius quasi nodis astrictus, inaudito quodam invento, & tanquam adhibita machinatione aliqua, singulare divinæ bonitatis officium extraxit. Est enim, à consuetudine oculorum animum abducere, difficillimum, ut tantundem fere complecti mente & cogitatione possimus, quantum visu, auditu, ceterisque sensibus percipiatur. at vero in divinarum cognitione rerum, quippe quæ sint prorsus ab oculis remota, vix brevī aliquo temporis spatio insistere possumus, & quasi animo peregrinari. Itaque ad aucupandos à se fugientes animos Deus, & per terrenas voluptates & commoda volitantes, novam quandam ejusdem fere generis commentatus est escam, ad quam, propter ejus miram suavitatem, spretis voluptatum illecebris, undique omnium fierent maximique concursus. Sed quæ fuit hæc tam admirabilis, bone Iesu, conjungendæ mecum amicitia à te inita ratio? eo tuus in me processit amor, ut tantum facinus, atque omnibus seculis inauditum, aggredideris, eoque nisi perfecto non conquiesceres. Etenim, si præcipua vis est amoris, ut plura, simul inter se disjuncta, conjungat, & efficiat ex duobus unum; quæ fuerit ista potestas in ea, quæ naturam & conditionem non habent ut copulentur? quid est hominibus commune cum Deo? quæ societas tibi, omnium autori bonorum, supernæ bonitatis origini, cælestis sapientiæ thesauro, & perenni æternitatis fonti, nostris cum sceleribus atque flagitiis, cum nostris luctibus atque sordibus, intercedit?

at ego ita comparatum esse video, ut recte conglutinari amicitiae, nisi inter aequales, non possint. nescis sane nescis, quantas vires amor habeat. hic plane, si liber, alta rerum fastigia submittit, & depressa, prope in immensum, ad caelum usque, provehit, ut ad aequalem utraque exaequata magnitudinem, mutuae voluntatis vinculo colligentur. eo igitur hic, qui me stimulat, ardor impulit, quaeque exardescit intus magnitudo benevolentiae, ut, quo haec conglutinatio animorum fieret, & juncta semel amicitia, communione naturae & similitudine studiorum, perpetua foret, humana ab homine & deteriora suscipiens, divina ac praestabilia cum illo communicarem. O magnam amoris vim! o miram caritatis potentiam! o abstrusum atque reconditum cunctis mortalibus miraculum, & nisi divinitus in nostros animos se fides infunderet, prorsus incredibile! quid, non modo stupore hominum & admiratione dignum est magis, sed quod minus assequi cogitando humana mens possit, quam Deum opt. max. eundem infinitum, omnipotentem, immortalem, aeternum, neque iis omnino spectabilem qui hac vita fruuntur, lucis inaccessae, lumine divinitatis, mortalitatis nube comprehenso, ut acies nostra ferre posset, se uniuscujusque facultati accommodasse, seque ipsum praesentem intuendum, os, oculos cernendos praebuisse, infirma demum potentia, quae tantam mundi molem, nullo adhibito opere, nulla subjecta materia, sed unico tantum verbo constavit, cujus nuru & arbitrio caelum, terra, mariaque reguntur, veluti seposita, & quadam quasi veste detracta, suscepti corporis mortalitatem, omnibus prope viribus exutam, & à cunctis derelictam, crudelissimorum hominum libidini ac potestati permisisse? Se itaque Deus hominem fecit, ut hominum sibi gratiam & amorem, artissimo naturae ejusdem vinculo, conciliaret. Verum, corpus illud pulcherrimum & innocentissimum tanta cum dignitate conjunxit, tanto leporis & humanitatis sale conspersit, ut, quicumque in illud ora atque oculos convertissent, suavissima quadam dulcedine deliniri, insatiabili voluptate allici, & prope, iis, qui experti non essent, incredibili jucunditate se retineri, sentirent; emanabant è perenni illo caritatis fonte, dulcedinis immensae & infinitae

finitæ rivuli atque torrentes : erunpebant ex vasto illo
 divinæ bonitatis oceano , tanquam flumina quædam per-
 petuarum voluptatum , & deliciarum omuium. Illuc , in-
 quies , animum non possum inducere , ut diligam , quod
 carne aut sanguine careat. placet mihi ista defensio ; est
 enim ad communis imbecillitatem infirmitatemque na-
 turæ facile accommodata. ad eandem ego quoque descen-
 do ; ostendam plane tibi , si mihi morem gesseris , quem
 diligas : dilige Christum , qui , ut te intimum haberet ,
 mortalem figuram induere , & hoc laboriosissimum cor-
 poris pondus subire , dulce sibi & jucundum existimavit.
 tui generis societate delectaris ? audio ; corpus , quod ge-
 ris , ad cælestium rerum contemplationem nitentem ac
 properantem animum , ad ea , quæ oculis cernuntur , vi
 sua retrahit , ac retardat : te in Christi consuetudinem tra-
 de ; fruire ejus bonitate ; dulcissimos ejus mores degusta-
 benignitatem & mansuetudinem experire. ita enim fiet ,
 ut omnes tibi mundi deliciæ sordescant , illecebras libidi-
 num omnes , in unum collaras , cum hac tanta voluptate
 non conseras. si enim impurissimæ hujus seculi oblecta-
 tiones , si inquinatissimæ voluptates , & flagitiosissima
 mundi blandimenta , quum dies noctesque , tanquam as-
 siduæ domesticæque furia , scelerum conscientia , quasi tæ-
 dis ardentibus , exagitent animos atque perterreant , quum
 eadem sæpenumero cum capitis & fortunarum periculo
 conjuncta sint , tanta tamen perditos & flagitiosos homi-
 nes delectatione permulcent ; erit quisquam tam stultus ,
 qui non intelligat , probos homines , & honestos , & à su-
 periorum moribus abhorrentes , novo atque incredibili
 genere deliciarum ac voluptatum , in tanto præsertim
 otio ac vitæ tranquillitate , perfundi ? Si teterimus ille
 generis humani hostis , quo interdum mortalium profligati-
 simi ac perditissimi ab acerbissimo improbitatis jugo
 respirare possint , res turpissimas atque acerbissimas tot
 tantisque voluptatum illecebris atque blanditiis delinire
 solitus est ; cur nostri amantissimum Christum , ad rela-
 xandos piorum animos , & ad reficienda assiduis pane la-
 boribus atque vigiliis confecta sanctorum virorum cor-
 pora , exquisita quædam delectationum genera compa-
 rasse non existimabimus ? quarum jucunditatem nec ali-

cujus oratio narrare, nec cupiditatum morbo depravatus gustus percipere, neque mens aut cogitatio, rerum mortalium curis obstupefacta, capere possit. Aperit sæpe illis, suorum non immemor, Deus cælestium deliciarum quasi fontes uberrimos, ad illarum æternarum voluptatum atque præmiorum similitudinem: excitate cæli regionibus, & ex felicissimo beatorum concilio, gaudii & suavitatis æternæ quasi rivulos. hinc illæ dulces lacrimæ, hinc illa suspiria, hinc præ nimia jucunditate liquentis animæ ignitum illud atque ardens eloquium: *Stipate me malis, fulcite me floribus, quia amore langueo.* Verum, quemadmodum erat sperandum, res maxime successit, facile omnium sibi subito, quicumque ejus humanitatem experti essent, studium ac benevolentiam allexit. Quem profecto, natura tam barbarum, quem conditione tam ferum & inhumanum, tanta offusa oculis animoque majestas atque suavitas, non ad humanitatem deduxisset? quem porro tam durum & obstinatum animum, tanta ac prope divina beneficia non mitigassent? flebiles ac mœstos, suavitate orationis lætos hilaresque præstare, inopes & rerum omnium egentes, aut stipe pauperum more emendicata aut pane divinitus multiplicato alere, fovere miseros, & quibuscunque posset viribus augere, agros ac plane depositos sanare, surdorum aures occlusas ad vocem aperire; oculis captos ad aspiciendam lucem revocare, pedibus læsos gressu donare, vita functos supra naturæ leges ab inferis excitare, nihil omittere quod ad hominum benevolentiam novo aliquo genere beneficiorum conciliandam putaret posse conducere. etenim, vel summam & numerum beneficiorum exponere, non modo figillatim de uniuscujusque commodo atque utilitate dicere, prope infinitum esset. commemorare possem, ingentem sæpius ab illo multitudinem; nec inopia cibi nec labore perterritam, ut ejus se suavissima oratione, & salutaris doctrinæ præceptis, quasi ex longa fame, satiaret, per desertam vastamque regionem, rebus omnibus ad humanum usum necessariis carentem, traductam. Sed hæc me lux antea & vox ipsa deficiet, si velim omnia persequi, si omnes vobis suavissimas epulas indicare; quas iis benignissimus omnium parens Christus impertitur, qui se tandem

tandem in sinum ejus recipiunt, & , tanquam adhibito
 saniore consilio, post longos errores ad patrias aedes re-
 vertuntur. Adstat ad Christi nascentis vel morientis ima-
 ginem provolutus in genua, qui mox à mundi nequitia
 in Dei fidem clementiamque transmissit, & maximam
 prope vim lacrimarum effundit, & simul ingenti latri-
 tia ac voluptate perfunditur, ita ut abire totus in lacri-
 mas, nec ab assiduis deprecationibus amoveri, aut illi
 flagellum, quo se sponte lacerat, eripi possit è manibus.
 quemadmodum enim perpetuis imbribus obrutus, at-
 que horribili sævientis hiemis tempestate vexatus, &
 squallore obsitus ager, si sole redeunte, qui quasi pro-
 grediens tristitia quadam contraxerat terram, lætifice-
 tur, & vicissim cum cælo exhilaretur; tunc tepido le-
 niter aspirantis Zephyri flatu nives, vi frigoris gelu-
 que constrictas, dissolvente, omnis ille locorum squal-
 lor cum veris adventantis nitore commutatur; tum ter-
 ra virentes herbas emittit, & liquidis distincta gemmis
 gramina; solisque percussa fulgore, variis incertisque
 coloribus mire fulgent; jam amœni ubique prominent
 flores, volucres profluentibus alas aspergentes undis, ad
 lene eorum murmur suavissimos cantus numerosque mo-
 derantur; denique ea rerum est facies, ut nec alio terra
 anni tempore lætiorem proferre aspectum; quam quum
 ex hiemis tenebris emergit, nec tantam in aspicientium
 sensibus jucunditatem procreare videatur, quam quum
 liquidissimis suffusa guttis, quasi lacrimis, placido vultu
 ridere conspicitur: ita etiam, simul ac, maximo ac sin-
 gulari Dei beneficio, concreta scelerum frigore in pec-
 cantis pectore glacies, divinæ caritatis ardore quasi colli-
 quefacta, diffunditur, & ab eodem novi luminis clari-
 tate cæcæ noctis offusa caligo depellitur, ad gratiæ,
 quasi solis, adventum, recreatum continuo illud cernas,
 quasi bonum atque fertilem agrum, fundere bonarum
 cogitationum germina, & virtutum omnium, quasi
 florum, jucunda varietate distingui; quos manantes pas-
 sim ab oculis dulces irrigant aquæ, suavissimo quodam
 sensu doloris & amoris excussæ, atque eo intus efferri
 gaudio, ut nusquam posse consistere præ hac tanta ju-
 cunditatis magnitudine videatur; ita ut admirabilis ejus
 splendor

splendor pulchritudinis, Dei simul oculos moveat, & celestium agmina mentium, nova quadam delectatione, demulceat; quippe *gaudium est in calo, super uno peccatore, penitentiam agente*. Verum, jacta sunt hactenus duntaxat divini amoris fundamenta; qui, ut in Christo radices egerit, adhuc tamen sub terra delirescit; cujus tanquam crassitudine circumseptus, nondum ad aspiciendam lucem emerfit. terrenum est, quod te in Christo delectat. fervidum hunc ignem, qui tibi tantum excitavit ardorem, illæ propemodum flammæ conflagrant, quæ passim è Christi corpore erumpunt. rudis adhuc amor est, neque omni ex parte perfectus, sed tibi, qui, nisi mortale sapias, nihil prorsus necessarius. si desperas adhuc te ad altiora perducere, in hoc postremo caritatis gradu consistere. si potes nihil, quod non cadit sub sensum, adamare, dum te à ceteris abstineas cupiditatibus, tantas ex illo perenni voluptatum fonte delicias hauries, ut nusquam uberiores suavitatis fructus percepisse te dixeris. Hac ergo dulcedinis & jucunditatis ubertate completus, dele omnia ex animo rerum caducarum blandimenta. ut clavus clavum trudit, sic amorem amore repellas. Si tui vires amoris, earum conscius infirmitatis, periclitandas esse non ducis; si tibi deest animus, si clamorem, si castra, atque aciem reformidas, si adhuc vereris, illum in pulverem & solem, ut ajunt, educere; in hac, si non optima, at certe laudabili, Christi adamandi exercitatione & umbratili conquiescas. propterea sacra Christi nascentis humanitas, quam ex incorrupta Virginis mortalitate, tanquam ex humanæ infirmitatis humore, Spiritus sancti calor expressit, & intra virginei sinus angustias, velut in nubem, coëgit, ab Archangelo Gabriele umbra vocata est. *Et virtus, inquit, altissimi obumbrabit tibi*. Verum, in acie dimicantibus, subducto Christi ducis aspectu, hosti jam terga vertentibus, ad suavissimos ejus complexus; tanquam ad umbram, receptui signum cecinit Hieremias his verbis: *Spiritus oris nostri Christus dominus; sub umbra ejus vivemus inter gentes*. maximo & inusitato genere amoris prosequendus est Christus: sed, qui adhuc rei magnitudine deterreatur, qui sub sole diutius versari non possit, quod tantos non ferat ardores, umbram sequatur; qui,

qui, ad ulteriora procedens, viâ asperitate retardetur, in Christi sinum revertatur; tum, viribus inde collectis, totus se labori & itineribus committat, ut possit eo, quo tendit, quamprimum pervenire. neque enim ei molesti admodum sumus, neque adeo iniquo cum eo jure agimus, qui nunc primum in Dei familiaritatem sese dedit, ut eum subito, omni oblectatione, ex Christo homine quæsitâ, spoliari velimus; quanquam optima Christiani viri ratio, professioque ipsa veri germanique amoris, plane hoc suscipere ac polliceri videtur; neque enim, qui pro viribus, quasi subditis ignibus ejus aliquem quoquo modo concepit ardorem, deterrendus, neque deferendus est à cohortatione nostra, quo majores adhuc aggerentem faces, & novam concepto semper igni materiam ad incendium inferentem videamus. Etenim, ut, adhibita in consilium conditione humanæ naturæ, ita se Deus amari facile sinat, hunc tamen à nobis amorem, etsi cum excellentiore comparatum, mancum quodammodo atque vulgarem, in suo certe genere perfectum, exigit; totum, totum, sibi postulat, neque aliud quippiam in societatem, se præter, admittit; alios sibi coram æmulos parari, indignum ipsi & acerbum videtur. jam tibi non possum, amantissime Iesu, in amore respondere; tuus enim meo amor infinito præcurrens spatio, tuis te tarde vestigiis persequendi spem mihi pæne nullam reliquit. excuso te, inquit, & licet parem, atque accepisti, non possis reddere voluntatem, tamen, quod interim offers, majora aliquando daturus, non aspernor; vix possum sine te vel ad momentum temporis vitam vivere spiritalem; patior quoque, meque à te adeo remisse amari, non moleste fero; verum, audere, invito me, quenquam ad meos amores, ad meas delicias, aspirare? hoc unum præter cetera indignum maxime puto, velle præter me quenquam in aliqua parte apud te amoris hære; hoc nullo modo ferendum puto. manat ille quidem, de quo nunc loquimur, amor ex corde, à quo, sicuti sanguis qui fusus est per omnes corporis partes, derivatur: ita, quæ ex humana consuetudine & carne & sanguine conciliatur benevolentia, tanquam à suo capite & quasi fonte deducitur, ejus non angustum aliquem angulum, non bonam sibi partem,

partem, sed integrum Christus tradi mandavit, hoc primo caritatis præcepto, quod de dilectione Dei promulgatum est nobis, expresse ex Bernardi sententia præcipitur, *Diliges Deum tuum ex toto corde tuo*. si igitur partem ejus aliquam in ceterarum rerum desideria derivaveris, si cum parentum & filiorum tuorum amore communicaveris, si jam aliquid sibi honos, si quid gloria decerpserit, si magnam sibi quoque divitiarum partem vendicaverint, si, in communione ejusdem, illecebras voluptatum obtuleris; non jam cor integrum soli Deo sacraveris, non jam totum eidem te dederis: sed pæne tui partem exiguum, in qua hæere vix possit, obtuleris. itaque iusta ira excandescens amantis animus, ferens non indigne, solum, adductos sibi plures esse, ante oculos, molestissimos procos & acerbissimos hostes, principes tenebrarum harum, & vitæ hujus inquinatissimas voluptates, verum etiam in eandem domum ad flagitiosissimarum libidinum societatem intrusos; tuo protinus corde recedet, ejusdemque novis temere irruentibus cupiditatibus possessionem quasi vacuum atque caducam relinquet. ejusmodi erat, ante Christi ad felicissima cæli regna profectionem, Apostolorum amor in illum. non enim integrum solus possidebat, sed erat illi cum inani quadam eorum cupiditate communis; non totus divinæ illius humanitati adhærebat, sed magna, ut videbatur, ex parte altissimis orta cupiditatis radicibus ambitione nitebatur. trahebatur ille quidem plurimum dulcissima illius ac suavissima consuetudine, verum in ipsorum utilitates & commoda rapiebatur vehementius. eos enim, humanarum opinione dignitatum inflatos, tanta tamque immoderata libido dominationis invaserat, ut ad mortalis erecta spes regni fastigium nullis inde adversariarum rationum flatibus dejici vel dimoveri potuerit. Ecquis sane non miretur, qui vanas subodoratus illorum cogitationes, quasi ortus atque principia, acutissime non indagare cupierit, unde irrepfit in Apostolorum animis ista honoris gloriæque cupiditas? qui, ut omnia scrutetur, nunquam tamen ipsos, vel tentatos vel admonitos, sed sine duce nullo, sine indice, ad falsam de Christi regno opinionem pervenisse compererit. Etenim, cui tandem, vel regnandi

regnandi cupidissimo, non illico imperii spem omnem eripuisse Christi ingens illa demissio animi, & in voluntaria paupertate summa rerum omnium inopia? iter pedibus ingredi, pernoctare in oratione, stipem emendicare, damnare divitias, egestatem extollere, odisse elatos, animi demissos amplecti, omnes demum illi esse de divinis rebus sermones, adeo ut in obscura Christi voluntate nullum modo illis affectati regni lumen ostenderetur, sed palam semper in omni vita singulare paupertatis studium, & humilitatis amor, effulserit. Ingens illius, non ignominiae omnium maximae subeundae solum, sed sanguinis & vitae fundendae desiderium, & obstinatum simul illorum ad honores & imperia contendentem cupiditatem accipite. Dum Hierosolymam proficisceretur, ut viae asperitatem sermonis jucunditate leniret, & simul illum, qui effervescebat intus, paululum exhalaret ardorem, principi Apostolorum impendentem, & jam jam in se ruituram malorum molem effunderet; ille, admodum obstupescens Christi Domini dicto, Deus meliora, inquit, ô Domine. quasi hæc tantæ de illo à se conceptæ spei non responderet oratio, ac tam illustres dedecoris & ignominiae notæ à regiae majestatis insignibus abhorrent. Verum enimvero, etiamsi satis hinc cæca illorum cupiditas intelligatur, se tamen adhuc etiam manifestius in postremo Hierosolymam versus ascensu declaravit. quum enim, obortis lacrimis, tantæ fletet urbis interitum, vel propterea miserabilis, quod nec calamitatem quidem in ipsam redundaturam suspicaretur, atque adeo sibi ab omni æternitate certum atque statutum mortis turpissimæ tempus instare, ut jam jam cerneret æstuantem invidia populum furere, jam jam atrox nefariæ proditionis foedus feriri, jam flagitiosissimas sui corporis nundinas fieri, & certam facinoris mercedem exposci, iniquissima jam conflare judicia, jam ipsum ad tribunal judicis crudelissime rapi, accusatores subornari, causam dici, virgas expediri, crucem parari, morti innocentissimum caput addici, omnemque lacero corpore carnificinam pæne subire videretur; inter hæc tantæ acerbissimis commemoranda supplicia, ambiriosa natorum Zebedæi parens, in spem regnorum erecta, inter regni proceres

ceres ascribi filios , & in proximas regali fastigio honoris sedes collocari , petierit. Non potest animus , quem semel occupavit ambitio , quiescere ; necesse est , ut semper aliquid tale moliatur. non modo Christi objurgatione , à spe regnorum exclusi , & effundendi pro ipso sanguinis gloriæ destinati , in vetitæ spei cogitatione adhuc etiam revolvuntur ardentius , verum etiam in extrema illa oratione , quam , plenam altissimæ cujusdam doctrinæ & dignitatis , à cæna apud discipulos habuit , quum sibi vitæ finem instare , non necessitate naturæ constitutum sed parricidarum scelere properatum , palam denunciaret , quum tanti effectorem sceleris atque ministrum , non inter barbaros homines esse , non inter feras versari , sed inter eos , quos tanto amore dilexerat , quos sibi vitæ socios adjunxerat , arcanorum mysteriorum participes fecerat , quos omnium gentium duces ac magistros elegerat , demum inter ipsos delitescere indicaret , quum se intestino atque domestico opprimi malo quereretur , quum , sese morti offerens , voluntarius , extremos suis ferret amplexus , & mutuam præciperet etiam singulis , tum universis , caritatem , quasi de summa imperii dimicantes , in contentionem principatus certamenque venire , ut ad eos motus , tam temerarios , tam præter expectationem omnem concitados , aliqua ratione sedandos , necesse fuerit omnium tunc temporis hominum oppresso sollicitudinibus Christo , cui magnum illud opus atque difficile humanæ redemptionis in manibus erat , illi , inquam , fuerit necesse elatos vana spe animos longa cohortatione deprimere , multisque adhibitis verbis , illam , à communi sensu hominum abhorrentem , veritatem , in omnium cordibus defigere ; nimirum , quæ apud Deum . illum omnibus superiorem confirmat esse , qui suæ voluntatis & arbitrii fastigium , ceterorum omnium imperio potestatique , submiserit. Verum nulla ratione aut modo quasi terminis se continere solet ambitio : sed , velut multorum imbrum atque torrentium aquis , quasi opibus , auctus amnis , spretis , quas intra ripas evolvitur majore vi ac mole agens undas , tumidus atque insolens , cuncta pervadit ; ita , ubi semel hæc egressa cupiditas est , ira se per latos spatiosque

Sorsque libidinis campos effundit, ut, irruens rapido in
 mentes hominum impetu, fere nullis arceri viribus pos-
 sit. O graves atque tardæ, ad eundem in eam Christi,
 de mundi contemptu, sententiam, hominum mentes! ô
 dura ad excolendum Christianæ disciplinæ præceptis cor-
 da mortalium! etenim de indignissima Christi morte
 non audierant ab eo, qui ipse vidisset, sed eidem ipsi
 spectaculo præsentibus adfuerant; ipsum proripi, cædi, li-
 gari, spectaverant; impositum ipsius humeris durissi-
 mæ crucis pondus inspexerant; quumque, se humana po-
 testate omni abdicatum solum sibi cæleste regnum, in
 quod ipsi adoptione perventuri essent, reservasse decla-
 rasset, res ut nemini dubia esse posset, in ipso ad superos
 ascensu interrogatus ab illis est, num esset sub idem tem-
 pus regnum Israël revocaturus; quanto ipsi suum incen-
 dissent ardore desiderium, si in obscura Christi volun-
 tate sibi lumen aliquod effulisset! quam celeri repente
 cursu huic ne oblatæ quidem spei velificari essent, si
 vel levis saltem aura promissionis afflavisset! si, quum
 nemini unquam in suspensionem affectari regni venisset,
 quum non obscura solum in hoc suæ voluntatis indicia
 sed signa clarissima dedisset, quando summo omnium
 studio delatum ultro recusavit imperium, ab eoque ut
 à re pestifera noxiæque refugit, quasi spe certa atque opi-
 nione inflati, vela cupiditati dedere; quanto tandem stu-
 dio exarsissent ad regnum, si propensæ incitatæque vo-
 luntati, aliquis etiam stimulus accessisset! Sed unde hæc
 tam alte radicibus actis funditus est eversa cupiditas?
 unde tam late servens restinctus est ardor? hujus rei tam
 admirabilis causam, in qua vel maxime vis illa divina
 virtusque cernitur, quod narrationem illustrem magis
 longioremque desiderat, omitto in præsentia, & in aliud
 dicendi tempus rejicio. Hic itaque imbecillus, & nunc
 primum in lucem editus; discipulorum amor, non recta
 ferebatur in Christum via, in quem nimirum quosdam
 quasi per anfractus circuitusque concludebatur; magnus
 sane, sed cœnoscus ac turbidus præterfluebat; non obli-
 tus cœno, ex alvei fæce contracto, non ullis delibutus
 fordibus, casu aliquo adlapsis extrinsecus, sed pæne ejus-
 modi à suo fonte deductus, at purus & liquidus emana-

verit, nulla præter Christum admistione fucatus effluerit. verum, si ad illius humanam tantummodo naturam revolvatur, tamen suam adeo perfectiorem maturitatemque desiderat, ut, si cum excellentiore absolutoque compareretur, pæne sit nomine amoris indignus. magna profecto percipitur, & ad sensum cogitationemque dulcissima, ex Christo præsentem, voluptas; sed multo etiam major exoritur ex eodem in cælum profecto iucunditas, & maximo cum fructu conjuncta suavitas. Si primus divini amoris aditus in tantam se tibi speciem & pulchritudinem offert, ut ea mirum in modum rapiaris, quid si superiores ejus domus partes aspexeris, si peristromata, si tapetia, si conchyliatas vestes, perlucidas auro gemmisque, si aulas omni prorsus opulentia confertas contempleris, si interiora ædium loca cernas, multarum rerum iucunda quadam varietate distincta, ornata figuris atque picturis, instructaque rebus omnibus, qua lætitia perfrui? quanta oculos iucunditate oblectareris? nunquam ut cupidum contemplandi animum, admirabili rerum earum aspectu, posses explere. ascendendum est, fateor; dulcissimo Christi carendum colloquio. triste quidem desiderium, & ad sensum peracerbum, sed vero solidoque cum gaudio nobis jam inde venturo compensandum. Si puero, subducto à nutricibus lacte, paululum solidioribus cibis apponatur, dentibus ea vi conatuque carentibus, qui est ad pastus capeffendos conficiendosque necessarius, flet, dolet, laborat, complet omnia luctibus, atque clamoribus; assidensque matris in gremio, assuetas appetit mammas, earum ubertate satiari desiderat; at vero ubi primum, ætate aliquantulum annorum decursu corroborata, malis robustioribus facilius extenuatos atque mollitos deglutire cibos assuefcit, & eorum incipit varia & exquisita genera degustare, ipsorum tanta suavitate afficitur, ut illa prima infantium alimenta, præ istorum dulcedine negligat prorsus atque contemnat. Est profecto spirituali quasi ætati ineunti tener ille pietatis sensus, veluti lac quoddam, pernecessarius. ita enim divina providentia comparatum est, ut per gradus quosdam, quasi per ætates, spiritualis homo ad maturitatem perducatur; sed quemadmodum cibi ita sunt ætatis unius proprii,

proprii, ut minus alteri convenient, ita, si quis spiritali adhuc ætate confirmata in illo eodem statu reponi desiderat, quo maxime fuerat quum è tenebris peccatorum in cælestis gratiæ lucem emerfit, primum nihilo plus agit, quam si det operam, ut ad incunabula & rudimenta virtutis, præcipiti fere cursu, regrediatur: deinde in maximum periculum adducitur, ne optatam sibi spiritus dulcedinem, non suggerente Deo, uberemque divini luminis copiam subtrahente, spiritali prorsus vita destituatur. Itaque, dum se magister optimus à discipulorum expediret amplexibus, illum summa vi retinentium: *Expedis, inquit, vobis, ut ego vadam.* nunquam enim è re ipsorum profectionem suam esse dixisset, si non suam ipsos præsentiam à maximis muneribus consequendis omnino prohibere intellexisset. maxima, ingentia, innumerabilia, à Christo assidue acceperant beneficia; ceterisque silentio prætermisiss, hoc, scilicet ejus videndi & contemplandi, mihi ceteris unum admirabilius videtur. quamobrem, mea hæc tempora in tua secula non incurrisse, beneficentissime Iesu, vehementer doleo. quis enim erat, aut tam agrestis, aut tam inhumanus, qui, quum te semel aspexisset, non se maximum cepisse vitæ fructum arbitraretur? quid enim beatius iis, quibus te, omnibus semper horis, affari, prope te esse, tecum cibum capere, concessum erat; qui digni habitati sunt, qui os illud egregium intuerentur & divinæ vocis sonum audirent, cujus imperio ac potestate sæpe maris ventorumque potestates conticuerunt? maxima hæc inquam, erant beneficia. verum, nullo alio largius munere donandi ac locupletandi erant, quam divinis Spiritus sancti muneribus; quibus ita aucti completique sunt Apostoli, ut, ab illis quasi angustiiis erumpentia, in totum se pæne terrarum orbem effuderint. neque enim benignitas tanta atque largitio speranda mortalibus erat, nisi propriis beati corporis dotibus, quas dicimus, suscepta Christi eveheretur humanitas, unde cælestes divinosque thesauros, omni quidem opulentia & divitiarum copia præstantes, & quasi per quædam involucria atque integumenta nostris olim patribus ostensos, non modo propalam omnibus collocaret, sed large etiam effusque

donaret. O nos in æternum miseros, si non hæc tibi tandem, scilicet in cælum abeundi, inita ratio fuisset! frustra enim, ad illud altissimum cæli domicilium, universorum vota mortalium contendissent, suos omnes frustra quilibet conatus, ad ipsum se jacentem erigendum, contulisset, nisi tu, clarissima cælo luce resurgens, ad te omnium hominum animos pertraxisses. si non ad quartum supra terram ambitum sol, princeps & moderator luminum reliquorum, cuncta sua luce compleret, nunquam vi sua, atque calore tepefactos, & attenuatos terræ excitaret, attraheretque vapores: ita, nisi Christus dux beatorum & princeps, eorum, qui per has vitæ mortalis ærumnas in illam beatissimam patriam ingrediuntur, terræ cælique magnitudinem & omnes Angelorum ordines emensus, ad Patris dexteram effulgeret; nulli patuisset aditus in cælum, neque humi defixam & carnis pondere depressam mentem paululum erigendi potestas data esset. quando enim illud maximum spiritalis lætitiæ flumen irrupisset, quo pæne toti obrueremur; nisi se palam Christus inimicissimis nobis cælo in conspectum dedisset? neque enim inflammatos quisquam ad pugnam duorum hostium animos ab armis recessisse, atque omnem memoriam injuriarum oblivione sempiterna delendam censuisse, crediderit, etiamsi compositis controversiis pax per procuratores constituta sit, & per obsides confirmata; nisi uterque populo princeps mutuis fecerit amplexibus reconciliatæ inter se gratiæ significationem, & solemni quadam carimonia depositis armis fœderis religione sibi fidem uterque devinxerit, tum demum sedatis discordiis, ab armis discessum existimari, tum latum pacis nuncium divulgari, militibus epulas atque congrua præberi, omnia flammis collucere, obstrepere cuncta fulminibus tormentorum, tubarum sono, clamoribus, multitudo solet significare lætitiā, neque vero æquum erat, ut, ad faciendam placati numinis fidem; divina à Spiritu sancto munera mortalibus deferrentur, etiamsi satis Deo per Christum factum fuisset, atque inviolabile illud fœdus, ejus sanguine ictum, quod perpetuo esset duraturum, antequam humanam Christus cælo naturam inferret, quæ, ad dexteram Patris
excepta,

excepta, omnium constitueret finem malorum. tunc sanctus à cælo Spiritus se se large effudit in homines; tunc, cælestis gratiæ inopes & egentes, divino cumulati munere recesserunt; tunc ignis atque spiritus vehementis speciem visus est suscepisse, quum divini in nos caritatis excitaret incendium, &, de cælo viribus ad resistendum Diabolo comparatis, nos promptos atque alacres redderet, & ingenti unumquemque latitæ cælestique voluptate perfunderet. fuit quoddam tempus, ut ex antiquissimis constat sacrarum rerum monumentis, quum longatium annorum serenitate, nullis terra est prope imbris irrigata, ex qua repente aquarum penuria, maxima est undique siccitas consecuta: hinc primum apertis terræ faucibus depressos in immensam altitudinem specus existere, arido exustoque solo, herbas suo succo fraudatas languescere, ad extremum, emoriente terra corrumpi, spoliatis ubique florum, herbarum, frugumque vestitu, camporum immensitatibus, steriles undique inter arenas, nullam arborem, nullos terræ ornatus, nullum culti soli apparere vestigium; & quos miseræ illæ atque perditæ gentes campos antea collesque viridissimos nitidissimosque, vidissent, hos ita vastatos atque desertos intuebantur, ut, absumto æstuanti perpetui temporis ardore succo omni, quasi sanguine, tanquam horrida atque ingentia cadavera amisso spiritu jacere viderentur; deinde suspici cælum ardere plurimo igni; stellæ crinitæ, sidera cadentia, faces nocturnæ, portentaque alia, aut obversari oculis, aut vanas exterritis ostentare species, cælo terræque mortalibus extrema omnia portendi; quum tandem elapso in tot miseriis ærumnisque triennio, & hominibus illis atque nationibus afflictis & miseris, jam non salutis spem sed finem malorum exitium expectantibus, fractus est ferox & obstinatus in eorum perniciem Eliæ animus, & satis adhuc domitas effrenatas illorum ad scelera cupiditates existimans, sonitum calamitates miseratus est, & fusus in preces, ecce tibi maximum, &, nisi à Spiritu sancto proditum memoriæ ac literis esset, incredibile miraculum; qui cælo nubes dispererat, disjectas idem cœpit revocare. sed primum excitata quædam è mari dicitur nubecula, æstu fatigatis allatura solarium,

in qua, reliquis velut hominis cujusdam membris obte-
ctis, ima pedum sunt animadversa vestigia; hæc magnis
repente aucta clementis, cælo obducto, largum repente
imbrem excussit; quem æstu sitique confecti homines
excepere, & crebris terra discessionibus quasi hianti ore
captavit. sic, ubi Christus Dominus non aliena subleva-
tus ope, sicut Elias fuerat igneo per aërem curru, sed vi
divinæ naturæ, in unam eandemque hypostasim cum hu-
mana colligatæ, recto ad cælum cursu properabat, ita
nube quasi involucris obtenditur, ut vehementer cupidis
contemplandi discipulis amplius aspiciendi facultas nulla
fuerit, quæ decem post dies adeo copiosos erat expressura
munerum imbres, ut large illis effusæque terrarum orbe
rigato, mundi totius renovatio consequeretur. Denique,
nisi se Christus aliquando à nostris oculis removisset, fu-
turum profecto fuisset nunquam, ut nostræ cum eo men-
tes inexplicabili illo amoris vinculo conjungerentur. qui
fieri potest, inquires, ut Christi aspectus, amoris sedes ac
domicilium, à summa nos ejus caritate repellat? citius
dixeris, divinam illam humanitatem, omni quidem sua-
vitate refertam, non modo ad voluntates sibi concilian-
das conducere, sed ad eas perpetuo in ejus amore ac be-
nevolentia retinendas, tenacissimum quoddam quasi glu-
ten esse debere. Verum hæc maxima in Christi carne sua-
vitas, quæ te tantopere delectat, tantum abest ut perfe-
ctæ huic animorum conjunctioni prosit, ut sit etiam im-
pedimento, quo ea minus existat. immo, Christum in-
ter animumque media, ita unum ab altero separat, atque
disjungit, ut conglutinari non possint. crederes, nisi ex-
perientia plane ita esse doceret, tenuissimum illum pul-
verem, quo interdum paries aspergitur, adeo pertinaci-
ter contra ceram eniti, ut, hædere conantem, constantis-
sime repellat, & eo usque pugnet, donec totus inde re-
moveatur. qua nam alia Christus ope, nisi sancti Spiri-
tus, nostris erat animis agglutinandus? verum, si non vel
minimum à nobis ante, quemvis, erga Christum, terre-
næ cupiditatis affectum excusserimus, quilibet ejusdem
nobis infigendi labor eludetur; ut ipsa etiam Spiritus
sancti largitio, quo omnes vel minutissimas atque levissi-
mas affectionis particulas amovendas intelligeremus, aut
sine

sine placido anxia lenis afflatu, aut valido ventorum spiritu, facta Apostolis non fuerit. tantam ille innocentiam, tantum animi nitorem, adeo eximiam singularemque munditiam, sibi beatissimus Christi amor efflagitat, ut ibi prorsus recuset esse, ubi suavissima ex Christo homine percepta voluptas princeps sit ad benevolentiam conjungendam. quod si adeo delicatus, adeo morosus est, adeo plenus suspicionis, ut in illius societatem affectionis includi tantopere recuset, quæ quamvis se se in aliquod mortale porfundat, nil nisi Christum attingit; quis tanta stultitia præditus, quis ita prorsus mentis inops atque consilii reperietur, qui existimet, ad illum descensurum esse eum, & se cum illo copulaturum, qui non levi tantum pulvere perspersus sit, sed luto, sordibus & rebus omnibus foedissimis atque turpissimis, oblitus, ita flagret ambitione atque libidine, ut omnibus omnium voluptatum studiis in unum pectus, tanquam in unam domum, convocatis, & infinita honoris & divitiarum cupiditate, velut in uno cubiculo inclusa, quocunque incesserit, ipsam pæne iter impressum libidinis & avaritiæ vestigiis relinquat, quæque venerit in loca, erumpentium cupiditarum flammis incendat? verum non modo suam ipsius innocentiam, atque candorem eximium, cum istorum impurissimis sordibus non commiscebit, sed eorum etiam conspectum reformidabit, neque apud illum erit, à quo infinito quodam intervallo disjungitur. Iam vero alias quoque utilitates & commoda vel maxima repudiassè videbantur Apostoli, dum, illa immoderata tristitia, vim Christo adhibere, ne discederet, nitebantur. duo enim præstantissima munera, nobis prorsus necessaria, suscipiet; duas sibi ipsi personas, humano quidem generi utilissimas, imponet; alteram Patroni, summi sacerdotis atque Pontificis alteram. quid est enim tam omni populo necessarium, quam assiduæ sacerdotum deprecationes? quid, ad expiandas scelerum sordes efficacius, quid ad publicas calamitates ab hominum pernicië depellendas utilius, quam Dei misericordia atque benignitas, sanctissimis Pontificum sacrificiis atque muneribus conciliata? in omnem igitur æternitatem, ad placandam numinis iram, muneri Pontificio præerit, & ad eum Pontificem

apte congruenterque : cui non satis visum est, suam semel in hoc nobis operam , pactionis vinculo , devincire , nisi etiam eandem sacramenti religione obstrinxisset : neque solum Deus , inquit David , in id quod semel promiserat obligandæ fidei sacramentum dedit , non solum juris jurandi & ut ita dicam existimationis periculo facturum obligavit se , nunquam ut Christus inito pro nobis abdicaret sacerdotio ; sed ita etiam juravit , ut nullum futurum esse tempus juraverit , quo tempore sui se jurisjurandi pœniteret. hic erit ille pontifex , qui , cum semel scelerum maculas suo sanguine deterfisset , in suprema cæli regione constitutus Deo proximus, mundissimam sui corporis hostiam pro communi hominum salute ad sacrificium propositam , & in Cruce immolatam, in perpetuum pro peccatis offeret ; ad cujus aspectum ut , coacta vi frigorum , glacies , solis ardore tepefacta , diffunditur , ita divina scelerum gelu constricta benignitas in largum atque copiosum munerum imbrem dilabatur ; hæc pœnz nos judicioque proripiet ; hæc omnem à Deo iracundiam propellens , ut nobis temperetur , efficiet : hic denique , tanquam Patronus omnibus , vel naturæ vel gratiæ præsidis, ita ad dicendum paratus accedet , ut , quamvis Deus , justus judex & fortis , gravissimis injuriis laceffitus , maximis criminibus violatus , capitali à nobis odio diffideat , quamvis sceleratissimi , impuri , pestiferi , supplicioque dignissimi , simul tamen ipsius vis orationis omnem nostram importunitatem ex intima ejus mente convellet. Quod si summus dicendi magister optime præcipit , idque in summa oratoris laude ponit , ut taliter quisque afficiatur , qualiter eorum animos , apud quos dicit , affici cupit ; frustra enim orator , quamvis disertus , quamvis ornatus , quamvis oratoriis præceptis abundans , apud judices aut dolorem aut misericordiam aut invidiam aut timorem excitare dicendo conabitur , si non antè omnes eos motus , quos judicibus adhiberi velit , in se ipso impresserit , atque inusserit ; quæ vis , qui impetus , qui ardor animi pro nobis postulanti Christo deerit ? qui ut misericordiam Deo commoveret , captus est ipse antea misericordia , ut propter nullam aliam causam se in hanc humilitatem naturæ nostræ dejecerit , quam ut simul in

miseri-

misericordiam prolaberetur, ac propterea debuerit, ut ait Apostolus, per omnia fratribus assimilari, ut, misericors fieret. Verum quid ais, ô Paule? vide, ne quid impium, ne quid sacrilegum, proferas; vide, ne, dum vis Christo susceptam hominis attribuire naturam, simul illum coneris de summa illa atque perpetua in homines benignitate misericordiaeque deicere. quando enim destitit suam Deus hominum generi misericordiam impertiri? quo tempore non est infinitam illius in se homo benignitatem expertus? non ne sæpius ultro est occurrere solita supplicibus, nullius oratione provocata? quando Deus, nobis propter peccata nostra vehementius iratus, novo aliquo genere calamitatis impudentissimæ hominum ad peccandum licentiæ obviam ire constituit, quin adhibuerit, in consilium cogitationum suarum, misericordiam atque clementiam? Verum, nihil est Paulus nisi sanctissime, nihil nisi religiosissime, loquutus. fuit illa semper Dei, P. B. in omnes homines misericordia, quæ quum sit unum & idem ac Deus, immo Deus ipse, nunquam potuit neque poterit ab ipsa divina natura seungi. semper clementiæ & miserationis munera inter homines ab illo perenni misericordiarum fonte manarunt. hic nobis paruit semper, neque est illa ejus ingens donorum effusio, ulla hominum importunitate, contracta; verum, neque affectionem ejusmodi sentire poterat, quæ, quod unius est propria hominis, non cadit in Deum, ab omni concretione mortali sejunctum, neque illius vi omnino commoveri. ut igitur infinitam illam bonitatem atque sapientiam, non modo re ipsa ærumnarum & calamitarum nostrarum, opem ferendo, misereret, verum etiam sensum hunc humanitatis, & illam quæ suscipitur ex afflictis hominum rebus ægritudinem, haberet, ad induendam formam servi, atque naturam iisdem prope affectibus obnoxiam, suam infinitam bonitatem incredibilis vis amoris adduxit. Si nihil est igitur, quod tantopere valeat ad animum judicis ad misericordiam adducendum, quam ipse idem misericordia & dolore incitatus orator, quantam conciliabit nobis apud ipsum Patrem misericordiam, quum non solum commotionem suam verbis, sententiis, voce, vultu significabit, verum totis etiam

impressa membris, acerbissimi signa doloris, ostendet? si,
 ad conciliandam sibi iudicum benevolentiam, dicentis
 quam maxime valet autoritas; quis dubitet, Christi du-
 ctu & aspicio tutum sibi receptum ad expertam Dei cle-
 mentiam fore? qui propter divina & immortalia meri-
 ta, & virtutis egregiæ laudem, ad id honoris culmen
 ascenderit, ut proxime ad Dei maiestatem & amplitudi-
 nem videatur accedere. si maximam victoriæ spem affert
 iudicis animus, sua eo quo impellitur sponte propensus,
 si eo, quo cursum intendimus, quam citissime pervenire
 speramus, quum eo nobis est velificandum, unde aliquis
 status ostenditur; quis jam in Dei misericordia, qui vult
 omnes homines salvos esse, felicem, Christo postulante,
 non speret eventum? si demum adeo rogantis dignitas
 & gratia semper in iudiciis floruit, semperque dominata
 est, ut res ad vincendum nulla plus possit; quis Christi
 gratia non moveatur? quis se, ejus comitatum studio,
 Dei opem nequidquam putet imploraturum? quippe &
 propter naturæ communionem & propter voluntatis con-
 spirationem, eandem, in quam Christus iverit, senten-
 tiam Deus tueatur. quo enim Pater, à filio rogatus, non
 descenderit? quid ab illo non impetraverit? quum ad il-
 lorum utilitatem postulata retulerit, quos, laboribus ma-
 ximis susceptis, periculisque gravissimis aditis, ex ho-
 stium vi manneque eripuerit, quibus vitam sua ipsius mor-
 te pepererit. quid, si illud pectoris vulnus, si pedum &
 manuum cicatrices, ostendet? jam, quantam in Deo mi-
 sericordiam concitabit! quantam in Dæmonem conflabit
 invidiam! quantam in nos benevolentiam conciliabit?
 Tanta ejus, in oratione, futura vis est, ut vel unus ille!
 cicatricum aspectus, non Dei inclinantem modo ad ho-
 minum perniciem animum erigere, sed adversantem et-
 iam ac, si fas est dicere, repugnantem, ut Imperator bo-
 nus ac fortis, capere possit. Possem hoc loco argumenta
 congerere, prope innumerabilia, utilitates maximas enu-
 merare, infinita in Christi patrocinio constituta nobis
 commoda proferre: sed video, multa mihi esse necessa-
 rio prætermittenda; nonnulla leviter pertingenda, quo,
 prospero soluta cursu, aliquo tandem exitu concludatur,
 &, tanquam in portum, contractis velis, mea invehatnr
 oratio.

oratio. Nolite igitur, carissimi Christo discipuli, tanta in nos profectura ex Christi discessu commoda pervertere. non hic tantum vestra res agitur, sed communis omnium salus in vestro dolore periclitatur. nihil est Christo nostro suavius, nihil humanius, fateor; ut in ejusdem profectionis cogitatione defixus sentiam, à me ipso viscerum partem avelli. si minus justo, at pio tamen, dolore affectos vos esse concedo; adjuvo etiam meis lacrimis mœrorem vestrum: verum, si nihil absentia, de suo in nos amore, detraheretur, si nostro in illum magnus etiam cumulus accedet, si majora perceptis lucra faciemus; profecto abjicienda hæc animi mollicies erit, efficiendumque, ut cedat utilitati dolor, & hæc quantacunque jactura, utilitatum maximarum compensatione, leniatur. non est sapientis, suæque utilitati servientis, commodum aliquod maximum, minoris adipiscendi causa, præterire. quid si demonstrem, non ejus-vos dolore commotos, sed vestra causa in tantum mœrorem adductos? nonne, multo vos pluris ipsos à vobis quam Christum diligere, convincamini? Verum, illum ipsum potius, cujus à vobis discessum doletis, dolorem vestrum increpantem audire. *Si diligeveris me, gauderis utique; quia vado ad Patrem.* Quid tibi venit in mentem, dulcissime Iesu, de illorum amore dubitare, quos ob tristituz decessionis nuncium, tanta vis mœroris invaserat, ut in illorum verbis, precibus, voce, vultu, collacrimatione denique, tanquam cuncta pervadentis doloris vestigia conspicerentur? Equidem, ut à me de cæteris judicem, necesse est, ut plurimum diligam, quem sine lacrimis atque dolore à me distrahi atque divelli non patior. profecto, ipsa hæc tam lugubris Christi mortis abitusque commemoratio illos in lacrimas mœroremque vocaverat; sed multo majorem in luctum atque squallorem sua ipsorum orbitas solitudoque conjecerat: non tantas, hoc tam improviso ictu consternatis animo miseris, Christi discessus doloris faces accenderat, quanta iisdem ea, quibus erant carituri commoda. At vero suis incommodis graviter angitur, non amicum sed se ipsum amantis est. Quid te ne ab illo diligere existimares, qui tuis honoribus, commodis, ac rebus prosperis, non æque actu ipse, gauderet?

deret? etenim, si Christi utilitas potior illis fuisset, nã ingens ad eos gaudium ex ea, quæ perventura ad Christum erat, gloria venisset. & sane, qui fieri potuisset, quin ea, quæ tum in ejus ore vultuque, quum nostræ salutis sui sanguinis precio redimendæ tempus instaret, eminebat hilaritas, perturbatis & afflictis omnem ejiceret ex animo profligaretque molestiam? qua se ratione continuissent, quin illi ultro ferrent amplexus, quin gratularentur, quum scirent, eundem debellatis hostium infestissimorum copiis, afflictis ac prope deletis vitiorum monstris immanissimis, animorum præda onustum, hostilibus spoliis ornatum, more triumphantium, universa cælestium agminum turba, prope convulsa suis sedibus, obviam procedente, ad summum cælestis Regni fastigium, esse, per omnes beatorum ordines, tanquam per gradus, evehendum, & in illa honoris sede celsissima ad Patris dexteram collocandum; quum intelligerent, tribuenda eidem fore vivorum mortuorumque omnium judicia, ceterosque honores amplissimos & immortales, æqua suorum meritorum præmia, decernendos? Si igitur expedit nobis, si gloriosus est tibi futurus hic è mundo discessus, quandoquidem nos jam dudum nimis indulsimus; abi, proficiscere, tuis rebus gestis amplissimis triumphas, frue hac tua maxima gloria, nosque tuo amore leviter intentos, quem à rerum fluxarum cupiditatibus tua hæc suavissima vindicavit humanitas, ne desistas usquequaque vehementius inflammare. Maximum, perfectissimum, ac prope divinum, ut ante dixi, amoris genus suo sibi jure à nobis exigit Christus, non humilem, non vulgarem, non usitatam inter homines caritatem efflagitat, sed singularem & insolitam benevolentiam, & si non eam quæ digna sit Deo, tantis nominibus de nobis optime merito, at quæ certe, pro viribus, ad divina illius in nos merita proxime accedat. verum, ut nulla materies facilis ad exardescendum est, prius quam humorem quem intus retineat efflaverit, ita mortalis animus nunquam ad comprehendendum divini amoris ignem erit apprimè paratus, nisi, qui fusi per ipsum sunt, turbidi cupiditatum quasi flatus evaserint; quos nulla res prorsus exhaurit, & mentem præparat, ut possit incendi, nisi,

nisi, qui suavissime permanat ad sensus ex divinæ erga humanum genus beneficentiæ & largitatis intuitu, ex Christi plagis atque vulneribus ardor expressus. Quamobrem semper plurimum peccanti prodesse existimatum est, si, initio suæ conversionis ad Deum, quæ redundat de homine Christo voluptas, ad illius sensus effluerit, hac enim primum celeriter, ab hujus vitæ oblectamentis atque illecebris, à corporis voluptatibus, satietate quadam atque fastidio abalienamur. hæc crebris quasi irrigationibus durum emollit atque intractabilem animum, nam, quemadmodum totam fere Ægyptum, sterilem per se ipsam atque silvestrem, foecundis aquis irrigat Nilus, ita hæc ubi in animum infusa jucunditas eundem obrutum oppletumque tenuerit, tum recedens, quasi mollium & oblimatum agrum ad ferendum, relinquit; eadem enascentes luxuriantesque cupiditates quadam quasi falce amputat, ferroque depascit, eadem animum subactum, ut agrum non semel aratum, sed novatum & iteratum, aptissimum reddit ad fructus divini amoris efferendos. Verum profectionem hanc tristem & luctuosam, quum plena doloris, plena mœroris esset, usque eo benignitate & misericordia Christus, acerbitate omni, levavit, ut dulcem etiam atque jucundam effecerit. O singularem Christi in omnes homines humanitatem tuam! ô benignitatem incredibilem! ô clementiam prædicandam! quis, vel hanc unam ob causam, non omnia tibi sua studia præsentet, non omnes conatus polliceatur, se denique ipsum in omnem æternitatem singulari huic lenitati atque clementiæ non deferat? quis hanc tam ardenti caritate tua non usque adeo superetur, ut omne adversus quascunque res alias studium amoremque rejiciat? Quum jam necessitate abeundi premeretur, quum jam ejus illam mortis victricem mortalitatem sibi cælum poposcisset, non tulit, non passus est, omni repente solatio destitutus, sui triste aspectus ac miserabile desiderium relinquere; sed placuit, toto illo quadraginta dierum intervallo, se illis identidem demonstrando, ne dolori succumberent, vel prorsus fide destituerentur, se ipsum tamen à consuetudine & assiduitate oculorum abducendo, vel paulatim illos assuescere, vitam sine ipso traducere. Videmus,

demus, matres, quum primum liberos ad ingrediendum erudiunt, non illico deferere, quod propter ætatem nusquam diutius insistere, aut ingredi longius sine casu aliquo aut prolapsione, possint, verum ex occulto, utrum suis niti pedibus commode queant, an vero nullo pacto consistere possint, observare: quod si jam offendisse, aut prolabentes, inspexerint, materna pietate filiorum casu perterritas, propere festinantes accedere sublevare jacentes, confirmare titubantes, & admotos uberibus suavissime complexari, deinum his artibus eo usque insistere, donec ipsos quoque pedibus ad insistendum idoneis esse animadvertant. Non secus Christus Dominus, eorum aspectui, quos, teneros quasi foetus, in suæ sinu benignitatis educaverat, se paulisper subtraxit, interdum se longius ire finxit; quumque, dum tenebris mortis funestissimæ atque nefariæ, suæ lucis splendor obvolutus esset, illa lubrica atque periculosa non constitissent via, quorum vestigiis ut insidiaretur humani generis hostis, vehementissime à Deo efflagitaverat; immo in communem omnium errorem rapti scandalum offendissent, ac miserandum in modum passim omnes afflicti procubuissent: non cessavit sua egentes ope impertiri propere, atque omnes, uno excepto proditore sacrilego, qui in illo eodem scopulo occubuerat ad quem miser alliserat, excitare; quos non tam suarum imbecillitas virium humi projecerat, quam omnino totius Christi rationis expertes ignarosque in unius hominis recuperationem preciosum ejus sanguinem profundi, gignique mortalium generi Christi morte salutem, atrox tanti discriminis casus ingenti terrore concusserat. Pulcherrimo Christi aspectu, alio lumine omni destituti in his humanæ vitæ tenebris, solis loco clarissimi utebantur Apostoli; hunc vitæ ducem ac moderatorem habebant, hunc requiem malorum invenerant; qui si tantisper forte ab eorum oculis subduceretur, velut offusa nocte, sibi mundi lumen obscurari, & una cum illo vita etiam ipsa eripi videbatur. Iam vero, ubi extremo illo suæ vitæ tempore, sæviante Iudæorum immanitate atque perfidia, inflammatis scelere parricidarum mentibus, deficientem primum nitorem sideris sui, maculis ignominiae conspersum, condidisse, deinde sanguinis

guinis colore suffuso suum illud omne lumen obruisse viderunt; non aliter, intentis ad hoc tam atrox & acerbum impietatis spectaculum, ingens ex eo terror atque formido incussa est, atque indoctis illis ac rusticanis hominibus, qui primum cæli ac siderum rudes, ignarique, subjectam soli lunam, nostrisque oppositam sensibus, solis radios obscurare, eandemque è regione solis sitam, interposito interjectuque terræ, repente eam amplius lucem, quam à sole accipit, non posse in terras immittere, solis & lunæ defectiones animadverterunt. eos igitur Christus, ut hac formidine liberaret, nihil habuit antiquius, quam ut, revocatus in vitam, & recuperato nitidiore splendore, sacrorum vatum effata, involucris obducta, evolveret in mediumque proferret, doceretque, summum iustitiæ solem, quasi cælo temporum destinatas vices implente, & piacularis maturitate temporis existente, necessario defecisse. Itaque, ut, tertio quondam die, toto iterum cælo luce diffusa revixisse sibi visæ sunt regiones illæ, quibus eruptione Æternorum ignium tantæ extiterant tenebræ, ut per biduum nemo hominem homo agnosceret; ita, quum erumpente, una cum amoris incendio, conditionis humanæ quasi fumo, divina illa majestas obscuraretur, & tenebris omnia complerentur, pæne jam extincti & luce omni carentes Apostoli, se denuo in vitam vocari, putaverunt, ubi tertio item die sol Christus illuxit. Quare, ubi jam illos, omnem, quamvis longam, ingredi posse viam animadvertit, & ea omnia, quæ in adultos jam ætate pueros conveniant, de illorum omniumque nostrum utilitate sollicitus, nihil utilius arbitratus est esse, quam terras deferere, & humanam cælo naturam inferre, unde talem illis custodem demittat, quo illorum solitudo atque imbecillitas quam firmissimo præsidio muniatur, & talem defensorem adjungat, quo comite atque socio mollis ille atque ignavus amor, firmus, constans, & ad omnia pericula fortis, efficiatur. Etenim, simul atque Apostolorum pectora divino Spiritus sancti igne calefcent, ille, qui in hac umbratili ut diximus exercitatione se continebat, amor, ut non hostium modo aciem intueri, non modo in foro, in urbe, in hominum esse conspectu, perhorresceret, sed ne ipsam

ipsam quidem lucem anderet aspicere, jam divina Spiritus sancti virtute cotroboratus, ejusque viribus armatus, plenus animi, plenus roboris ac virium, omnem ferociam in discrimen ipsum certaminis afferens, se ipsum in medium agmen, in pulverem; in clamorem, in aciem educet, in armatas hostium copias immittet, vehementiori flagrans incendio sponte se in furentes popularis invidiæ flammæ impellet, non laceffitus impios provocabit ad pugnam, arma in se furentium exacuet, & concitata in Christum odia convertet; non ipsum se amplius, non sua quæret commoda, sed cuncta referet ad Christi gloriam, ad ejus fidei propagationem; ipsa Apostolorum corpora, suæ adeo salutis vitæque sollicita, tum ad omnia pericula offeret, tum etiam palam, ad explendam carnificum rabiem crudelitatemque, proponet; nullius erit ita laudis cupidus, nullam exiget aliam suæ caritatis mercedem, quam ut propòsita sibi ad æmulandum invicta Christi patientia, liceat sanguinem illi pro sanguine, vitam denique pro vita, rependere. O præclarum & admirabilem tui Christe amoris specimen! ô semper ardens nullaque sanguinis profusione restinctum divinæ tuæ caritatis incendium! ô singulare amoris cum summa crudelitate certamen! ô dignum Deo, Angelis, hominibusque spectaculum! in quo primum P. B., quasi ferentarii, ad committendum prælium plurima prodire ex Christi liberalitate argumenta beneficentiæ, contra ex Iudæorum castris ferox erupit execrandæ impetus invidiæ: postea vero, quam infestis signis utrinque concursus est, tanta vi pugnatum est, ut in eo certamine longe semper magis amoris ad benefaciendum incitatus ardor effervesceret, quam accensa ad exorbendum beneficientis sanguinem odii voluntas inflammaretur. Christi singularis humanitas cum Iudæorum feritate conflagravit; instabat hinc acriter divina sapientia, pertinaciter illinc humana stultitia repugnabat: occurrebat hinc animi moderatio, illinc effrenatæ libidines resistebant: hinc se pietas extollebat, illinc cornu flagitium efferebat: hinc probitas inter immanissima scelera, quasi in confertissimos hostes, incurrebat, illinc furor in divinam Christi clementiam, quasi in armatas hostium copias, irruebat. æquitas, demissio

demissio animi, fortitudo, constantia, virtutes omnes, cum iniquitate, cum superbia, cum ignavia, cum temeritate, cum vitiis omnibus, decertabant: denique misericordia cum iustitia, patientia cum labore, vita cum interitu, semper vicens & erectus amor cum jam defessa atque languenti immanitate pugnavit. in ejusmodi certamine, quasi omnes adversariorum impetus atque conatus majus Christo robur fortitudinemque adderent, quo ejus vis deprimi videbatur magis, eo sese altius efferebat, & quasi conjectæ in æstuantem ignem egelidæ tormentorum aquæ, non illius comprimendi sed exagitandi, non refrigerandi aut extinguendi, sed nutriendi & inflammandi, vim quandam ac potestatem haberent, in majus propemodum caritatis ardor excresebat incendium. Quemadmodum enim, si quis æger ac morbo gravis, maxime quum vis fureret morbi, quanta maxima posset voce, se æstu sitique torreri fatigarive, clamaret, postuleretque ut sibi gelida ferretur aqua; ubi vero miser cum poculo ad se venientem aspiceret, vas gestantis extorqueret è manibus, forte resistentem vi manuque repelleret, male verbis acciperet, eoque hausto, se multo gravius vehementiusque æstu sitique ingravescente affligari, vociferaretur, nonne huic maximam esse febrem, non letali miserum ardore consumi, fateremur? Sic nostri amantissimus Christus, quasi ferventem, diuturnam ac molestissimam sitim explere cupiens, omni suppliciorum & crudelitatum genere vas plenum atque redundans è Patris manibus videbatur eripere; quum ore ardenti, quasi evomens quas intus flammis absconderat, sæpe diceret, *Baptismo habeo baptizari, & quomodo coarctor, donec in me perficiatur!* quumque, omnis impatiens moræ, ac sese tandem in cruciatum dari quamprimum exoptans, nimis diu optatam pro nobis mortem sane differri quereretur, Petrum, illi meliora precantem, satanam appellans, repulit. utquæ æger, impetrata à medico bibendi potestate, si ab amicis admoneretur, propterea quod poculum sumisset avidus, ut modice biberet, ut suæ saluti parceret, ne sibi ipsi quodammodo manus afferret; nonne, quasi de suo jure sibi aliquid detraheretur, cum eisdem expostularet? nonne hoc illis peracerbe fortasse respondet;

ret: Quid? medicus fecit potestatem bibendi, vos eam mihi extorquere conamini? Ita Petro ait, quum irruentes in eum milites vi manuque repelleret: Pater hunc mihi tradidit calicem, ad meum arbitrium exhauriendum; tu me æstu, quo jam diu crucior, relevari prohibeas? In horto igitur Gethsemani, hoc ingens & immane poculum, primum labris admovit; quumque, humi prostratus & afflictus, demissis illis precibus ter Patri supplicaret, ex eo bibit, quum à prætoris cohorte corripere, dum, ab impio discipulo, nefariæ prodicionis tessera indicaretur, dum collo manibusque injectis catenis, velut prædo, vinciretur: ex eodem itidem bibit, dum in Prætoris conspectum produceretur: bibit, dum ad Herodis tribunal raperetur: bibit, dum veste spoliaretur, dum verbera, non ad quæstionem sed ad pœnam, ingererentur, dum per ultimos cruciatus, quippe damnatus, & impiis cohortis Romanæ militibus, ut Iudæis gratificarentur, tormentibus, laceratur, non amarissimos tantummodo cruciatuum liquores exsorbet, non haurit, non ebibit, sed torus quasi perfunditur; in funesto demum Calvariæ colle, cruci affixus, cœuntibus in insontem hominem ac Deum, tanquam unum in locum, omnibus dolorum & acerbitarum non rivulis sed fontibus, obrutus prope est, & ut Hieremias ait, est *saturatus opprobriis*; quumque, exhaustis prope omnibus cruciatuum & calamitarum fluctibus, siccis ejus arida, non relevata modo atque refrigerata, sed satiata & jam penitus extincta videretur esse, adhuc magis ebulliens quod intus effervescebat incendium, summa omnium cum admiratione, ingenti ad extremum edito gemitu, *Sitio*, quantum potuit, voce contendit. O maximum ardorem, nullis dolorum fluctibus refrigeratum! ô fervidum ignem, nullo cruciatuum imbre restinctum! ô vehementem flammam, nullis fluminibus tormentorum oppressam! quis ex omni seculorum memoria ita in amore constans inventus est unquam? quem adeo alicujus amantem audivimus, in quem illud aptius conveniret elogium, *Aqua multa non potuerunt extinguere caritatem*? quum non tantâ sacrilegi homines ejus exorbendi sanguinis cupiditate flagraverint, quanto ille desiderio; post acerbissima tormenta, ad subeunda

nova etiam multo graviora supplicia & cruciatus exarsit. Quis non igitur merito, luce hac sacrosancta, triumphet? quis non jure lætetur? quis tantis undique circumfluentibus gaudiis, mœroris aut tristitiæ causas anquirat? Quid reliqui profecto erat, quod Apostolos ad dolendum incitaret? quæ nova mœroris causa ex præsentī lætitiā emerferat, ut reluctantēs in luctum ac dolorem impellerentur? quis adhuc mīretur amplius, Apostolos tantam ex Christi discessu concepisse lætitiā, ut cum gaudio Hierosolymam reverterentur? etiam ne exigua ad lætandum materies videatur, sentire, se omnia summa esse consecutos, arcanorum mysteriorum notitiā, rerum divinarum scientiā sibi traditam, intelligere, in illum postremum amoris exitum evasisse, in quo omnis ejus perfectio atque præstantia posita est, & admirabili incredibilique constantia, fidelissima atque perpetua veri amoris comite & administra, corroboratos se esse, cognoscere? cujus vi ac firmitate, in se conjectas omnes impietatis faces exciperent, sui que demum sanguinis effusione restingerent, quæ sibi incussos mortis tormentorumque metus averterent, & ad enascentis tum primum semina religionis toto jam terrarum orbe, diffusa suis everfis factoribus, extinguenda, vanas conspirantium inter se principum voluntates & conatus efficerent. quæ tantæ erant tenebræ doloris atque tristitiæ, quas non illico disjiceret ea, quæ repente, in tantis nubibus, Christi divinitatis notitiā, quasi fulgor, illuxerat? quæ cæcis nunquam oculis undique erroris caligine circumfusa, in tot signorum magnitudine, in tantarum admirabiliumque rerum inolitio-
ne, in salutaribus Christi præceptis, effulserat. Quæ igitur mœroris tanta vis reperiri posset, quæ erumpentis jucunditatis maximæ cursum inhibere, & ad Apostolorum pectora pervadenti, vias niteretur intercludere? quid enim eos magis rapere poterat in lacrimas, quam hæc repentina Christi decessio? at illico re ipsa experti sunt, eo arctioribus cum illo vinculis colligatos se esse, quo ab eorum sese conspectu & consuetudine longius amovissent. nos huc jam pridem fidei Christianæ dignitas amplitudoque vocabat, ad hoc quasi ad quoddam ultimum Christi prædicationis & miraculorum jacula dirigebantur,

tur, scilicet ut in eo id primum diligeremus, quod nec mortalibus oculis intueri, nec terrenis manibus contrectari, nec ullis corporis sensibus percipi posset. hinc Mariæ Magdalenz, totius Ecclesiæ personam tunc temporis referentis, diu lacrimis quæsito, & ægre tandem invento, ferenti obviam amplexus, *Noli, inquit, me tangere; nondum enim ascendi ad Patrem.* scilicet, ut Beatus Leo summus Pont. explicat, Quid in carne conaris mulier ad me venire? quid ex corporis figura, quam ex me ipso, tibi sum notior? non eam à te ipsa, & ab illis qui in me credituri sunt, mei notitiam requiro, quæ contrectatione contineatur, sed eam prorsus cognitionem efflagito, in quam Spiritus ductu auspicioque profisciscantur; hæc, ubi in cælum abiero, & à vobis præsentibus præsens ereptus fuero, ut in vestros animos inferatur, & illata in eisdem plurimum augeatur, efficiam. Hoc unum maxime fidem nostram spectabilem & admirabilem reddit, in hoc ejus præcipue nobilitas elucescit, ut, quod plurimum est à nostris sensibus remotum, id nos maxime credamus, quem ipsi nunquam audivimus vel vidimus, diligamus, qui tanto à nobis intervallo sejungitur, debito cultu ac benevolentia prosequamur. huic erat fidei totus prope terrarum orbis, summa cum celeritate, lustrandus, &, superstitione omni refertus, exturbato de suis sedibus idolorum cultu, Christi religioni dicandus. & quum hoc quadraginta dierum tempore, quo tempore Christus Dominus versatus est inter homines, nondum tutum ac liberum præsentibus Apostolis in ipsorum animis aditum, paululum constitisset, eos tamen adepta, velut retenta diutius intentissimo arcu sagitta celerius, quum emittitur, quo destinatur, infigitur; celeritate incredibili urbes peragravit, maria trajecit, Alpes ascendit, & quidquid nascentis inter obeuntisque solis terminos continetur, quidquid Austri Aquilonisque regionibus includitur, amplexa, omnes terrarum oras opplevit, & munita Spiritus sancti ope ad penetrandum in visceribus hominum via, omnium invasit animos, eisque penitus insedit, & quandam quasi notam, perpetuo quidem permanсурam, non cruore scedandam, non ferro violandam, non igne delendam, inussit, hæc vel semel comprehensa mentibus animisque

misque credentium, tam stabilis ac diuturna permanet fides, ut, non sicut ceteræ impietatis antiquæ; vanæ ac fictæ, de diis immortalibus opiniones, non sicut veterum & recentium quorundam hæreticorum somnia quædam atque commenta, diuturnitate extinguatur, deleatur, die, vetustate, & annorum decursu contabescat, injuriis temporum occidat; sed longissima jam vixerit secula, vim diuturnitatis evicerit, hominum ætates superaverit, atque adeo in æternum propagari ævum est avida; ut nec decursis saturetur annis, nec præteritis temporum spatiis expleatur. O felicem Apostolorum hæsitantiam! ô nobis salutarem titubationem! ô breve nescio quod tempus, immensis seculorum pæne innumerabilium spatiis compensatum! illa illa hujus disseminandæ & propagandæ religionis ministrorum nimis curiosa investigatione, an Christi animus ad corporis societatem rediisset? incorruptæ posterorum fidei jacta sunt firmissima fundamenta; illa necessaria Apostolorum cunctatione, nostræ ad credendum tarditati itum est obviam, & brevi temporis spatio, pæne immortalitati provisum. Quæ fax igitur tristitiæ, purum & liquidum voluptatis amnem inficiat atque corrumpat? præseus à præsentibus eripiat, abducatur ab oculis, nunquam tamen validissima illa, quibus Christo jam adstringuntur, vincula dirumpentur; nulla cupiditate, nullo metu, non jam humanis naturæ mortalis muneribus, sed cælestibus divinitatis donis, contracta cum eodem Christo societas dissuetur; nulla vi unquam perpetua illa animorum conjunctio distrahetur, nec inimicorum sævitia, nec Iudæorum importunitate nec locorum ac temporum intervallo, dissociabitur; nullis humanarum rerum cupiditatibus, nullis voluptatum illecebris, jam alte in Deo radicibus ætis, plane stabilis ille amor perturbabitur, nunquam de sua sede ac statu dimovebitur. nam, quidquid erat in terris boni, quidquid suave, quidquid jucundum, jam una cum Christo desideratur. & simul atque illa invida & importuna nubes soli clarissimo terram larga luce complenti offecit, omnes etiam ejus partes opacavit, nonne hic cuncta mihi sine te, suavissime Iesu, vilescant? hic sine te mihi se aliud quid offerat, quo oblectare me possim? poterit ei, qui tua vita

vixerit, qui tuo lacte recrearetur, (Christe optime) aut hujus cæli spiritus esse jucundus, aut hujus vitæ hæc lux non obscura videri? Verum, ut tandem modum starnam orationi meæ; quum victor de tribus potentissimis hostibus gloriosum in cælo triumphum reportaturus sit, si nos eum diligimus, si ejus nobis cordi existimatio est, nostrum ad ejus gloriam studium conferamus. At, quid est jam, in quo operam nostram profiteri, eique palam navare possimus? nam si opes illi nostras polliceamur, bonis cælestibus affluens,strarum rerum non eget, si potentiam, si dignitatem, si laborem offeramus, omnes nostræ non modo utilitates & commoda ab eodem, tanquam à fonte, deducta profisciscuntur, sed etiam, quod vivimus, quod movemur, quod spiramus, uni illi acceptum referendum. nihil ergo horum est, quod non, in eorum datore & perfectore, multo quidem excellentius atque nobilius existat. Vna res est, P. B. in qua gratificari Christo possimus, unum illud relinquitur, in quo non modo Christi gloria versatur, sed nostra etiam salus & utilitas continetur. In splendida atque illustri triumphantium pompa, hæc omnia, triumphorum dives antiquitas, admirabatur; simulacra urbium & oppidorum, devictarum gentium imagines, auri & argenti vim ingentem, & detracta ab hostibus spolia; ad hæc, obstrepere omnia clamore militum & tubarum sono, omnia acclamantium vocibus personare; præterea vulgi plausus, populi, sua adversus Imperatorem studia significantis, clamores exaudiebat, carminibus victoriam ducis celebrari, ferri ad cælum laudibus Imperatorem; sed quod in se oculos omnium converteret, quod plausus & clamores excitaret, id in primis videbatur, quum tantorum modo exercituum reges, à quibus tot antea gentes atque nationes jura petebant, quos infinita hominum genera, tanquam deos, reverita, eorum pedibus advolvebantur, tunc, de regali fastigio dejecti, victoris arbitrium expectantes, ante currum vincti ducerentur. Iam vero inimici atque hostes nostri infestissimi, qui semper Christo bellum habent impium atque nefarium indictum, sunt, nostra scelera atque peccata; quæ si vincta Christo tradiderimus, ut quæ tantum illi quondam dedecus & contumeliam intulerint, ejus

ejus gloriæ & amplitudini aliqua ratione deferviant, eorum vim atque conatus adeo æternis in posterum vinculis atque carceribus coercebit; ut, nisi tu ipse eorum vincula ruperis, horribilibus custodiis circumdaris, omnem spem eis prorsus libertatis, & nocendi potestatem, eripuerit. Verum, neque cuiquam veniat in mentem, dubitare, se idcirco desertum esse, quod cælo Christus receptus, Patris dexteræ assederit, aut, quasi perfuncto gravissimis vitæ laboribus, sibi quiescendum esse duxerit, neque salutis humanæ semel per illum partæ tutelam, ejusque dignitatis defensionem, utpote curarum plenissimam, esse cum præsentī lætitiæ commiscendam. nam, etiam si tanto intervallo abesse videatur, animo tamen & corpore, quemadmodum in cælo fruitur, adest, nobiscum manet, & usque ad consummationem sæculi, perpetuo manebit. etsi, honorificentissimo Dei judicio, tanto honore dignus est habitus, quantus neque ulli delatus est ante illum neque habendus in posterum, etsi, nulla externa adjutus ope, sed suæ virtutis gradibus, ad eam sibi gloriam communivit viam, etsi in solio, circumfuso undique lumine, collucenti consedit; tamen, quando id res ipsa postulare videbitur, quum præsens periculum aderit, velut ex eodem exiliens, præsto erit illico, & si nos adversariorum insidiis expeti, si in aliquod discrimen vocari quenkum, aspexerit, quæ ad nostram semper defensionem parata habet arma, suscipiet, periculum quod in nos intenditur propulsaturus. nulla quidem immortalī intercedit ægritudo lætitiæ, neque tanta contaminantur gaudia labore, non desidet, non cessat, quum susceptis armis res ad certamen deducitur. Ecquis apud illum unquam de suis calamitatibus deploravit, quin statim in ejus fide certissimum ac paratissimum perfugium invenierit? Ecquis unquam, accepta à dæmonibus clade depressus, aut hostium minis terroreque perculsus, ad ejus aram præsidii opisque confugit, quin eum subito, studiosissimum sui defensorem ac propugnatorem, habuerit? Quid? nonne in dubiis rebus, in maximis gravissimisque periculis, allata sæpe multis auxilia, quemvis aut hebetem aut impium, Christum præsentem fuisse, palam confiteri coegerunt? Repetamus memoria, si placet, à primis illis

nascentis Ecclesiæ primordiis. Quum impietas armata , ad debellandam ac funditus evertendam Christianæ religionis veritatem , manantem in dies latius , eosdemque suæ magnitudini terminos , quibus terræ ambitus continetur , cæli regiones constituentem , in Christianorum cæde desæviit , & honestissimo Sanctorum sanguine saturata est ; nonne vetustissima scriptorum monumenta ; quibus propter vitæ sanctitatem , gravitatem , eruditionem , abrogari fides non potest , testari reperiemus , suam illum non modo operam , cum strenuorum militum virtute atque præstantia conjunxisse , sed , quo præliantibus animus amplior esset , suam ipsius sæpenumero præsentiam declarasse ? quoties in acie , ex illustri & excelso quodam loco pugnantem , mortalium genus aspexit ? quoties tela vibrantem , & ingentem hominum multitudinem ad martyrum carnificinam , velut ad quoddam immane crudelitatis spectaculum effusam , de calo ignibus atque ætheris flamma consumisisse animadvertit ? Quid referam ex vetustis atque vulgaribus sanctorum martyrum atque virginum historiis ductas narrationes ? quis est omnium adeo rerum ignarus ac rudis , modo sit Christi religione imbutus , qui non aut legerit ipse aliquando , aut non audierit , sæviente falsa deorum superstitione , quæ , furæna æmenisque , bellum atrox atque impium Deo hominibusque indixerat , Christum ipsum plerumque humana specie , dum fortissimi illi duces , sacræ Christi militiæ nuper adscripti , pro vera religione tuenda , divinitus ad mortem usque decertantes , à tyrannis crudelissime vexarentur , coactam ad necem insontium acerbam lictorum atque carnificum manum effudisse , aut lacerata flagellorum ictibus corpora , aut evulsis carnibus denudata ossa integritati ac decori pristino reddidisse , vel , id robur animis atque constantiam intulisse , ut acerbissimos inter ultimosque cruciatus , illorum plurimi nullos dederint gemitus , nullas voces emisissent , nullum denique inter prementium tormentorum angustias omnino doloris sensum expresse- rint ? Pendebant alii totis diebus è cruce , & de ea , tanquam de superiore loco , populos ad Christi fidem erudiebant. stratas alii ignitis carbonibus vias læti , quasi ro-
sas , ingrediebantur ; perusti , quamplurimi , vel tædis arden-

ardentibus, vel candentibus laminis, ita dulcissimis complebant omnia vocibus, ut si fervido fatigata æstu mollissima corpora suavissimo rore relevarentur. demum, multi inter acerbissimos scorpionum cruciatus, inter crebros flagellorum ictus, nudis plerumque ossibus incussos, exultare sibi videbantur inter choros Angelorum, & divina quadam suavitate perfundi. Quid multa? adstat lætum inter omnes Deo datura spectaculum, supplex in genua provoluta virgo, regali stirpe progenita, atque ejus candidæ decoræque cervici stricto imminet gladio immanis dextera lictoris, letali vulnere eum jam jam in locum delapsura. verum, ô rem miram & incredibilem! quum illi mors impenderet, quum ferro invaderetur, quum omnibus premeretur ærumnis, quæ proximo leti periculo saltem aliquantulum exterreri, quam vel metus ipse & expectatio exanimare debuerat, eo erat statu mentis atque corporis, ut eam neque præsentis terror mortis impelleret, neque inimicorum labefactaret injuria. contra vero is, ad quem tantæ immanitatis spectabat officium, quasi eodem ferro miseri illius jugulum peteretur; toto animo torisque artubus contremiscebatur. Vnde tam gravia tamque difficilia perferendi in illos ardor æstuabat? unde tanta securitas animis, nisi à Christo præsentem, ingerebatur? an suam passus est diutius opem à Stephano implorari, quum obsessus à Iudæis lapidibus obrueretur? in illa acerrima pugna intentis oculis in cælum, quasi duas discissum in partes, non eum sedentem, ut olim, sed, ut præsens occasio ferebat, contemplatus est, stantem, opem ferre supplicibus, excitare afflictos, dare salutem, laborantibus succurrere, liberare periculis; sibi que illatas ab acerbissimis hostibus injurias propulsare. erit ne quisquam adeo divinæ immemor benignitatis, & exhibiti in nos amoris expers, qui, eo quod se nostris oculis conspectuque exemerit, omnem iridem eorum, quos dilexit unice, memoriam ex animo ejecisse arbitretur? hæc non modo P. B. viget perpetuoque vigebit, sed ejus plane in medullis, atque in visceribus ipsis, infixæ perpetuo manebit. Utinam illius nos ita memores essemus, nec veterum fama meritorum, aut præsentium gratia beneficiorum, elaboretur ex animo, ut nostrarum miseratio calamitatum

mitatum nulla unquam adversa, ac contra nitenti injuriarum vi, ex ejus pectore exturbata concedet, nec vivida illa semperque florens amoris virtus, peccatorum nostrorum concussa nutibus, contremiscet. immo vero, tantum abest, ut se à nobis distrahi, atque divelli patiatur, ut nihil optet ardentius, quam in uno eodemque pectoris domicilio perpetuam animorum nostrorum societatem & conjunctionem. Quis igitur erit ita durus ac ferreus, qui tanti aspernetur convictum amici? quis tam ferox & inhumanus, qui ad fores adstanti, & se nunquam introduci conquerenti, denegat hospitium, qui summæ felicitati non adscribat, posse cum mundi procreatore quam sæpissime colloqui, adesse una in iisdem ædibus, una eademque vita vivere, ac pæne ex eodem ore spiritum ducere, & in his ærumnis atque miseriis summa quadam animi tranquillitate potiri, non ex rerum fluxarum jucunditate orta, sed ex perpetuis Beatorum gaudiis atque deliciis derivata? O vere fortunatos illos, apud quos tantus diverit hospes! ô prope beatos, quos Deo frequens conciliavit hospitium, & conspirantibus in unum animis amicitiae vinculo colligavit! nam quum amoris mira quadam & inexplicabili ratione perficiatur, ut amicorum uterque, à seipso recedens, in alterum quem diligit, tanquam in suam sedem ac domicilium, abeat, ejus mores imitetur, totum se ad illius nutum & voluntatem effingat, ad ejus vocem suos etiam sonos inflectat, nec modo eodem amictu, eodem incessu, atque ille, utatur, ceteraque externa omnia, quæ facile assequimur imitando, confectetur, sed ipsam corporis totius effigiem, atque oris lineamenta, suis absterfis atque deletis, in se ipse, si possit, inducat: quid futurum nobis erit impedimento, quo minus, si in Christo fuerimus, si nostram voluntatem ita cum illius voluntate copulaverimus, ut ex duabus una eademque confletur, divinam quodammodo speciem & pulchritudinem animis referamus? Iam vero, amoris ardore liquefactus ac dilapsus animus, aut in res mortales aut in Deum sese diffundat necesse est. si igitur aquam, & liquida omnia, non modo ex Peripateticorum sententia, sed ab ipsa etiam magistra rerum experientia didicimus, quum rei cujuspiam terminis, ne diffuant, cohibeantur, in rei

in rei illius figuram habitumque formari : quis jam dubitet , si in Christum totos nos transfuderimus , quin sit divinæ illius in nobis pulchritudinis imago quædam ac species exprimenda ? at fieri non potest , quin , dum hac luce fruimur , dum corporis custodia detinemur , rerum mortalium curis & secularibus negotiis immisceamur. esto. verum non , est tibi illis diutius insistendum , sed per ea , quanta poteris maxima celeritate , prætervolandum. nam si præterfluens amnis , aut vix aut nullo modo , conclusa autem aqua facile , corrumpitur ; nonne , si prope- rantes nostræ ad cælum cogitationes hic diutius remo- ventur , facile computrescent ? Evola igitur per has vitæ hujus commoda , atque pertransi ; eaque levissime , quan- tum sat erit ad vitæ usum & necessitatem , attinge ; ut , quemadmodum ventorum impetu , pulsuque remorum , ita per æquora fertur navis , ut ejus vim & incitationem aspicias , vestigia ingressumque non videas : sic nulla fere tuarum vestigia cupiditatum in terris impressa resideant ; quæ , si quidem in solo , quum calcatur altius , pedibus ce- dente signantur , non abnuo , immo gloriosum duco , te humanis opibus atque divitiis , pedum tuorum signa ad contemptum & perpetuæ ignominie notam inurere. nun- quam enim , nisi adscensus ad Patrem , Christus sua ter- ræ fixit vestigia. ut scilicet nobis ostenderetur , tanquam salientibus , quo altius in sublime feramur , terram esse acrius ante premendam , & humana omnia adversis ve- stigiiis impellenda.

O R A T I O VII, D E P E C C A T O.

FVit hæc non modo , Auditores , Christi Salvatoris nô- stri , ceterorumque Sanctorum , verissima certissima- que sententia , culpa & peccato nihil homini accide- re horribilius posse , aut magis perimescendum ; verum etiam veterum Philosophorum atque sapientum fere om- nium opinio. quorum licet variae multumque inter se dissidentes pugnantisque familiæ , frequentes tamen com-
muni

muni consensu, quasi pedibus, in hanc eandem sententiam ivere. Hinc illa quorundam incredibilis extitit, in voluptatibus quoque usitatis atque permissis, continentia; hinc illa honorum & rerum humanarum despicientia, perpetuaque in proposito susceptoque consilio gravitas & constantia. intellexerunt nimirum, eo minus in aliquod peccati genus delapsuros se esse, quo sibi ipsis magis ad omnem cupiditatem aditum præclusissent. Atque hoc etiam magis ab omnibus istorum est admiranda diligendaque sapientia, quo illi, non fide divinitus hausta, sed insita in omnibus naturæ lege, non præmiorum æternorum spe atque expectatione commoti, quum eorum plurimi, una cum corpore simul animum interire, putarent; non metu poenarum perterriti, quas idcirco inventas esse crediderant, ut aliqua invita formido improbis esset posita; sed communi voluntate virtutis & officii præciderunt sibi ipsi istam licentiam, libertatemque vendi. Quapropter gravissime verissimeque Salvator hominum Christus improbissimas multorum cupiditates à Tyriis, à Sidoniis, à Ninivitis, in crimen atque in iudicium vocandas esse prædixit; quod, quum illi divino illustrati lumine perspexissent, quam scædum ac perniciosum esset, vel minimum à religione officii declinare, quum cognovissent, verissimis gravissimisque poenis nos à peccatis avocari, contraque spe post hanc vitam uberri- ma atque præmiis ad virtutem amplissimis alligi, tamen ita vitam instituerint, quasi hæc longe remota ab eorum opinione intelligentiaque fuissent, nihilque debere existimaverint hominum cupiditati esse clausum, sed libidinum peccatorumque omnium patere in vita licentiam. Verum istorum tanta perversitas, si recte inspicatur, vel ob hanc causam corroborari ad audaciam solet, quod sua homines scelera & cupiditates, ad propositam voluptatem, non ad futuri temporis iudicium, conferant; quodque, ut plurimum videant, prolapsa fere in immensum effrenata hominum ad peccandum audacia atque licentia, à præsentis supplicio se Deum continere atque reprimere. ita fit, ut singularem hanc Dei optimi maximi clementiam, seu potius patientiam miram & incredibilem, non virtutis sed libidinis habeant incitamentum. ô scelus!

ô por-

ô portentum ! ô audaciam immanem ac detestandam ! idcirco ne scelestus aliquis existimabit, nullum impudentiæ nequitiaeque suæ finem esse relictum, quia videat non in primo gradu injuriæ resistere irati judicis severitatem ? quod enim nostræ salutis rationem ad futuri judicii discrimen reservare solitus sit, idcirco sibi omnia à divinæ legis præscripto atque ratione ad voluntatem atque libidinem suam translata esse videbuntur ? Quæ quum ita sint, operæ pretium nos esse facturos existimo, si cæcis istorum tenebris, qui in aliquo peccati genere versantur, si non ornatæ, certe salutaris, orationis facem prætulerimus, simulque breviter ostenderimus, quanto suo periculo se in tot scelorum flagitiorumque sordes ingurgitent. Atque ut ad rem ipsam aggrediamur ; primum, qui se letali scelere contaminavit, æternum quoddam & capitale Dei in se odium struxit. quæ quidem moles, eas ruinas, tamque graves, edit, ut ullis naturæ viribus reparari non queat. Quid agebas, ô infelix anime, quum viam in te sceleri aperiebas ? aliquid ne aliud, quam, ut in te perniciosam tabem offunderes, qua statim à Christo, nimirum à spiritu quem duceres, à vita qua viveres, excludereris ? quid enim calamitoso animæ diffidio, præter mortem, corpori ipsi creatur ? Verum, quoniam animi fere omnia ad corporis similitudinem diriguntur, facite, vobis veniat in mentem, Auditores, funebris illa malorum cohors, qua mors comitata in corpus irrumpit ; simulque cogitate, quæ & quanta è corpore bona, tanquam possessione pulsa, decedant. ea primum egreditur, quam omnes admirari solebant, pulchritudo ; succeditque in ejus locum horribilis monstruosaque deformitas. quid est enim tam pulchrum ad aspectum, quidve, quod oculos omnium magis moveat, quam ipsa hominis species atque figura, suis animata sensibus, & coloribus quasi luminibus illustrata ? hæc, ut primum est vitali sanguine destituta, in eam turpitudinem deformitatemque convertitur, ut, quos antea recreare aspectu solebat, nunc horrore metuque afficiat. denique, quum ea pax, qua illæ quatuor inter se contrariæ dissidentesque naturæ, ne qua pugna existeret, copulabantur, animæ decessione diremta sit, resque ad certamen contentionemque deducta, necesse est extre-

mam

inam totius corporis corruptionem consequi, ex eoque vermes procreari, & intolerabiles odores efflari. ad hæc atque alia multo graviora mala animus ex interitu delabitur. quid eo pulchrius animo, cui Deus inhærebat, cui Christus vita erat, quæ species ne excogitari quidem poterat ornatior, quum in eo ipso, à quo ortum duxerat, admirabiles amores excitaret sui? at hic, amissis celestibus donis, sine Christo, tanquam sine anima, sine spiritu, in eam turpitudinem monstrositatemque immutatur, ut, si, quemadmodum animis, sic ea sensibus percipi posset, nulli tam duri oculi reperirentur, qui immorari in ea, ne ad breve quidem tempus, possent. Etenim, si in deformitate corporis id habet turpitudinis offensio, ut sæpe multi, quibus per quietem monstra se ostenderint, cohorrerint, aliqui in morbos incurrerint, nonnulli aliquando vitam amiserint; quanta illa depravatio & scelerata turpificati animi videretur, quam summus ille mundi arbiter Deus, tanquam singularem aliquam poenam apud inferos constitutam improbis esse voluit! quid erat tam Deo simile, ut Basilus inquit, quid clarius & expressius divinam illam præstantissimamque naturam & pulchritudinem quodam modo repræsentabat, quam ipse ille, quem cum Deo mutua animorum conjunctio, præcipuo quodam amoris nexu, devinxerat? ut non tam hæreditatis vel adoptionis jure, quam hac eximia præclaraque forma, quasi cognatione, Dei optimi maximi nomen videretur attingere. Si, quum eandem in duobus membrorum compositionem conformationemque lineamentorum intuiti fuerimus, in eam cogitationem tacite deducimur, ut suspicemur, eosdem naturali esse inter se cognatione conjunctos, quod raro videamus naturam fratres aut filios à fratrum vel parentum similitudine abripuisse; profecto quid erit impedimento, quo minus quilibet animus, omni virtutum genere expolitus, depulsis vitiis sordibus, Dei filius videri possit, quum in eo imago quædam divinæ illius probitatis atque justitiæ, non secus atque coloribus expressa, cernatur? eximiam istam ac pæne divinam sanctorum pulchritudinem regius Vates animo, quasi oculis, cernens, tam excellenti præstabilique forma obstupuisse, eosque deos & Dei filios vocavisse

vocavisse se dixit. ergo, quid, quasi nova re aliqua aut incredibili intellecta, admiraris? quid, quasi progredi ulterius intelligentia non possis, in hac sententia diutius commoraris? quum videas, nitidos aquarum rivos radiis, à solis lumine mutuatis, fulgere ad oculos, eosdemque, luce à sole contracta, tenebris obtendi, tamen, quod assidue quotidiana, & consuetudine oculorum, hoc assueveris cernere; neque obstupescis, neque admiraris, neque ejus rei rationes requirendos esse ducis, quam semper videas; & in hac re hæsitabis? hoc te, quasi quiddam novum & incredibile, ad exquirendas causas excitabit, si intellexeris, tenebris & obscuritate eum animum involvi, qui in vitiorum sordibus hæserit, aut quem peccati nox opacaverit? Verum, quid ego in commemorandis tuis sordibus tanto opere laboro? quum, & mortuum te esse, & tanquam aliquod projectum cadaver, Dæmonum, quasi ferarum, immanissimarum dentibus, ac multo magis rapacissimis tuæ conscientiæ moribus, dirumpi atque discindi, ratio & veritas ipsa convincat? O conditiones miseras iniquorum! ô rerum vicissitudinem deplorandam! ô infelicem animam, quantas tibi malorum moles exaggeravit, quæ te illexit in scelera cupiditas! ignoras plane miser, quam magnas tibi calamitates tuæ flagitiosæ libidines pepererint. nescis, insane, nescis, quam immensas lateque patentes tibi ruinas patefecerit, quæ te vorago vitiorumque gurgis absorbuit. tu, in quem paulo ante, divino ac singulari beneficio, nova atque admirabili ratione ineffabilis trium divinarum personarum majestas, tanquam in domum, includebatur, qui, mentis ac voluntatis conjunctione, prope unum atque idem cum Deo eras, qui ita illi carus eras, ut non aliam in partem libentius divertere, quam apud te, mallet, quasi sine te esse non posset, quem omnes beatæ calî mentes colere ac prope venerari solebant, quæ semper propter te esse, tibi in famulatum dari, in summa gloria ponebant, ita ob peccatum summa hac felicitate evertēbaris, ut exiens à te Deus, te Dæmonum inveterato in nos odio, superbix, nequitix, crudelitatisque addiceret, tuarumque te cupiditatum monstris, in diversas partes trahentibus, quasi discerpendum dilacerandumque relinqueret. Proh Deus immor-

immortalis ! fieri ne potest , ut tanta mentes hominum caligo invaserit , ut , quantas in ipsos calamitates effrænata eorum libidines effuderint , plane non videant , tantus stupor oppresserit , ut , quibus conscientiae stimulis continuo appetantur , ulcerentur , conficianturque , non sentiant ? ut etiam intolerabilem odorem illum , qui extincto ex animo , & in gremio immaniissimi pectoris sepulto efflatur , eorum prope ad nares non ferri demirer. nam , si verum est , quod à philosophis sapienter est dictum , quo res nobiliori seu præstabiliori natura prædita est , eo vita functam majorem ex se gignere corruptionem , foedioresque ex eadem excitari spiritus ; quam tetros quam foedos ex anima odores affari putatis , quæ nihil eorum , quæ à Deo prodierunt , si Angelos excipias , præstantius effluxit , nihilque reperitur in mundo , quod propius ad divinam naturam videatur accedere ? profecto tam pestifer hic halitus est , ut , quemadmodum putrida mortuorum cadavera , ne odore eorum teterrimo aërem inficiant , animalia necent , civitates deleant , aut igni consumuntur aut terræ visceribus includuntur ; sic plane extinctus animus , ne quid , ut ita dicam , ab eo contagionis ad illam felicissimarum mentium abundantem bonis vitam beatissimam permanare possit , æternis inferorum ignibus dedatur , atque infra omnes terræ cavernas ; infra omnes mortuos , amandetur. Verum , non modo ob peccata ab ærtissima Dei conjunctione sejungitur , non modo à vita relinquitur , verum etiam suppliciis omnibus , nefariis hominibus constitutis , obnoxius , perpetuis ignibus , ut dixi , in omnem æternitatem excrucians & comburendus , addicitur. quæ est enim materies tam facilis ad exardescendum , quid tam , ad concipiendum ignem , paratum , quam resecta à vite sarmenta ? quem ea exitum , si prætereuntes occurrerint , ad extremum manet , nisi ut in fasciculos colligentur , atque in ignem conjiciantur ? quid spei tandem salutis eorum subesse putamus , qui , succi nihil ex ea , cui insunt , planta trahentes , exaruerunt , nisi , eos hanc unam spem , seu potius desperationem , manere , ut à Deo , tanquam ab agricola experto ac diligenti , à Christi corpore segregentur , ac denique satanæ tradantur ad incendium ? quod si tibi hoc

ex re

ex re dispari parum simile ad eam rem, qua de agimus, explicandam traduxisse in ea videatur oratio, aut dubites plane, non ita se rem habere; audi Christum ipsum, referentem hæc omnia ad vitium agricolarumque similitudinem, tibi que prorsus similia minitantem, nisi fructus talis vitæ dignos edideris. *Si quis, inquit, in me non manserit, mittetur foras sicut palme, & arescet, & colligent eum, & in ignem mittent, & ardet.* quum enim antea Patrem Deum, tanquam nobiliorem personam si cum Christi humanitate conferatur, nobilius etiam munus insistentem induxisset, se vero, tanquam hominem, viti, nos vero palmitibus, qui ejusdem sunt prorsus naturæ cum vite, comparasset: Si quis, inquit, sese nimium fuderit, luxuriansque silvescet sarmentis, omnem illi, qui se in eum fundit, succum subtraham, plaueque deducam; quid igitur mirum, si statim arescet? quid mirum, si Pater meus, tanquam bonus agricola, quidquid erit nactus in hac arbore, vel silvestre vel aridum, id statim amputaverit, ferroque coercuerit? non decent talem truncum steriles rami; at multo minus aridi: amputentur ergo, & à me projiciantur; & quandoquidem nullus in iis usus esse potest, quam ad ardendum lateque fundendum incendium, aggerentur à Dæmonibus in eos faces, ac demum ab eisdem in inferos, perpetuis illis alendis seu potius augendis ignibus, exportentur. Postremo illud quoque inest in scelere mali, ut adeo mentis, ut ita dicam, perstringat oculos, ut, quibus undique septi simus, pericula non intueamur, & usque eo consilium impediatur, ut summus furor atque amentia consequatur. Nihil est, Auditores, quod mihi tanto opere admirandum videatur, quam cogitare, quodvis vel minimum capitis fortunarumque periculum, quamlibet vel levissimam curam, ita animum excitare, eumque sub pectore fixam in varias partes versare, ut somnum ab oculis revocet, atque omnem ab animo jocandi voluntatem eripiat, contra eos intueri, qui aliquo scelere constricti teneantur, quum, tot jam conscientiarum scelerumque testibus convicti, de damnatione sua dubitare non possint, quum maxima, eaque sempiterna, supplicia effugere se nulla ratione posse, certo sciant, nisi mutata velificatione ad poenitentiarum portum confu-

H

geriur,

gerint, quum pane, discedente terra, immensa aliqua voragine aut gurgite absorbeantur, non modo soluto animo esse, sine cura quiescere, sine metu spirare, verum se etiam insolentius efferre, liberiore licentia, seu potius audacia, jactare, tempus voluptatibus luxuria flagitiisque contere; potest ne aliud fortius argumentum istorum cæcitatis miseræque depromi? potest ne manifestius eorundem amentia proponi, & quasi in aspectum adduci? tantus igitur, miserande, te stupor oppressit, vel, ut verius dicam, tantus furor, ut, quum te, execrandum Deo, detestabilem Angelis, quum omnes tibi bonos & esse inimicos & futuros scias, quum tantas tibi ruinas impendere sentias, in tot periculis, in summa, nisi te Deus adjuvet, salutis tuæ desperatione, aut insolenter exultare gaudio aut quietem capere possis? nonne repente, quamvis te dormientem arctissime amplectatur, omnis tibi somnus ab oculis excutitur, quum recordaris, te Dæmoni in servitutem adjudicatum, eive conculcandum, omnique suppliciorum genere excruciantum, traditum esse? cui si potestas à Deo esset, statim atque te à Christi societate distractum vidisset, lucis usuram tibi tam diuturnam non dedisset, sed statim supplicium de te quam acerbissimum sumisset; neque solum nostri generis hostes, verum animalia cuncta, elementa atque adeo creatæ res omnes, tuorum à te scelerum poenas expetissent. si angues, leones, & alia ejusmodi ferarum genera, quas Deus homini ab initio dicto audientes effinxerat, tamen vetus Parentum nostrorum scelus, qui Dei obedientiam abjecerant, ea nobis infesta atque inimica reddidit; quas credis adversus te, ob tua scelera, simultates suscepturas, quibus tecum præliis dimicaturas? nonne omnes sua in te crudeliter arma intenderent, immanitatem severissime exercerent? hæc te, pessime, lacerarent, te illa veneno necarent, te alia unguibus dentibusque discernerent. Verum, quamvis sine mente, sine sensu sis ut es, tamen te, ob periculi magnitudinem, nunquam neque vigilantem neque in somniis mente consistere oporteret; quamvis sis, ut es, violentus, & furens; tamen, quoties tuorum tibi scelerum veniret in mentem, quoties ad mortis memoriam revocareris, perterritum de somno excitari, furere etiam vigilan-

vigilantem necesse esset. ut te non modo tuæ malæ cogitationes conscientiaëque animi non terrent, non modo poenæ terror non vexat, verum etiam nova semper scelera veteribus sceleribus addis. nullæ tibi aut avaritiæ aut libidinis inquinatissimæ sordes occurrunt, in quas te non statim libentissime, quasi sus lutulentus, ingurgites. O immanem audaciam! ô miserrimum hominem! tanta tibi terrorum periculorumque materies, tanquam Tantalosaxum, impendet; tu vero semper eandem coacervare, quo citius suo ruat pondere, non desinis? te bonorum nemo aspicere sine lacrimis potest; tu solus tuis maximis damnis non commoveris? quousque Dei patientia abuteris? ecquando tua te maxima pericula à summo furore atque amentia ad spem aliquam rationis humanitatisque traducunt? an nescis, impure, inclusum illud Dei odium, multarum tuarum in divinam ejus majestatem injuriarum, posse se omne in te statim effundere? an te fugit, scelestè, tunc maxime in judicium ex Christi sententia te esse vocandum, quum tuus maxime furor in omni genere improbitatis nequitiaëque bacchabitur? an ignoras, nequissime, tunc te sempiternis ignibus conflagraturum, quum maxime omnium libidinum turpissimarum flamma combureris? Qui igitur, id quod fieri solet, te conscientia timidum suspiciosumque non reddit? cur, quum tot sceleribus, quasi tot testibus, coarguaris, jam nunc judicium crimenque non horres? ut viris sanctissimis mirari sæpenumero contigerit, posse iis, qui aliquid impie scelerateque commiserint, diem aut noctem quietam esse, nec conscientia sceleris, & furore ex maleficiis concepto, excitari, & formidine agitari, ac perterrerì, quasi furiarum tædis ardentibus, qui fieri potest, inquirunt, (si iis, quibus profitentur se credere, fidem adhibent ullam,) quum sciant, improba facinora æternis suppliciis post mortem vindicari, quum videant, nullum esse diem, nullam horam, nullum instans, mortis periculo vacuum, sed eam semper propter incertos casus imminere, quin semper timeant, quin singulis momentis divinæ justitiæ satellites in se irruentes aspicere, sibi que, jam pæne ligari, ad supplicium rapi, atque, ut ita dicam, in eos, qui sunt apud inferos, ignes demergi, videantur? Ponite ante oculos,

Auditores, eorum quempiam, qui rei capitalis damnari in vinculis servantur; animadvertite, in quantas animi angustias adductus sit; cogitate, qui æstus, qui terror, quæ tenebræ, sint homini, omnium longe-miserrimo: membra sopori nunquam tradere, semper cuncta, quæ audiat quæque videat, metuere, circumspectare omnia, & omni strepitu pavescere, videri sibi fores carceris aperiri, collo manibusque catenas injici, jam horribiles militum custodias circa se esse, carnificum manibus contrectari, denique supplicium de se quam acerbissimum sumi. infelix vero peccator, cujus peiori loco sitæ res sunt, à cujus opinione sempiterni supplicii poena non abhorret, qui neque dubitat, posse ea, quam sibi exaggeravit, calamitatum mole repente opprimi, nihil tamen de salute sua sollicitus esse, finem peccandi nullum statuere, in summo otio ac voluptate ætatem agere. quasi vero tantum tamque imminens periculum ad quemvis potius, quam ad se, pertinere videatur. Iob, vir ille sanctissimus, in cujus vita ne vestigium quidem ullum gravioris alicujus criminis apparebat, cujus singularis innocentia summis à Deo laudibus exornata est, in quem adhuc Dei gravissimum illud exstat elogium, de quo nulla unquam posteritatis ætas conticescet, nullæ unquam litteræ silebunt, omnem scilicet, quæ in mundo eo tempore esset, probitatem in ejus persona constituisse. hunc igitur virum egregium, arque omni virtutum laude cumulatissimum, ea fuisse vitæ conditione, sacrarum litterarum monumenta testantur, ut à spe semper, cui testimonium conscientiæ velificabatur, timoris æstu abriperetur, inque concitatum divinæ severitatis mare traduceretur: *Semper enim, inquit, quasi tumentes super me fluctus, timui Deum.* nullius enim rei similitudinem, ita aptam, ad eam rem explicandam quam voluerat, sumere poterat, ut hanc, qua adeo timorem de divino judicio suum exponit, ut pæne illum in oculis ponere videatur. quam ergo vitæ rationem virum omnium sanctissimum iniisse putamus? quo cruciatu timoris angustolatum existimamus? fingite cogitatione, si placet, horribilis alicujus tempestatis imaginem; in qua tempestare, modo summa tanquam montium cacumina superantibus, modo in immensam pæne vallium altitudinem deprimentibus

tibus se undis , parvo quis navigio investus , hieme maxima , intempesta nocte , cælo undique tenebris clauso , jactetur : quem huic esse animum putatis , quid agere , quid cogitare existimatis , quum ejus oculis mille mortis obversentur imagines , quum mox aut ruituris in se fluctibus operiri , aut vorticibus absorberi , aut ad aliquod saxum dejici , infringi , comminuique se videat ? quæro enim à vobis , num illecebris voluptatum tentetur animus . at , omnem repente libidinis ardorem , pelagi ferventis æstum extinxisse , responderitis . interrogabo vos , num ullam cogitationem habeat honorum , aut multum vulgi acclamationibus atque inanis gloriæ aura permoveatur . at , furentis tempestatis vi impetuque omnes honorum contentiones , omnes ambitionis motus tumoresque confedissee , dicetis . petam postremo , num fortasse divitias , ceteraque fortunæ bona , aliquo in pretio habeat . putas ne , statim inquietis , se mente ac voluntate in fortunæ bona divitiisque conjicere eum , quem eodem tempore cernas merces omnes è navi dejicere , atque in mare præcipites agere , quorum gratia tam longum iter habuerat , tam periculosam navigationem susceperat , tot vitæ discrimina adierat ? Si igitur quempiam , adversa maris tempestate jactatum , ut vitam conservare liceat , voluptatum omnium oblivisci , bona fortunaque negligere videas propter magnitudinem periculi , magnopere admirandum esse non censes ; at vero sanctos viros , quibus , quocunque aspexerant , semper ejusmodi periculum occurrebat , ut suæ salutis prospicerent , tale aliquid egisse admiraberis ? nonne citius à salutaris istorum timore pessiferam securitatem , & inanem fiduciam tuam , coargui necesse esset ? nonne , à singulari istorum sapientia , singularem etiam dementiam & insaniam tuam rationibus oporteret necessariis addici ? nonne talem tibi cogitationem injicere , talem vocem excutere , maximus hominum sanctissimorum terror deberet ? me miserum ; si ii , qui placido tranquilloque mari vehebantur ; summo cruciatu animi , vitam agebant , verentes summopere , ne divinæ fluctibus iracundiæ mergerentur ; quo timore angere vel potius terrore perhorrescere eos fas esset , qui iræ cælestis pelago , horribilibus ventis agitato atque commoto , tan-

tam mox tempestatem subituri feruntur? si valida navigia remis, ancoris, armamentisque omnibus, ac præcipue spe maxima, instructa, pane cum salutis suæ desperatione configunt; quanta porro eas naves desperatio invaserit, quæ fractæ, comminutæ, & ad navigandum inutiles, fractis ancoris, funibus ejectis, gubernaculis amissis, ab omni spe derelictæ, concitato mari fortunæ ludibrio futuræ pelluntur? O miseram ac deplorandam infelicis animæ vicem! quis nam tam illi duras iniquasque leges imposuit, ut pejori sit condicione, quam cetera omnia? quid nam ejus adeo salutis adversatur, ut, quum tanti sit ejus salus & incolumitas, ut non reliquarum modo rerum jactura, sed mundi totius interitus atque ruina, pro nihilo existimeretur, si cum ejus labe atque perniciæ conferratur, in eam tamen despicientiam venerit, ut res illi, quamvis vilissimæ, quamvis abjectissimæ, anteferantur; quæso, si unquam tuum vel plures, aut pecuniam, aut rem sibi debitam, judicio persequentes, aspexistis, si eorum disceptationibus interfuistis, illorum recordamini, in quàm optimis patronis deligendis prudentiam, in sapientissimis & disciplina juris civilis eruditissimis viris adeundis diligentiam, aspiciat, ut, vocati in jus, veniant, ut, citati respondeant, ut sint in suo jure defendendo, & probandis rationibus suis, acutissimi, in adversarii fundamentis oppugnandis ac plane evertendis, acerrimi: & ut quisque ingenio est hebeti atque tardo, tamen solertissimus perspicacissimusque evadat, cogitare, ut fidem judicum implorent, ut Deum hominesque testentur, ut forum atque subsellia inflexis ad miserabilem sonum vocibus impleant, ut studeat sibi quisque benevolentiam judicis conciliare, atque odium in adversarios struere, ut lectis atque illustribus verbis utatur, adeo ut nulla jam disertorum atque eloquentium hominum præcepta desideres, sed, ipsam demonstrationem accusationum, ac defensionum illarum, doctrinam esse non mediocrem putes. At vero infelix anima, quæ jam extremo ac sempiterno supplicio damnata est, & carnificum crudelissimorum manibus ad supplicii locum incredibili celeritate raptatur, ea inquam celeritate, qua orbes, qua astra, qua remotissimum illum cæli complexum moveri vertique videmus,

videmus, quæ sane tanta est, ut eam Astronomi cogitatione assequi vix possint; nec quisquam est, qui tantis ejus malis salutem quærat, aut miseræ auxilii quidquam afferat. quis est tam durus ac ferreus, quis tam crudelis & inhumanus, qui, si quempiam duci ad supplicium videat, si vinctum catenis aspiciat, tametsi recentia sceleris ejus vestigia contineatur, tametsi jure poena affectum esse censeat, tamen, quum ea miseria præditum videat, non ejus præsentī fortuna commoveatur, non ejus vicem doleat atque deploret? te solum adversus te ipsum quibuscumque feris immaniolem, te quavis bellina crudeliorem, tuæ ærumnæ non premunt? tu solus in omnium bonorum gemitu lætaris? in tua ipsius calamitate triumphas? te, quem tantopere aliena damna afficiunt, non tui ipsius animi squallor, non luctus, non mortis acerbitas, non suppliciorum æternitas, à scelere ad partem aliquam humanitatis revocare potest? Quare, si quid in nobis mentis, si quid rationis, si quid consilii inest, Auditores, nostri tandem aliquando misereat: & si quis est, qui in aliqua culpa hæreat, precibus, lacrimis, ejus poenæ se subtrahat, dum Iudicis animus flecti ad misericordiam potest, dum est ad ignoscendum paratus; nec suam defensionem in eam diem differat, qua die omnes nostri labores, omnes lacrimæ, omnes conatus, in justo Dei furore atque iracundia, tanquam in scopulo, perfringentur.

O R A T I O . V I I I .

D E R H E T O R I C A

D I S C E N D A .

PLurimum semper opis ac dignitatis in eloquentia constitisse, nemo est qui nesciat. cujus admirabilis splendor non tunc modo enituit, aut utilitas declarata est, quum eidem, illa dicendi magistra atque domina, Græcia fastigium imposuit, aut in hac ipsa Vrbe viri omnium eloquentissimi clarissimique, Crassi, Antonii,

Hortensii, Cicerones, vignerunt, sed etiam in aliis, quæ secutæ sunt id seculum, ætatibus maximam in Oratore inesse vim & amplitudinem, repertum est. Verum, tamen post C. Cæsaris dominationem non adeo eloquentia ad honores consequendos privato cuique contulerit, omnis tamen utilitas in unius Ecclesiæ commoda redundavit. Etenim, ut de Iustino, Cypriano, Victorino, & ceteris, taceam, qui sapius Christiani nominis dignitatem existimationemque à falsis impiorum calumniis vindicarunt: ecquod fuit tempus, quo tempore turbulentissimis hæresum tempestatibus Ecclesiæ navis jactata sit, quæ eas quoque singularis alicujus doctrina, accurata quadam dicendi copia, represserit? Erupit, quemadmodum à sapientibus viris accepimus, quum ex diuturno bello recreare se tandem, & levare oculos, res Christianæ viderentur, illa ferox, immanis, detestabilis furia, sceleratus Arius, qui divinitatem discerpere distrahereque conatus, in omnes Ægypti fines, in singulas fere Asiæ provincias, in bonam etiam Europæ partem, opinionum suarum virus effudit: effulsere, eadem fere tempestate, in tam cæcis nubibus atque procellis, illa quatuor Catholicæ religionis fulmina, Athanasius, Basilus, Nazianzenus, Chrysostomus; quorum ictibus ingenti fragore tacta impietatis moles multorum annorum ruina dejecta est. Verum, non multo post, ferox hæc bellua, exciso capite, tanquam immanis hydra, aliis pluribus capitibus, revixit. inde Manichæi, Sabellici, Pelagiani, & plures aliæ hæreticorum familiæ profeminatæ. quid ergo? repente clarissima illa eloquentiæ Christianæ lumina, tanquam singulare aliquod præsidium, ad dubia Ecclesiæ tempora reservatum, apparuerunt; Ambrosius, inquam, & Augustinus, aliique, quos non idcirco prætereo, quod non admodum suam in confutandis ejusmodi erroribus operam probaverint, sed quod eorundem fere luminibus, istorum splendor, obstruxerit. hi itaque furentem hanc belluam, & vastare omnia cupientem, eloquentiæ gladio perculerunt, denuo ex eadem, humi prostrata, suisque sepulta sordibus, velut ex corruptione contagiosissima, Manichæa pestis excitata est; quæ quum Alexandriam occupasset, navibus Romam ex Ægypto trajecit: restitit illico
venienti

venienti magnus Pontifex Leo ; illum dico Leonem , inter sanctos eloquentissimum , inter eloquentes sanctissimum ; qui postea eandem , iisdem navibus , eodem unde conscenderat , fugientem , ita œcumenico Concilio restringendam comprimendamque curavit , ut reviviscere non amplius posset. nullo fere tempore igitur ita afflictæ religionis opes conciderunt , quin , illo eodem tempore , eloquentissimi alicujus hominis ingenio sublevatæ sint. Immo , prorsus sic statuendum videtur , & majorem in Christiano oratore , quam priscis illis temporibus , dignitatem inesse , & doctrinæ præsidia requiri majora , & plura publicis rebus per eum adjumenta , quam per veteres concionatores , importari. nonne tantum in judicia atque conciunculas , tanquam in aliquem gyrum , compulsos esse eos , qui habiti sunt eloquentes , accepimus ? nonne maximum specimen eloquentiæ dedisse putabantur , qui scelus fraudemque nocentis in popularis invidiæ flammam conjecissent ? at vero Christianus orator omnino est à civilibus controversiis remotus ; nihil de fundi aut hæreditatis jure agit ; omnis est illi cum vitiorum atque scelerum monstris accurata & vehemens atque studio veritatis incensa contentio ; ea tantummodo in controversiam & in judicium vocat , quæ à majorum institutis abhorre , & fidei ac veritati repugnare videntur. deinde plurimorum fuit opinio , nihil fere prodesse , plerumque etiam obesse , doctrinarum ex intima arte depromptam cognitionem in oratore ; ut etiam oratores summi , qui pectus ante , artium plurimarum scientia , complessent , omnino omnis eruditionis expertes ignarique videri voluisse , memoriæ proditum sit , quod probabiliorem hoc populo orationem fore censerent suam , si ne litteris quidem tincti putarentur esse : certe , qui oratori plurimum tribuebant , mediocrem in eo eruditionem doctrinamque desiderabant. at vis Christiani oratoris , professioque ipsa , polliceri omnino videtur , diligenter eum antea , quæcumque reconditis in artibus versantur , investigasse , eaque scientia atque memoria comprehendisse. quam enim habere vim poterit ad persuadendum , aut ad oppugnanda planeque evertenda adversariorum commenta atque mendacia , quæ non maxime exquisitaque doctrinarum om-

nium cognitione efflorescat atque redundet, oratio? Denique, tametsi ornati homines in dicendo, & graves, generi hominum utilitates sæpe maximas attulerint; si quis tamen eas recte dinumeraverit, multo plura detrimentum publicis rebus, quam adjumenta, per homines eloquentissimos importata reperiet. Quoties disertorum hominum ingeniis, ambitione præsertim exagitatís, seditiones in populo maximæ excitabantur! quoties homines nocentissimi, quorum nulla vitæ pars turpitudinis esse expers, qui ita in manifesto peccato tenebantur, ut non modo recentia scelerum eorum vestigia, sed ipsa pæne cubilia, cerni ab omnibus possent, unius oratione, iudicium severitati eripiebantur! quoties sæpe multi, odio atque furore amentes, ad arma eloquentiæ confugerunt, quibus vel inimicos provocarent vel se lacessiti ulciscerentur! At vero hic noster Christianus atque omni laude cumulatus orator, etsi arma orationis semper teneat, quibus provocare improbos possit, ejus tamen omnis contentio non ad privatas injurias, non ad propria commoda, refertur, sed ad patrocinium Christianæ religionis, & ad ejus, qui lacessitur, utilitatem effunditur. Postremo sic ajo, Rebus publ. Christiano oratore gravius aut utilius nihil posse constitui. ita enim, nisi quid me ratiocinantem fallit, à me ratio efficitur, concluditurque: Vnde cædes, adulteria, sacrilegia, rapinæ, nisi ab ira, odio, cupiditate, ceterisque animi motibus, quum ii non satis reguntur à ratione, proficiscuntur? igitur, qui appetitus, longius evagantes, & tanquam exultantes, reprimere, aut eos rationi obtemperantes reddere, studet, hîc cædes, rapinas, atque ejusmodi perniciosissima vitiorum genera, quantum in ipso est, à civitate repellit; qua re ne cogitari quidem utilius quidquam potest. at hoc Christiano oratori propositum est; nihil igitur illo utilius. Atque, ut cetera exempla missa faciamus, nonne statim Germania fere tota Principum suorum obedientiam abiecit, simul ac effractis pudoris modestiæque repagulis effusa est in omni intemperantia libido? nonne item, simul ac cupiditatis flamma exarsit, tota fere illico, odio, avaritia, crudelitateque flagravît? nonne virtutum omnium germen exstinxit, simul ac primum impurissima Lutheri decreta,

decreta, malorum omnium semen, excipit? tunc cædes, adulteria, rebelliones, tota passim Germania factæ sunt, quum pulsa ratione in cupiditatum dominatu, omnium rerum perturbatrix libido, collocata est. Proinde, quum tanta plane vis utilitasque in eloquentia versetur, ut, exceptis semper cælestibus auxiliis, omnes ei Christianæ Reipub. protegendæ partes tribuantur; si vobis, adolescentes optimi, Ecclesiæ dignitas & incolumitas cordi est, si vobis honori esse vultis, si ceteris mortalibus utilitati; toto jam pectore hoc studium, in quo vobis versandum esse duxistis, amplectamini, neque illa, quam diximus, tam exquisita tamque perfecta magnarum rerum atque artium scientia vos, incensos studio dicendi, deterreat; immo, quemadmodum ego sentio, multo vos debet ad id acrius impellere. Quid enim tam præclarum excogitari potest, quam illi doctrinæ deditos vos esse, quæ omnium artium maximarum studiis contineatur? quid admirabilius existere, quam omnium rerum, virtutum, disciplinarum, vim, scientiam, varietatemque complexos esse? in quarum singulis separatim qui elaboraverunt, magnam sunt ferre laudem adepti. quis gaudio non efferatur, dum cogitat, tantam ejus, cui studeat, artis esse gloriam ac dignitatem, ut, quascunque in oras disputationis regionesve delata sit, tanquam in proprias sedes venerit, quocunque ingressa sit, scientiarum longe maximarum instructu, ornatu, comitatuque incesse? quis ad discendum non inflammetur, quum intelligat, quemadmodum è summis montium amnes in mare perpetuo labuntur, sic ex altissimo sapientiæ jugo in eloquentiam, tamquam flumina disciplinarum omnium, defluere? Verum hæc qui assequi se posse desperant, qui se ingeniis ad illa eruenda, quæ sunt in Philosophia, minus acribus & acutis esse sentiunt, qui ea, quæ de divinis rebus à Theologis traduntur, excipere se posse diffidunt, quibus ad ea, quæ Mathematicorum reconditis in artibus includuntur, perveniendi facultas non est, moneo, prædico, ut ex hac nostra schola decedant, & eloquentes evadendi spem simul abjiciant; ne, quæso, doctorem frustra fatigent, se ipsi crucient, alios impedian: qui demum verentur, ne in eloquentiæ pelago, tanquam scopuloso

atque

atque infesto, ad aliquod saxum appellant, ad hanc nobiscum navim non ascendant, sed nos ex portu, prospero cursu, vela facientes intueantur. Affert, nec inficiabor, progredientibus sæpe moram & difficultatem, viæ longinquitas asperitasque; verum hæc omnia, atque his multo graviora incommoda, jucunda loci, quo itur, memoria leniuntur. præsentī igitur animo sitis; jam enim fiet, ut confecta navigatione omnem vobis molestiam ex animo præsens, quasi portus, eloquentiæ tollat aspectus, & summi labores vestri, magna compensati gloria, mirigentur. Quod si eloquentiæ parenti mirari tantopere contigit, quod, quum tot summi homines, & summis ingeniis præditi, se omni tempore ad dicendum contulissent, quum sua præsertim ætate, fecunda optimorum oratorum altrice, multo plures huic facultati, quam ceteris artibus, inservirent, quum summa laus in eloquentia posita esset, quum, spe uberrima & præmiis ad perdiscendum amplissimis allicerentur, tamen vix singulis ætatibus, singuli tolerabiles oratores extitissent, suo vero tempore paucissimi, quos æquo animo spectare posset, invenirentur; quanto magis erit mirandum, non modo si è vobis plures, Deo bene juvante, summi oratores evaserint, verum etiam, si quod in vobis homines veteris eloquentiæ vestigium aspexerint! quos plausus excitabit, quos clamores commovebit, quas admirationes efficiet, si referta sententiis, si ornata verbis, si pura, si dilucida, si apta, vestra erit oratio! quum pauci, ac nulli fere, sint, qui in hoc exercitationis genere versandum esse existiment, quum fere eloquentiæ studia interierint, quum in omnia ejus præmia ceteræ quoque artes invaserint, quum certe nullum ad opes & copias iter patefaciant. Quamobrem, Romani adolescentes, ad eloquentiæ laudem summa animi alacritate contendite; atque ex eo genere, atque in ea urbe, ortos vos esse recordamini, in qua summa dicendi vis, inventa atque perfecta est; neque quisquam existimet, posse se, remotis his studiis atque exercitationibus, aut aliis doctoribus quam nostris doctissimis Patribus, in hoc genere excellentem evadere. etenim, quemadmodum ceterarum fere bonarum artium; ita sunt etiam in possessionem hujus omnium præstantissimæ

mæ

mæ facultatis, quasi ventris, nomine constituti, quam testamenti vel hæreditatis jure illis restituant, quos, tanquam heredes veteris eloquentiæ, procreaverint atque aluerint. Te vero, Famiane Strada, Princeps horum omnium adolescentum, summo ingenio, acerrimo judicio, singulari memoria adolescens, non tam cohortandum, quam summo opere laudandum esse, judico, quod, adjuvante natura, accendente studio atque exercitatione, tantam jam sis facultatem adeptus, ut, quæ vix alii perfecta ætate summo labore, magnis diuturnisque vigiliis, assidue consueverunt, ea tu, antequam qualia sint intelligere potuisti, pæne puer didicisse planeque nosse videaris, & antequam primum eloquentiæ vestibulum ingredi per ætatem potueris, in intima ejusdem penetralia pervenisse existimeris. Cujus virtuti quanquam faveo, Auditores, tamen non mediocriter etiam doleo, præclarum ejus ingenium, summos perpetuosque labores, adeo potius præcucurrisse industriæ, nullam ut aliis fere laudem reliquerit. Quo magis nobis laborandum vigilandumque esse judico, cavendumque, ne ab ejus flagranti studio, incredibilique solertiâ, tanto intervallo videamur abesse; vel saltem enitendum, ut eo quisque majori dignus laude habeatur, quo ad hanc miram & in hac ætate incredibilem dicendi vim & copiam propius accesserit.

O R A T I O IX,

D E

C H R I S T I M A T R E

A S S V M T A.

Communis celo terraque lætitia ex glorioso Dei Marris, sanctissimæque Virginis, triumpho, Patres religiosissimi, ceterique auditores ornatissimi, Angelorum atque hominum animos, ad triumphantis merita prædicanda, admirabili inter se voluntatis nexu devincit. Etenim, diversis quidem de causis, sed in unam Virginis

Virginis gloriam, contendentibus æque ab Angelis atque ab hominibus, tam in illis Beatorum sedibus jucundissimis, quam in hoc exilii atque ærumnarum loco, ad memoriam nominis sempiternam, festus hic dies agitur: ab Angelis omni quidem genere laudis celebratur, quod summi regis matrem, jam præsentem, & tanquam ingens aliquod luminare additum, cælum nova luce complementem intueantur, quodque eidem, soluto mortalitatis vinculo, effractoque corporis carcere, de ascensu in illam sempiternam domum, de amplissimo atque gloriosissimo ex fugatis hostibus triumpho, gratulentur: ab hominibus contra, suavissimis vocibus, summaque frequentia, exornatur; quod summopere gaudeant, post longa vota, post diutinas lacrimas precationesque assiduas, ejus divinum filium maximo ac pæne intolerando Virginis matris desiderio concessisse, eamque ex tot tantisque vitæ hujus incommodis & molestiis exemptam, in felicissimis illis omnique jucunditate refertis Beatorum choris collocasse, exultant gaudio Angeli, quod cælestis regni diadema, fulgentibus stellis illustratum, expectatæ diu reginæ capiti impositum sit, quod, susceptis aptum laboribus, aditisque dignum periculis, tantis esset virtutibus consentaneum. hic vero tota lætantium cantu personat Ecclesia; quod, licet una nobis cum Virgine omne mors lumen extinxerit, & ad unius decessionem è vita, omnia etiam è terris ornamenta discesserint, tamen rebus id nostris prope desperatis relictisque perfugium, miseris atque jactatis levamen, accesserit; nihil ut jam sit, vel ab importunissimorum hominum malitia, vel ab humani generis hostis astutia, pertimescendum. Verum, si quærat, ad quos potissimum ingentes utilitates & maximæ pervenerint, licet solis illis beatissimis mentibus felix ejus è vita discessus bono fuisse videatur, quum ad illorum infinita gaudia æternasque voluptates jucundissimus cæli terræque reginæ, Deique matris, aspectus accesserit; perspicuum est tamen, summam utilitatum omnium, atque bonorum præsertim, in homines redundare. Etenim beati, omnibus vitæ hujus incommodis molestiisque perfunditi, in locum quietis & tranquillitatis plenissimum, tanquam in portum ex longa navigatione, venerunt, ubi jactis

jactis ancoris, maximæ & expeditæ cunjctam securitatis, in qua vita beata posita est, nullis amplius agitari fluctibus, nulla abripi tempestate, nulla absorberi procella, jam possunt; sed habent pro comperto, fore se semper tum in maximis tum in æternis voluptatibus, nos vero, in hoc mari turbulentissimo, gravissimis & vehementissimis contrariarum perturbationum flatibus ita agitamus, ita jactamur assidue, ut, nisi se nobis patrocinantem divina Mater præbuerit, &c, clarissimis distincta stellis cæli verticem tenens, nostrum iter, quasi dux nocturna cynosura, direxerit, maximo in periculo versemur, ne aut, amissis rationis gubernaculis, rapido cupiditatis æstu abripiamur, aut, de eo quem tenere debuissimus cursu paululum deflexi, in vada & in scopulos impellamur. Quæ quoniam ita sint, felicem hujus beatissimæ Virginis introitum in vitam beatam & æternam, quo omnium bonorum nostrorum origo & summa continetur, quanta maxima possumus frequentia & religione, celebremus. cujus quidem laudatio, etsi ad omnes Christianos pertinet, tamen haud scio an alicujus sit magis propria, quam nostra adolescentum, quos, in suam tutelam traditos, majoribus habet beneficiis obligatos. Equidem, quod ad me attinet, quamvis pæne opprimi me tanto onere sentiam, tamen, cum illis dicto audientem me esse oporteat, quibus non modo omnes studiorum meorum sed etiam vitæ rationes commisi, ita in hoc certamen prodire non dubitabo, ut tantarum laudum cursum, quanta maxima possim, celeritate conficiam. A nostris igitur cervicibus tantorum malorum mole depulsa, nobisque in possessionem veteris libertatis restitutis, quæ repræsentari, nisi liberatoris morte, non poterat, tandem Salvator noster, spoliis inimicorum onustus, & tantis cumulatus gratiæ muneribus, quanta capere humana natura, divinæ annexa, poterat, cæli terrarumque à Deo principatum acceperat. Verum, orbitati eorum, quos omnium gentium magistros, arcanorum mysteriorum conscios, testes rerum à se gestarum locupletissimos, elegerat, parentem Virginem, virgini commendatam, magna quidem mutui doloris solatia reliquerat; tantisper, dum delapsus è cælo Spiritus sanctus metuentium animos, à summo timore ac debilitate,

debilitate , ad incredibilem fortitudinem securitatemque traduceret , & nascentis fines religionis , orientis obeun-
 risque Solis regionibus terminaturos, contra iniquitatem
 judicum, contra inimicorum acerbiteratem , contra regum
 opes atque potentiam , contra Iudæorum insidias , om-
 nium virtutum præsidio muniret ; cui etsi perspicua satis
 hæc Christi voluntas erat , atque adeo suas omnes appeti-
 tiones rationi obediētes habebat , ut, tanquam famulæ,
 eidem ad nutum obtemperarent; non poterat tamen, filii
 dulcissimi desiderio , usque eo non commoveri , ut mor-
 tem in beneficii locum non reponeret ; quo , quam posset
 citissime, in Christi conspectum se committeret. *Qualis*
erat, beatissima Virgo, tui pectoris ardor ! quæ tuis erum-
pebant ab oculis lacrimæ ! quæ voces ex ore prodibant !
quæ & quantæ in te cupiditates cælestis patriæ , jucunda
filii memoria , excitabantur ! non est obscurus hic locus ,
Auditores ; ita enim ad nostram institutionem se palam
gessit in vita , ut præclaras ejus virtutes conjectura judi-
care non sit necesse. Igitur , qua interim in re elaborasse,
qua voluptate desiderium sui dissidii lenisse , existimatis ?
quibus occupationibus , antequam cælum , & in illum
beatorum conventum , adiret , ardentissimam sitim tole-
rasse putatis ? At otio se dederat vel fœmineis luctibus,
vel suum forte dolorem animi libera quadam oblectatio-
ne mitigabat. erras ; non quies illam , non remissio ani-
mi , delectabat ; non his pellebatur animi ægritudo sola-
tiis ; nemo unquam cessantem , nemo oscitantem eam vi-
derat. quis enim in ea locus torpori & negligentia esse
poterat , in cujus vita , nulla hora , nullum temporis mo-
mentum , vacuum ab insignis alicujus virtutis usu repe-
ritur ? quæ pars cogitationum ipsius deprimebatur in
terram , quum jam omnes rerum inanum laqueis expeditæ
ad cælum erigerentur, quumque , etsi versabatur in-
ter homines , tamen videretur quodammodo vivere &
habitare in illis cæli sedibus jucundissimis ? nullum labo-
rem , quamvis natu jam grandior , perhorrebat , non ur-
gentis somni necessitas , non gravia senectutis incommo-
da, non productæ ad multam noctem preces , non defessa
labore membra, non assiduis vigiliis & inedia confectum
corpus , effecerat , quo minus libero atque expedito ad
cælum

cælum cursu contenderet, & inexplicabilibus complexa Christum nodis, se cum illo conglutina-ret. *Erant*, inquit Lucas, enumeratis discipulis, *hi omnes unanimiter perseverantes in oratione, cum Maria matre Iesu*. Ergo incensis & nunquam intermissis precibus, manens adhuc in corpore, supra omnes cælestes orbes animo peregrinabatur; in hoc curriculo se quotidie exercebat; in hoc opere dies noctesque urgebatur; non illa studiis sanctissimorum virorum obsecundavit solum, sed præfuit; non se comitem eorum pietati, sed ducem, præbuit. O vim maximam precationum assiduarum! ô virtutem omnium præstantissimam, sine qua nec ceteræ haberi possunt, neque ad brève quoddam tempus retineri! hæc est illa arx munitissima, in qua, præsidia defensionis suæ, constituerunt ii, qui cum hoste humani generis infestissimo conficiantur; qui mundi oblectamentis, qui voluptatibus corporis, qui sibi ipsis, bellum atrox atque perpetuum indixerunt. hæc est illa mirifica quasi munitio ac moles, qua quidem adeo à freto divinæ iracundiæ se jungimur, ut, nisi hæc modica intercapedo intercedat, pæne millies in singulas horas toti ejusdem fluctibus operiamur. hæc est illa patrona præclarissima, quæ, judicis animo ad Dæmonis odium renovato ac revocato, & dolore vulnorum eorum, quæ pro nobis accepit, refricato, nos in possessionem salutis ac defensionis nostræ constituit. hæc depressos animos, & quasi demersos in rerum vilissimarum sordes, ad illud altissimum cæli domicilium erigit, ad res divinas contemplandas extollit. hæc, res, à nostris sensibus remotas, locorum intervallo disjunctas, præterito temporis spatio, tanquam tenebris, involutas, propinquas præsentisque facit, ac pæne statuit ante oculos ejus. Igitur viribus, quasi alis, animo quotidie, quandoquidem corpore non poterat, in cælum ferebatur, eoque comitatu, in Dei conspectum, in filii dulcissimi complexum, venerat. ubi quanta suavitate duci, quanta voluptate retineri, quibus blandimentis deliniri, solita esset, non equidem inæ esse opis existinem, non humanæ imbecillitatis, non hujus temporis brevitatis, explicare. hoc est plane illarum beatissimarum mentium opus, tuus etiam est, sanctissima Regina, labor, cujus hæc toties gaudia cælestia divinis sensibus

bus percipiebantur. sentiebat, Auditores, se nova quadam ac jucundissima voluptate perfundi, divina suavitatem liquefcere; ac pax exultare sibi inter choros Angelorum videbatur, quibus jucundissimis amplexibus, quum prope eisdem quasi laqueis teneretur, eorum sæpe necessitatibus evocata qui sibi erant in tutelam traditi, sese libenter expediebat. O miram virginis caritatem! ô amorem maximum ac prope divinum! quid unquam tale, nisi de Christo, audivimus? magna profecto illa laus & admirabilis videri solet, suscepisse pro aliquo labores atque pericula sine emolumento ac præmio; summa profecto commendatio, quæque habeat uberrimam copiam ad laudandum, præcipuum aliquod commodum amici causa prætermisisse; at vero cælestes delicias neglexisse, æternas quasi voluptates abdicasse, quo aliis prodesse possis, hoc quidem per se tantum est, ut, id qui faciat, non is quidem sit cum hominibus comparandus, sed Deo simillimus judicandus. Igitur, tametsi beatissima Virgo cogitationes suas omnes defixas in Deum, tanquam unum in locum, haberet, tamen, quando erat necesse, bonam earum partem in aliorum utilitates & commoda derivabat. &, quemadmodum Martha olim à Christo postulaverat, ut Mariam, sororem suam, ad divini pedes magistri, salutaria vitæ præcepta tradentis, sedentem, pro potestate cogeret, suam cum ipsa operam ad cœnæ ministerium adjungere; ita etiam acciderat sæpissime, ut, si quando corpus, quod propter eos, quos filio suo gratissimos esse constaret, assiduis vitæ laboribus addixerat, sese in cælestia desideria ferentem animum, ad hæc munia pro parte subeunda, advocaret, suam cum eo ad communem utilitatem operam libentissime conjungere; satius enim duxerat, nullam cujusvis lætitiæ, etiam cælestis, rationem habere, quam committere, ut ejus officii pars aliqua, præsertim in Apostolos, desiderari possêt. neque idcirco distractum in diversa studia animum, tanquam in contrarias partes, minus in preces intenderat. etenim si illi semper orare intelliguntur, à quibus nullum quidem tempus intermittitur, aut de Deo cogitandi, aut de hominibus bene mendi; nos in Christi matrem cessationem ullam vel minimam, in studio orationis, induxerimus, quum eum
semper

semper tenere vitæ cursum potuerit, ut quolibet temporis momento aterna virtutum omnium monumenta reliquerit? quoties igitur ad illam existimatis Christi discipulos, quos habebat in liberum loco, de rebus arduis ac dubiis retulisse, atque illius in deliberando prudentiam, in consiliis dandis fidem ac religionem, admiratos esse! quoties, magno aliquo vel acerbo dolore commotos, se ad illam contulisse, atque in ejus sermone & suavitate, immo potius in ejus suavissimo conspectu, curas omnes doloresque deposuisse! quoties nova illa Ecclesiæ germina fecundissima, petita ferro iniquorum, religiones omnes pari impietate exæquare nirenti, ad ejus aram praesidii confugisse, didicisseque, contemnendos esse iniquorum gladios, non pertimescendas Iudæorum insidias, inimicorum injuriis occurrendum, & alacriter pro eo ad supplicium, tanquam ad palmam, festinandum, qui semel corpus, ut salutem daret, libidini inimicorum obtulerit, seque in cruciatus acerbissimos & in mortem crudelissimam, summa cum voluptate, tradiderit! quam erat in hoc genere frequens! quanta vi animi, quanto impetu, ardore, spiritu, vultu denique ipso, persuadere illis conabatur, ne, beneficio provocati, steriles agros imitarentur, qui multo minus efferunt quam acceperunt; sed, quandoquidem ipsis jam omnis prærepta esset referendæ gratiæ facultas, cum illius tamen Imperatoris ductu auspicioque, inferendis cælo armis, sua saltem signa conjungere ne dubitarent, qui, in regni ejusdem propugnatione extinctus, spiritum effudit in victoriâ! quas, ad inflammandos illorum animos, orationis faces adhibebat, ut sæpe, non tam illis consilium, quam incendium, tradidisse videretur! qua pietate, tendens supplices ad cælum manus, à Deo precabatur, ut filiis, sibi carissimis, quos in spem cælestis regni produxerat, opem auxiliumque præberet, ut illis dignam Christiano viro, dignam Ecclesiæ principibus, fortitudinem inspiraret; & si divinæ opis explorata quædam ratio, humana mente, concipi potest, ralem exterritis fiduciam injiceret, ut Deum secum stare, & inflicta nomini corporique eorum vulnera, quodam quasi clypeo galeaque, subire perciperent, quibus referendis illud etiam patriæ cælestis desiderium aperiebat

suum, & dolorem omnium acerbissimum, ex longa mortis dilatione contractum, quasi in eorum pietatem & misericordiam, qui audiebant illam, refundebat. quæ nam igitur suspiria, quos gemitus edidisse, quem lacrimarum imbrem effudisse putatis, dum pro Christi discipulis, dum pro Ecclesia recens nata, dum pro se ipsa, humiliter Deo & parenti filio supplicaret? Quapropter, tametsi inclinata jam voluntate in id, quo impellerentur, satis sponte propenderent; ita tamen revocatis in memoriam Christi beneficiis, iisque reputatis quæ officii ratio postularet, quasi currenti equo calcaria admoverentur, præcipiti fere impetu, qua sese dederat ad eam rem via, rapiabantur, ut mortis pro Christo obeundæ studio acerbissime dilacerari ac pane mori viderentur; & eo usque commovebantur, ut incredibili dolore animi quererentur, iram in hostibus confedisse, exorbendi Christianorum sanguinis ardorem deferbuisset, occidendique rabiem defecisse dolerent. his igitur stimulis eorum animi dies noctesque concitabantur, hæc una tantum cura, aliis solitudinibus exoneratis, infederat; non aliam, præterquam rerum à Christo gestarum commemorationem, quasi viam, quotidiani eorum sermones ingrediebantur, nunquam erumpentibus eorundem cogitationibus parebat aditus, nisi qua memoria rerum earum, quas ipsi oculis perceperant, iter effecerat. quoties de salutatione Angelica, de humana divinaque Christi natura in unam hypostasim colligata, aliisque arcanis Christianæ fidei mysteriis, Dei matrem percunctantes multis verbis, ultro citroque hâbitis, dies noctesque integras consumeabant! quoties admiratione defixi obstupescabant, quum ejus temporis mentionem fecisset, quo tempore sibi ad pariendum vicinæ temporibus exactis, propter tecti inopiam, in humili ac paupere tugurio Deum parere, & in frigore pernoctare necesse fuit, præterea Angelorum cantus, concursus, obsequia, qui ex suis sedibus prosilientes, cuncti se ad ejus pedes projecissent, & dominam ac Reginam suam salutavissent! ô quoties, quum in Christi mortis acerbissimæ mentionem, eorum tandem recidisset oratio, & parricidarum Iudæorum crudelitatis memoria, non cruciatuum acerbissimorum immopitate satiata, non sanguine

sanguine innocentis expletæ, & præsertim fugæ turpissimæ recordatione, refricarentur animi, quasi obductus recrudesceret dolor, vidisses illico, veterem animi curam molestiamque renovari; nec gemitus modo, sed etiam ejulatus edi exaudisses. quoties tu quoque mitissima Virgo, ob amorem in eos incredibilem & singularem, his lacrimis ingemiscebas, & luctibus illorum non parcius ipsa flebas, quam illi lacrimarentur! quoties, ne omne eis prorsus ademisse solatium videreris, quibus ipsa deberes esse solatio, bono animo illo dolore pæne consumptos esse jubebas, commemoratisque iis quæ de Dei clementia & benignitate referuntur, pluribus verbis consolari dolorem illorum conabar! Verum in ejusmodi colloquiis, Apostoli sanctissimi, magna quidem ex parte posita erant doloris vestri solatia; at Virgini, ardentiori Christi desiderio æstuanti, quasi quædam verborum faces admovebantur, multo semper illa vehementius ad mortis cupiditatem exarserat; quumque cum forte annum perfunctione illarum rerum, propter quæ in hac terrestri domo derinebatur, aditum ad tantæ spei eventum dare prospiceret, nihilque jam superesse, quod posset illi impedimento esse, quo nîtinus castra moveret, vasa colligeret, & de hujus vitæ præsidio stationeque decederet; majores fusa in lacrimas, & ardentiori incensa studio immortalitatis, à Deo enixe petere cœpit, ut, si ei videretur, se cuncto iis corporis liberaret; & fortasse ad ea loca frequenter veniebât, unde cursum suum Christus in cælum direxerat; ut vestigium illud ipsum, in quo ille postremum institisset, contueretur, seque inde involatum dare cipientis, hæc quoque extrema & tanquam cygnea fuit vox & oratio: Quousque miseræ mihi, pater sanctissime utque optime, hic in terris morandum erit? ecquando stis me corporis molestiis liberaveris? quousque istuc mihi aditus patere non poterit? dum infirma illa discipulorum turba ducem aliquem & rectorem sibi poscebat, tametsi acerbissimum mihi esset, tamen vivere non recuavi, ne munus, mihi assignatum à te Deo meo, defuisse viderer. nunc vero, quum eorum sese timiditas in iduciam, ignavia in fortitudinem, verterit; quum jam conspicias, nihil tuæ voluntati resistere, sed regum poten-

tissimorum arma, pauperum nuditati, sapientium, & di-
 fertorum eloquia atque consilia, stultorum, ut ajunt, in-
 fantiæ, veterem impietatem novæ religioni, cecidisse. Iam
 igitur, nisi tuo imperio alia quoque provincia meo ac-
 cessit labori, meum animum hujus corporis vinculis, in-
 fer me in illum cœtum beatissimorum civium, votum
 meum imple: dum te etiam atque etiam considerare, atque
 oculos tuo explere liceat aspectu jucundissimo, te procul
 intueri, & quasi in ultima cœlestis theatri cavea spectari
 propius non liceat, cupio. Verum, quum nihil sit tam in-
 credibile, quod non convenire in Christi matrem potuisse
 credamus, existimare etiam licet, totum illum cœli con-
 tum, data postulandi occasione, pro cœli domina ac regi-
 na, surrexisse, & humillimis precibus Deum & hominem
 Christum rogavisse, ut carissimam sui partem extra com-
 munitatis periculi fortem evelleret: quid enim tam indignum
 esse, quam Dei matrem sacratissimam, atque eidem ante
 omnes caram, eos, quibus ipsa odio esset, habere? quid
 esse minus ferendum, quam lumen illud clarissimum, cu-
 jus fulgore cælum illustrari & collucere oporteret, id
 apud illos in eorum urbe versari, quæ recenti eorum fa-
 roris incendio, quæ Christi cæde ac parricidio, quæ ne-
 fariis sceleribus flagitiisque, flagraret! quid dolendum
 magis, quam in illorum hominum turpissimorum domo,
 quæ adhuc Christi Domini ad supplicium rapti vestigii
 impressa esset, præclarissima cœli ornamenta reponi! quid
 indignatione omnium dignius, quam illorum manibus,
 quæ adhuc sui essent regis sanguine respersæ, teneri, &
 illorum oculis conspici, qui nunquam satiati expletique
 ab illo lacerato vulnerebusque cruentato corpore non po-
 tuerunt averti! Vna fortasse vox erat, ad hoc pari consensu,
 ut, tanquam bonus imperator & æquus, stren-
 num militem, & labore defatigatum, confecto viro
 bello, missum faceret. quæ justissima matris postulata,
 Dei non reluctantem animum, in suam sententiam impu-
 lerunt; & divinæ ejusdem providentiæ visum est, tandem
 ut Christi potiundi & illorum æternorum bonorum ar-
 ditas, tanquam diuturna sitis, eo potissimum tempore ex-
 pleretur. & quemadmodum Hieronymus inquit, exoptis-
 simæ rei velox nuntius, fidusque divinæ voluntatis in-
 terpres

terpres, Gabriel Archangelus, perpetuo virgini obsequio addictus eligitur. Iam vero, quod est ingenium tantum, quæ tanta facultas dicendi & copia, quæ maximum & incredibile illud gaudium, quo perfusa est optima arque sanctissima parens, expresserit? illa quidem, summa cum modestia gaudere, exultare, triumphare; sed, sicuti erat unicum probitatis exemplar, demisse Deo gratias agere, quod divina Christi benignitas jam parata esset extinguere omnem diuturni sui desiderii ardorem. nec multo post, accita Dei mors tandem imperio, roganti obviamque prodeunti, non asperas, non inimicas, non tristes, sed amicas atque suaves iniecit manus, & multis quidem cum lacrimis & lamentatione Christianorum virorum mulierumque omnium, magno cum luctu & gemitu Apostolorum, qui illuc ex omnibus terræ partibus divino consilio convenerant, Dei matrem, cæli decus, bonorum præsidium, orbis terrarum lumen, extinxit. O fortunata mors, & omni vita dulcior & carior, quæ finis fuit adumbratæ vitæ, & initium solidæ & incorruptæ, quæ portus malorum, & terminus humanæ miseriæ, tanta cum voluptate reddita est ei, cui debebatur, morienti dulcis, decora Deo, immortalis Beatorum concilio jucunda, terris, suis detractis ornamentis omnibus, funesta, sociis ac filiis, in solitudine & orbitate relictis, acerba. ergo, qui tibi dies æternæ jucunditatis atque lætitiæ initium attulit, idem quoque omnibus, qui te singulari religione colebant ac venerabantur, eorum, quibus adhuc abundarunt, solatorum finem constituit; quæ hora tibi felix & gloriosa, eadem ceteris, interverso hoc cælesti divinoque thesauro, calamitosa ac tristis illuxit. cujus quidem corpus, quum ex oppido exportaretur, quod fuisse creditis impiorum gaudium, qui existimabant, homines in oblivionem eorum crudelitatis atque facinoris esse venturos, si etiam Christi marrem, tanquam indicem sui sceleris, sublatam esse vidissent? quem conventum mulierum factum esse arriramini, quum, ut credi facile potest, illud quoque corpus mox felicissimo illi spiritui, æterna societate, conjungendum, ungerent unguentis, complerent coronis & floribus, & ut tenuissimæ earum opes ferebant, thure odoribusque incensis, usque ad

sepulturæ locum, prosequerentur? quem fletum, majorum natu, quorum fere omnes illum quoque diem memoria tenebant, quo die illa innocentissimum filium extremo summoque supplicio affectum viderat, & dolorem omnium acerbissimum, tanquam aliquod telum, totis animæ visceribus hauserat? quam dissimilem hunc diem illi diei videbant esse! tunc enim, ab omni ætate hominum atque ordine, acerbissimo quodam morfu doloris dilaceratam fuisse viderant, atque omni genere crudelitatis & suppliciorum enecatam in filio; nunc vero cernebant animo, tanquam oculis, eandem ipsam, exhausto universo dolore, tanta & tam incredibili voluptate perfundi, ut nullius non modo flumen ingenii, nulla dicendi aut scribendi vis & copia, narrare, sed nec cuiusquam mens & cogitatio capere posset illius animi divini gaudia cælestia; tunc genti turpissimæ & impurissimæ, vita ejus in summa paupertate vel potius egestate transacta, virginalis oris pudor, animi demissio singularis, vestitus asperitas & moderatio, despiciatui fuerat atque contemtui, nunc vero videre videbantur eandem, splendore virtutum clarissimarum illustrem, omnis antea vitæ fructum percipere magnum, immortalem, ita ut non modo præsentis diei gloriæ nulla unquam allatura esset finem ætas, sed eadem florens in dies magis se etiam refunderet in posteritatem, & futurum aliquando esset, ut, propter eximiam sanctitatem, etiam hostibus digna, quam sanctissime colerent, videretur? felicissima igitur mors, & quavis vita, licet jucundissima, suavior. quod si ad speciem præclara, ad aspectum jucunda, ad æstimationem pretiosa, Deo videri solet mors sanctorum ejus, quanto magis ejus movisse oculos & delectavisse putamus felicem sanctissimæ omnium virginis ex hac vita discessum, cujus integritas, & innocentia singularis, digna potissimum fuit, quæ novo & admirabili & omnem naturæ vim excedente partu expleret diuturni desiderii nostri expectationem? Si, tanquam laborum & miseriarum quietem, non solum fortiter, sed etiam sæpe libenter, appetiverunt ii, qui fere perpetuis vitæ incommodis atque molestiis conflictabantur, quod multas uno dolore animi & corporis poenas sæpe miseris adimi intelligerent, quam
te illam

te illam cupide mater sanctissima atque optima adamasse crediderim, in qua una perpetuo omnes fortunæ fluctus, tanquam in saxo, frangebantur! si eam denique boni atque sanctissimi viri jucundam, & votis omnibus expetendam esse duxerunt, quod ea esset via in cælum, ubi illius præstantis divinæque naturæ pulchritudinem, acie mentis, divino lumine illustratæ, percipientes, affluentem bonis omnibus felicitatem consequerentur; non est dubitandum, quin hæc tibi certissima spes tam propinqui discessus objecta, omnium maximam jucunditatem attulerit, quum, ingentium meritorum frequentia circumsepta, haberes pro comperto, te in sempiternum tempus immortalibus bonis fruituram, & quot dies, quot horæ, quot momenta tuæ vitæ, laborum plenissimæ, adderentur, totidem etiam tuæ maximæ gloriæ felicitatique deduci? Quæ cum ita sint, quid moror in terris? quin istinc ad vos, ô cælités, venire propero? quorum felicissima societate amores & deliciæ meæ continentur, quorum non modo ad aures, actionum & virtutum illius concentus vehitur, verum etiam in oculis splendor pulchritudoque defigitur, vel saltem, quum hoc fieri non possit, cur in his artibus pro mea virili parte non versor, quarum illa princeps fuit, & quarum adjumento ad cælum sibi viam communivit, æquitate, labore, temperantia, castitate, studio virtutis, odio peccatorum? quousque humi defixa mea mens erit? quousque cogitationes meæ, in illa cæli gaudia defigendæ, in luto voluptatum ac cupiditatum omnium totis vestigiis hærebunt? quousque levissimarum quarundam rerum, & quasi puerilium ludorum, vinculis, veluti tenuissimis quibusdam laqueis, contexto everriculo teneri me patiar? ita ne res abjectissimæ & sordidissimæ meum animum suo pondere ita deprimant, ut, maxime in terram propendens, ipse se erigere nequeat, eoque, quo hominum Angelorumque Regina penetravit, feliciter evolare? Iam vero, quæ vox, quæ latera, quæ vires, vel partem exiguam possint commemorando sustinere earum laudum & honorum, quibus in cælo excepta est? Existimare licet, (sic enim cæli reginæ dignitas, sic Dei matris nomen, exigebat,) processisse obviam illi venienti Christum opt. maximum, felicissimæ

possum, gaudebo tamen tua hac tam excellenti bonitate, & quoties ipsum te intuebor, à quo nusquam oculos de-
jiciam, toties de tuis maximis beneficiis, toties de tua in-
credibili caritate, toties de tua singulari sapientia recor-
dabor; qui, quum tibi, Dei formam gerenti, innumera
Angelorum agmina ad nutum præsto essent, amore sau-
cius, tua hac gloriosissima è sede consternatus, te in has
ærumnas intulisti, atque homines, tuæ erga eos benevo-
lentia, præter alia, hoc quoque habere fortissimum pi-
gnus voluisti. ego, autequam tuæ beatissimæ divinæque
naturæ majestas ac gloria meos ad oculos perveniret, &
in hanc felicissimam vitam introirem, mecum de tuo co-
gitans beneficio, satis mirari non poteram vim tui amo-
ris immensam, qui rem tibi tantam, tam novam, tam
incredibilem, induxisset in animum; nunc vero oculis
ipsamet cernens, quod assequi cogitando non poteram,
admiratione propemodum obruor, & stupore pæne defi-
cio, considerans, te tantorum exercituum Regem, quo-
rum prope immensis agminibus infinita cæli spatia com-
plentur, tuam divinam majestatem natura mortali, quasi
servili quadam veste, texisse, ut non modo nomen hu-
mano generi tuum ad translationem criminis accommo-
dares, non modo unum te communis culpæ reum substi-
tueres, sed etiam, quam damnatis crucem fixeras, tibi
ipsi reservares. quibus complexam Dei pedes humilli-
mis verbis illi gratias egisse credibile est, quod quæ cum
omnes ejus labores, omnia pericula, partiebatur, etiam
præmia communicasset. Verum, ut eo tandem detur ora-
tioni nostræ digrediendi locus, quo maxime ad utilitates
nostras recasura sit; reputate cum animis vestris, Audito-
res, quibus susceptis laboribus, periculisque aditis, tanta
hæc, quasi merces, rerum ab ea gestarum gloria, & im-
mortalitatis præmia successerint; reperietis enim, maxi-
morum meritorum laudem, atque omnia virtutum orna-
menta, in Christi matrem confluisse, quibus tanquam
gradibus in cælum ascendisse videatur. sed nulla à Chri-
sto virtus ita in ejus laude posita est, nullo ab alio fonte,
ejus adeo felicitatem derivasse Christi voce testatum est,
quam à singulari quodam studio, quo vehementius in
dies semper incitabatur, ut suas omnes cogitationes &
studia

studia ad divinæ legis normam perscriptumque formaret. Etenim, quum Christi verba, de loco superiore, necessaria ad salutem præcepta tradentis, favore multitudinis atque omnium applausu exciperentur, atque mulier una è circumstantium turba exclamasset, O beatam quæ te genuit parentem, & cujus ab ubere lac suxisti ! immo, oportere eos perbeatos esse existimari, respondit, qui aures ad Dei verba hebetiores non haberent, sed eadem, percepta animo, obsepta memoria, eaque diligentissime custodita, quasi ex umbra sapius in exercitationem, tanquam in medium agmen, educerent ; quid meam tu tantum matrem tali fecunditate beatam prædicas ? non ejusmodi præconiis ejus singularis gloria fulcitur, non eo loco jacta sunt altissima felicitatis ejusdem fundamenta ; aliud nempe est, quo vere beata appellari potest ; Dei legem incredibili studio amplexa est, & in ejus voluntate constantissime perseveravit : proxime deinde ad hanc laudem accedit illa singularis & omnium linguis atque litteris prædicanda virginitas, cui quidem tantus honos, summo Dei judicio, delatus est, ut ejus sanguine, tanquam humore collecto, illam coëgerit nubem, qua se inus includeret, quaque effuso imbre terram large effusæque rigaret. Nulla nota, nullo colore, nullis sordibus alliti, in illam cælestem patriam ingrediuntur. ergo, qui adhuc sunt in possessione celsissimi illius pudicitiae & virginitatis fastigii, vigilantissime illud contra carnis insidias tueantur, ad ejusdem conservationem, spiritum & sanguinem conferant, jugulum potius, quam pudicitiam, præbeant. Quos vero, aut vehemens perturbationum impetus, aut vis adversariorum & importunitas, de eodem culmine dejecerit, alteram continentiae arcem, scilicet castitatem, æneant. primum enim virgines, quemadmodum regius vates cecinit, post virginum reginam, ad Dei conspectum producentur ; quas deinde castitatis studiosi consequentur. *Adducentur, inquit, regi virgines post eam ; proxima ejus afferentur tibi.* Qui igitur in prima aciei fronte, pristinae integritatis nitore conspiciendi, cum vitiis decertare non possunt, in altero militiae cornu consistent. Tu vero, sanctissima Virgo, quæ hodie supra omnes cælestes orbes evecta, supraque omnes beatorum sedes constituta, æquam

æquam laborum tuorum mercedem accepisti, respice nos, atque tuis precibus adjuva, quos jam olim in solitudine destituiſti, nobisque pietatem à Deo ceterasque virtutes impetra, quibus in istam sedem æternamque domum ascendisti. Tui nominis æterna memoria cum hoc templo consecrata est: tibi hæc cura suscipienda est; tibi hæc opera sumenda; ut hic ornatissimus Romanorum adolescentum conventus, qui se tibi præcipuo quodam reverentiæ vinculo devinxerunt, pectora, omnium virtutum præsidio in hoc hujus miseræ vitæ bello muniant, postea, corporibus elapsi, vitæ tecum perpetuitatem pariter & gloriam consequantur.

O R A T I O X,

DE DIVTIRNA
ÆGROTATIONE
TOLERANDA.

Nihil est facilius, auditores, quam recte valentes ægrotanti consilium dare, eumque ad patientiam & gravitatem adhortari. Etenim, dum abest à nobis infortunium, expedita ac prompta omnis ejus tolerandi ratio videtur: cum autem jam præpe est in oculis, tum difficultates, quæ in ejus absentis quasi caligine ac tenebris deliteſcebant, emergunt, atque in conspectum nobis sese committunt, neque, æque facilem esse illius excogitandi atque experiundi rationem, ostendunt. Atque id plerumque etiam accidit, ut ea, quæ isti patientiæ magistri subtiliter differendo magnifice jactant, probari in populis, atque in concionibus, nullo modo possint. Nam, cum ipsi sæpe minus, quam ceteri, præceptis decretisque suis obtemperare cernantur, & qui dolorem virtute comprimendum esse docent, molliter in eodem ferendo se gerant, alterutrum efficiunt, ut vel re ipsa ostendant, etiam cum virtute conjuncta, ea esse ad tolerandum acerbissima,

bisſima, quæ ipſi, eadem adhibita, vacare omni acerbitate contendunt, vel liquido probent, parum ſe ſibi conſtare, quum iis rebus, quarum videri contemptores volumus, tantopere deinde frangantur. Ita miles, qui nunquam caſtra, nunquam hoſtem vidit, dum parietum umbris occultitur, dum inter epulas de inſtruendo agmine, de obſidendis urbibus, de eruptionibus in hoſtium caſtra, ſermones infert, dum in ludicra armorum tractatione ſe exercet, facilis eidem videtur feriendi hoſtis diſciplina; ubi vero idem ſe in pulverem & ſolem eduxit, ubi procul hoſtem aſpexit, tum invadente animum timore, obſecto clypeo, ſpem omnem ſalutis in fuga conſtituit. Quod ne jure nobis objici aliquando poſſit, atque ne videar vos magis præceptis quam factis inſequi ut erudiam, dicturus breviter, de diuturnis corporis morbis cum ratione ferendis, non, ad Philoſophorum conſuetudinem, longis atque contortis diſputationibus rem totam involvam, ſed ex multis, qui in hac patientiæ laude viguerunt, geminum in virtute par eligam, duosque in medium adducam, qui, diuturno ac miſerando morbo affecti, perfectæ patientiæ munere functi ſunt. Ac primum quidem ſtatuam vobis ante oculos, non unum aliquem ex verere Academia philoſophum, philoſophiæ præceptis inſtructum, vel hominem mediocriter à doctrina exculſum, verum, ut exiſtimare licet, plane omnis eruditionis expertem: non virum quempiam adducam, qui in Stoicorum manibus educatus, tamenſi corpora tormentis excrucientur, etiamſi conſtricta doloribus membra teneantur, tamen omnino motus neget in animis ullos eſſe debere; ſed eum potiffimum ſumam, qui in hac ratione vitæ nunquam habitaverit, ſed fuerit in ejuſmodi magiſtrorum familiis peregrinus atque hoſpes: non denique locupletem vel divitem aliquem producam, qui opibus, & copiis, valetudinis incommoda lenierit, ſed paralyticum quendam, omnium rerum egentem, cui, præ inopia, nemo plane eſſet ad cujus ille curam & providentiam pertineret. Quam vellem hic eos aſſeſſe, qui, morbo aliquo impediti, lecto detinentur, & mecum fieri ſingularis hujus patientiæ ſpectatores: proſecto alterutrum eveniret, ut vel hac eximia patientia, timore depulſo, & mulie-

muliebribus lamentationibus cohibitis, remitterent ac dilatarent animos, vel, ubi ratione nulla vincerentur, pudore fracti obmutescerent. Possuntne hujusce paralytici maximæ longissimæque calamitates, efficere jucundas alteri, mediocres & breves? Quis, obsecro, præ illo dici miser potest? Si, eo quod te inensem unum vel alterum dolor aliquis oppresserit, exclamas, atque id tempus vocas diurnum; quid diceres, si annum unum, si plures, ægrotasses? Quamvis esses egregie fortis & patiens, tamen, si dolori cederes, prope dixerim te apud prudentes viros justam excusationis causam habiturum. Quis enim esset ita durus ac ferreus, quin diceret, nullam esse patientiæ vim tantam, quam non longinquitas temporis contrarat penitusque consumat? Si ergo viro forti ac docto, propter diurnitatem morbi, prope omnes ignoscendum arbitrarentur, si, ad extremum, nec fortiter nec viriliter ægrotavisset; quanto magis homini rusticano, indocto, neque ullam aliquam sapientiam professo, qualis hic erat paralyticus, gementi concederent, si non ita multorum dierum dolor omnem illi patientiam extorsisset è manibus? At, si idem rudis, imperitus, expertus totius humanitatis, quindecim, decem, quinque tantum annos fortem se in eo morbo præbuisse; nonne ipsius imperitia, atque condicio infima atque depressa, talem vim animi ac tolerantiam ad incredibilem admirationem efferreret? nonne id palam omnes loquerentur, Quomodo hic, sine ulla doctrina, constans in diurno morbo reperitur, cum eos, qui se sapientes ac doctos appellari volunt, in longe breviori ægrotatione tam intoleranter dolere videamus? quomodo hic, cum sit in unaquaque re hebes ac rudis, usque eo potest dolori sufficere, cum ii, qui tanta habent ab omnibus disciplinis auxilia, se vinci ab illo patiantur? Cum autem hunc dicam paralyticum sordidum hominem & rudem, non quinque aut decem aut quindecim annos ægrum fuisse, sed octo ac triginta in lectulo quievisse, spreum, contemptum, neque tamen loco cessisse, sed, obsistendo dolori, homines stupidos & attentos ad ipsius patientiæ spectaculum tenuisse, quam vobis admirationem commovere debet, quos plausus, quos clamores efficere! Potestne tam incredibilis gravitas, tam inusitata

tata magnitudo animi, vel taceri ullo modo, vel dici prodignitate? Video, auditores, quoniam tantum operæ ad audiendum datis, vos tantæ rei admiratione non mediocriter esse commotos. sed maiorem multo in vobis admirationem illius verba concitaverint, quæ sunt ejusmodi, ut magis, perfectam absolutamque omni ex parte sapientiam, declarare explicareque non possint. Accedit ad eum Christus; rogat, num sanari velit. Quis adeo sit sine mente, sine oculis, sine sensu, quin summam in eo recuperandæ valetudinis voluntatem esse arbitretur? Videbant omnes, illum propterea iis in locis debilem jacere, ad quæ complures, eadem coacti necessitate, confluerant: videbant, eundem omnium opem implorare, quo, cum ferret occasio, celerrime in piscinam dejectur. quid ergo erat, quod quisquam de illius animo dubitaret? qui si ita patebat, pæne ut oculis cerneretur, cur illi intercludebatur, cui nulla erat cogitatio tam clausa, tam recondita, quæ non eidem apertissima promissimaque esse posset? Non est igitur dubitandum, quin illi ejus voluntas fuerit penitus nota atque perspecta. Quorsum ergo interrogat, Visne sanus fieri? Non est difficilis questio, si optime Christi ratio teneatur: intelligemus enim, quæ causæ fuerint ad centurionem respondendi, Ego veniam, & curabo eum, eas ipsas causas fuisse de isto querendi, num sanus esse cuperet. Quis dixerit, ignorasse Christum, quid esset centurio responsurus? Immo vero, quia id norat optime, quo fides incredibilis unius cujusdam militis ejusdemque peregrini obscura & latens illustraretur, talia ex illo verba elicuit, quæ, dum res Christianæ stabunt, in rebus divinis faciendis usurpabuntur: *Domine non sum dignus, ut intres sub tectum meum; sed tantum dic verbo, & sanabitur puer meus.* ita, quia non erat ignarus, quid esset hic paralyticus responsurus, & simul, quo esset unde quisque disceret toleranter dolorem pati, interrogando & respondendo, eo illum deduxit, ut ea diceret, in quibus omnis posteritas obstupesceret, in quo omnes exclamarent, O virum fortem! Sic se profecto res habet, ut existimem, detrimentum nos facturos fuisse, si huic, silentio, salus à Christo restituta esset. unde tam prompta tamque expedita ad dolorem tolerandum remedia

remedia depromerentur, si adeo efficax exemplum non permanasset ad posteros? unde discereinus, quod esset officium fortis & animosi viri, si illa magnitudo animi, illa virtus, in eo, in quo vigeat, compressa atque conclusa, in perpetuo silentio jacuisset? Itaque medicus animarum Christus, qui, in præmiis pœnisque constituendis, non tantum quid præsens tempus & causa postulet attendit, sed aliorum etiam rationem ducens, id, quoad ejus fieri possit, cum futuræ hominum posteritatis utilitate conjungit, quærendo, & sciscitando, vim quandam illi imposuit, responsione sua, ejus patientiæ, quam perspectam habebat, expromendæ, ad eum finem, ut eam omnes aspicerent, admirarentur, eandemque sibi vitæ magistratam asciscerent. *Vis sanus fieri?* laceßere, non percontari, videri potest Christus. Si de aliquo homine ærumnoso ac misero quærat, num è suis molestiis eximi velit; hic profecto non auxilium sibi deferri, sed rideri miseriam suam, existimaret: nihil enim est, quod minus, miseri, quam se illudi, velint. Quisnam vir constans, & magnus, si se ita pungi confodique sensisset, quamvis animum patientia ac fortitudine contexisset, Christum non esset adortus jurgio? Quis Philosophus gravis, magno animo, & humanâ contemnens, non esset commotus, non ita respondisset? Tutemet vides, quot quantisque malis excrucier; conjicis ex hac meâ ætate, prope jam exacta, me plures annos hoc eodem morbo conficari; non ignoras, frustra me quotannis ad has porticus revolvi; & adhuc dubitas de mea voluntate? quæris an sanari velim? quasi cuiquam suave sit cruciari; quamobrem? nisi si quid est quod existimo, quia risui jocoque tibi sum. ad eamne rem nostra miseria est, ut agitata rideatur? parumne multa mihi accipienda sunt morbi, senectutis, egestatis vulnera, nisi etiam aculei facetiarum accesserint? Scimus, omnium fere ægotantium animos esse nimis timidos atque demissos, præsertim si unum aut alterum mensem, si annum denique ægotaverint. Quod si de magnitudine animi tantum dinturnitas detrahit, cui non sit credibile, omnem istius patientiam duodequadraginta annorum usu evanuisse? ô excelsum animum atque altum! ô incredibilem patientiam, dignam, quæ medita-

K

ta nobis

ta nobis in perpetuum ad omnem usum similium rerum esse debeat! Cum Christi dicto tentari videretur, cum deberet, ex ceterorum consuetudine, illum male verbis accipere; tamen nihil temere dixit, nihil doluit, nihil questus est, sed æquissimo pacatissimoque animo respondit; *Nempe Domine, sed hominem non habeo, ut, cum turbata fuerit aqua, mittat me in piscinam.* Potestne talis patientia, talis fortitudo animi, ad similem virtutem, mollissimum quemque non excitare? Ecquod unquam simile de ullo philosopho audivimus aut legimus aliquando? Multos accepimus fortissime se in dolore gessisse, sed alios aliis de causis. Multi dolorem contemserunt, eo quod brevis futurus esset. Multi sæpe homines nobiles & gloriosi, quasi in aliquo theatro essent, ad captandum plausum & gloriolam popularem, dolorem susceperunt fortiter ac tulerunt. alii, quamvis acriter morbo premerentur, tamen quia opibus, potentia, aliisque vitæ bonis abundabant, multitudine eorum & copia non nimium illud incommodum obruerunt. In hoc quid objiciant homines? illiusne patientiam, morbi brevitate, extenuabunt? octo supra triginta vehementer laboravit annos. an, laudis & gloriæ cupidum, eam pertinacem constantiam multitudini venditavisse? at erat apud omnes contemtissimus ac desertissimus, ita ut diceret, *Dum venio ego, alius ante me descendit.* an, multis suffultum bonis, cetera non ita desiderasse jactabunt? at ea mala, quæ pluribus fortuna distribuit, universa in se ipso experiebatur; morbum, egestatem, solitudinem: adeone desertus unquam aut infelix quisquam fuit? Videor mihi hominem videre, quotannis fonti illi imminentem, eique tamen alterum præcurrere, certamque spem salutis eripere. cerno animo, eundem, non unum aut alterum annum, sed octo ac triginta continuos, summam dare operam, ut ceteris ipse prior immergatur, neque tamen quidquam proficere laborantem. Accedebat id, quo nihil est gravius, quod eos, quos multiplicibus aliis periculosisque morbis implicatos viderat, iisdem liberatos aspiciebat, se autem arctius suo quotidie malo vinciri & constringi sentiebat. Quid enim ad dolorem angendum acerbius, quid ad patientiam convellendam robustius, quam eos aspicere, qui
modo

modo eodem atque nos fluctu verberabantur, ventos secundos habere, nos vero ad easdem syrtes scopulosque identidem navim offendere? Hujus equidem, ut ira loquar, invidentiæ tanta vis est, ut ad suas cuique calamitates augendas, efficiendasque longe graviores plurimum conferat. Nam, quantum de miseris aliorum detrahitur, tantundem in nos quodammodo transfundi videtur. Num sua cuique paupertas adeo onerosa est, quam cum est in comparationem alterius opum ac divitiarum adducta? num luctus, dolor, invaletudo, asperius quemquam urget, quam cum alterius voluptate, læticia, valetudineque collata? Et tamen cum, ferens tot annos illam ægritudinem, ceteros videret, qui eadem de causa easdem porticus oppleverant, salvos domum rediisse, suæ autem calamitatis nullum neque modum neque tempus terminari, cum spem, quæ sola hominem in miseriis consolari solet, nullam pæne sibi reliquam esse intelligeret, non queritur, non despondet animum, sed pergit alacrior, certo statutoque anni tempore rursus eadem ad loca adire non gravatur. Desinant igitur homines enervati ac molles, cum quid ignave ac serviliter fecerint, ita causam suam constituere, ut, quo morbus fuerit diuturnior & gravior, eo se dicant majore excusatione, vel potius misericordia, dignos: se ipsos potius accusent, suam impatientiam damnent, quibus vix Deus propter peccata levissimam aliquam plagam imponit, cum clamant, vociferantur, &, nisi illorum precibus ac votis statim occurrat, totos se languori desidiæque tradunt, neque illud modo vehemens numinis deprecandi studium, quo antea erant incensi, remittunt; sed paulatim prorsus abjiciunt. Etenim, in Dei iudicium vocatus, cum impatientiæ insinulaberis, si in longitudinem morbi confugeris, statim hic contra tuam defensionem suos octo ac triginta annos objiciet: si ex tua jam affecta ætate rationem salutis conquisieris, suos itidem canos ac rugas ostentans, hanc tibi spem maxime præripiet: si crimina levitatis & impatientiæ obterere inopiæ gravitate volueris, sua idem paupertate solitudineque acerrime tibi resistet. Et profecto tanti fuit, quod tot annos duobus gravissimis malis tanta contentione animi resisterit, cum maximos fecerit in

virtute progressus, cum, pulsus omnibus vitiis, quæ ex peccati culpa collegerat, melior atque perfectior ab ea calamitate sit redditus, cum ipsi gloriosior ea salus acciderit, quæ non ab Angelis, sed ab ipso Angelorum domino data sit. Verum non deerit fortasse quispiam, qui ut ab hac ejus culpa ignaviæ atque inertię, vestros animos in aliam partem opum ac dignitatis, qua olim alii floruerunt, commemoratione traducat, afflictam atque prostratam hujus miseri hominis fortunam commemorabit, fortis humilitatem ostendet; dicet, non esse mirandum, si se ita fortem in eo statu præbuerit, quo meliorem & præstantiorem antea non esset expertus; non continuo in summa laude huic esse ponendum, si se æquabilem in ea fortuna præstiterit, qua florentiorem nunquam splendidioremque vidisset. consuetudinis magna vis est, & diuturna perpeßio malorum dolori quasi callum obducit: hic jam inde ab adolescentia miseriis assuefactus, patienti ferendoque se quotidie magis ad firmitatem intendebat: tum venit plaga vehementior, cum è secunda fortuna, quasi ex adducto contentoque arcu, infortunii telum emittitur: tum dolor acrius pervellit, cum fortunatos homines & nobiles in summa prosperitate aggreditur. Itane? Quoniam placet, alium ego hominem, longe ab isto diversum, arripiam, eumque in oculis omnium conspectuque constituam, qui ex optima præstantissimaque fortuna, è summa omnium bonorum abundantia, ex prospera valetudine, in extremam egestatem, ægritudinem, in profundum malorum omnium, dejectus ita est, ut, si unum in locum ceterorum hominum res adversæ collocentur, lusus sint cum hujus infortunio comparatæ. Cogitate omnia, quamvis aspera, quamvis horribilia; hæc simul omnia de improvviso sunt ab iniquo dæmone in virum innocentissimum & fortunatissimum importata; morbus, egestas, solitudo, mors filiorum acerba: & quasi hæc levia essent, præterea hæc eadem, tum fuga domesticorum, tum conviciis uxoris, tum odio & invidia amicorum inimicorumque, permiscuit. in quibus omnibus fuit animo ita præsentī & magno, ut unus hic natus esse ferendis miseriis videatur; neque, patientiæ ipsius demonstratione, ulla possit esse fortior, contra hujus vitæ ærumnas,

arumnas, disciplina. Atque adeo, ne putetis, hæc me oratorie, non Latine loqui, singula illius mala percensebo. Accipio primum egestatem, quam fere omnes in gravissimis malis ponunt, quam omnes deplorant, quam omnes reformidant: hæc, ut ostendam, fuit in Iobo non mediocris, non usitata, sed maxima, & inaudita. Quis enim de fæce ac de sordibus homo, non aliqua saltem obsoleta & lacera veste contegitur, vel, si ea etiam careat, non totus saltem fasciis pannisque devincitur? Hic vero, è summis opibus atque divitiis, in tantam mendicitatem brevi pervenit, ut hæc illi, etiam vilissima involucra, ejus miseranda fortuna ademere: atque in id, quo nervi, quo ossa reguntur, carnem scilicet & pellem, adeo horribilem cladem ipse Dæmon invexerat, ut ulceribus plagisque undique discerptum atque discissum vermes, simul inde ortum & pabulum trahentes, fero pastu dilaniarent. Iam vero fuerit nudus, purulentus, sanie scabieque copertus; at aliquo domicilio tugurioque tegebatur; hoc unum vel leve nactus erat tormentorum perfugium. Quam domum, quod tugurium nominas? vide, quanto fuerit pejore conditione, quam ceteri pauperes; quod illi, urgente vespere, si minus domo tugurioque, certe fornicibus & domorum protectionibus porticibusque, sese recipiunt; hic autem, quasi locis publicis communibusque videretur indignus, pernoctabat in compitis, & in imbribus, ut, ad morbi vim acerrimam, frigorum quoque ventorumque asperitates influerent. Atque utinam nudum illi apertumque solum patuisset; terra, terra inquam, auditores, tanquam illius corporis tractationem complexumque horreret, eum, ut ita dicam, novercalibus odiis prosequeretur. Itaque in sterquilinio sibi lectum, ex illis sordibus purgamentisque, constraverat. In quo, est admirabile, quam omni solatio omnino caruerit. Ea enim, quæ improbos homines non mediocriter adjuvant, nullam illi poterant levationem asferre. Nam ii, quibus res minus prosperæ sunt, causam in peccata conferentes, dolorem, quem capiunt, nescio quo pacto mitiorem efficiunt: neque enim levem sibi ille consolatioem adhibet, qui recordatur, tanta sua esse delicta, ut nullum sit tantum malum, quod non sceleribus suis jam

diu debeat. huic vero tantum aberat ut aliqua levatio ex memoria peccatorum, quæ nulla erant, vel certe levissima, emergeret, ut major inde doloris oriretur tristitiæque materia. Nam cum, illo, nemo neque integrior esset in orbe terrarum neque sanctior, cum esset omnibus virtutibus ornatissimus, ea se poena supplicioque multari cernebat, quæ recte in quemvis impurum, sacrilegum, & flagitiorum omnium facile principem, conveniret. Iam vero à corporis valetudine, quæ maxime egestatem sustentat, quid potuit adjuvari? (nam etsi paupertas numeretur in malis, tamen si sanum valensque nacta sit corpus, plurimum de vi sua acerbitateque amittit; at si egestatem etiam cruciatus corporis comitentur, ita malum alterum in alterum influit, jam ut neutrum ferri tolerarique posse videatur.) Proh Deus immortalis, quanta vis morbi, quam tetra, quam immanis, per omnia viri sanctissimi membra pervasit! paulatim corpus sanie horribili absumtum extabescere, undique scaturire vermes, eorumque morfu lacerata viscera odorem teterrimum efflare, qui omnem cibum sumendi voluntatem potestatemque prorsus adimeret. Ecquis, si pecudem aliquam, non dicam hominem, ad eum modum excruciarî perspiceret, non commoveretur, non ingemisceret? At in ea cogitatione, inquires, se vir sanctissimus oblectabat, quod sciret, eam sibi calamitatem immissam esse divinitus. Verum usque adeo nullum ex hujusmodi cogitatione solatium referebat, ut maxime etiam propterea conflictaretur. Vt enim acriter in se ipsum inquireret, nihil veniebat in mentem, quamobrem Deus, qui digna meritis bonorum sancit, ita in se graviter animadverteret, qui ipsum ex animo præter cetera dilexisset, qui esset præcipuo eum semper cultu veneratus, qui iuste semper, & cum fide, vixisset. Quod si non mediocrem medicinam putas esse, intelligere, id tibi à Deo fuisse vulnus inflictum, eandem tibi non adimo, non veto te eadem uti: sed vide, ne, dum levioris viri sanctissimi plagam conaris efficere, altius culpam tuam exaggeres. Si enim, cum in multis vitiis atque sceleribus volueris, cum omnes poenâs tuis flagitiis debitas esse non inficies, ita timide atque muliebriter dolens, clamas, ejulas, ingemiscis, si paululum quid tibi de valetudine,

valetudine, vel de vitæ commodis, Deus abstulerit; qui tandem, quæso te, fletus, quæ criminationes existerent, si vel facturus virtutis tuæ periculum, vel tuam innocentiam in luce & in oculis collocaturus, se gratis in te concitatum infestumque præberet? Quæ hæcenus diximus, sunt adeo, ut videris, aspera & acerba, ut non modo cuiusvis animum, sæpe fluxum ac mollem, sed ferreum atque adamantæum, flectere ac debilitare facile possent. non credo, expectari à vobis, auditores, acerbius quidquam, vel gravius, quod illi subeundum fuerit. Quid? estne aliquid ultra, quo progredi calamitas possit? Est quidem, si eadem injuriis hominum exagitetur. Nam etsi altitudo maxima animi eminet in contemnendis ac despiciendis fortunæ ludibriis, tamen hæc laus patientiæ ac fortitudinis multo maxime in aliorum injuriis contumeliisque perficitur. Commovent & conturbant animum humanæ miseriæ; hominum probra dejiciunt atque supplantant: ut, qui sine inimico viriliter ægrotaverit, qui in adversis rebus contumeliarum expers æquabilis fuerit, non tam à se ipso, quam quod abfuerit impulsor agitatorque, fletisse videatur. Ita plane fit, ut non tam miseros fulmina fortunæ seriant, quam contumeliarum aculei lacerent atque cruentent. Quid vero hic noster? cum, tanta egestate premeretur, cum, doloribus maximis, pæne conficeretur, non modo, qui dolorem suum consolando levaret, reperiebat neminem, sed neque deerant, qui, exprobrando illudendoque, calamitatem suam elevarent agitarentque, ut non tantum corpori ulcus dolorem inureret, quantos cierent in animo verba cruciatus. Quid ergo? num gemitum edidit aliquem, vel fletum imbecillum? num asperi injuriarum aculei iram in eo, vel motum quempiam animi impotentem, concitaverunt? O patientiam prædicandam! ô invictam fortitudinem, & eo ipso, de quo loquimur, Iobo fortissimo dignam! Si de aliquo alio homine misero dicerem, eum in summa hominum dicacitate atque perfidia omnem iracundiam repudiasse ac rejecisse, si hunc ipsum proferrem laceffitum omnino quievisse, cum fuisset humanitatis respondere, & insolentiam scurrilitatemque stultorum devorasse, rem magnam fortasse loqui viderer: nunc autem eundem non

modo nihil , provocatum , respondisse cum dicam , cum non modo pane , hominem se esse , oblitum fuisse asseram , sed insuper multa in eo dolore & agitatione , de contemnenda morte , de tolerando dolore , de despiciendis opibus , prope ad Philosophorum morem , graviter & copiose disputasse affirmem , quis credat , nisi sacrarum litterarum testimonio convincatur ? Qualem igitur celsitudinem animi illius fuisse existimatis , qui , cum hinc egestas summa , vel mendicitas potius , urgeret , illinc morbus intolerabilis , incredibilis , inusitatus , instaret , hinc filiorum mors acerba invaderet , illinc scurrilitas inimicorum , amicorumque perfidia premeret , hinc familiarium nefaria proditio oppugnaret , illinc uxoris arrogantia atque loquacitas irrueret , quasi in summo esset orto , honestæ vitæ præcepta virtutisque tradiderit ? Quam tandem fortitudinem atque patientiam vixisse in eo putabimus , in quo , sine ulla querela , universa illa mala per aliquot menses insederint , quæ divisa ac distributa si sint , clamant homines , ea ferri tolerarique non posse ? Pudeat igitur nos Christianos homines , tali virtute atque sapientia præditos , si quid humanitas acciderit , quidquam immoderate vel intemperanter facere vel loqui . Quis enim , cum faces doloris admovebuntur , si de istius insigni calamitate cogitaverit , commovere se possit ? quis audeat dicere , se ab eodem obrui , si eas istum excipientem plagas viderit , & ferentem silentio , quibus cum si conferat suas , vix cum illarum exigua parte æquari conferrique posse fateatur ? Quamquam minime , dum vivimus , dolore obruimur etiam si doloribus maximis excruciemur . etenim premimur hic , at non opprimimur . Dices , hanc laudem , eximiam virtutis atque patientiæ , fuisse hominis illius ac temporis , neque esse à nobis omnia ad illam veterem normam exigenda . Vide , ne tibi multo plus ista oratione colligas criminis , quam defensionis . Si enim tum , cum nondum lex erat hominibus constituta , cum nondum hac cumulatissima mensura nobis gratiæ , quam Theologi dicunt , beneficium dabatur , cum communis vitæ ratio non ita erat angustis circumscripta cancellis , cum dominabatur in orbe terrarum maledictum , cum mors terribilis erat , unus pater familias ,
bonus

bonus vir ac simplex, miseriis omnibus oppugnatus, non modo earum impetum sustinuit, sed, præclara edita pugna, ita superior discessit, ut uni illi, omnium concessu, perfectæ patientiæ palma deferatur; nonne nunc credis multo à te majora non expectari solum, sed etiam postulari? Quid tibi Deum ad ignoscendum daturum arbitraris, si tot præsidii gratiæ munitus, tanta exemplorum copia instructus, in ferendo tolerandoque dolore deliqueris? Vides igitur, & illius insignem tolerantiam, & tuam vel mediocrem impatientiam, propter temporis dissimilitudinem, in illo summæ laudis causam habere, in te maximi criminis, in illo præmii, in te damnationis. Quod si egregia fortium virorum facta tantos habent stimulos ad gloriam, ut vitam suam, ad eandem similitudinem laudis, multi sæpe inertes & voluptarii direxerint; cur horum, quos adduximus, gravitas atque constantia, non erit nobis patientiæ ac fortitudinis incitamentum? patiemur ab hominibus nos, longe nobis inferioribus, tanto intervallo superari? quod potuit ex mediocribus viris vel tenue cælestis gratiæ lumen excitare, nonne id debet in nobis, omnibus divinis muneribus & donis plane cumulatis & ornatis, studium perfectionis, & officii nostri ratio, multo melius efficere atque facilius? Ad eorum igitur quasi sanctam æmulationem, cum nos dolor aliquis pervellerit, acrem illius morsum, sine ullo clamore vel metu, sustineamus, neque committamus, ut, tanquam ignavi milites ac timidi, qui, simul ac viderunt hostem, abjecto scuto refugiunt, infamia notati, pœnas inertiae graves justasque persolvamus.

O R A T I O X I,
I N F V N E R E
B A P T I S T Æ G V E R R I N I,
P O E T Æ C L A R I S S I M I.

Habita in Academia Humoristarum.

SI mortalium cuiquam, optimi clarissimique viri, Baptistæ Guerrini, mors luctui fuit, luctuosior certe quam vobis, Academici præstantissimi, contigit nemini. Etenim, tum hominis suavissimi, & Poëtæ singularis, consuetudine jucunda, tum egregiæ virtutis ejusdem fructu, privati, prope innumeris dolendi causis circumfluitis. Et sane, quis vestrum tam immemor beneficiorum, quis tam ingratus reperiatur, cui maximum acerbissimumque dolorem non commoveat, summi ejus in vos amoris & studii recordatio? quis tam inhumanus, quis tam sine mente ac sine ullo sensu existat, qui non multis cum lacrimis, ejus incredibilem, in eo munere, quod illi demandastis, obeundo, diligentiam curamque meminerit? cum, non acta ipsius ætas, non hyemis asperitas, non frigoris vis, non squalor viarum, non litium molestiæ, quibus maximis gravissimisque implicabatur, anno superiore, potuerint eum retinere, quo minus, singulis diebus, quibus hic conventus haberi solet, non solum adesset, verum etiam ceterorum diligentiam inveniundo præcurreret. Et, si ad nos redire, quemadmodum sperabamus, potuisset, credo, pro ejus in vos amore summo ac singulari, in ipsa cura ac meditatione rerum utilitatumque vestrarum, atque adeo hoc ipso in loco, ante oculos vestros, excessisset è vita. Ego vero, Guerrine, cum mecum hæc cogito, tum maxime orbitatis nostræ me miseret. & si major est calamitas, felicitate aliqua dejici, quam ascendisse ad eam, nunquam profecto, quam alte ceciderimus, video, perpetua humanitatis virtutisque
ruæ

tuæ possessione depulsi, ut contra præsentis mali acerbita-
 tem fuisse nobis tutius dixerim, possedisse te nunquam,
 quam postea tam dolenter amisisse acceptum: tum enim
 ita nostras in communem luctum lacrimas contulissemus,
 ut ejusdem ex æquo doloris cum ceteris socii atque par-
 ticipes, ita poëtæ clarissimi longeque omnium principis
 honorem mortuo tribuissemus, ut reliqui pene litterarum
 cupidi omnes: nunc autem in publico prope orbis terræ
 mœrore, nostro incommodo detrimentoque dolemus, in
 summo omnium hominum de tuis laudibus consensu,
 non virtuti magis extinctæ, testimonium damus, quam
 amico suavissimo optimeque de nobis merito, debito pa-
 rentamus officio. Verum, si laudatio nostra, Academici,
 brevior aut inferior expectatione vestræ videbitur, duæ
 præsertim res, temporis ad dicendum brevitæ, & acer-
 bissimi vulneris dolor, excusent. quæ enim res est, paulo
 ad dicendum uberior, quæ brevi semihoræ spatio transi-
 gi queat? deinde, si doloris nostri causis exaggerandis
 famam eloquentiæ quærere voluisse videamur, eum vel
 non acerbissimum, vel tolerabilem certe fuisse, significa-
 bimus. Habet hoc summus vel amor vel dolor, ut non
 modo eloquentiam, verum etiam interdum loquendi fa-
 cultatem, eripiat, & qui in alterutro explicando sit elo-
 quens, hic se parum ab eo affici, doceat. Itaque, ita de
 rebus, vobis quam mihi notioribus, audietis, ut & in
 orationis brevitate dolor, & in earum commemoratione
 officium nostrum, appareat. Ac primum, ea quæ tractari
 uberrime in initiis laudationum solent, genus, patriam,
 formam, divitias, ne attingenda quidem censeo; hæc iis
 integra relinquuntur, quorum omnis ornatus, ejusmodi
 externis atque adventiciis rebus continetur. deinde ma-
 jorum virtus, quæ præ ceteris rebus inferre sese atque in-
 trudere in laudationibus solet, ab oratione nostra reji-
 cienda esse videretur, nisi in partem Guerrini laudum, suo
 jure, venire deposceret. Etenim, si, ut est apud poëtam
 egregium, bonis in equis patrum virtus effertur, cur in
 præclaris filiorum ingeniis, majorum suorum claritas,
 expers hujus laudis esse debeat? Itaque, quod puer, in
 perdiscendo, cursum suum transcucurrerit, quod, annos
 natus duodeviginti, cum ceteri in ludo esse consueverunt,
 publice

publice Ferrariæ docuerit, quod antea magister exstiterit quam fere per ætatem discipulus esse posset; id, inquam, ab insita, in Guerrinorum familia, sapientia prodiisse putandum est. Quod si est ita, dicatur sane hic noster, in Baptistæ avi, & Alexandri patrui, omnium sui ævi doctissimorum virorum, doctrina atque præceptis educatus, ad poëticæ facultatis atque omnis eruditionis gloriam tantopere effloruisse; concedatur, naturale stirpis bonum aliquam eidem ad virtutem indolem & materiam contulisse, dum tamen, plura majoribus eum suis largitum esse, confiteamur, quam ipse ab eisdem acceperit. Nam, ut flumina à suo primum fonte tenuia ac rivulorum similia excurrunt, & campos interfluunt, tum aliis aquis, ac præsertim imbribus, aucta, tumescunt, ac ripas excedunt: ita etiam majorum Guerrini nomen, ab hac ejus de cælo delapsa virtute completur, & tanquam extra ripas diffuens amnis, ad immortalitatem largius illabitur. Quorum igitur nomen & fama exiguis sane terminis contineretur, summa istius laude & gloria dilatata, largius effunditur; quorumque virtus, licet per se clara, vix tenue ad nos lumen emitteret, nunc, velut astra, à clarissima istius virtute, tanquam à sole, illuminata, longe illustrioribus radiis effulget. Et, quoniam, in præstantissima Guerrini virtute designanda, solis nomine ac similitudine usi sumus, istuc quoque idem solis simile habere dicatur, ut non plures ille regiones terrasque circumbeat, atque ipsa nominis sui fama populos nationesque lustrarit. Solent hæc nostro sermone conscripta, Italiæ finibus, exiguis sane, concludi, intercluso sibi, propter sermonis varietatem & nominis, ad exterarum gentes & populos aditu; sed difficile dictum est, quam ampla egregiis viri istius monumentis, propter eximiam ipsorum venustatem elegantiamque, ad omnes prope nationes via patuerit, quam celer ad universum prope terrarum orbem peragrandum cursus extiterit. incredibile commemoratu est, quam eadem, primo pene aspectu, omnium in se amorem benevolentiamque converterint, quam, ad se amplectenda, omnium populorum, omnium hominum studia commoverint. Convertite animum, Academici, atque eas gentes circumspicite, in quibus aliquis harum littera-

litterarum studiis honor habetur, Hispanos, Gallos, Germanos, Illyricos, Anglos, Persas, Indos; ab his omnibus jam pridem admirabilem illam Tragicocomœdiam, in suum sermonem converſam, in manus haberi, legi, laudari, canique, reperietis: ut non jam accita ſed apud ipſos nata, non hoſpitio accepta ſed civitate donata eſſe, videatur. quod autem, in quodcunque genus linguæ recepta, clamores ſemper & admirationes efficiat, incredibilis ex eo ac prope divina ejus virtus perfectioque perſpicitur. nam, ut in arboribus, ita etiam in ſcriptis, ea longe optima putanda ſunt, quæ in aliam linguam, tanquam in aliquod aliud ſolum, tranſlata, nihil de ſua vi, pulchritudine ac ſuavitate deperdunt. Iam vero quantum apud Italos, quibus præſertim ejus ſcripta nata ſunt, honore & gloria proceſſerit, quantum, in eo genere ſcriptorum, omnium ſuperiorum gloriam vicerit, quid me attinet dicere? clara res eſt, arque omnibus ad intelligendum expoſita. De quo unquam opere, præterquam de iſtius admirabili Tragicocomœdia, proditum memoriæ ac litteris eſt, ut à quocunque hominum genere, ſive à pueris ſive à majoribus natu, ſive à ſcœmiis ſive à viris, ſive à doctis ſive ab indoctis, cum ingenti admiratione ac voluptate legeretur, ut, autore ſuperſtite, octies & quadragies, typis, ut loquimur, excuderetur, ut nunquam ullus exemplarium numerus, vel maximus, multitudinẽ legentium ſtudioque ſufficeret, ut nemo unquam expletus ſaturatuſque, ſed avidus ſemper & cupidus, ab ejus lectione diſcederet, ut; memoriis hominum exceptum & cuſtoditum, oblivionem & vetuſtatem non extimeſceret? uſque adeo, ut ſi exemplaria ejus omnia interire, ſi ab omnium manibus extorqueri, ſi à civitatibus ejici, ad exitium rapi, contingeret, memoriis hominum, quibus illud opus hæret infixum, ab interitu vindicaretur; ſed quid inquam hominum memoriæ? ſaxa & ſolitudo ipſæ, ad quas toties decantatum eſt, illud referrent ac redderent. Iam, ut Darii Perſarum regis ſcrinio, auro gemmiſque fulgenti, ab Alexandro magno, Homeri librorum cuſtodix tradito, nihil ipſi ſit invidendum, pluribus longeque præſtantioribus ſcriniis, hoc eſt. benevolis hominum animis, incluſo atque ſervato, &, ſi ad multitudinem

tudinem exemplarium , tam late profeminatam , spectetur, toto orbeterrarum , tanquam in arca, constructo atque recondito. Vnde autem hæc illi tanta tamque admirabilia esse inventa putatis , nisi ab inaudita ejus elegantia , admirabili venustate , incredibili suavitate ac prope divina ? Magna & inusitata egregii operis gloria, nullam non habere virtutem, nemini non admirabile videri. Habet ibi vulgus quo delectetur , eruditus ubi ingenium alat , doctissimus quisque quod admiretur. Ita in eo lenitas , & quædam quasi orationis humanitas , gravitati miscetur , ut lenitati nihil detrahat gravitas , neque de gravitate quidquam lenitas auferat. ita ornatus cum perspicuitate conjungitur , ut & lucem ornatui perspicuitas afferat, & perspicuitatem ornatus mire commendet: prope ut prodigalitatis natura in hoc uno damnanda videatur , cum , quæ vix singula singulis dona partitur , in uno omnia refererit. Et quisquam , tantis te laudibus egregium , singulis Italiæ principibus viris eximium extitisse mirabitur ? Poëtarum hujus ævi parens, Musarum hominumque deliciæ ; tu non expetendus ? tu non diligendus ? tu non beneficiis omnibus ornandus ; tam multis tibi virtutibus magnam apud omnes homines gratiam conciliantibus ? Tu , maxime omnium , in te probando , duas res, valde inter se diffidentes , vulgi & eruditorum judicia, copulasti ; tu perpetuam orationis majestatem in versibus , cum æquabili lenitate junxisti ; tu pascua , tu rura, dignitate ; deliciis, frequentia hominum, ipsis etiam urbibus invidenda, tuis carminibus, reddidisti; tu ita poëtice facultati studium tuum dedisti , ut illud nunquam à Reip. procuratione sejunctum habueris, verum ad poësin, cum diutius in negotio curaue fueras , veluti ad aliquam animi remissionem ludumque , descenderis . Solent hæc amœniora studia , Academici , poëtices præsertim , à curia, à foro, à negotiis publicis , hominem avocare, eumque in locis solis, amœnis , in sylvis, in hortulis, constituere ; ubi etiam ille recubans molliter & delicate, cum ceterarum rerum , tum Reip. in primis , curam & cogitationem abiciat. qui autem, poëtæ boni cum essent , simul Reip. & rerum gestarum gloria floruerint , pauci ex Græcis , pauciores ex Latinis , plures proferri possunt

ex nostris. Ex hoc fuerunt illi numero, quos patres nostri viderunt, Ariosti, Bembi, Guidiccioni, Casæ; qui omnes, cum plurimum in Rep. autoritate, consilio, sapientiaque valerent, furtim, si quando per negotia licebat, in hæc ejusmodi studia, tanquam in hortum, divertebant, ut eos vix intelligeres id agere, cum agerent tamen. Ad numerum istorum adscribatur hic noster, qui, ut summe ab omnibus Italiæ principibus viris expeteretur, non ingenio solum & eruditione assequebatur, verum etiam rerum maximarum usu, atque prudentia. In quo usque eo felices universi fuere, ut variis temporibus, alius alio, tanquam in possessionem illius humanitatis, virtutis, consilii, atque prudentiæ, successerit. Ejus primo egregiam operam, in multis publicis privatisque muneribus, usurpavit Alphonsus Ferrariensium Dux II, eo splendore ac nomine Princeps, quo omnes nos scimus. quam operam in multis, ad Remp. Venetam, ad Ducem Sabaudia, ad Ferdinandum Imperatorem, legationibus, sed in ea præsertim nobili ad Henricum Valesium in Poloniam, ita probavit, ut eundem, in ea iterum loca, ad illud sibi regnum obtinendum, jure legationis ac nomine mitteret, oratorem vero postea, una cum Cæsare Estensi, nunc Mutinensium & Regiensium Duce, ad Gregorium XIV Pont. max. allegaret. quo tempore, ac deinde multis annis post, Ferrariensium suorum civium nomine, ad Paulum V legatus, ostendit, quantum eloquentia omni-que dicendi facultate præstaret. Ab Alphonso deinde ad Carolum Emanuele, Sabaudia Ducem, illa humanitas, illa virtus fidesque translata, consiliis de Rep. dandis, epistolis scribendis, rebus difficillimis explicandis, adeptam Ferrariæ laudem ita confirmavit, ut, fama clarissimus, reliquorum etiam Principum desideria commoverit. Ergo à Ferdinando, magno Etruriæ Duce, ad multa atque ardua ditionis suæ negotia perficienda vocatus, admirabili apud eum virtutis prudentiæque gloria claruit. postremo, à Francisco Maria, Urbinate Duce, Principe hujus ævi doctissimo, eorundem quasi studiorum societatis jure vindicatus, nihil esse in ceteris artibus demonstravit, quod esset à cognitione sua remotum. Id quod tam multa, ab eo soluta oratione conscripta, declarant,

declarant, & in primis nobilis ille ad suam Tragicocomœdiam commentarius, libri, quos de Secretario, ut loquuntur, de honestate, de Rep. scripsit: quæ omnia ita eruditorum commendatione probantur, ut proxime ad veterum Philosophorum laudem accedant. Atqui, si non Ferrariæ, in urbe clarissima, si non in vetere, nobili, locuplete, Guerrinorum familia natus esset, si de ejus patria ambigeretur; profecto isthæc omnium Principum in eo tantopere expetendo voluntas, istud omnium hominum in ejus versibus legendis, discendis, laudandis, studium, maximo argumento est, non quatuor tantum urbes, ut de Homero narratur, sed omnes Italiæ civitates, omnia loca, eum sibi civem fuisse arrogatura. Sed vereor, si sim longior, ne aliquam apud vos crudelitatis invidiam colligam, Academici; nam, ut vulnere, ita & animi dolor, tractatione recrudescit. Sed modum esse statuendum, intra quem doleamus, censeo. Etenim, damno accepto; intoleranter queri, nemini honestum ducitur, doctis vero hominibus, & Philosophiæ deditis, etiam flagitiosum putatur. Vtrum enim nostro, an ejus, doleamus incommodo? Non equidem cerno, quid in eo magno opere sit dolendum. Nam, licet, propter summum ingenium excellentemque doctrinam, videbatur omnino mori non debuisse, tamen, ut est hominum fragilitas, ætati satis diu vixit, gloriæ quidem certe quam diutissime. Reliquum est, ut nostro incommodo detrimentoque commoveamur. At ingrati seque nimium amantis est, magis de eo, quod sibi detractum est, queri, quam de eo, quod acceperit, gratias agere. Immo, in ejus erga nos meritis, multum pono esse præsidii, ad omnem pene vim doloris ejiciendam. Ea erat virtute Gnerrinus, ea fama ac nomine, ut, semel eum vidisse, in aliquo vitæ fructu poneretur. At vero vos, præ ceteris Italiæ Academiis, electos fuisse, quos amore indulgentiaque prope in filiorum numero haberet, in quibus juvandis, ornandis, curam, cogitationem, vitam terminaret suam, quorum exercitationibus tantum tribuerit, ut in illa tabula, quam videris, eleganti similitudine testatum reliquerit, quam pretiosæ ab eis, suo in animo, virtutum notæ imprimerentur, quantum pertinere ad vestram gloriam arbitramini?

mini? Hæc in animum vobis subjicere. tum enim doloris acerbitas, non solum ex magna parte decesserit, sed alacris quidam vobis, vestris carminibus, referendæ eidem gratiæ ardor accesserit. Quæ carmina (licet enim verum dicere) grati potius erunt animi testimonium, quam æternæ ejus gloriæ monumentum. Suis ipse se præclaris monumentis ad omnem memoriam commendavit; suam ipse sibi, nova quadam atque admirabili ingenii magnitudine, peperit immortalitatem. Illud potius consequemini, ut ejus in vos beneficiis prodendis, nominis vestri fama, una cum eorum memoria, in posteritatem propagetur.

O R A T I O · X I I ,

A D

A L E X A N D R V M P E R E T T V M .

C A R D .

S. R. E. Vicecancellarium ,

anno C I D I D C V I I .

Multa sunt in te, Cardinalis amplissime, magna & admirabilia, quæ me, quamvis invitum & repugnantem, possint in tui amorem & observantiam impellere, verum nulla re alia, ita ad te colendum ac diligendum allicior, ut singularibus ac prope divinis virtutibus tuis: quarum multitudine atque præstantia qui non moveatur, omnino sine humanitate, ac sine sensu, existimetur. Extant, nec inficior, tua in me non pauca beneficia; sed fatear ingenue, nunquam fore apud me tanti ulla merita, ut propterea aliquam tibi laudem; quæ mendacio niteretur, affingerem. Non ego is sum; qui mentiri ita facile possim, quique non suo quemquam merito, sed meis commodis atque rationibus, pendam. Possunt quidem beneficia valde me illi, unde manarunt, adstringere; ut autem laudabilis mihi quisquam, qui non sit, videatur, prorsus non possunt efficere. Itaque reverentia

L

rentiæ & observantiæ in te meæ causam una virtus sustinet : quæ quantum, in dies prope evolans, ad id, quod est summum atque perfectum, accedit, tantundem ille in me ardor excrescit, quem clarissimum ejusdem virtutis lumen ac splendor accendit. Quod si licet ex verbis, quo quisque inclinatione voluntatis propendat, interpretari, cui de amore in te meo summo & singulari dubium esse possit, cum intellexerit, nullos à me, nisi de tuis laudibus, sermones institui, nihil in amicorum colloquiis, nisi de tua justitia ac liberalitate, inferri? At mirum dictu est, quam omnium animos perattentos habeam, quam id, quod volo, nullo fere negotio probem. Nec injuria : omnia mihi abunde sufficiunt, quæ sunt dicenti maxime necessaria ; studia & voluntates omnium in te mire propensæ, fides ad persuadendum maxima ; ex fama, quæ de te percrebruit, suppeditata, uberrima ad laudandum materies & copia. Quamvis hanc etiam afferunt tuæ laudes facultatem, ferè ut, in illis explicandis, nihil sit opus eloquentia. Simplex, nuda, inornata earundem explicatio, est ipsa per sese ad audiendum gratissima. Ea enim de aliis plerumque tractantur, quæ illos, unde dicimus, multum, nihil fere ceteros, adjuvant. quare, sint licet præclara & admirabilia, tamen, nisi ornatissime copiosissimequè dicantur, non infunduntur in aures, sed audientium animos sensusque prætervolant. Contra accidit in iis laudibus, quarum fructus totus positus est in iis, à quibus leguntur vel audiuntur : nam eæ excipiuntur retinenturque facillime. verbi causa, si alicujus ingenium, sapientiam, eloquentiam, laudavero, erunt hæc mirabilia, grata certe non erunt ; quia nullus in iis fructus, nulla generi hominum utilitas inesse putatur : at vix liberalitatem, fidem, justitiam, clementiam nominabo, cum fiet in eo plausus, & grata populi admurmuratio. In hoc fere genere sunt laudes tuæ : non, quod virtutum ceterarum ornamenta non sint in te : sed omnis istarum cultus & nitor later in illarum splendore ac lumine. Immo illud quoque obtinuisti, ut, quæ te præsertim tuentur & ornant, non minus sint jucunda auditu, quam quæ sunt aliis utilia. Deinde, cuinam difficilis vel laboriosa ea causa videatur esse, in qua explicanda, nullo quis negotio, nulla probandi

probandi necessitate versetur? Accipio liberalitatem. Si quempiam liberalem dixero, si munificum, si beneficum, non continuo hoc mihi credetur; sed erit explicandum, quid cum liberalitate, quid cum beneficentia, is qui laudabitur, fecerit; homines præterea adducendi, qui se liberalitate & beneficio affectos esse confirmant: atque rem satis notam, satis testatam, me adduxisse putabo, si decem vel octo rei istius autores testesque produxero. Ridiculum est, in tuis laudibus, quasi dubium sit aliquid, testimonia requirere. Versamur in rebus notis, & illustribus; obruimur hominum pæne innumerabilium testimoniis: satis est verbo tantum ponere. Singularem tuam beneficentiam esse, clamabunt statim, in eo, omnia xenodochia, omnia templa, omnes religiosorum ordinum familiarum: proferent alii sacras vestes, alii pecunias in usus pauperum attributas; alii alia ex hoc eodem genere liberalitatis argumenta proponent. Præterea cujusvis generis, cujusvis ordinis, cujusvis denique fortunæ homines, summi, medii, infimi, isti tuæ laudi & gloriæ se offerent. Sed si nil aliud attulero, nihil mea proficiet neque valebit oratio: est aliud, quod sit mihi multo magis explicandum. Hic enim, quem ut beneficum laudari volumus, tantum abest à summo, ut fundamenta istius laudis nondum jecerit. Etenim, ut credatur testibus, ut rem ita esse convincam; adhuc erit liberum cuicunque, vereri, ne, simulatione liberalitatis, aliquam aliam cupiditatem obtexerit. Studio ac voluntate bene de omnibus merendi, magis quam muneribus & largitionibus, liberalitatis gloria colligitur. Itaque expectabunt, qui audient, ut ejus, quem ornare institui, consilia primum, postea eventus, qui consilia hominum præsertim declarant, aperiarn: cumque nullam illi potentiam, nullam dominationem; nullum regnum fuisse propositum, demonstravero, tum eundem in laude perfectæ liberalitatis constituerim. Cujus rei nullum videtur posse firmitus argumentum, quam ex populi studio ac voluntate, depromi. Fuere non nulli, nostra ac patrum memoria, qui ejus, quam dixi, potentiæ cupidi, aliquot sibi amicos delegerunt, quos divitiis explerent, honoribus & copiis amplificarent: profecto istorum hominum species videbatur honestissima, volun-

tas vero & causa erat impudentissima, cum instrumenta liberalitatis, præmia virtutis, in superbia & ambitione consumerent. quid ergo? tantum absuit ut aliquam gratiam inierint, ut in odium offensionemque omnium iruerint. Statui jam antea, nihil esse facilius, quam de tuis laudibus dicere; eo quod affirmanti aliquid de te creditur; neque aliquod præterea probandi onus imponitur. Si dixerò, te nihil unquam voluisse tua causa, nihil studuisse, nisi bene de Rep. mereri, laudari, coli, diligì; cui hoc non persuadebo? Si asseruero, nihil superbe te unquam fecisse, nihil periculi cuiquam creasse, nullum metum, nullam formidinem objecisse, quis reclamabit? quis fidem aut religionem in eo desiderabit meam? Postremo, si contendero, te non fuisse sceleratum beneficia, sed beneficentiam & liberalitatem gratis exercuisse, nonne jam strepitu & clamore suam unusquisque voluntatem significabit? Non possum adduci, ut suspicer, esse quemquam tam impudentem, tam stultum, qui contra res tam notas, tam manifestas, venire audeat, qui tot tantisque beneficentiæ tuæ monumentis non credidisse sustineat: at, si quisquam ita projectus ad audendum reperiatur, ut neget tamen, magis hic à re ipsa, quam aliqua orationis vi, refelletur. Comparet illorum exitum, qui, nomine, liberalitatis & beneficentiæ famam, re vera opes violentas & minime ferendam potentiam quaesiverunt, cum tua præsentì laude atque fortuna; jam intelliget, quid intersit inter largitorem factiosum & molestum, & animum vere beneficum ac liberalem. Quoniam exitus improbissima illorum cupiditas habuit? eos videlicet, ut amisso imperio, adhuc vivis ipsis, omnis eorum inemoria, præter injuriarum recordationem, obscuraretur & evanesceret. Tu vero quid assequeris? id, ad quod eos nunquam libido regnandi perduxit; ut tu plus unus possis quam ceteri, ut sis carissimus omnibus, ut non modo in eorum linguis ac litteris, sed in medullis atque visceribus hæreas. adeo ut probatum sit experimento, utilius etiam ad potentiam Principi esse, si, officio ac voluntate adducti, servire homines velint, quam si vi metuque cogantur. Ego illud jam mirari desino, quod interdum ante mirabar, unum te, omnium fere dignitate

dignitate maximum, auctoritate gravissimum, copiis locupletissimum, nullum neque adversarium neque obrectatorem neque inimicum habere, sed certatim omnes diligere, salvum esse cupere, & vota fatere pro fortunis tuis, ut diuturnæ sint, ut augeantur, ut in ea sede colloceris, in qua olim propatruus tuus, pietate, justitia, magnificentia, atque omni virtutum gloria, floruit. Si enim secundis illorum rebus invidetur, qui se intoleranter jactant, qui omnia ad suum commodum, nihil ad aliorum, conferunt; nemo offendetur in eo, quod opibus & potentia præstes, si modestiæ, lenitatis, moderationisque meminerit tuæ; nunquam committet, ut nolit, res tuas esse quam florentissimas, si, qui ab illis fructus, si, quæ in omnes utilitas consequatur, attenderit. Itaque de homine gravissimo & sapientissimo sæpe audiui, cum diceret, omnium fore communem hostem, qui tibi esset inimicus. Quid enim interest, utrum te quis, an publicam causam, an communem utilitatem & salutem, quæ te præsertim incolumi continetur, oppugnet? Statueram jam ab initio, nihil in iis, in quorum explicationem ingrederer, commorari, sed unamquamque rem strictim attingere, ne qua vel assentationis vel artificii significatio daretur: sed festinationem orationis meæ, ea res aliquantulum remoratur, quæ mihi videtur una de tuis maximis ac præstantissimis laudibus. Quicumque hic Romæ, de tuis virtutibus, sermones conventusque habent, fere omnes audio; atque parum constare inter eos video, ex omnibus tuis laudibus quæ excellat & dignior quodammodo sit cui ceterarum palma deferatur. Sunt, qui facilitatem in concedendo commendent tuam, plerique animi magnitudinem in largiendo mirantur, denique alii alia loquuntur & probant; me quidem tua illa sapiens, ut ita dicam, taciturnitas, seu potius mirifica in loquendo cautio, delectat. Habet hoc omnino magnus animus ac præstans, ut sit aliquanto ad loquacitatem proclivior. Quemnam beneficium invenias, adeo modestum, adeo suæ gloriæ prodigum, qui, si minus laudari, saltem diligi, propter benefacta, non expetat? Itaque virtutis istius studiosi, dum hanc eandem benevolentiam quaerunt, in eo fere vitio labuntur & cadunt, ut, quæ laudabiliter fecerint,

quantum possint exornent, & majora verbis efficiant. Deinde ita quodammodo à natura facti atque instituti videmur, ut in promittendo, quam in dando, largiores inveniamur. Fere hic mos est apud te, ut iis, qui postulaturn aliquid ad te veniunt, unico fere verbo, daturum te facturumve, respondeas. at nullum est jusjurandum tam sanctum ad religionem, nulla cautio tam firma ad nexum & obligationem, ut id, quod simpliciter ais vel negas, ad fidem tuam valet. Dicam uno verbo; omnia sunt tua beneficia plena liberalitatis, inania verborum. Hinc natum existimo (dicam libere, quæ audio de te,) ut ii, quibus nihil est tam præclarum, neque tam laudabile, quod probetur, tibi vitio dare interdum audeant, quod eos, quos à te impetrare vis; domum incertos sine spe ulla dimittas. Vellent primum, opinor, ut, ex communi hominum consuetudine, rem esse plurimi negotii multique laboris, ostenderes, tum operam & studium pollicereris tum, postremo magnifice beneficium, si impetrarint, efferres. Mihi (si licet affirmare sententiam & opinionem meam,) non oportuisse solum, sed plane necesse fuisse videtur, hoc à te consilium tam acre, tam sapiens, iniri. Dicam planius: mea sententia est, nihil à te potuisse rectius, nihil elegantius, fieri. In eo loco res est, ut urbanus & commodus in primis habeatur, qui norit omnium astutissime verba dare, spes aliorum alere, fidem in eo, quod dixerit, fallere. sunt hæc sananda & corrigenda. est Princeps bonus & prudens, qui hanc operam sumit. quid ergo oportet eum facere? aliquidne aliud, præter id, à quo elegantuli isti, atque omnibus artis coloribus perpoliti, refugiunt? videlicet, nihil fere loqui, pauca promittere, multa præstare? Aut enim tibi fuit hoc consilium probandum, aut omnis opera ludenda, si verum est illud, quod prope natura in animis omnium insculpsit, plane ad corrigenda vitia nihil esse contrariorum virtutum medicina salubrius. Ut igitur floctendo contorquendoque in diversam partem, quæ inclinant & propendent, erigimus; ita inanem loquacitatem graviore silentio, dictorum vanitatem promissorumque inconstantiam majore quadam fide veritateque, emendamus. Verum in ea, quæ dudum referre & ad te unum delegare institui, temere

temere multi non veteberunt irruere, & sibi vim fieri clamabunt, quod à communis possessione laudis ejiciantur ac deturbentur. Nam, quod ad beneficentiam spectat, non dubitabunt dicere, si, ex amplissimis opibus atque divitiis, eadem illis, quæ tibi, largiendi facultas suppeditaretur, fore ut, majore etiam cum laude, in plures & digniores, suas ipsi copias & fortunas effunderent. deinde, quis est tam levis, tam mendax, tam perjurus, tam perfidus, qui non existimet, esse se maxime veridicum, religiosum, & in suis dictis factisque constantem? At vide, quantum ubertati & copiarum tuarum laudum prope confidam, ut, quæ in neminem præter te cadunt, eadem cum aliis communicari posse concedam. Do igitur hoc illis, aliquot te, in ista laude, socios habere. Rem afferam ejusmodi, quam omnes tibi remittant, & tuam esse totam & propriam, fateantur. Cujus obsecro liberalitas adeo est ampla, adeo patens, ut nemini præcludatur, ut nulla neque rerum neque locorum neque temporum ratione & modo contineatur? Si ero prodigus in amicos, non ero profusus in omnes; & pro diversitate temporum erunt etiam mihi voluntates & studia diversa. largius in vilitate annonæ, parcius in caritate me geram. Hoc idem transfero ad rerum locorumque discrimina. Una tua liberalitas soluta ac libera est; non his angustiis terminatur; non exiguis hisce finibus circumscribitur. Iam ut non verear te beneficentiæ ipsius fontem appellare, unde liceat omnibus, quandocumque & quantum sit commodum, haurire. Neminem enim, quam velit officiosum, quam velit beneficium, mihi quisquam adduxerit, de quo beneficium si petam, non quærat; quis sim qui poscam, qui nolit scire qua confidentia adductus ad postulandum descenderim: & si nullam neque inter nos amicitia neque meritorum commendationem postulationi meæ fiduciam tribuisse ostenderim, nomen justam causam dem illi, non modo recusandi, sed audaciæ impudentiæque meæ præterea reprehendenda? Non est necesse nominare quemquam: tantum, quid mihi & aliis usu venerit, explicabo. Multi ab aliquot principibus viris, quos illis longus usus multaque merita conjunxisse debuerant, pauca & usitata poscunt, nec impetrant: ego à te, quod

interdum pudeat, sine meritis, atque adeo sine ulla notitia, multa nec parva quæsiui, & obtinui. Non conferam ingrata illorum perfidiam cum tua benefica atque præstanti natura, pusillum & abjectum eorundem animum cum tuo maximo & excelso: non, id quod possem, iniquitatem querar, improbitatem arguam, impudentiam reprehendam. quid enim ita sim ineptus, ut conjungam cum tua laude, cujusquam præterea dedecus? Tantum illud arripiam, quod debeant omnes mihi concedere, ut ita te solum fidei amicitiaque desertores isti, in ea de qua dixi laude, relinquunt, ut se etiam ab illa, quam ferè interdum belluæ consequuntur, longissime abesse cognoscant. Sed, ut eo revocetur unde paululum declinavit oratio, qualem te cum amicis & familiaribus esse tuis oporteat, si tam multa in eos, quos nunquam antea vidiſti, à tua liberalitate proveniunt? quamvis non recte, amicos & non amicos, familiares & non familiares, separavi atque distinxi. Quicumque sunt Romæ, quicumque tuum nomen audiverunt, omnes tibi sunt amici, omnes familiares, complures etiam tua aliqua liberalitate beneficioque devincti. Num possunt ullæ majores & fideliores amicitia reperiri, quam eæ, quas virtus & beneficiorum necessitudo conjunxit? Itaque non modo illi, quos officiis vel re sublevasti, sed, qui à te nondum quidquam acceperunt, id, quod liberaliter feceris, prædicare, ornare, grata animi voluntate complecti. In quo, jure, te felicem appello. Equidem, cum tuum præsentem statum mihi propono, nihil te fortunatius aspicio. Omnia sunt in te, quæ fortuna dat extrinsecus, aut corpori; optima valetudo, egregia forma, ingentes divitiæ, summa potentia, amplissimæ cognationes: &, quod in priori parte felicitatis ponitur, esse te carum tuis atque jucundum, intelligis. Hæc sunt fere, quibus contineri vitam felicem, non pauci opinantur. Non quæro, recte an secus judicent. Ego ex omnibus optabilibus optandum semper maxime duxi, ut, quibus beneficia dedissem, gratis & fidelibus uterer. expertus sum magno meo cum dolore, quorundam in me hominum perfidiam; didici jam ex usu multarum rerum, esse huic affines sceleri multos. Quorus enim quisque est, qui memoriam beneficiorum retineat, qui

qui non etiam, id quod est turpissimum, injuriis beneficia compenſet? Cujus rei ſi cauſæ quærantur, duæ poſſint afferri: aut enim ſit hoc vitio naturæ; nihil eſt enim minus ad diuturnitatem memoriæ ſtabile, quam id quod alteri gratificeris: aut quod veremur ut plurimum, ne, quod accipimus, ſœneratum ſit reddendum. Hæc ſuſpicio abeſt primum à conſuetudine tua longiſſime. vix enim ornasti quemquam beneficio, cum beneficii ejusdem obliuiſceris. Deinde, quam improbitatem, quam perfidiam, ex intimis ingratorum mentibus non evulſerit tua illa gratuita, & nihil ſibi quærens, humanitas atque benignitas? Quis enim eſt tam importunus, tam inhumanus, tam ferreus; qui tua commoda non anteponat ſuis, qui ſe tibi debere non fateatur? Quæ cum ita ſint, vere es felix, cum ſeras virtutis tuæ fructus uberrimos ampliffimosque. quis enim poteſt excogitari major fructus, quam prope innumerabiles maximis beneficiis obligatos & diſtictos habere? quid tibi glorioſius, quam numerum illorum, quos ornaueris, quos locupletaueris, propter multitudinem ignorare? quid jucundius, quam omnes, quaſi aliquod regnum, ut tibi ſerviant, expetere? Non eſt difficile, in hac ætate atque in his moribus, aliquot invenire, qui ingentes ſuntus faciant, maximam familiam alant, magnifice ac ſplendide vivant; ſed inimum eſt, quam ab his ſuperbe & crudeliter, viris interdum optinis, imperetur, quemadmodum homines honeſti, & domi ſuæ nobiles, tractentur. Sed, ne quiſquam poſſit dicere, mentiri me, aut fingere aliquid, aut nimium augere, ſi dixerò, te non eſſe aſperum, non acerbum, non inhumanum, ſed mitem, clementem, humanum; illud ante objiciam, quod eſt cunctis notiſſimum, quod eſt tota Vrbe celeberrimum: hoc eſt, tuorum te familiarium pleroſque ne de facie quidem agnoſcere; iis autem, quos vitæ neceſſitas, aut officii ſui ratio, circa te eſſe compellit, adeo clemens, adeo libera, apud te ſervitus eſt, ut ſervituti eorum magis, quam liberæ atque beatæ aliorum vitæ, inuideatur. Omnino miſeranda eſt, vel certe non invidenda, eorum conditio, qui ſerviunt. Nam, libertate erepta, quid ſit homini in vita jucundum, non video. Nihil autem libertati contrarium eſt magis, quam

non ita vivere ut velis , quam omnes voluntates rerum , aliorum arbitrio , moderari . At non est adeo cuiquam suave , domi suæ imperare , ut est in tua servire jucundum ; non est adeo cuiquam ingenuum , urbibus ac populis dominari , ut est , tibi subjici , liberale & gloriosum . quid mirum est igitur , si iis malis , quæ servitus habet , expulsis , omnibus votis ; ut tibi quisque famuletur , exoptet , summa ambitione , ut abdicet se libertate , contendat ? Hæc ut vera sunt , ita videri omnibus jucundissima , certo scio ; at , quemadmodum à modestia tua accipiantur , prorsus ignoro : mihi enim renunciatur , te non admodum istis laudationibus delectari : quod placere illis etiam video , qui virtutis fructum , non in laude , sed in specie & forma honesti , positum esse volunt . Quorum judicium in eo , quod virtutem propter se ipsam expetendam esse ducant , vehementer prædico : quod autem gloriam , præsertim si sit cum aliorum utilitate conjuncta , repudient , id potest mihi nullo modo probari . Quare impetrabis mihi hanc veniam ab humanitate tua , ut mihi à te liceat dissentire , atque eam laudem , quæ tibi parum est commoda , ceteris etiam perniciosa , prorsus abjicere . Ego , non solum non esse absurdum , sed prope necessarium , existimo , ornari Principem laudibus ; modo non eas tempus vel gratia , sed veritas & ratio , pepererit . Id adeo ea mihi ratione probatur . Quid tam omnes videri , quam imitatores Principum , volunt ? at vix ea quisquam , quæ imitatione digna sit , nisi laudentur , aspexerit . sunt igitur ornatissime recte facta Principum explicanda . Non ignoro , eam esse virtutis vitique naturam , ut una propter sui speciem , multo magis alterum propter suavitatem , hominum animis insinuare se possit : tamen , quia omnes acutius plerumque vitia , quam virtutes , videmus , sunt illæ sæpius lumine orationis illustrandæ , & in audientium oculis defigendæ . Quapropter perniciose de Rep. meretur , tam , bonus Princeps , si laudari se non permittat , quam , doctus orator , si à toto isto genere laudationum omnino refugiat . Vterque enim indicio de se ipse est , ut nolit , improbos & flagitiosos cives è vitiis ubi latent , emergere . Quid , si magna aliqua spes utilitatis ostenditur , & deest laudator , nonne sunt Principi
necessario

necessario oratoris partes suscipiendæ, quodque cum pietate, justitia, aut cum ejusmodi aliquo virtutis officio fecerit, explicandum? Quam multa, Homericus Nestor, quam multa innumerabiles alii, &, quia te magis nostra delectant, quam magna Paulus Apostolus de se ipse prædicat? ut omnes esse sui similes cupit? ut, castitatis, innocentia, omniumque virtutum exempla à se petenda esse, contendit? Atque, si ea vis est in laude, ut, quibus adhibetur, prope vim quandam imponat, honeste laudabiliterque vivendi, videant obsecro isti landis & gloriæ contemtores, ne, dum sua recte facta divulgari moleste ferunt, illud tacite significare videantur, nolle se ita in studio virtutum includi, quin liberum sit illis, quando velint, exire, & in contrariis vitiis suum ad arbitrium libidinemque vagari. Noli, quæso, rei tam alienæ à te suspiciones injicere; noli eam sapientiam, quæ cum periculo existimationis tuæ sit, adamare; sed libenti eam animo, austeræ privatorum quorundam hominum severitati, resigna, quos laudari nihil utile est nobis, illis etiam fortasse periculosum. Sed jam tempus est, ut totum id, quod dixi, concludam atque perorem. Atque solent ii, qui de dicendi facultate præcipiunt, fere illud in perorando jubere, ut ad eos, quos laudavimus, cohortandos demum traducatur & convertatur oratio; ut ne videlicet antea defatigentur, neque quiescant, quam ad summum virtutis gloriæque fastigium adscenderint. Quorum doctrina, ita ut est, mihi per quam puerilis videtur. adeo enim hoc est non necessarium, ut sit etiam interdum minime ad id, quod volumus, accommodatum. Quid si is, qui laudat, nihil fere autoritate & gratia possit, contra, qui laudatur, utraque in re longe multumque omnibus præstet? eritne quisquam tam ineptus, tam stultus, qui ei consilium dare sustineat? Quid si sit etiam ira perfectus, ut nihil fieri possit illo præstantius? quid si ita animatus, ut nihil oratione ejusquam indigeat? nonne inanis omnis noster labor & stultus, in eo cohortando, videatur? Istud idem mihi plane nunc contingit. nam si vulgatis istorum præceptis orationem meam effluerem, merito ab omnibus irrideat atque contemnar. Cujus enim consilio locum tua incredibilis virtus sapientiaque reliquit?

reliquit? cujus cohortationes tua firmitas constantiaque desiderat? quid est quod jam addi ad tuas virtutes posse videatur? Qua igitur utar conclusione? Ea opinor; ut, omiſſis ejuſmodi nugis, tibi vitam à Deo quam maxime longam & diuturnam exoptem ac deprecer. Nam; ut memoriae nominique tuo; non breve neſcio quod tempus, ſed immortalitas debeat, liberalitate, clementia, probitate, juſtitia, aliisq; tuis, prope divinis, virtutibus perfecisti.

O R A T I O X I I I,

habita in Academia Humoristarum.

E L O Q V E N T I Æ,
OMNIVM DOCTRINARVM
PATRIMONIVM VINDICATVM.

Quid eſt, quod ſemper Philoſophus oratorem contemſerit, ejuſque orationem, uti puerilem & caſſa nuce inaniorem, irriſerit? Princeps ille, vel potius omnium antiquorum calculis Deus Philoſophorum, Plato, Philoſophum cum oratore committit, eundemque facit certaminis ſuperiorem abire. ſed; quod videri admirabilius debeat, cui eloquentiæ patrociniũ tradit, non modo ea facultas aderat quam tuebatur, ſed omnis præterea Philoſophorum ſcientia inerat, uſque eo ut princeps ex omnibus, cuncta pæne audiente Græcia, auſus ſit in conventu poſcere, qua de re quiſque vellet audire. quæ arrogantia non ſolum una cum illis majorum gentium Philoſophis orta eſt & vixit, ſed in eos etiam ſeſe transfudit, quos non ingens aliquod meritum, ſed ſua ſibi opinio (ſi diis placet) tanquam minorum gentium magiſtros illis veteribus inſerit. quoruſque eſt, qui, ſimul ut didicerit, naturam eſſe principium motus & quietis, vel de eſſentiis, aut, ut nunc loquuntur, de ſubſtantiis, vel de iis quæ ſubſtantiis accedunt, vel de cælo, de æternitate,

mitate, de tempore, garrire cœperit, non continuo eum cavilletur, quem studio eloquentiæ flagrantem aspexerit? Sed non est difficile, invenire, quid tantopere Philosophum ab oratore divellat ac distrahat. Equidem nullam hujus dissidii causam esse aliam existimo, præter zimulationem. nam eos maxime inter se odisse videmus, qui in ejusdem laudis cursu versantur. non enim ego invideam cantori quod elegantius cantet, nec fabro lignario quod scire armaria concinnet; quid horum artificia ad me pertineant? si velim ad contentiones descendere, omnis mihi cum litterato res erit. Etenim tritum est illud, *Figulus figulo invidet*. Sed quid, inquires, habet commune Philosophus cum oratore, pro cujus possessione depugnet? universum Philosophiæ patrimonium; quod ita Philosophus totum sibi usurpat ut suum, ut in nullam ejus partem oratorem admittat. at, si familiæ herciscundæ judicio, æquo videlicet jure, certetur, multo majorem hic partem, quam ille, percipiet. cum enim omnis Philosophiæ fons in tres rivulos diducatur, in differendi subtilitatem, in naturæ obscuritatem, in vitam & mores, quanquam ab omnibus his promiscue hauriat uterque, ex eorum aliquibus tamen cumulatus impletur orator. ac primum ratiocinandi ars ita eloquentiæ influit, ut à ceteris rebus aspergi, ab hac una imbui videatur. nam si eloqui, est, quæ ratio invenerit, promere, atque ad audientes proferre, quomodo judicare poterit, esse verum id, quod invenerit, sine arte bene differendi, & vera ac falsa dijudicandi, quæ verbo Græco *Διλεκτικὴ* appellatur? Sed, nonne, inquires, inventio, quod est opus oratorium maxime, in probando commovendoque consistit? ita vulgo dividi scio; sed postremum oratori Aristoteles adimit quod sit extra causam, & judici totum assignat; primum relinquit, atque in omni argumentationum genere eundem libere vagari permittit. & sane hac una re præsertim eloquentia præstat; hac pugnat, hac metuenda est; sine ea eloquentiæ nomen ne retinere quidem potest. Itaque Rhetoricam, quæ est ars bene dicendi, Dialecticæ ex altera parte respondere, idem Aristoteles docuit. quarum artium diversitatem haud fere quisquam Zenone melius expressit, qui, Rhetoricam palmæ,
Diale-

Dialecticam pugno, similem esse dicebat. in quo aperiebat aliquid, unde longe huic illam præstare cognosceres. nam, qui Rhetoricam in apertum deducit, Dialecticam in angustum impellit, quid aliud intelligit, nisi illam esse dominam, hanc ejus prope pedissequam, illam omni impetu palamque decernere, hanc ex occulto dolisque contendere? Sed, quemadmodum parva animalia, in suis angustiis pugnantis, callida atque mobilia, facile alienas manus effugiunt, in apertum autem compulsa, quemadmodum se tueantur ipsa, non habent; ita etiam ex Dialecticorum subtilitate differentes, quamdiu illa breviter conclusa verbis ratione, tanquam foraminis cujusdam angustiis utuntur, facile ipsos captare volentes eludunt, at, inde expulsi, omnes ad pugnandum nervos amittunt. adhibet quidem definitiones orator, non interiore verborum gyro comprehensas, sed oratione dilatatas, easque oratoriis lacertis viribusque contorquet; ut Antonius & Sulpitius fecere; quorum uterque, in causa C. Norbani, quantum potuit oratione, dilatavit, quid esset majestatem minuere; utitur nihilominus aliis argumentorum locis, ex genere, forma, ex similitudine, ex differentia, ex contrario, ex adjunctis, ex antecedentibus, ex consequentibus, ex repugnantibus, aliisque, non ut scrobiculis ubi deludat, sed uti campis ubi percurrat, non ad certum verborum numerum adstrictus, sed ad omnem verborum copiam solutus. cujus igitur omnis argumentorum possessio magis propria existimanda est? utrum ejus, qui ad præscriptum ea utatur, an ejus, qui libere? utrum ejus, qui angustum in ea iter habeat, an ejus, qui, qua velit, tuto vagetur? Sed hinc fortasse Philosophus magnopere molestus non erit, non pugnabit, in aliquam nos hujus societatis partem admittet, ab aliis duabus excludet. Si quærat de istis, qui se scire omnia profitentur, quid de Philosophia Ciceronis sibi videatur, continuo cachinnos extollent. Sed ut ad nos redeam, fateor, homini, Latinæ eloquentiæ studioso, in ea lingua perdiscenda occupato, quæ, si nihil aliud in vita agatur, tota sciri perdiscique vix potest, physica ista perinde nota non esse, ut iis, qui, ceteris studiis omissis, id agunt unum, nego, si sit opus illa cognoscere, homini ad perdiscendum acerrimo, non
statim

statim fore notissima. non auderem hoc dicere, nisi dixisset Anronius, doctor singularis, eum, qui uniuersam oratoris vim nosset, non magis de ceteris rebus laborarum, quam eum, qui Herculem fingeret, quemadmodum pellem aut hydram fingeret, etiam si hæc nunquam separatim facere didicisset. Rem miram; oratoriam facultatem Herculi, pelli vel hydræ Philosophiam, atque adeo uniuersam scientiam de diis immortalibus, comparat. quid illud, quod est in confesso apud omnes, nimirum multo hæc luculentius liquidiusque eloquentem esse dicturum, quam illos ipsos earum artium magistros, quantum illi juris in hac etiam parte esse convincit? quis locus in tota Aristotelis philosophia est obscurior, quam Physica? in qua scribenda obscuritatem de industria quaesivit, ut etiam fecit Heraclitus ille, cognomento *οὐρανός*, at hæc si verbis usitatis & communibus traderetur, sine magistri ductu, nemini, ingenio paulo perspicaciori, non esset obvia atque aperta. Sed fecit perite & callide Aristoteles, ut rei tenuissimæ majestatem obscuritate prætenderet. Venit in mentem Homerici illius Vlyssis, qui, navi ac ceteris rebus tempestate amissis, Corcyram ejectus, quo à Nausiaca Alcinoi filia exciperetur hospitio, Palladis ope, in cujus tutela latebat, longe amplior ac speciosior apparuit, cum esset corpore breuiusculo, & forma non ita eleganti. ita Aristoteles, quem, ob insignem sapientiam, prope Palladi comparaverim, quo Vlysses suum, hoc est, suos de Physica libros, Nausiacæ, videlicet imperitis, conciliaret, nebula obducta, amplificavit. sed, quemadmodum cecidisset Vlyssi perincommode, si quis deus, nebula discussa, veram ejus formam detexisset, ita etiam Philosophis molestissimi accidunt ii, qui cornicum, ut dicitur, oculos configunt. homines videlicet callidi metuunt, ne, ipsorum præstigiis, orationis luce, disjectis, continuo artis, quam ornant, tenuitas pateat, ne continuo cernatur Vlysses ejectus, nudus, ac brevis. cupiunt de suo studio id, quod M. Varro de diis gentium cupiebat, nempe à vulgi intelligentia illud esse quam remotissimum, ne, enunciaris ejus mysteriis, totum contemnatur & abjiciatur. Sed non possum intelligere, quamobrem tanta ejus artis arrogantia subnixi ambulent.

ambulent. velim, mihi dicant, quid sciant. profecto si sunt viri boni, hoc unum dumtaxat se scire responderunt, quod nihil sciant. qua enim in arte illud Academicorum placitum, hoc est, nihil certum sciri, probabilius quam in Physica traditur? quid est in illa, de quo non copiosissime dici in utranque sententiam possit? quid, quod, ignoratum, non vehementer exspectatur, perceptum non illudatur? His igitur oratoris cuiuspiam eloquentia expositis atque detectis, alterutrum necesse erit, vel ut ea vulgus irrideat, vel ut se, non didicisse, minus poeniteat. Restat pars tertia de moribus, in hac vero eloquentis exultat ac triumphat oratio. Non est tractatio de virtute, de iustitia, de moribus, similis artium reliquarum, in quibus rudis atque hospes qui sit, nisi cachinnos irridendum aucupetur, tacere compellitur. res sunt in medio positæ, & quid sit in unaquaque earum verisimile, non arte sed ingeniis eruitur. itaque ut quisque præstantiore est ingenio, ita plura & similia veri reperiet. M. Varro, ut autor est Augustinus, bis centum octuaginta octo de summo bono sententias enumerat. volo scire; quam nam earum orator non etiam copiosius, quam ipsi earum inventores, non sit defensurus vel refutaturus, si tueri vel refellere proposuerit? habeat paratos argumentorum locos, quos diximus, nihil sane cuiquam eorum in disputatione concefferit, qui totum hoc studium sibi usurpant ut suum; sive honestatem cum Zenone tutetur, sive cum Aristippo voluptatem, vel cum Diodoro honestatem sine molestia, vel cum Calliphane honestatem cum voluptate, vel cum Aristotele virtutis usum cum vitæ prosperitate, vel denique cum Hieronymo Rhodio, doloris vel molestiæ cuiusvis vacuitatem; sive, cum de jure quaestio sit, alias scriptum, alias æquitatem, defenderit. notissima est illa Serg. Galbæ cum P. Crasso, juris civilis peritissimo, disputatio. dederat Crassus rusticano cuidam consulenti responsum, juri quidem scripto congruens, sed æquitati non ita conveniens. quid ergo? Galba, suscepto æquitatis patrocinio, tum similitudines tum rationes adiungens, tam multa contra jus dixit, ut Crassus, ceteris præfidiis interclusis, ad autores, unde jus illud hauserat, revolveretur, & tandem se victum fateretur. Quorsum igitur

igitur spectant ea, quæ diximus? eo nimirum, ut intelligamus, in oratoris suppellectile, non minus Philosophorum opes, quam orationis ornamenta, concludi. Accedit eodem, quod à ceteris rebus simulari Philosophia potest, ab eloquentia non potest. vestis longa, dentes atri, sordes, promissa barba, ut cetera absint, Philosophi speciem præbent; eloquentia, si doctrina desit, insanix.

O R A T I O XIV,
IN FVNERE
FRANCISCI MARIÆ
A MONTE

S. R. E. Card. & Episcopi Ostiensis,

Ad Cardinalium Collegium.

SI clarorum virorum atque omni dignitate principum funera, parem jacturæ luctum efflagitant, Auditores, Francisci Mariæ à Monte, S. R. E. Cardinalis, & Episcopi Ostiensis, interitus, tam multa nobis bona præripuit, ut multas simul causas dolendi defendique reliquerit. Omnia erant in eo, quæ natura atque fortuna, vel corpori vel extrinsecus tribuit; genus, forma, opes, honores. at vero virtus, quæ sola verâ hominem laude exornat, tam multa in eum bona contulerat, ut prope fuisse illi certamen cum natura videretur, utra earum, ad eum augendum, plura atque majora conferret. sed erat iniqua concertatio; siquidem duæ res, multum inter se dispares, componebantur. nam quis nesciat, ad hominem ornandum, multo majorem in virtute quam in natura, vim & potestatem hæere? hæc enim corpus adjuvat; illa animum augeat: hæc bona externa, ac brevi dilapsura, contribuit; illa, intrinseca ac perpetuo permanens largitur; immo hæc naturæ fortunæque bona tum demum veram laudis rationem obtineant, cum virtuti, tanquam

M

quam

quam materies, in qua illa se exerceat, subjiciuntur. Etenim ipsa virtus in earum rerum usu ac moderatione maxime cernitur. Verum, quia in claritate generis, tanquam in semine, vis quasi quædam inest ad egregia facta edenda, quamvis naturæ fortunæque bona, quibus abundabat, temporis inopiâ reticere cogamur, non est prætereunda silentio ejus stirpis antiquitas, quæ tantum ex se bonum eduxit. at neque est hoc pluribus verbis agendum, sed tantum ex eo attingendum, quantum est properanti necesse. itaque uno verbo simpliciter ponam, prodiisse illud ex clarissima orbis terræ Borbonum familia. nam statim longa Regum maximorum series occurreret, plurimi Galliarum Reges obijciuntur, domi forisque clarissimi. Propagavit in Italia hanc nobilissimam stirpem ille Borbonus, qui à Carolo magno, Christianorum Imperatorum longe clarissimo, velut quidam furculus, ex reliqua familia, tanquam ex suo trunco, decerptus, traductus est in Italiam, & Marchio sanctæ Mariæ, diplomate, quod etiam nunc extat, dato, creatus. sed, quemadmodum fecunda arbor, in quodvis solum translata sit, suam vim retinet, neque à se ipsa degenerat; ita etiam hic furculus, Italici etiam cæli ac soli benignitate adjutus, sui semper similis fuit. nam omnibus deinceps seculis optimorum ducum clarissimorumque Imperatorum foetus præstantissimos edidit, quibus enumerandis laudandisque, non modo unica ac brevis oratio non sufficiat; sed ne libri quidem, qui in hujus familiæ antiquitatem scripti feruntur, satisfaciant. Ex hisce igitur tam altis nobilitatis radicibus, illa Francisci Mariæ Cardinalis ad virtutem atque ad omnem humanitatem indoles extitit, imo, ut Phidias signum, simul aspectus & probatus est. Etenim mirifica quædam in eo vis extitit, ad conciliandos sibi omnium hominum animos. quod si, ut est apud poetam, *principibus placuisse viris non ultima laus est*, quantum hoc genere laudis efferendus est ille, qui non modo virorum ad se principum amorem attraxit, sed insuper, incredibili quadam morum suavitate, coëgit, ut ultro suas ipsi opes, divitias, honoresque deferrent? Atque, ut de reliquis taceam, Ferdinandus Medices, ex Cardinali S. R. E. magnus Etruriæ Dux factus, præter ædium amplissimam usum,

usum, ac pretiosam supellectilem, qua illum donavit, Cardinalem etiam, in ipsius locum, creandum cooptandumque curavit. Atque illud in hoc homine, ut mihi videretur, ad incredibilem admirationem efferre nos debeat, quod, cum summas hominum benevolentias dies imminuat, fortasse, quia multa in iis, quos diligendos suscepimus; vitia, quæ in secretissimis animi cujusque latebris ac recessibus delitescent, aperias, hunc, qui semel ipsorum amicitia dignum existimarunt, arctiori in dies amoris vinculo sibi devinxerunt. quod sumi potest pro argumento, puras illi virtutes, sine ulla fæce vitiorum, hæsisse. & sane, cujus non sibi amorem alliceret illa humanitas, illa virtus, illa forma, illa suavitas! omnes ad eum aditus erant semper aperti, neque unquam cuiquam occludebantur; ut etiam, ex tanta morum facilitate, non nemo, gravissimæ Cardinalis personæ quendam quasi contemptum oriri, falso quereretur. sed imitatus est homo Christianus ac Princeps laudatissimum illum Trajanum, cujus sine fine, sed non sine causa, vox illa fertur in cælum, quam reddidit accusantibus, quod querelis omnium excipiendis imperatoriam majestatem vulgaret, & quodammodo vilem efficeret: *Talem, inquit, præstabo Imperatorem privatis; qualem optarem ipse privatus.* Verum, hæc in Principe affabilitas, hæc in verbis humanitas, si deferatur à beneficentia, irrisum magis atque contemptum, quam admirationem ac benevolentiam, parit: ostendit enim, non consentire animum cum sermone. at oderunt homines plurimum hoc verborum cum mente dissidium. Sed nunquam deprehensus est, in Francisco Maria Cardinali, hic tam absurdus & abhorrens ab oculis & ab auribus vulgi dissensus; sed potius mirus semper in eo exiit cordis linguæque concentus: Etenim copiosissimos pauperum mendicantium greges, quotidiana fere stipe sublevabat, multas religiosorum ordinum familias, multas pauperum domos, mensuris donariis, pro re sua, juvabat, dicatis Deo virginibus S. Urbani Aedem, ac cœnobium Aedi adjunctum, exstruxit; Sodalitati Deiparæ Virginis Assumptæ, in domo professa Soci. Iesu, aureorum ad decem millia, & eo amplius, muneri obtulit, ut ex eorum redditibus, illis sumptibus suppeditaret, quos

in exponendis sacrosanctis Corporis Christi mysteriis facit, extremis Bacchanaliorum diebus. & cum eadem Sodalitas, se nunquam passuram, respondisset, ut, ipso vi-vo eos redditus caperet, aut tantam vim nummorum attingeret, perseveravit deferre, ac prope vim facere, ut acciperet. in qua contentione, tum incredibilis Cardinalis liberalitas, tum gratus ejusdem Sodalitatis in eum animus, mirabiliter, ut mihi videtur, enituit. nam, quoties ille insticit, ursit, oppressit, ut acciperet, toties donavit; quoties illa recusavit accipere, toties gratiam retulit; quia novam illi liberalitatis declarandæ materiam exhibuit. Verum hoc tam mirum in pauperes studium, cum amor & voluntas in Deum inflammet, non potest esse à vera pietate ac religione sejunctum. at ejus religionis in primis indicio est illa in exemplum posteritatis sedulitas ac diligentia, in iis præsertim sacris celebrandis, quæ in Sacello Pontificio statis diebus fiunt; quibus, cum erat veniendum, non solum ad horam, sed multo ante horam, præsto erat; neque, affecta jam ætate, infirmæque valetudine, cohiberi poterat, ut ad ea ne accederet, vel saltem tam mature ne accederet. ac, nisi postremo, morbo jam ingravescente, jussus esset domi se continere; credo, ante omnium ora, in conspectu Pontificis max. ante ipsam aram, destitutus viribus, animam exhalasset. Ædificantum ad præstandam suam diligentiam sacris religiosissimis animum! sed excitabatur ad hanc laudem præclaris domesticæ virtutis exemplis. nam à Petro illo à Monte, Marchione; atque in exercitu Veneto tribuno militari, hanc indolem hauserat; cujus incredibilis in resistendo constantia, prodita memoriæ ac litteris est. hic, cum in prælio, ex vulnere, adverso corpore, excepto, videret intestina sibi diffuere, nihil animo consternatus, altera manu viscera, ne dilaberentur, cohibebat, altera fortiter hostem feriebat. similis huic nostro, in resistendo labori, constantia, sentiebat, deficientis animæ vires, tanquam viscera, sibi pane concidere; & tamen fugientes eas retinebat, ut posset suo muneri diligentiaque sufficere. Sed quid plura ejus religionis argumenta requiramus? cum ejus testis locupletissimus, totus ille conventus, existat, qui octavo quoque die in domo professi

Soci-

Societatis Iesu habetur ad vesperam. Deus bone, quas ibi lacrimas fundebat! quæ suspiria, quos gemitus dabat! quas de se ipse verberibus pœnas ultro sumebat! quam multa alia demissi religiosique animi signa prodebat! quæ aut referri temporis ratio non finit, aut divulgari secretissima sanctissimi illius loci religio non patitur. Et sane singula eorum, quæ dicimus, digna essent, quæ tum larius explicarentur, tum sæpius repeterentur. quamobrem, non tam oratoris quam monitoris partes apud vos agere videor. nam oratoris est, rem dilatare, atque omni verborum ac sententiarum flore conspergere. sed habet hoc, in inopia temporis, materia dives, ut homini deserto omnem eloquentiæ declarandæ facultatem eripiat. Etenim, quis possit esse copiosus in iis, quæ vix liceat verbis attingere? itaque necessitati parens, commonstrabo reliqua, vel potius digitum, ut ajunt, ad fontes intendam. Vos igitur, quibus hæ sunt notiora quam mihi, recordamini illam ejus, in rebus maximis gerendis, prudentiam, virtutem, constantiam, fidem; quas in eo virtutes, non semel ac per transfennam prætereuntes strictim aspeximus, sed sapissime, & quam diutissime. nam eo tempore quo Cardinalis fuit (annos enim circiter quadraginta in eâ dignitate complevit) longum virtutis suæ declarandæ spacium nactus est; ex multitudine negotiorum, quibus præfuit, magnam Reipublicæ sapienter & ex utilitate multorum administrandæ facultatem obtinuit. non est expectatum in eo tempus, cujusque facultatis explorator acerrimus, ut declararet, quid ferre ejus vires possent, quidve non possent; sed, statim ab initio sui Cardinalatus, habitus est idoneus, qui cujusvis negotiorum moli succederet. ideo in eum Cardinalium numerum adlectus est, qui, quoniam ad eum de universa fere Rep. refertur, proprio jam nomine Consilium appellatur. illi autem alteri, quo sacrorum rituum causæ disceptantur, non solum adhibitus est statim, verum etiam postremo, summa cum laude, præfuit. ædiliū etiam consultationibus de muniendis, sternendis, dirigendisque viis præpositus est. Sed, utrum quis recte an secus se in honoribus agat, illud argumento est in primis, si majore honore dignus existimetur. cum igitur hic Populi totius voce

ad Pontificatum max. expeteretur, non est dubitandum, quin honoribus, quos gereret, cumulatissime satisfaceret. quod si non tam est gloriosum, honoribus uti, quam honoribus dignum haberi, etiam si non pervenerit quo populi totius studio vocabatur, dicendum est tamen, nihil illi ad summam amplitudinem defuisse. Itaque gloriosa clarissimi viri memoria, non est prosequenda lacrimis neque luctu, sed admiratione ac laudibus usurpanda; ut, quotiescunque ea animum subeat, eum etiam ad similitum virtutum imitationem incendat. &, quod importuno ejus interitu damnum Resp. fecit, spes est, ut ejus virtute quam primum reparetur, quem, velut imaginem illius humanitatis, virtutis, ac probitatis, aspicimus.

O R A T I O X V,
 LAUDATIONIS
 G R E G O R I I X V
 P O N T. M A X.
 C O M M E N T A R I V S.

EGregia atque præclara Gregorii XV, Pont. max. vita, ut est laudabiliter & honeste inchoata, ita etiam plausibiliter & gloriose transacta invenitur. nullus ejus actus sine plausu præterit; nullum tempus, vacuum ab egregio aliquo facinore, effluxit. quod difficile existimatur, in longa præsertim vita, ut in nulla ejus parte titubetur, non solum id ille affecutus est, sed insuper adeptus, ut majorem in dies laudem promereretur. inagnum est, vitæ cursum, tam multis undique septum periculis, sine offensione peragere; majus, aliqua eum cum laude tenere; quid dicam, summa omnium cum admiratione ejus metam attingere? hoc tantum est, ut vix quisquam animo assequi queat, ne dum oratione completi. nam vix fas esse putatur, versantem in lubrico sine casu aliquo & prolapsione consistere. Sed nihil de ejus pueritia loquar. quod enim recte in ea, & cum aliquo probitatis officio gestum esse dicatur, non tam virtutis amor

amor effecisse, quam parentum disciplina à filio exegisse, vel metus ac magister ab invito expressisse existimeretur; quæ autem consequitur ætas, si absit à vitiis, magnam ad dicendum vim affert. Qualis enim in eo adolescente indoles ad virtutem inhæreat, qui, liberam vivendi potestatem nactus, libidinum oblectamenta contemnat? Talis fuit adolescentia Gregorii. quam adolescentiam, non domesticis clausam parietibus habuit; non patriæ, quamvis maximæ, finibus abdidit; sed Romam, hoc est, in amplissimum orbis terræ theatrum, eduxit. neque enim, regendis urbibus natus, unius domi claustris cohiberetur, neque, orbis terræ imperio designatus, unius urbis mœnibus concluderetur. In hoc ille omnium populorum ac gentium domicilio, doctrinam suam, tanquam ex umbraculis paterni Gymnasii extractam, non modo in solem ac pulverem, verum etiam in ipsum discrimen aciemque, perduxit. nam, multos annos, judicandi onus, magna cum ingenii & eruditionis laude, sustinuit. sed translatus in hanc urbem, num generis nobilitatem qua præstabat, num opes & gratiam quibus florebat, suffragari sibi ad magistratus adipiscendos voluit? nihil ille ejusmodi artibus loci esse putavit, ubi virtutis adjumenta suppetere. quod autem ejus cohonestandi partes, sola sibi virtus, non fortuna casusve, desumeret, illud argumento est, quod non raptim ut non nemo, sed pedetentim ut par est, non impetu sed gradibus, ad honores ascendit. ut enim casus & temeritas fortunæ est, ita consilium & ratio virtutis. itaque initium magistratuum gerendorum à Capitolio fecit; ut nimirum is populus, cui ipse futurus esset Pontifex, haberet aliquod ab eo tanquam specimen æquitatis atque prudentiæ. sed, uti in bello, qui recte unam vel turmam vel centuriam rexit, dignus judicatur, qui majores ordines ducat; ita etiam in Rep. qui unam ejus partem feliciter gessit, majori ampliorique regendæ aptus existimatur. Itaque albo Referendariorum adscribitur. Sed non ita multo post, redditur foro atque judiciis; ut hæc civitas, quæ ejus sapientiam atque doctrinam, tanquam ab adolescente præbitam, leviter ac timide, ut ita dicam, liguerat, postea, à grandiore administratam, largius liberaliusque gustaret. atque eidem, Pontificis

Vicariz partes regendæ tuendæque mandantur. hic, quod paulo ante dixi, multo clarius apparuit, videlicet ut, qui recte unum magistratum gessisset, aliud illi majus committendum videatur. nam ob eam Remp. præclare administratam, relatus est in numerum Auditorum Rotæ. Iam vero Bononia, quæ tantum lumen decusque pepererat, visa est illud sibi repetere, ut & præclaris domesticæ virtutis exemplis gauderet, & ab alumno suo eam consilii sapientiæque lucem acciperet, quam aliis ille populis late diffuderat. quapropter, Archiepiscopus factus, in patriam rediit. At eum illi Roma, ad certum aliquod tempus, non in perpetuum, dedit; commodavit, non elargitus est; ea condicione permisit, si major vis nulla reposceret. id quod evenit. nam Italico tumultu, cum omnia fere gravi difficilique bello ferrent, cum maximus fortunis omnium metus instaret, missus est ad extinguendam illam flammam. qua, summa cum felicitate, primo fere adventu compressa, Romam ad insignia Cardinalatus accipienda contendit, tam faustis populi Rom. studiis & acclamationibus, tam perspicuis majoris amplitudinis adipiscendæ prædigiis, ut Deus atque homines conspirasse ad ejus decus viderentur. nam vix eum ordinem est adeptus, cum ad alium longo intervallo superiorem Deoque proximum locum evehitur, tanto Cardinalium consensu, ut, ne consultandum quidem putarent, qui nam in Pauli V demortui locum sufficiens subrogandusque videretur. Etenim, nemini eum honorem deberi, existimabatur, dum ille extaret. Sed puto, virtutem, quæ sola illi suffragata est, ad honores, tarditatis suæ pcenituisse, ac superioris temporis moram hac præpropere festinatione emendasse. Ita sese plerumque cursores in stadio remissius agunt, ut, metæ propinqui, rotas ad currendum vires effundant. sed hunc fuisse virtutis, non fortunæ, conatum, declarat in primis illa ejus Pontificatus gerendi ratio atque prudentia. siquidem non fuit illi consilium, magnifica ædificia construere, vias latissimas sternere, novas aquas incredibili impensa perducere, sed alia, ad æternitatem nominis longe firmiora, conari atque perficere; nempe, Christianæ Religionis terminos late proferre, ejusdem fidei propagatoribus

ribus, itineris conficiendi gratia, annuam pecuniam in perpetuum adjicere, pauperes, ostiatim victum emendicantes, unum in locum coactos, suis sumptibus alere, viros morum sanctitate atque miraculis claros, ad numerum Sanctorum adscribere, principum virorum similitudines inimicitiasque componere, viros omni dignitate principes, ac dignos eo loco ac nomine, in Cardinalium ordinem cooptare, aliaque id genus suscipere, quarum singula per se longam & copiosam orationem efflagitent. sed nihil ab eo factum est prius, quam ut bonas artes, temporum injuria neglectas & irrisas, & tanquam à libero spiritu & communi luce seclusas, revocaret ac restitueret. quibus revocatis, non angulum aliquem, quo se reciperent, dedit; non quodvis hospitium addixit, sed Pontificiam suam domum attribuit, intimos suæ aulæ recessus aperuit, aspectum suum, sedem majestatis, domicilium humanitatis ostendit; dexteram illam, sublevandis jacentibus natam, reconciliatæ pacis pignus exhibuit. ô miseram præteritorum temporum conditionem! ita ne, illud habitum esse turpe, quod est pæne solum honestum! ô perfectam egregii Principis laudem, nempe se judice, rerum pondera, tam indignis pretiis olim expensa, existinationi suæ reddita esse! quid illud, quod si hæc ætas non percepisset oculis, incredibile videretur, quantam laudem promereri debet! ô rem miram, & in qua omnes, qui audiant, obstupescant, unum perfecisse Gregorium, ut munitiones atque castella in faucibus callium Vallis Telineæ, magna impensa atque labore ædificata, summa eorum, qui illa excitassent voluntate, in potestatem Ecclesiæ venirent. magnus erat Italiæ universæ metus injectus, nam, quæ Rex Catholicus, Christianæ religionis studio iucensus, adversus hæreticos propugnacula excitaverat, ea non nemo, ad suam perniciem extructa esse, falso opinabatur; liberi Italiæ ejusdem populi, tantas moles, ad se præsertim opprimeundos, excitatas esse, clamabant; externæ nationes Regesque, se ab Italia in perpetuum excludi, ferre non poterant. is enim earum munitionum situs est atque natura, unde vel pauci, aut subeuntem hostem opprimere, aut iugentem hominum multitudinem, conantem irrumpere, prohibere facile possunt; quamobrem,

ubique locorum, exercitus jam pæne conscribi, arma parari, fœdera feriri, bella atque tumultus oriri. quod autem tantam malorum molem Gregorius exciderit, sapientiæ, quod eas munitiones obtinuerit, autoritatis, quod ii, quorum ea res erat, sua voluntate tradiderint, singularis cujusdam probitatis fuit ac religionis. cum vero liberam Cardinalibus, summi Pont. eligendi, potestatem, lege, æquissime scripta, permisit, quid nisi inertiae, ambitioni, gratiæque, ad Pontificatum maximum, aditum, in perpetuum obstruxit? cum Cardinalium eorundem fidem, in ferendo suffragio, sacramenti omnium sanctissimi religione constrinxit, quid nisi propositum veræ virtuti regnum, firmioribus præfidiis auxiliisque munivit? ô strenuum principem, & bene de humano genere meritum! quod multi cogitaverunt, pauci sunt aggressi, unus rite perfecit; ut, si ceteræ laudandi causæ in illo deficient, vel hæc una abunde exornatum omnium seculorum posteritati commendet. hæc una perficiet, ut naturæ gratias agamus quæ illum genuit, virtuti lateamur quæ Pontificem fecit, huic ætati gratulemur cui tanto bono perfrui licuit, calo invidemus quod nimis ad se celeriter illum arripuit. vix enim octo ac viginti mensibus in Pontificatu maximo vixit ille, qui nunquam mori debuisse videbatur. sed non potest dici cito præreptus, qui spatium perficiendi id, quod bene cogitaverat, habuit; nec potest vocari breve tempus, quod totum est in perpetratione rerum maximarum absumtum. Quamobrem, ommissis inanibus querimoniis, ne nostro magis incommodo, quam ejus interitu, lugere videamur, clarissimi Principis memoriam grato animo prosequamur, atque omnia nostra in id potius vota jaciamus, ut multos deinceps Pontifices, ejus quem modo experti sumus quam maxime similes, habeamus.

O R A T I O X V I ,
 I N F V N E R E
 C O M I T I S I V L I I C Æ S A R I S
 S T E L L Æ ,
 P O E T Æ C L A R I S S I M I .

Scripta Comiti Stellæ, ejus filio.

Postulabat omnino excellens Iulii Cæsaris Stellæ, patris mei, virtus, & egregia in hunc vestrum ordinem merita, Academici præstantissimi, ut idem pietatis officium, & grati animi monumentum, à vobis referrent, quod aliis præstantibus viris mortuis, summa cum pietatis laude, præstitistis. cur enim ille tacitus præteriretur, cujus præsertim præconio effectum est, ut toto orbe terrarum de vestris laudibus non reticeatur? cur ab hoc vestro eruditissimo cœtu, non aliqua vestri in eum amoris significatio foras emanaret, quo principe ausum est nomen vestrum, privatæ domus claustra perrumpere, & celeri cursu, Italiam primum, tum exteras gentes & nationes obire? At in me eligendo, non bene à vobis ejus laudibus consultum fuisse videri possit. multa sunt, quæ in eo, qui apud alios verba facit, requiruntur; sed duo in primis; autoritas, & eloquentia. at, qua tum eutoritate polleat is, qui, si ejus annos numeres, nondum ex ephebis excessit? quantum eloquentiâ præstet, qui vix suspicari per ætatem possit, quid sit, dilucide, copiose, ornate, & eleganter dicere? jure igitur quærat, quæ nam vos causa impulerit ad hanc provinciam mihi demandandam, infanti ac puero, præsertim cum tot viris, ætate, ingenio, eloquentia, doctrinaque præstantibus, abundetis. Non eo inficias, Academici, rudem hanc & infantem adolescentiam meam, cum tot clarissimis eloquentiæ luminibus collatam, nihil habere nisi tenebras,

tenebras, ac, si per se sola spectetur, patris mei claritati tanquam nebulam quandam aspergere. sed emicat quiddam inter meas tenebras, quod longe oculos feriat, neque sinat, se cuiusquam splendore præstingui, quodque vos secuti, ceteris omnibus anteposistis; videlicet, debita parentibus à liberis pietas. Etenim hæc, ex infantium ingeniis, voces elicit; hæc, quamvis tacita, multorum eloquentiæ præcurrit; hæc, si sibi dicendi partes assumat, iniquissimi cuiusque sermones non pertimescet. nam, quid aliud poterit dicere, si quis in eo sensus, si quæ humanitas insit, nisi hic, ad laudationem patris, plus animi quam virium attulit, adolescens & filius? hac igitur pietate fretus, sequar, quo me benignitas vestra, quo parentis merita, quo filii officium vocat. & quamvis difficile sit filio, de patris memoria, sine lacrimis commemorare; tamen, & aspectus vester, longe mihi jucundissimus, qui me ad hilaritatem impellit, & illustris paternæ virtutis commemoratio, quæ ad similitum rerum imitationem adhortatur, omnem ab oculis fletum avertet. ecquis enim ejus filii animum fletus obnubilet, cui tantus paternæ laudis splendor eluceat? ecquis dicentem dolor invadat, cui tam secunda afflet aura voluntatis assensionisque eorum, quorum autoritate ad dicendum accesserit? Sed, unde incipiam? ubi desinam? Etenim, in hac causa, tam multi sese fontes, uberrimæ copiosissimæque laudationis, ostendunt, ut, quem potissimum aperiā, ignorem. sed quoniam habenda est ratio diligenter & loci & temporis, ceteris fontibus relictis, eum libere sinam effluere, qui ab ingenii magnitudine & eruditione patris mei decurrit. neque enim convenit, eo in loco, ubi litterarum studia vigent, qui eruditorum hominum atque omni doctrina principum frequentia celebratur, quo tanquam in suam sedem ac domicilium confluit quidquid est ubique terrarum, in his elegantissimis studiis, summum atque perfectum, ullam cupiam laudem aliunde, nisi ex litterarum studiis, arcescere. ad quæ studia, atque ad poësin præsertim, eam parens meus, usque ab utero matris, indolem attulit, ut Apolline satus, Minervæ gremio exceptus, in Musarum nutrimentis altus educatusque dici, poetarum licentia, possit. difficile est, alterum invenire,
in quo

in quo magis extiterit verum esse, quod dicitur, poëtas nasci, non fieri. ita eum celeriter, non expectata ætate, ad optimos versus faciendos, natura ipsa incitata rapiebat. jam vero, quoniam illud ingenium, illa humanitas, illa virtus, ad litterarum gloriam, ad poëticæ facultatis decus, ad sui ævi laudem, ad hujus Academiæ ornamentum, extiterat; factum est, ut ejus ætatula in duos præstantissimos magistros incideret, M. Antonium Muretum, & Franciscum Bencium. parum videlicet fuerat, in eo naturam, quid efficere posset, expertam, nisi etiam fortuna ad id bonum, quod illa peperisset, alendum augendumque vires suas contulisset. his igitur magistris, ut dixi, in disciplinam traditus, ita ex clarissimis eorum officinis excessit, ut, Bencii ipsius testimonio, magistris major exiret. difficile memoratu est, qua ille ingenii celeritate, quidquid monstraretur, arriperet, ut, qui videret, posse se liquido jurare putaret, non id eum tum primum accipere, sed antea novisse, non tum primum intelligere, sed multo ante, cognitione scientiaque comprehensum, habere. accepi ab intelligentibus viris, eam fuisse Platonis sententiam, ut existimaret, rerum omnium intelligentiam non hominum ingeniis acquiri, sed ab eisdem, de cælo in terras, afferri, verum ex corporis commercio, oblivione, veluti rubigine quadam, obduci, eam postea rubiginem, magistrorum diligentia, discuti, itaque scire, nihil esse aliud nisi reminisci. hæc commenticia esse, neque ullis veritatis radicibus niti, veritas Christiana, quam ego profiteor, me dubitare non sinit. at, si vera essent, singularem in parente meo excellentiam, & quandam quasi divinitatem, arguerent. dici enim posset, non solum perceptarum à se rerum notitiam, præter communem hominum legem, è cælo retulisse, neque ullam ex communionem corporis oblivionem contraxisse, verum illud etiam astrum secum comportasse, cui, ex eodem Platone, unius cujusque animus, quodam quasi vinculo societatis, adjungitur. atque, si in Poëtæ laudatione, poëtarum deliciis uti fas est, dici etiam posset, non tam eum ex gentilitiis insignibus, quam ab hoc astro, Stellæ cognomen invenisse. poterant hanc opinionem obtrudere primi illi ingenioli ipsius partus; qui, quemadmodum

de

de Hortensio scribit Cicero, simul aspecti & probati sunt; poterat istuc idem ipsemet persuadere, in illa tenerima ætarula, antea cognitus magister quam discipulus. quis, ea scripta legens, quæ nihil pueritiam, nihil scholam redolent, non ea à magistro potius quam à discipulo prodiisse existimasset? multi ad summum facultatis cuspis pervenerunt, at non pueri sed senes; multa multi, perfecta ingenio, & elaborata industria, ex sese dederunt, sed non statim exitit in eis aliqua, ingenii impoliti ac rudis, tanquam materia, quæ magistrorum præceptis & institutione formaretur. nec natura quidem, totum statim ex sese perfectum educit. est sua ætas fructibus, ad quam cum perventum est, maturitatem accipiunt; & si qui ante diem maturuerunt, à succo destituti, celerius quam provenerant exarescunt. Sed quorsum hæc? quia ad illos libros Columbeidos, à se puero scriptos, festinat oratio. de quorum pulchritudine elegantiaque cum dixero, vereri non debeo, ne quid magnificentius locutus fuisse videar ut orator, vel cupidius ut filius. est opus in manibus; legitur, teritur, in ejus admirationem ingenii suspicitur. vix illi vigesimus annus advenerat, cum extrema operi manus accessit. at, dignum hominum conspectu, dignum eruditorum auribus, dignum immortalitatis præmio carmen, interioribus domesticæ latebræ recessibus latitabat; sed sua se luce prodebat; nondum inspectum erat, & diligebatur; ineuntis ætatis pudore, silentio premebatur, sed loquacis famæ præconio divulgabatur: verum impetratum est, vel potius expressum, ut posset aspici. at simul ac recens ejus pulchritudo oculos ferit, non solum admirationes, verum etiam clamores elicit. unius vel alterius, cui operis illius inspiciendi potestas fuerat, testimonium, tanquam ad ejus spectaculum, omnes Latinæ eloquentiæ studiosos attraxerat; sed, prudens adolescens, quamquam egregia eorum in se hominum voluntate delectaretur, non tamen usque eo se ab hac secunda communis in se voluntatis aura passus est abripi, ut statim, quo illa impelleret, andaciter vela committeret; sed tantisper cursum inhibuit, dum doctissimorum hominum; eloquentia & eruditione principum, sententiam & judicium exquireret. quam modestiæ laudem

dem in patre meo , longe gloriosiore , quorundam arrogantia efficit , qui indignantur , eorum , quæ scripserint , ut ita dicam , fastigium , majorum censuræ submittere ; quo fit , ut , dum iudicio , eruditione , prudentia , majoribus natu anteire se putant , in omnibus illis virtutibus longe infra suam ætatem esse inveniuntur . Fulgebat , per id tempus , clarissimum illud eruditionis lumen , quique optime omnium poterat de ingeniis hominum iudicare , Petrus Victorius ; magnum poëticæ facultatis nomen inter omnes habebant , Petrus Angelius Bargasus , & Petrus Magnus : eminebat in Io. Tonso , omnis cultus humanitatis , omnis nitor ingenii , omnis splendor orationis ; vigeant hæc poëtica studia apud Antonium Quæringum , qui nuper est mortuus . his , inquam , præstantissimis orbis terræ bonarum artium magistris , tanquam iudicibus , poëma illud suum iudicandum objecit . at , quis nam esset tantus operis cuiuspiam nitor , qui , cum eorum luminum fulgore collatus , sideris unius instar habere , inter plures clarissimos soles , non videretur ? quis nam tantus orationis cultus , qui , ad sermonis illorum elegantiam , sordidus obsoletusque non appareret ? verum , usque adeo lux illa ingenii , clarissimis illis eruditionis elegantiaque luminibus , cum ipsis collata , sideris instar habere non est visa , ut ipsi etiam ultro faterentur , ad illius splendorem & claritatem , se potius stellis propiores esse , quam soli . usque adeo egregia operis illius facies , ad illorum facultatis pulchritudinem , non evilit , ut etiam maiorem sui admirationem excitaverit . at istorum , de quibus hactenus commemoravimus , testimonium , vix est communis officii fines egressum ; at istius , ad extremum reservati , significatio & voluntas , progressa est longius . hic est vir ille , dum vixit , Græcis & Latinis litteris in primis doctus , omnium elegantissimarum artium ornamentis excultus , patriæ suæ lumen , Italiæ decus , sui ævi splendor , Carolus Sigonius . hic vir , inquam , ornatus , de patris mei laudibus non nihil fama & auditione perceperat , hominem vero de facie vix noverat : at , ubi absenti sibi elegantissimum illud volumen pervenit in manus , ea repente , ex operis excellentia , admiratio oborta est , ut exclamaret : O opus egregium ! ô poëma

ma

ma divinum ! ô carmen Musis & Apolline dignum ,
 que eatenus ejus visendi complectendique cupiditas
 census exarsit , ut Romam veniens , non prius ad hanc
 tem quopiam diverterit , ubi lassitudinem sedaret , o-
 neris molestias , aliquot dierum quiete , depelleret , vel
 saltem ubi pulverem deponeret , sudorem abstergeret ,
 calcaria detraheret , ocreas exueret ; sed statim , ita ut
 ocreatus , pulveris ac sudoris plenus , ad ædes patris
 recta se contulit , in ejus complexum irruit , illam
 vim ingenii , illam virtutis exsuperantiam , illam dicendi
 copiam , exosculatus est , atque singularibus verbis
 gloriam gratulatus , quam sibi in perpetuum peperit ,
 ut non ita late heros ille , cujus res gestas suis verbis
 immortalitati mandaverat , Hispanici Regni fines per-
 lisset , ut ille gloriæ suæ terminos extendisset . id ab
 mine clarissimo exauditum est de eo , quem vix aspi-
 rat , de quò tantum audierat , de quo nulla erat causa
 mentiretur . nimirum , non amor , non utilitas , non
 ambitio , sed veritas , eam ab homine libero vocem expro-
 rat . Hic denique est felix ille vates , cui , ex Fracastor
 varicinio , tantum daturus erat Deus , *Vnus ut aspicere*
caneret majoribus, ausas Oceani intacti tentare pericula pro-
pes. quid mirum est igitur , si ea virtus , quæ ad immor-
 talitatem nominis sibi viam communierat , ad principum
 virorum gratiam aditum aperuerit ? hinc Philippo
 Hispaniarum Regi , cujus nomini illud opus sacra-
 verat , ob ingenium , admirabilis extitit ; hinc aliis deinceps
 Hispaniarum Regibus , ob splendorem nominis , non ob-
 turus . Summorum vero Pont. gratiam & studium , qua-
 admodum ob virtutem promeruerit , quid me attine-
 cere , vobis præsertim , quibus licuit oculis id , quod
 quor , aspicere ? nonne Clementis VII , acerrimo
 ingeniorum æstimatori , prope in amore ac deliciis fuit ?
 nam patria eum caritate dilexit , consiliis suis intimum
 habuit , & , à negotiis publicis feriatum , in ejus oratione
 ac suavitate , omnem animi curam molestiamque de-
 fuit . nonne , ingenii gratia , reliquis deinceps Rom. Pon-
 tificibus carus , usque ad extremum vitæ tempus , in
 rum cubiculariorum numero adscriptus permansit , quos
 honorarios appellant ? quem locum ac numerum
 ille,

ille, dum vixit, obtinuit, ut difficile sit judicare, utrum ille ordo sibi, an ipse ordini, majus attulerit ornamentum ac decus. Sed, quamquam hæc, quæ hæcenus diximus, ad prædicationem nominis gloriosissima, ad existimationem & decus honestissima, ad opes & gratiam utilia, patri meo contigerint, nunquam, summis vestris in se beneficiis anteponenda ea esse, existimavit. nimirum, dignum à vobis esse habitum, qui huic honestissimo cœtui, huic clarissimæ orbis terræ litterarum frequentiæ, Principis honore ac nomine, non semel sed iterum ac sæpius, præficeretur; id vero gaudebat, id serio triumphabat. atque utinam longior illi vita suppeditasset; fortasse, vestro beneficio ac munere, rursus huic tanquam navi præposito, licuisset mihi vobiscum una, ipso moderatore atque magistro, ad virtutis portum appellere. Sed, quoniam suo magis quam suorum tempore, ab hoc Musarum domicilio, ab hac eloquentiæ officina, ab hac bonarum artium sede, translatus est in æternos illos colles, ubi, pleniore plectro, Dei O. M. ac cælestium Heroum triumphos ac laureas concinit; audite eum, de loco illo superiore, ita vobiscum agentem: Ego, dum ætas tulit, dum per tempus licuit, dum vita affuit, vestris semper imperiis parui, commodis servivi, studiis obtemperavi; denique quantum ego eniti opera & labore potui, semper contendi, ne ulla in re meum à vobis desiderari officium posset: atque earum rerum fructus, sane magnos atque præstantes, excepi; singularem videlicet benevolentiam vestram, egregium de mea facultate judicium, tot eruditorum atque in omni genere doctrinæ principum, in eo honore, qui summus apud vos habetur, mihi sæpius demandando, suffragia; sed omnes mei labores eo spectabant, ut istum, quem mihi unicum natura filium attribuit, simul ac ea ætate esset, qua versari inter vos liceret, aliquod ingenii sui specimen edentem aspicereim: sed, quoniam commune rerum humanarum fatum, hunc mihi fructum eripuit, quod vivo non licuit, mortuo concedite; ac, si ullum unquam fuit tempus, quo ego vobis voluptati atque usui fui, vos oro, obsecro, obtestor, ne carissimum istuc mihi pignus à vobis segregatum habeatis, sed vestro patrocinio tueamini. Ego eum vobis pro me substituo; ego vos

N

illius

illius orbitati tutores adopto; vos eidem patres, patronos, ac dominos, trado. Hæc parens meus. Cum illius postulatis vota mea consentiunt, congruunt, conveniunt. Quamobrem pro illius studio ac voluntate, pro meis optatis ac votis, istud in me imperium, à parente vobis meo traditum, ac mea etiam voluntate commissum, accipite; neque eo, quo ille, magis ingenii bonitate quam alia quavis ope, pervenit, vestro ductu auspicioque per ejusdem vestigia perducite.

O R A T I O X V I I, DE CHRISTI DOMINI A S C E N S U.

*Habita Roma, in Æde Apostolorum Principis, in Vaticano,
Ad Clementem VIII Pont. Max. &
S. R. E. Cardinales.*

SI Christus in cælum propterea abiit, B. P. ut omnis ab iis, qui se Christi discipulos profitentur esse, seignities ac socordia propulsetur, magna profecto virtus est, quæ in Christiano viro requiritur. ita enim, in arenam pugnaturus adducitur, ut soli, omnia obtinenti, rei nullius umbra officiat. Apostoli, omnibus rerum humanarum quasi tabernaculis dirutis soloque æquatis, unum tantummodo sibi reliquum fecerant, Christi videlicet mortalitatis umbraculum, quo trepidantes sese reciperent. id quoque evertatur necesse est, & in nuda receptaculis planicie, strenua Christi acies explicetur. sed non video, quamobrem, ô Christe, id fiat; tui rationem consilii assequi nequeo, ut ii, quos tuo sanguine peperisti, quique tua tibi sunt vita cariores, eo deducantur, ubi nullus periclitantibus tutus ad salutem locus existat. video, multitudinem hostium, quasi extra ripas diffluentem amnem, campos inundasse; auribus fremitum, tot millium, in armis stantium, accipio, superba tuorum perduellum

duellum agmina, ac præ paucitate tuæ gentis pæne innumerabilia, ingentes animos ac spiritus fumere, & certam sibi de ea victoriam polliceri, conspicio, apud bonos imperatores hic fere mos viget, ut, cui pauciores sint copię, hic se, loci alicujus fiducia fretus, defendat, & egregia ex eo prælia faciat. ignaris divini consilii, durum videri id possit; sed, quibus notum illud esse contingit, nihil est mitius, nihil magis cum ratione consentiens. vult enim Deus, nostram cum hostibus bellandi vim totam ab ipso pendere, neque commune aliquid tam fluxis & caducis rebus habere. adeo ut in hoc potissimum omnis Christianæ religionis sita sit laus, & hoc præsertim nomine sibi quisque victoriam de suis hostibus promittat ac spondeat, si nihil sibi in humanis præsidiiis relictum sit loci; at, si quis ab hoc Dei præscripto discedat, & ad aliorum præsidia confugiat, non levem illi contumeliam imponit. magnam in dignitate & existimatione sua plagam accipit imperator, si milites sibi dicto audientes non habeat, aut si illi ita faciant arroganter, ut de illius officio desperent, aut ei præscribere audeant. prædixerat Christus, omnes, in Crucis prædicatione, in Evangelii præcones coituros, novas contra ipsos quæstiones instituendas, virgas expediendas, cruces parandas, nova atque exquisita supplicia excogitanda & invenienda; verum ii, adversus quos, tot tantique conatus, tanquam armatorum acies, instruerentur, caverent, ne quidquam illis humani, præter eam virtutem, quam divinitus ab ipso accepturi essent, opponerent; nam fore, ut nudi & inermes, nulla humana ope adjuti, victis hostibus, victores evaderent. at, quis dubitat, quin ea suavitas & humanitas Christi, quæ lapides etiam adigere ut se diligerent posset, sua dulcedine, Apostolorum corda demulcisset, eamque illis victoriam à manibus eripuisset? siquidem Spiritus sanctus, ad quem omnis illius victoriæ gloria refertur, cum terrenis affectibus, etiam erga Christi corpus, non commiscetur, neque cupiditatum turmas, quasi auxiliares cohortes, in societatem admittit. quid fiet igitur? quoniam, inquit Christus, tantis rerum incrementis meâ hæc humanitas, quasi murus, opponitur, de medio removeatur; malo, vos triste mei desiderium

urgeat , quam tantorum jactura bonorum , fera poenitentia , laceret atque cruentet : dolor de meis injuriis , sive potius Satanas , qui expetivit , ut cribraret vos quasi triticum , (utinam propositum non assequeretur ,) frangeret atque comminueret , sed , fractos comminutosque , Spiritus sanctus , novus artifex , tanquam vas figuli , in aliud opus atque præstantius urgebit . Deinde , cum Apostoli , tot terras peragraturi , tot maria trajecturi , tot itinerum incommoda ac difficultates superaturi essent , quo commissum sibi munus exsequerentur , quid tam erat à rationibus illorum alienum , quam , aliquid objici , in quo voluptas eos aliqua , tanquam uno in loco consistere ac morari , compelleret ? omnia igitur removenda erant , quorum interjectu , tot itinerum , tot laborum , tot victoriarum cursus impedirentur . quid est enim , cum properato opus est , quod abeuntis festinationem remorari tantòpere possit , quam fertilis terra , atque omnium copia rerum abundans , quam viridis camporum ornatus , vestiti viribus colles , perlucidi fontium liquores , quam sicut terrenum aliquod cælum , quasi astris , distinctæ floribus valles ? quoties Regnorum Provinciarumque domitores , exercitus , quorum vim impetumque , neque locorum angustiae , neque fluminum oppositus , neque montium asperitates , retardarunt , regiones ad irritandas illicitasque voluptates idoneae retinuerunt ! quoties , hac sæpe mora , est festinantis laus obtrita ! quoties , ingentes spei gloriæque opportunitates amissæ ! quis , ô Christe , æterna cæli felicitas , perennis animarum suavitas , immortalis rerum pulchritudo , suprema voluptas , summi Angelorum hominumque amores atque deliciae , quis , inquam , si tu versatus inter nos esses , à labore ad otium , à periculis ad securitatem , ab itinerum molestiis , animum , ad te fruedum potiendumque , non transtulisset ? quod nam fidei propagandæ studium , quæ negotii conficiendi celeritas , quæ nam hominum commoda , à suavitate humanitatis tuæ non essent in oblivionem adducta ? equidem , de me ut fatear , si te semel nactus essem : mea culpa fuisset , si te unquam dimissem . etenim , nulla me vis , manibus & brachiis , pedibus inhærentem tuis , avelleret . quid ? si præsentiam nostris ab oculis suam nunquam Christus removisset ,

removisset, nonne omnium animos acuisser ambitio? quis nam futurus fuisset contentionis atque certaminis inter homines finis? quis non cum altero, de loco, certasset? quis non manibus pedibusque, ut dicitur, elaborasset, ut primas, apud Christum, autoritatis gratiæque partes haberet? Quæ quam vera sint, ineptum filiorum Zebedæi postularum ostendit, qui matris ore petebant, ut unus dextera, sinistra alter, Christum adsederet, adeo ut medius ille ex tribus, quod apud illas gentes honori ducebatur, existeret. omnis igitur labor, ipso præsentē, constitisset, ac jacta summæ ambitionis magnarumque discordiarum semina fuissent; quarum fationem, ab animarum nostrarum campo, tantopere prohibuit Christus, primum, quum discipulis, indigne ferentibus superbum & ambiciosum duorum illorum fratrum postularum, ad se vocatis, Quicumque, ait, voluerit inter vos major fieri, sit vester minister, & qui voluerit inter vos primus esse, erit vester servus: deinde, cum nobis, quos, non aliis magis præceptis, quoad vixit, insecutus est ut erudiret, quam humilitatis, quæ sola omnes discordiarum causas eradicatus ex animis extrahit; cum, inquam, nobis præcepit, ut, ad nuptiarum solemnitates invitati, imi potius lecti convivæ, eligeremus esse, quam summi; hoc est, ut ipsi, nos existimatione nostra infra omnes homines esse, deputaremus; hoc enim est, quod ipse ait, in novissimo loco decumbere. ne igitur ad ea, quæ subeunda sunt, nova discrimina, Apostoli, tardiores facti, torpescant, omnis otii ac voluptatis causa subducitur, atque, ne dissensionis ramos truncosque eliciat atque diffundat, id quod speciem gerit amoris atque pietatis, inclusum semen ab ipso enecatur & eliditur; &, quemadmodum, qui sunt, in suos agros, adventus hostium excepturi, terras urere, vicos subvertere, alimenta corrumpere, soliti sunt, ne, si ibi, ubi comineatu abundet, hostis insistat, inde rejici difficilior possit: ita etiam Christus, qui optime omnium nosset, rerum terrenarum cupiditates, ac nostri ipsorum amorem, quo nullus Spiritui sancto capitalior est hostis, in animum nostrum, ut ejusdem potiat, invasurum, quo nihil, quocumque se vertat, unde alii possit, inveniat, locum omnem, ad quietem ac voluptatem

tem idoneum, destruit, soloque exæquat, quidquid est jucundum ac delectabile, vastat, orbemque terrarum nudum sterilemque relinquens, vastam illi quasi solitudinem facit. hic non possum quin exclamem : O mirum Spiritus sancti candorem, qui cum ea dilectione, quæ in Christi corpore veritur, includi recusat ! hîc vos putate, ut ego non dicam, num se ad eos applicaturus sit, quos vita inquinatissima ac sordidissima, in omnium turpitudinum luto, totis vestigiis demersos hærentesque detineat. O cupiditatum onus non ferendum, quarum gravitate ita enervatur atque opprimitur animus, ut ea etiam cupiditas, quæ aliquam, ad sensus permulcendos, à Christo voluptatem aucupatur, ad terram illum affligat atque propellat. *Multa habeo*, Christus inquit, *vobis*, Apostolis meis, & gloriosi laboris consortibus, *dicere, sed non potestis portare modo.* quidnam, obsecro, erat, quod adeo vires illorum infringeret, ut tum non essent illi oneri ferendo pares, quod postea eorum esset humeris imponendum? profecto erat ille, qui in Christi corpore volitabat, amor. hic, utpote mortalis atque terrenus, eorum corda, plusquam erat opus, urgebat; hic amor, ut moli illi, quæ esset à Spiritu sancto imponenda, humeros possent subijcere, ab ipsorum cervicibus erat antea depellendus. ut enim nemo sit novi oneris capax, nisi illud, quo gravatur, antea deponat : ita etiam, nemo divini amoris divinorumque ejusdem mysteriorum capere magnitudinem potest, nisi qui antea humanis sollicitudinibus animum exoneraverit. Sed perge porro; tibi enim, Christe, assentior, tuam Apostolis præsentiam magno esse ad reliqua impedimento; quid igitur, te illis erepto, præcipis, ab Hierosolymis ne discedant? quid eos jubes, intra unius conclavis parietes, paucos etiam hos dies, hære? ideo B. P. hæc illis quies indicitur, ut distractum in varias curas & ancipites animum colligant atque confirment. ubi milites, hostium, acriter pugnantium, timor invasit, cognitò pavore exercitus, haud rudis tractandi militares animos imperator, jubet classicum primum, ut consistent, canere; tum fessos jubet acie excedere arma deponere, corpora curare, ac tantisper quietos esse, dum, metu ejecto, pariter animos atque arma recipiant. neque etiam

etiam hinc ulla sit admiratio, si Apostolis, ea crudelitate, quæ in Christi nece debacchata est, ingenti terrore concussis, eatenus consistere imperatur, quoad, soluti terroribus, à Spiritu sancto rursus in hostem procurrare jubentur. At tum id, inquires, Apostolis imperatum jure fuisset, si eorum adhuc animos occupatos oppressosque ea formido detinuisse, quæ illos antea exanimaverat; sed, quid si jam, omni metu depulso, se satis alacres ad pugnam reddiderant, nonne frustra omnis illis dimicatio interdiceretur? quis poterat dubitare, quin omnem veteris discordiæ infamiam & suspicionem extinxissent ii, qui adorantes reversi sunt in Hierusalem, cum gaudio magno? verum, quamvis non minimum illis animi ac roboris, ex Christi in cælum abitu, accessisse, non sit eundem inficias; tamen, quid habuisset rationis, modo è regione timoris atque formidinis, naufragos jaclaros, ad cujuspiam fiduciæ littus expulso, rursus, in eosdem fluctus tempestatesque conjicere, antea quam acciperent virtutem supervenientis in eos Spiritus sancti, qui, navis gubernatoris, ac remigum, munere fungeretur? quomodo se maximæ temeritatis crimine eximerent ii, qui navim, sine ministerio nautarum vel remigum, sine malo, sine velis, sine gubernatore, hyemi fluctibusque committerent? quomodo damni, quod navis faceret, culpam effugerent, si vel eam venti turbineque, raptam, ad saxa scopulosque devolverent; vel quassatam laceratamque fluctibus, suscitati vortices, in profundum, ingenti cum fragore, detruderent? at nihilo minorem in fraudem illi delapsi fuissent, qui Ecclesiæ navim, concitatis iniquorum animis, sine Spiritus sancti regimine, qui solus eam poterat felici in portum cursu dirigere, ad manifestissima ac certissima pericula, è litoris statione, solvissent. quomodo, qui ad ancillæ vocem expavit, fixas sibi cruces eluderet? quomodo, qui inhorrescens alteri mare, positus in tuto cohorrui, imperterritus, concitatos sibi acrioribus ventis fluctus tempestatesque subibit? non pigeat igitur, ecclesiæ naviculam tuto tranquilloque in loco tantisper includi, dum gubernator adveniat, eamque velis remisque ita instruat, ut eisdem, everberatum mare humanæ feritatis & iracundiæ, cedat. postremo, ideo

Christus voluit, ut Hierosolymis Apostoli, tanquam vallo quodam, continerentur, antea quam, distributis orbis terræ partibus, singulas singuli, divini verbi gladio, quem Christus venerat mittere in terram, expugnarent subjicerentque: quia cum multi ex Iudæis credituri essent per verbum illorum in ipsum, unde melius probare in populis ac civitatibus poterant, vera esse quæ dicerentur, quam si ex ea urbē, in qua illud tam atrox crudelitatis exemplum editum fuerat, quam plurimos testes domestico præconio colligerent? interim, utcumque sit, ille jam celeres in cælum dirigit cursus, & summas aëris regiones, immensumque ætherem, admirabili celeritate percurrit, atque, exortæ repente nubis oppositu, intuentium oculis sese subducit. Sed quid tam propere te, nubes, cælo diffundis? cur, tam cito, spectaculum illud, quo nulum superis futurum sit pulchrius, illorum oculis invides, qui eatenus illo sint carituri, quoad mortalis vita suppetiderit? cur illico, quidquid lucis internitebat, avertis? cur tanti nitorem sideris condis? Sed, quoniam, triumphator gloriosissime, tuus hodiernus hic honor totus utilitati nostræ gloriæque deservit, quoniam, (te nostris ab oculis sublato) breve hoc tui desiderium, æterno futuri temporis spacio, compensandum est, quo te frui licebit; unum à te deprecamur, ne ea nubes, qua nunc amicus nobis atque propitius, tanquam triumphali curru, inductus, cælum ingrederis, postmodum te, cum imperio ac potestate redeuntē, iratum & alienum referat atque constituat,

ORATIO XVIII,

quæ est prior

DE S. SYMPHOROSA

MARTYRE.

GAudium, voluptas, Angelorum atque hominum, Christus Dominus, B. Symphorosam, cui hodie natalitia dantur, *habitare facit in domo*, patris nostri cælestis, *matrem filiorum letantem*. Atqui, si sanctis martyribus suis, inter æstus flammarum, inter sonitus crepitusque plagarum, inter acies securium, inter laniatus ferarum, inter sævas carnificum manus, summam sæpe lætitiâ excitabat, ut, tanquam si essent in lectulo, clamarent, Quam suavia sunt hæc! quam dulcia! quamque expetenda! quam inexplicabili hilaritatis voluptatisque magnitudine hanc beatissimam in cælo matrem excipiat oportet, ubi, qui fortiter pro sui nominis gloria demicaverunt, defuncti malis omnibus, rerum gestarum mercedem accipiunt? si, tanta erat in bello delectatio, quantum esse debet in victoria solatium? si tanta erat in dimicatione alacritas, quæ nam esse debet in triumpho hilaritas? si tanta in cruciatibus suavitas inerat, quæ nam esse debeat in voluptate jucunditas? sed terrarum etiam orbis, clarissimam istam victoriis ac triumphis feminam, unde tantus, generi hominum, honor ac decus accessit, iis quos potest honoribus ac laudibus afficit, conaturque, lætitiæ illi sempiternæ, qua in cælo victrix exultat, aliquem quasi cumulum addere. Sed incertum est, utrum, sua gloriosa fecunditate, plus cælo boni an terræ, pepererit, Angelis an hominibus dederit. ac terra quidem, nova se ac generosa prole ornata atque auctam gaudet; cælum vero, octo se civium præstantissimorum numero locupletatum, exultat. hominum genus, jure humanitatis, sibi eos vendicat; cælum vero civitas, propter fortis ejusdem societatem & gloriæ, sibi eosdem

N 5

usurpat.

usurpat. sed, quamquam felix hæc parens, tot ac talibus filiis edendis, ab Angelis & hominibus gratiam inierit, videri tamen potest, cælo magis, quam terræ, consuluisse. nam, cum terræ eos peperit, terrenum hoc domicilium clarissima ac venustissima quidem prole ornavit; sed ad breve nescio quod tempus: at cælo, cum genuit cives sanctorum, & domesticos Dei, in omni æterni temporis spatio permansuros exhibuit; terræ, ad breve certamen, produxit; cælo, ad æternam coronam gloriamque progeneravit; terræ eos, tantum commodavit; cælo, nunquam repetitura donavit; terræ, cum dolore procreavit, utpote Evæ maledicto subiecta, cui dictum est, *In dolore paries filios tuos*; cælo, cum gaudio, peperit, quia nihil, ad communem nascendi conditionem partus ille spectabat; terræ eos sollicita edidit, nimirum incerta, quos vitæ exitus essent habituri, bonos an malos; cælo, otioso eos animo reddidit, quem, securum, stabilis eorum, in fidei confessione, constantia, omnium tormentorum acerbitatibus longe superior efficiebat. Christianis eos sacris initiaverat, optimis moribus erudierat, ad certamen pro Christo fortiter supeundum, tum oratione, tum præclaris domesticæ virtutis exemplis, excitaverat, pulcherrimæque mortis appetentes effecerat. quos igitur, nascentes, ad vitam cum metu suscepit, eosdem, adultos, ad crudelissimam mortem, cum gaudio, dimisit. Sed, quamvis, in hac gloriosa hujus beatissimæ matris fecunditate, prior fuisse videatur cæli, quam terræ, conditio, attamen, nihil altera alteri suum decus & gloriam invidet, sed gratulatur; non, sibi minus fuisse concessum, queritur; sed Dei benignitatem tellus extollit, quæ, ex suis filiis, suo limo compactis, nova pulcherrimis cæli regionibus ornamenta quæsierit. Sed, ut ad B. Symphorosam, unde paululum digressa est, revertatur oratio; illud fortasse non nihil potuit ejus, è vita decedentis, cor animumque pervellere, quod sola, sine illis, cælum ovans ingrederetur. sed, nullo modo, turbidæ istius cogitationis quasi nigritia poterat ad infuscandam purissimam illius voluptatem influere. etenim, eos illa non deserebat, sed antecedebar; non illorum certaminum expers proficiscebatur, sed eorundem futura è cælo spectatrix, abibat; pro certo sciebat

bat, non suis tantum triumphis, cæli cives exhilaraturam, sed summam etiam illis, ex filiorum victoriis, de se, quæ tales filios genuisset, voluptatem allaturam. interim illa, alacri promptoque animo, mortem, hoc est, extremum rerum omnium, appetit; quod non esset nescia, ab hoc aditu gradum sibi fieri ad vitam, ad immortalitatem, ad gloriam. Est quidem dolor in morte, est hujus vitæ commodorum amissio: at est in Christo, cui illa persolvitur, voluptas, est bonorum æternorum consecutio. habet, nec inficior, ultimum supplicium infamiam, habet dedecus, habet horrorem; sed habet Christus, cui illud subitur, decus, habet gloriam, habet honorem. non est, mors talis, luctu prosequenda, sed gaudio; non est fugienda, sed votis omnibus expetenda; non turpis, non indecora, non vilis, sed pulchra, sed jucunda, sed *pretiosa est in conspectu Domini, mors sanctorum ejus*. quod, si mors isthæc, tot tantisque bonorum muneribus affluit, hanc gloriosissimam martyrem, in profluentem injectam, non tam amnis illius fluctibus obrutam, quam torrente voluptatis submersam existimo. quarum voluptatum cursus, perennis ac profluens, non ex unis, sed ex pluribus, in unum coëuntibus, aquis, exibat. quædam enim voluptates, ex propriis suis bonis, quædam ex filiorum, in omni virtutum genere, copia, prodibant. lætabatur, quod, defuncta hujus turbulentissimi maris periculis, portum aspiceret. explebat illi animum agnus cælestis, cujus felicissimas nuptias sanguine ac vita coëmerat. cumulabat eam gaudiis immortalibus immortalis illa felicitas, quæ futura erat, tam exigui laboris, æterna merces ac præmium. Atque, hæc erant illius propria, alia porro, ex liberorum suorum commodis, tanquam auxiliares aquæ, ad explendum ejus felicitatis amnem decurrebant, seque cum eo miscebant; videlicet, egregia adolescentium virtus, vitæ innocentia, morum præstantia, in periculis fortitudo, in laboribus patientia, in obeunda, pro Christi nominis amore, acerbissima morte, alacritas. Itaque, quot filios susceperat, totidem etiam sibi lætandi gaudendique fontes aperuerat; quot, in eorum animos, semina virtutum in-severat, totidem sibi cælestium voluptatum origines causasque pepererat. quisnam igitur se illi gaudio mœror fuisset.

fuiſſet auſus inferre , ad quod explendum , tot præterea voluptatum fluentia , à tot capitibus orta , decurrerent ? Si ex duobus liberis , in quinquennali illa celebritate ludorum , corona donatis , tanta patri lætitia oborta eſt , ut ſubita morte conciderit , nonne ſeptem clariffimi totidem filiorum triumphis , ſola lætitiæ vi , materno corpori animam potuiſſent eripere , ſi ejusmodi lætitia eam naturam haberet , ut ſua magnitudine quempiam opprimeret ? vitalis eſt illa lætitia , non mortifera ; poteſt quidem mortalis honor , immodice exceptus , mortem afferre , at immortalis gloria quemquam vita ſpoliare non poteſt. quid ? Getulii viri ſui , & Amantii fratris , pro Chriſto interfectorum , coronæ , nihilne in ejus vim lætitiæ influerant ? nonne , domesticæ propinquorum laudes , in noſtrum quoque decus gloriamque redundant ? O domum fecundam triumphis , copioſamque victoriis ! quæ nam , ex veteribus Romanorum domibus , pugnarum , victoriarum , ac triumphorum , numero , qualitate , magnificentiaque , cum iſthac comparare ſe audeat ? valeant omnes , Marcellorum , Scipionum , Metellorum , Lentulorumque , familiæ : nam , ſi illi , depugnata à ſuis majoribus bella , narrabunt , hæc longe plura atque majora certamina , à ſe commiſſa , commemorabit ; non cum hominibus ſuſcepta , ſed adverſus principes & poteſtates hujus mundi , contra ſpiritualia nequitia in cæleſtibus ; ſiquidem terribiliores ſunt ii hoſtes , qui aspectum noſtrum effugiunt , quam qui ſub illum eundem cadunt. ſi jactabunt illi victorias ſuas , multæ etiam ex hac familia palmæ proferentur , eo ceteris glorioſiores , quo præclarius eſt atque glorioſius , ſe ipſum vincere , quam innumerabiles hoſtium copias fundere atque delere. ſi , triumphis illæ ſuis inflatæ , elatius ſe gerent , in hoc quoque genere à domo iſta ſuperabuntur , cujus triumphis eo ſunt nobiliores clarioresque , quo pulchrius eſt , de vitiis triumphare , quam , ante triumphalem currum , multa captivorum millia , catenis onuſta , adducere. Quamobrem , ſi animi ſecuritatem , ſi decus , ſi gloriam , ceteris rebus potiorem habemus , ſi ad veri honoris faſtigium properamus , ea via nitamur , quæ ſanctiſſimæ hujus martyris ejuſque filiorum impreſſa veſtigiis apparet ; eorum mores imitemur ;
inde

inde exemplum vitæ expetamus, sibi quisque simile. nam, si quæ sævior vis ingruat, in Deum, qui nobis est causa patiendi, mentis aciem intendentes, nullum tristitiæ, nullum timiditati, nullum adversariorum incurfibus, locum præbimus, sed, victis hostibus, hilares ac læti, triumphali curru inveci, cælestem affluentemque bonis omnibus patriam ingrediemur.

O R A T I O X I X,

quæ est posterior.

D. E. S. SYMPHOROSA
M A R T Y R E.

Hodie, Auditores, ut nostis, sceminæ natalitia dantur, Beatæ videlicet Symphorosæ. quisnam igitur non facilem sibi fore de mundo victoriam existimet, quem vincere muliebris etiam infirmitas noverit? hodie, matris, in æternam vitam, natalis dies, anniversariis sacris, summaque ab Ecclesia religione colitur. quid nam inde matronas æquum est discere, nisi, posse etiam inter domesticas curas ad summum sanctitatis fastigium ascendi? hodie martyris natalitia celebrantur. quis non erubescat, se præbuisse aliquando vitiis assensum, quibus muliebris virtus, usque ad sanguinem, restitit? nihil, imperterrita, mortem extimuit, unde gradum ad vitam fieri non dubitabat. Solet quidem esse mulier, sedes ac domicilium ipsum timoris; sed quis nam timor suas contra eam copias esset ausus adducere, in cujus propugnaculis stabat caritas, fortiter dimicans? quæ caritas foras mittit timorem, neque eum patitur contra se gradum attollere. profluentis undas, in quas dejecta est, hausit interrita, sciens, ardori, quo intrus æstuabat, nullum posse flumen officere, nullasque, quantumvis ingentes, aquas caritatem extinguere. moles quidem, ejus alligata collo, deprimebat corporis pondus in flumen, sed eadem prope-ranti sursum animo, tanquam alas addebat, membra quidem,

dem, circumfusus irrigabat humor, sed, flagranti in visceribus amori, acrius excitabat incendium; qui amor, recta in Deum via contendens, omnem superfluum curam rerum familiarium, sollicitudinem omnem inutilem, liberorum dilectionem, tanquam Olympici montis celsitas imbres tempestatessque, infra suum fastigium esse jubebat; quorum etiam jacturam ingentis sibi lucri loco esse ducebat, ut cum Apostolo diceret, *Omnia hac, arbitrata sum ut stercora, ut Christum facerem lucri.* quamquam liberorum amor, eatenus erat illi vilis, quatenus communicabat carni & sanguini. nam, qua Deum parte spectabat, erat illi pretiosus & carus; ceteris autem in rebus eos oderat, sed perfecto odio, sed eo odio, quod in amorem præstantissimum exit; quod videlicet neque virtutis adhærescit, neque ad labefactandam interiorem animæ substantiam commineat; quo, non pejus illis quam sibi, esse consultum volebat. nam æquali in illorum corpora atque in suum odio ferebatur; quod odium, ex Christi sententia, in hac vita cultu est optimum, quod specie ac nomine tenus est odium, re autem vera amor eximius. neque tui corporis, sive tuendi, sive perdendi, alia potior est ratio, quam tuum in illud odium aut amor. nam, si illud diligis, perdis; si odisti, in omnem æternitatem tueris ac servas. Atque eatenus hoc salutare eos odio profecuta est, ut perditos quam florentes, afflictos quam erectos, mortuos quam vivos, pro Christo, maluerit. at, si quæ forsitan sollicitudo vel cura comitata est, è vita migrantem, ea profecto fuit, ne aliquando illis, magis res bonæ quam malæ, secundæ quam adversæ, voluptariæ quam laboriosæ, placerent; ac propterea aspexisset eos libentius, se præeuntes, quam subsequentes ad præmium: sed nihil horum, egregia juvenum eorundem virtus, ex se dedisset, in quorum animos ea Christi fides radices immiserat, ut nullum inde cupiditatum humanarum germen emergeret. eos etiam in eosdem, jejunia, labores, castitas, caritasque non ficta, spiritualis solatii succos infuderat, ut omnes voluptates respuerent, quæ non à Christo defluerent. tum, in pulverem, in solem, in aciem descensuri, de loco peregrinationis & de valle lacrimarum exibat; non autem de convivio pinguium, aut de terra sua-

viter

viter viventium, egrediebantur. jejuniis pasti, contra carnis illecebras depugnabant; ciliciis loricati, contra inanem seculi gloriam fastusque prodibant; vilibus am-
culis tecti, adversus mundi delicias ibant; spe certa im-
mortalitatis induti, contra tyranni minas, arma fume-
bant, scutum videlicet fidei, in quo possent omnia tela
nequissimi ignea extinguere. quæ nam igitur terrenarum
rerum cupiditas, quis nam mortis terror, in tam egregie
munitos irrumperet? quis nam in eis locus pateret, ad
hostis sævissimi vulnus? potuit quidem carnificis fer-
rum penetrare illis in viscera, potuit bifariam corpora
findere; sed nullus cupidinis vel timoris gladius pertin-
gere ad divisionem animæ valuit. ad hæc, quamvis pro-
priæ virtutis ardore inflammati prodirent in bellum, ta-
men parentum quoque exemplis incensi, illud idem ag-
grediebantur alacrius, uterque, similium bellorum peri-
cula, fortiter inierat; uterque hostem fugaverat, ferierat,
debellaverat. non audet se timor inferere, ubi alienæ
laudis æmulatio viget; ille, inquam, timor ignavus, quo
quis molliter vulnera ac mortem exhorret; non ille ge-
nerosus, quem, dubius rerum eventus incutit, quoque
veremur, ne expectationi hominum pares non invenia-
mur; hic enim, virtutis comes individuus, nunquam ab
ea sejungitur. licuit igitur huic præstantissimæ fœminæ,
de virtute constantiaque liberorum securæ, cæli fines at-
tingere, licuit è custodia corporis egredi, ægritudine illa
solutæ, qua vel poterat affici, quod illud sibi spectacu-
lum, passio videlicet filiorum, eriperetur, quo nullum
Deus habebat pulcrius in terris, vel quod ea sibi de Deo
bene merendi occasio subduceretur, qua nulla locuple-
tior obijci poterat, nimirum, ut, cum parens magis filio-
rum vitâ vivat quam suâ, septies in eorum cruciatibus
pateretur, septies in eorum mortibus moreretur, septies
in eorum victoriis vinceret, septies in eorum triumphis
coronaretur. nam primum, quamvis jucundissimum illud
spectaculum, ejus ab oculis absuit, animi tamen aciem,
quæ multo videt acutius atque perfectius, non effugit.
hac in cælo, una cum Deo atque Angelis, quibus præfer-
tim certamen illud dabatur, inexplicabilem hausit volu-
ptatem. deinde, quamvis se, ex filiorum carnificina la-
niari,

niari, ex eorundem morte vita spoliari non sensisset, fiebat tamen, quia vita parentum propagatur in filiis, ut mortua in eis viveret, pateretur, moreretur, vinceret, triumpharet. immo, ante filios, cæli regno excepta, præter ea quæ diximus, illud etiam bonum assequebatur, ut nullis perturbationibus posset impelli. etenim, corporis sensibus alligata, vix potuisset sine aliquo animi motu conspiciere lævientes in liberum corpora carnifices, tumultuante intra maternæ caritatis viscera carne & sanguine; at, soluta hujusmodi vinculis, nihil supererat, quod contaminare liquidam ipsius voluptatem posset. qua igitur lætitia efferebatur, cum, plaudentibus Angelorum choris, egregia liberorum suorum virtus, omnibus tormentis superior, extiterat! quibus gaudiis exultabat, quoties, quæ erant ab illis feliciter gesta, suis laudibus assignabantur! etenim, ut liberorum quisquam fortiter aliquid fecerat, ita illa exultantium Angelorum gratulationibus excipiebatur, ut, quisquis certaminis victor pronuntiabatur, ita etiam ipsa, in illius victoria, victrix, Angelorum præconio, citaretur; ut quisque filius ex suarum virtutum meritis ornabatur, ita etiam, in illius laudibus, matris nomen infereretur. denique, inter faustos acclamantium plausus, illa identidem vox exaudiebatur: O beatæ matris fecunditatem gloriosam! & vere gloriosam. nam bis, fecunda, eos peperit; semel, cum labore, iterum cum voluptate. octies sese Deo victimam obtulit, semel in suo sanguine, septies in liberum morte, multiplici, coronarum octo, splendore, renidet. quarum una, propriæ virtuti est partus, reliquæ sunt illi communes cum liberis. aurata insidens rheda, stelliisque distincta clarissimis, agit octo magnificentissimos ex devicto hoste triumphos; unum ex sua, reliquos ex gloriosa liberorum victoria, multis ad se partibus pertinentes. nunc, se esse matrem, gaudet; nunc, septies ex partu laborasse, lætatur. carissima sibi pignora à Deo commissa & tradita, non segni devicta otio, & tanquam situ quodam obducta, sed honesto labore nitida & collustrata, restituit; non fœdis mancipata vitiis, sed egregiis, libera, virtutibus, exhibet; non hostium insidiis excepta, non armis evicta, sed spoliis inimicorum onusta, sed victoriis aucta, ante
oculos

oculos summi Imperatoris Dei, constituit, eam se nunc voluptatem esse adeptam intelligit, quæ nulla unquam ægritudinis face turbetur; iis sese nunc bonis præditam sentit, quæ nullo malorum confinio lædantur.

O R A T I O XX.

Illustrissimo ac Reverendissimo

D. FABIO CHISIO,

E P I S C O P O

N E R I T O N E N S I,

& Sedis Apostolicæ apud Vbios Nuncio,

I A N V S N I C I V S

E R Y T H R Æ V S

S. P. D.

Romano Pontifice, quod te non fugit, extincto, cum sacer Cardinalium Senatus, de altero Pontifice in æmortui locum subrogando, deliberat, eo ipso die, quo Conclave ingreditur, solet aliquem sibi doctum & gravem virum excitare, qui sui ipsum officii admoneat, ut suis illum suffragiis eligat, qui sit omnium optimus ac præstantissimus. Itaque, Urbano VIII vita functo, cum non esset aliud, in quo me exercerem, sinxi, has mihi partes fuisse demandatas; atque orationem hanc scripsi. quam postea eo amandare cogitabam, quo ineptas alias chartas soleo. satis enim magnum me ex ea fructum percepisse existimabam, si otium, quo diffuso, neque illud levia & inania aula mihi officia eripiunt, honeste ac laudabiliter consumissem.

sumsissem. Et, cum jam in eo essem, ut eam dilacerarem atque conscinderem, cohibui me, & eatenus id facere distuli, quoad ejus tibi legendi potestatem facerem; quod videbam, in ea optimi Pont. forma, quam oratione comprehenderam, te recte includi. Nam qui vis Episcopus omnes eas virtutes, ad gregem, sibi commissum, tuendum, debet asferre, quas in Romano Pont. praesertim desiderari contendimus. Lege igitur; & postquam legeris, vel eam Nihusio mitte, ut aliis orationibus inserat, vel illud de ea statuere, quod mihi erat in animo facere. Vale. Roma, Kal. Febr. CIO IDC XLV.

A D

S. R. E. CARDINALES,

cum, post obitum Urbani VIII, Conclave ingressuri essent, scripta, exercitationis causa.

NOn dubito, P. A. quā hāc mea oratio, hoc tempore, superflua ac non necessaria fuisse existimetur. tum potuit fortasse nec inutilis nec importuna cēseri, cum in eligendo Rom. Pontifice, palam saepenumero, ac voce, suffragia ferrentur. tunc enim non alienum à re tanta videbatur, aliquem excitare, qui de loco superiore contenderet, in electione Rom. Pontificis, nihil tribuendum esse gratiæ, nihil amicitiae dandum, nihil opibus concedendum, sed hominum potentiae, ambitioni, ac minis, toto pectore resistendum. nunc vero, quum, lege sanctissime scripta, tota hāc suffragandi ratio in perpetuum sublata sit, quum Patrum amplissimorum voluntates, quibus interdum, tum officii tum necessitudinis cuiuspiam ratio, vim afferebat, in caligine secreti suffragii, tanquam in praesidio, libertatem suam collocatam habeant, vix ullum cohortationi locum esse relictum intelligo. deinde, quæ vox, quæ latera, quæ vires, rationem officii

officii vestri vobis efficacius ante oculos ponant, quam verba illa, quibus, in ferendo suffragio, iurandum concipiendum erit? quæ verba, si legentibus terrorem incutiant, quanta eos formidine perterrere sit necesse, qui eisdem clara voce proferendis, arctissima se religione palam obstringent? postremo, si iurandi religio tam sancta apud omnes gentes semper est habita, vix ut quicquam contra illud iturus existimaretur, id ab iis violatum iri suspicemur, quorum omnia dicta & facta, in exemplum fidei ac religionis, ab omnibus suspiciantur? quod nemo, nisi barbarus, nisi ferus, nisi inhumanus, commisisset, ut pejeraret, in eo viros principes, humanissimos, sapientissimos religiosissimosque, turpiter lapsuros, existimabimus? si non est credibilis, tantus in homine scelerato ac perduto furor, is verisimilis putabitur in tot tantisque, tamque præclaris, Ecclesiæ luminibus? Quamobrem sic existimo, magis quia oporteat, quam quod necesse sit, id mihi à vobis dicendi munus esse mandatum. Atque, ut imperiis vestris quamprimum occurratur, ea forma in medium prodeat, in qua princeps Apostolorum Petrus, cui hodie successor expetitur, animarum pastores voluit esse inclusos. nam, cum dicit, *Pascite, qui in vobis est, gregem Dei, providentes, non coacte, sed spontaneè, non turpis lucri causa, sed voluntarie, neque ut dominantes in clero, sed forma facti gregis, ex animo*, tria complecti videtur; quibus perfecta Pontificii muneris functio contineatur; nimirum, vigilantiam primum, tum liberalitatem, postremo mansuetudinem. Atque ad diligentiam quod attinet, nihil tam cavendum est Ecclesiæ universæ, quam, ne desides, indiligentes, otio magis quam labori indulgentes, ejus gubernaculis admoveantur. si pacem cum hoste haberemus, si nullis iniquissimorum hominum insidiis expeteremur, si placido tranquilloque inari veheremur, non tam esset de ducis, de gubernatoris arte ac vigilantia, laborandum: inertes, inermes, ac dormientes prope ipsi, recte eidem præficerentur. sed non est ita; hostes, sævissimi ac violentissimi, cervicibus nostris impendent, formidabiles adversus nos acies habent instructas; commoto ac concitato ferimur mari, sævis jactamur fluctibus, adversis agimur ventis; clamat Ecclesiasti-

ca jurisdictio atque libertas, undique prædones adesse; queritur, se ab omnibus diripi, dilacerari, divelli, quæ olim, in omnibus populis atque nationibus, ubi Christi nomen in honore erat ac gloria, à cunctis excipiebatur, fovebatur, colebatur, nunc fere ab omnibus neglectam, repudiatam, ejectam, vix apud paucos locum reperire ubi consistat. supplicat, tendit ad vos manus, Petri navicula, quæ, turbato mari, rapitur vento, fluctibus agitur, procellis pene sommergitur. quamobrem, qui se postulet eidem præfici, ut securus, & ab omni cura semotus, labores effugiat, otium sectetur, ut in hortis ac suburbanis quiescat suis, ubi vivat, ubi se oblectet, ubi recubans molliter ac delicate, ad omnem animi remissionem ludumque descendat; hic simul etiam postulat, eandem, quantum in se est, perdere, & crudelissimis latronibus inquinatissimisque hostibus vexandam, diripiendam mergendamque, si fieri possit, objicere. nam, qui gubernator, in summa tempestate summisque periculis, somno consopitus jaceat, in puppi, quid aliud agat, nisi navem evertat, & in scopulos ac saxa compellat? atque eo etiam perniciosius ab illo erratur, quod istius somnus nullas novas tempestates commovet, sed tantum, coortas, à navi non submovet neque declinat; at illo altero, altiori somno oppresso, non solum acrius, obortæ deserviunt, sed vehementiores etiam procellæ nascuntur, densiores tenebræ diffunduntur, quidquid humanæ ac diabolicæ fraudis ubique locorum ebullit ac fervet, totum in Petri naviculæ contumeliam & damnum erumpit. quid ea tempestas, quæ Christo dormiente excitata, navim, qua vehebatur, prope subvertit, nisi ad vivum expressit, quantum Ecclesiæ mali ex Episcoporum desidia somnoque nascatur? nempe, parum visum erat Christo, tantam rem verbis nobis in aures infundere, nisi in oculis etiam plane defigeret. omnino horribilis incredibilisque vigilantia in rectore omnium ecclesiarum & gubernatore requiritur; sed non minor etiam benignitas liberalitasque depositur. quamobrem, Spiritus sanctus, de Episcopo sermonem habens, cum patris ac pastoris eum nomine appellasset, quorum partes sunt, ad utilitatem salutemque ovium ac filiorum, bona vitamque profundere, tanquam sibi

sibi

sibi ipse minus satisfecisset, largioris profusiorisque rei vocabulo usus est, atque Pontificem cum cælo, populos autem, sibi subjectos, cum terræ solo, in comparatione conjunxit; cum inquit: *Audite cali quæ loquor, audiat terra verba oris mei.* non potuit aptiori similitudine, in hoc genere, Pontificum virtutes, ac vitia, tanquam penicillo describere. nam, quid cælo largius, si, ad hilarandas terras, rōres & pluvias large demittat? quid eodem parcius, si utranque rem contrahat atque concludat? ita etiam nihil est Pontifice liberali benignius, nihil avaro tenacius, atque hominum generi perniciosius. nam qui minus ille pauperes exitio ac vastitate conficiat, si nullam, avidis atque sitientibus, rerum Ecclesiasticarum guttam aspergat, quam cælum terras agrosque devastet, si, undique solis splendore constructo atque recondito, nulla eas luce collustret, nullo calore aperiat, si contractis aquis, nullo eos rore reficiat, nullo humore perfundat, nullis imbribus augeat? qui minus ille ceterorum in pauperes benignitatem exhauriat, atque, ut ita dicam, exsiccet, si suam ipse præripiat ac deneget, quam cælum liquores omnium imminuat ac perimat, si suas ipsum aquas nimis avare contineat? satis, & plusquam utile fuit Rebuspub. docuit experientia, verum illud esse, quod dicitur, nulla in re perniciosius, quam in hac una, peccari. quid pauper ex privatorum facultatibus hauriet, si omnem fere superiorum in se benignitatem clausam aspiciat? abstinebunt, credo, fortunis aliorum, nihil de sacro vel de publico auferent, nihil, pecuniæ studio, tenebuntur, qui eos viderint, quos non dominos, sed distributores bonorum Ecclesiasticorum, fidelibus populis Deus attribuit, patrimonium pauperum avare diripere, domum suam auferre, in se suosque transfundere, nullisque pecuniarum acervis, cupiditatis profundum explere? nihil minus; sed ipsos etiam magistros suos rapacitate avaritiæque superare studebunt. ut, non ineleganter quidam ex veteribus, avarorum Principum magistratus, sectatores & comites, spongiis esse similes, dixerit, qui, quovis admoverentur, quovis accederent, quidquid ibi pecuniæ ac divitiarum nacti essent, tanquam humorem aliquem, statim exfugerent. quod quidem etsi multum simile sit,

non tamen omni ex parte rem explicat. nam reliquæ spongiæ, humore refertæ, nihil amplius inhiant, nihil insuper attrahunt; istorum autem avaritiæ sitis, nullis quæstibus satiatur, nullis rapinis expletur. at, si quis tantam ipsorum cupiditatem gravi aliquo dicto diverberet, eodem plane confugiunt, quo ii, qui insitam cæco nato fidem Christi, conabatur evellere; nempe ad superiorum exemplum. Num quis, inquit, *ex principibus credit in eum*? hoc est, num ii, qui principem in Ecclesia locum tenent, muneribus minus capiuntur? num minus ipsorum cognatos & affines, pauperum sanguine faginaros impinguant, & ad nova semper lucra facienda, inexhaustam eorum sitim pervellunt? ac plane vera loquuntur. sit enim, quemadmodum inquit Gregorius, ut trahant greges in præceps, dum pastores per abrupta nituntur. Postremum, quod à pastoribus quæritur, inorum videlicet, lenitas atque suavitas, ejusmodi est, ut totum à superiori dependeat. Etenim non potest mansuetudo & lenitas deesse, ubi beneficentia & liberalitas insit. ex contrario, non potest crudelitas acerbitasque non deservire, ubi pecuniæ cupiditas dominetur ac vigeat. quamobrem, qui pastorem nacti sunt, magis se ipsum pascentem quam gregem, habebunt etiam perpetuo imminuentem cervicibus suis crudelissimum dominum, nihil dissimulantem, omnia animadvertentem, ex levissimis cujusque peccatis novas causas pecuniæ quærentem. neque quidquam gravius apud Ezechielem Deus cum pastoribus animarum exoptulat, quam, quod cum austeritate imperium in suos exercent. quod si Africanus affirmabat, nihil tam imperatori, cui lictores præibant, cui fasces & secures præferebantur, quam clementiam convenire; quis eam audeat à Pontifice separare, qui, non Regis, non Imperatoris nomine, nobis præest, sed patris, sed pastoris, sed servi, appellatione præficitur? exigit interdum poenas pater à filio, sed non alias magis, se esse patrem, sentit, quam cum castigantis partes exsequitur; ac multo plus ipse animo torquetur, quam ille scapulis doleat; atque illud ipsum flagellum, quo eum percussit, in ignem conjicit, quo ignis incendium, inustum caritatis ardori vulnus sanat ac deleat. Quæ cum ita sint, omiſſis ceteris votis,

tis, id unum dies noctesque nuncupemus, ut, omnibus his laudibus, quas diximus, cumulatus, nobis Christi vicarius obtingat; Christi ejusdem exemplo edocti, qui moris suæ tempore, omissa ceterorum discipulorum cura, pro Petro tantum preces effudit, cum palam, omnibus Apostolis audientibus, dixit, *Satanas expetivit vos, ut cribraret sicut triticum; sed ego, Petre, oravi pro te.* quid? nonne alii etiam discipuli, Dæmonis insidiis expetebantur? cur ceterorum, ut ita dicam, oblitus, pro Petro orandum sibi esse duxit? nempe, quia intelligebat, Petro à ratione officii non discedente, reliquorum ad Deum reversionem non difficilem fore. ita etiam, si vigilantem, si benignum, si mitem Episcopum, in Petri cathedram sedentem conspiciemus, tanquam à desidia, avaritia, superbiaque digredientes, ad contrarias iis vitiis virtutes, ipso duce, veniemus.

O R A T I O XXI.

T Y R R H E N O

V. C.

E R Y T H R Æ V S

S. P. D.

Quam vellem, Tyrrhene Clarissime, nudius tertius, hoc est Dominica Palmæarum, in sacello nostræ Sodalitatis adfuisses! nunquam enim vidisti, ac fortasse nec videbis quidem, tantam hominum gravitatem, doctrinam, atque sapientiam, unum in locum congregatam. nam ibi aderat flos delibatus totius Societatis Iesu, nempe Patres ad centum, canitie venerandi, quorum bini, à singulis orbis terra provinciis electi, Romam venerant, ad comitia Præpositi generalis, atque ad res, ejusdem Societatis, graves,

ves, arduas, atque egentes consilii, consultandas, delib-
randasque. causa, ad nos veniendi, hac fuit, ut sacellum
nostrum inviserent, ac simul omnes, aliqua unius ex no-
stris voce, singulas Sodalitii nostri leges consuetudinesque
perciperent. tradita sunt mihi hæ partes; quas, ut ego non
dicam tu potes existimare, quam gravate susceperim, quod
viderem, me apud eos verba esse facturum, quorum sin-
guli cuiusvis docto ac disertoratori timorem facere pos-
sent. eas tamen, ut potui, hac oratione persolvi; nec plane
infeliciter, præsertim ad memoriam quod attinet, qua cu-
stos est reliquarum ingenii partium, quaque in senibus
nulla esse propemodum solet. nam ea me, si tot clarissimo-
rum virorum splendore perstrictum effugisset, nemo erat,
qui posset subvenire; itaque necessario, mihi erat haren-
dum. sed, Deo juvante, constitit. mitto orationem ad te,
ut, quod tuo commodo fiat, legas, ac si non indignam judi-
ces, qua ceteris, qua sunt imprimenda, addatur, ad Nibu-
sum pervenire, ubi sese occasio dederit, cures. Vale.
Romæ, VI Kal. Aprilis CIO IOC XLVI.

A D P A T R E S CONGREGATIONIS GENERALIS SOCIETATIS IESV,

quum Sacellum Sodalitatis Deiparæ Virginis
Assumptæ, Romæ in Domo professæ Soc.
Iesu, beneficii gratiæque causâ, humanis-
sime inviserent.

Quantum humanissimus optatissimusque hic vester
adventus, Patres religiosissimi, secum afferat di-
gnitatis, splendoris, atque adeo maiestatis, si pluri-
bus verbis coner exponere, non minus inanem operam
sumere, nec minus desipere videar, quam qui probare con-
tendat, solem, ut est in proverbio, meridie lucere. quis
enim, cum videat, totius Societatis Iesu, consilii, auto-
ritatis, prudentiæque lumen, ex omnibus, quantumvis
remotissimis orbis terræ regionibus collectum, hoc in
loco, sole clarius, enitere, tanquam si suis ipse oculis fi-
dem non habeat, longa atque copiosa cuiuspiam oratione
id sibi per aures infundi in animum postulet? hoc igitur
supervacaneo laudationis officio prætermisso; primum,
omnium nostrum nomine vobis gratias agam, quod ho-
die tantam sapientiæ magnitudinem, tantam vim splen-
doris ac luminis, intra angustos huius Sacelli fines, di-
gnari sitis, honoris nostri gratia, compellere atque con-
cludere. quod beneficium tantum est, ut parietes isti
atque subsellia præ gaudio exultare, ac vobis gratias age-
re velle videantur. verum, quia modestia vestra, quæ
præstantis, liberalis, egregii, ac regalis, comes est animi,
nisi parce admodum ac tenuiter, gratiarum actionibus
nos vobiscum uti, non sinit; ne in aliquam ejus offensionem

nem incurram, satis erit, simpliciter ac verbo fateri, maximis, immensis, atque immortalibus, nos beneficiis vobis devinctos teneri, easque pro iis gratias habere, quas nulla dicendo assequi possit oratio. Atque ad illud alterum transibo, in eoque paululum commorabor, cujus præsertim gratia hic hodie sum excitatus orator, ut vos breviter totius instituti nostri rationem edoceam. cujus instituti, in pauca ut conferam, summa hæc est, ut capitali inter se odio dissidentes, ad pacis ac mutui inter se amoris studia revocare conemur. Etenim, cum ceteræ, quæ sunt in Vrbe, Sodalitates, alia aliud sibi opus elegisset, in quo elaboraret; illa, ut peregrinos, sub divo pernoctantes, recto reciperet, ac liberaliter omnibus in rebus haberet; illa, ut fortunæ naufragio ad terminos egestatis ejectos, suum in suum, tanquam in portum, colligeret, foveret, aleret, educaret; illa, ut in summa rerum omnium inopia, vario morborum genere confectantibus, amplo in nosocomio, nihil, ad valetudinem, amissam recuperandam, deesse pateretur; illa, ut eos, qui in tanta paupertate decessissent, ut nihil, quo efferrentur, reliquissent, sepultura afficiendos curaret; illa, ut virgines indotatas, quo honeste collocari possent, pecunia juvaret: nostra hæc id sibi sumsit, ut pacem inter inimicos conciliaret. quo munere, amplissimis viris, summoque genere natis, quibus magna ex parte honestissimus hic numerus constat, nullum est dignius, nullum in quo eorum opera, majori esse usui possit; propterea quod, in dirimendis controversiis, multa sæpe incidant, quæ summorum virorum autoritate indigeant, & interdum etiam, si sit opus, imperio. neque sine divino consilio factum existimo, ut ab hinc annis ferme quinquaginta, hoc ipso die, de hoc eodem opere primo coiremus, quo die princeps pacis, triumphanti similis, Hierosolymarum est urbem ingressus, ut nos cum Deo, à quo disjuncti eramus, pace conjungeret, ut etiam hujus diei memoriam, sicut & Deiparæ Virginis Assumptæ, & Sanctorum omnium, diem festum, spiritualibus muneribus Deo offerendis, pie religioseque prosequamur. Quid verbis opus est? adeo hæc nostra Sodalitas alacrem ac promptum ad id opus animum attulit, ut non solum inimicitias, si quæ essent

essent ortæ, componeret, verum etiam summam daret operam, ut inimicitiarum causæ, quoad ejus fieri posset, è medio tollerentur. etenim, quo nam alio anni tempore, plures in Vrbe cædes fiebant, plures rixæ comminabantur, plura inimicitiarum semina, tum inferendis tum propulsandis injuriis, profeminabantur, quam festis Bacchanalibus? quibus diebus, inveterata quadam, ac prope concessa licentia, nullam fere quisquam legem tenere se putat, continentia, frugalitatis, modestia; tot illa malis occurrere posse existimavit, si augustissimo, hujus vestrae Domus in templo, pacis autorem ac Deum, Christum Dominum, regali propemodum cultu ac magnificentia, ut videre potuistis, populo ad spectandum colendumque proponeret, quo ea pulcritudine ac maiestate illectum, à flagitiosis illum voluptatibus avocaret. nec spes illam sua fefellit. nam, tota fere civitas cernitur, ex suis domibus in id templum effusa, religiosi illius spectaculi amoenitatem improbis ludorum celebritatibus, graves summorum concionatorum de rebus sacris sermones impuris mimorum lascivientium dictis jocisque, suavissimos vocum præstantissimarum, Deo psallentium, cantus inconditis hac illac bacchantium clamoribus, antepone; & si qui sunt adhuc, qui inanum illarum voluptatum studio teneantur, non immoderate & intemperanter, ut olim, sed aliqua iis ratione modoque utantur, neque adeo proclive ad aliquod scelus crimenque labuntur. neque id non intellexit Paulus V, qui hoc potissimum nomine Sodalibus nostris gratias egit, quod, ipsorum præsertim opera, illis, tam infestis bonis moribus ac legibus, diebus, minus multa delicta committerentur, minus multa reorum nomina apud magistratus descripta invenirentur; denique, quod rota Vrbe pax atque otium agigaretur. neque ille, quoad vixit, annum unum intermisit, quin ad id templum accederet, & ad aram ejus maximam, incruentum Missæ sacrificium faceret. ad cuius exemplum, Innocentius X, ex quo tempore factus est Pontifex, quotannis, celebris ejus pompæ splendorem, præsentia suæ luce condecoravit; idem sentiens, quod ille, magnam id opus esse contra perditos mores disciplinam. Quid multis moror? egregium opus, pulcherrimam provinciam, clarissimus

hic

hic nobilium virorum cœtus sibi delegit ; pulcherrimam ,
inquam , provinciam , non cuivis generi hominum aptam ,
sed iis tantum dignam , quos regius vates , ad eam capes-
sendam , his vocibus advocat , *Suscipiant montes pacem*
populo . pacificatoris , inquit , partes , suscipiant montes ;
montes , hoc est , ii , qui , ut Augustinus interpretatur , al-
tiorum ceteris , sanctitatis locum obtineant ; montes , hoc
est ii , quorum virtus , cum usitatis atque vulgaribus ho-
minum probitatibus comparata , montis instar habere in-
ter minus colles videatur . Neque id eos fugit , qui So-
dalitatem hanc legibus temperarunt . ii enim , tribus præ-
sertim rebus hanc montium altitudinem excitari in nobis
posse , sunt arbitrati ; primum , orandi assiduitate studio-
que , quo mens fertur in cælum ; ideo jubemur , huic ex-
ercitationi partem aliquam diei , matutini in primis tem-
poris , dare , & quoties in hunc locum convenimus , ho-
ræ quadrantem in attenta sacri cujuscumque mysterii me-
ditatione consumere . deinde , inchoatæ hujus molis opus
ad summum posse perducere putarunt , mutuis ac familiari-
bus inter nos , de Regno Dei ac de divinis rebus , collo-
quiis atque sermonibus , quos nostri Collationes appel-
lant . quamobrem , Dominicis præsertim diebus , cum
fere omnes antea , nulla ad id lege coacti , Eucharistiæ
Sacramento se refecissent , hoc in loco , spirituale quasi
convivium , de Symbolis exornatur atque instruitur ; in
quo à multis , tanquam à convivis , collecta exigitur , ut,
quod ipsis divinitus in mentem venerit , in commune con-
ferant , ut ex eo alii etiam alantur & crescant ; cui Pater ,
Sodalitatis moderator , non nihil de suo , quasi condi-
mentum aliquod , addit , quo illud in ventrem animæ gra-
tius suaviusque descendat . atqui hoc vim tantam habet ,
ad tollendum animum altius , ut plerumque , non ibi esse
ubi sumus , sed in cælo ad illam mensam videamur ac-
cumbere , ubi divinus convivor , cibi & convivoris
& administratoris partes exsequitur . Et sane quid haberis ,
ô Cælites , cur vos nobis esse anteponendos dicam ? idem
est convivium , eadem cœna , eadem mensa , idem convi-
vator , idem panis , panis nimirum Angelorum , eadem
opipara ac delicata obsonia , nempe , de divinis rebus col-
loquia . unum est , in quo nos à vobis vinci fateamur ne-
cesse

cesse est ; quod id vobis bonum perpetuum est , nullaque
 corporis curandi necessitate interruptum , at nos , cum ma-
 xime ea cœlesti sagina recreamur atque reficimur , tum
 ab eadem , corporis necessitate cōgente , depellimur . quod
 cum sit , nescio alios , equidem non dubitabo de me fateri
 quod sentio ; nam , cum hinc pedem efferō , ita à rerum
 mortalium sollicitudinibus curisque invador , arripior ,
 implicor , alligor , ut ad eandem animæ siccitatem inani-
 tatemque , qua antea laborabam , devolvi me sentiam .
 Omnino , Sodales præstantissimi , ita sese res habet ; dum
 sumus in hac vitâ , adverso ferimur flumine , parvo ve-
 tustoque navigio , ubi , si paululum remiges inhibuerunt ,
 statim retro , præcipiti lapsu , revolvamur ; omnino tur-
 bulento infestoque vehimur mari , ubi , si paululum se-
 cunda Spiritus sancti aura confederit , continuo adversæ
 tempestates cooriantur , quæ nos , hac illac agitados , cur-
 sum tenere non sinant . Sed redeat , unde aberravit , ora-
 tio . postremo , hæc montium forma , in quam regius
 David Angelos pacis includit , omnino exprimetur in
 nobis , si montium apicem Christum intra pectoris no-
 stri claustra conclusum habuerimus , si nullum eidem ,
 ad exeundum , aditum aperuerimus . & quoniam , duabus
 potissimum de causis , contingat , eum à nobis fuga sese
 proripere , aut elatione animi atque superbia , quia apud
 humiles corde divertit cum eisque sese oblectat , aut li-
 tium clamore ac pugna , quoniam in pace est locus ejus ;
 qui nobis leges scripserunt , ad cohibendos comprimendosque
 superbientis seque supra se efferentis animi fa-
 ctus , octavo quoque nos die ad valetudinaria , quantum
 potest , impellunt , ut ibi ægrotantium cubilia , circum-
 euntibus nobis , communis naturæ conditio oculis subji-
 ciatur ; quæ nihil habet , unde animos efferat , sed multa
 continet , quibus eos abjiciat atque prosternat . Ad sedan-
 das vero litium contentiones ac pugnas , quas plerunque
 caro , quæ concupiscit adversus spiritum , cominover ,
 verberationes corporis induxerunt in mores , atque , Ad-
 ventus & Quadragesimæ præsertim temporibus , solem-
 nes quasdam verberationes habent indictas , quibus , hoc
 in loco , qui velint , in sese , ratione tamen modoque , de-
 saxiant . quas verberationes , ad revocandos animos , in
 varias

varias sæpe cogitationes & studia dilapsos, antecedunt musici vocum concentus, ac vehementes & pietatis ardore incensæ cohortationes. Atque totum hoc exercitationum nostrarum quasi curriculum, septem præcipuis Urbis ecclesiis, infra Octavam Paschatis Christi resurrectionis à nobis obeundis, conficitur, tanta Romanæ nobilitatis & summorum aulæ Antistitum, in quibus, purpuratorum aliquot Patrum splendor elucet, frequentia, ut civitas universa eo spectaculo, ad maximam tantæ pietatis admirationem efferatur. atque tantam ea res habet dignitatem ac decus, ut multi extra nostrum numerum, quantumvis splendidissimo genere orti, maximi beneficii gratiæque loco deposcant, in nostrum comitatum recipi. deinde, ad declarandam animorum conjunctionem tunc omnes eadem mensa ciboque uruntur. Postremo, itinere illo peracto, summa totius populi approbatione, ab æde D. Mariæ Majoris, omnes pedibus ad templum nominis Iesu se conferunt, ubi Deo gratias solemniter actis, unusquisque domum suam, plenus celestis solatii, se recipit. Hæ sunt, Patres religiosissimi, leges, quibus hæc nostra Sodalitas continetur. neque quidquam est dignius, in quo omnes nervos ætatis industriæque contendamus, quam, ut iis quam diligentissime obtemperemus, quo nos, qui in hac luce orbis terrarum vivimus, ceteris, in vestris domibus, Sodalitatibus specimen, unde exemplum sibi expetant, simus; quod spes est vestris precibus nobis posse contingere. Interea tanto à vobis beneficio exornati, nihil à nobis, tam, grati æ memoris animi debitum videtur exigere, quam ut Deum enixe rogemus, ut vos, egregie transactis vestris partibus, eum Societati vestræ Præpositum ac moderatorem præficiendo, quo nihil possit esse perfectius, vestras in sedes, sospites incolumesque perducatur, quo suum singulis, ab exoriente sole ad occidentem, provinciis ornamentum ac lumen, quo fuerant spoliata, reddatur.

O R A T I O X X I I
I A N I N I C I I
E R Y T H R Æ I
C I V I S R O M A N I ,
E T
C O M M I S S A R I I
A Q V Æ M A R A N Æ ,
A D
S . P . Q . R .

NVnquam putassem, P. C. futurum; ut de ea re, quæ nunc adeo me sollicitum habet, ad vos supplicem accederem. Ecquando mihi venisset in mentem, posse illud tempus adesse, quo, de re mea, in dubium venirem, quo id, quod mea pecunia, quod jure ac legibus, publicis monumentis, à me emptum esse, constaret, quod, tot annos sine controversia possedissem, ademptum mihi, lugerem? Verum id, utpote à similitudine veri alienum, absuit à cogitatione mea longissime; cumque id, primum, est mihi nuncium allatum, non minus novum & improvisum accidit, non minus admirationem & stuporem incussit, quam, si novum & horrendum aliquod monstrum atque prodigium extemplo meis sese oculis objecisset. Ac nunc fortasse, quamvis graviter læsus, quamvis dolore omnium fere maximo affectus, quieviissem, precibus, querelis ac lamentationibus abstinuissem, si tantum, ex ceteris bonis, provenire mihi posse, perciperem, ut ex eo suppeditare quotidianis meis ac frugalissimis sumptibus possem. sed egestas cogit, me querimoniis vobiscum ac precibus uti; necessitas, unde (nisi quid sit


fit à vobis præsidii) pene mihi ad saccum res rediit, impellit, me vobis esse odio atque molestiæ. Iam ferme biennium abiit, postquam ii mihi fructus, quos ex officio Aquæ Maranæ, mea pecunia coëmto, capiebam, quibusque me ac familiam meam sustentabam, intercipiuntur, vel saltem eorum, ne pervenire ad me valeant, cursus inhibitor. quæ tanta, tamquæ insignis in me calamitas, alienissimo plane tempore, irruit; ætate nimirum exacta atque decrepita, quam jampridem vires deseruerunt, quibus, labore, industria, studioque, mihi comparare, quæ sint ad vitæ usum necessaria, queam. Rem miseram; quæ ætas, ob ejus imbecillitatem, tractari mollius ac delicatius postulat, ea aspere, acerbè, ac duriter est habenda; quæ ætas, quia est ad occasum jam ferme deducta, digna est favore ac misericordia, ea habetur idonea, cui præcipua lex injuriæ definiatur. At videte, P. C. quam præter opinionem meam, hæc, in meum caput, mali moles irruerit. O inanes hominum cogitationes! ô fallaces eorum spes! tum, tum, inquam, id me malum oppressit, cum spes non minima ceperat, fore, ut, ob mea in Remp. Romanam merita, insigni aliquo beneficio publice à vobis ornatus cumulatque discederem, quod videlicet, homo Romanus, libris jam pluribus editis, aliisque mox edendis, Latini sermonis laudem, in quam alii, tanquam in possessionem caducam & vacuam, invaserant, vobis sim vindicare conatus, & majorum suorum regno collocare, quis enim non loquebatur, quis affirmare dubitabat, populum Rom. omnium gentium victorem, una cum majestate imperii, loquendi scribendique Latine, usum & facultatem amisisse? quos conatus à me, pro mea virili parte susceptos, in irritum non recidisse, nationum exterarum testimonio posse comprobari videtur. nam, quod illæ mea scripta expetant, legant, quod in suis urbibus, elegantissimis typis, imprimenda curent, quod quædam earum, immodicis me, quas respuo nec agnosco, laudibus onerent, quod, speciosissimis titulis, quos referre pudet, afficiant, quid habet ea res argumenti, nisi eos fateri, Latini sermonis puritatem, nitorem, elegantiamque, etiam nunc à nobis coli, nobiscum versari, nec; ut multorum erat opinio, ad alias regiones transisse,

transisse, & exilium patria sede commutasse? Iuvat magnifice loqui; & certe decet, adversus eos, quos scire, quis sit cuique honos habendus, quid cuique, suis pro meritis, tribuendum. quid si gentes; à nobis remotissimæ, quarum iudicium grave videri debeat, præmia, quemadmodum ego, falsa opinione ductus, mihi fugebam, hic Romæ, virtutis gratia, scribant, fuisse decreta? Redditæ mihi sunt nuper, ab Vbiis, à Batavis, literæ, quibus doctissimi eruditissimique viri, nescio quem honorem, tanquam bene de Rep. merito, mihi fuisse delatum, gratulantur. homines videlicet candidissimi æquissimique, qui suo ex ingenio alios æstimant, qui unamquamque rem ponderibus suis, ut est dignum, examinant, perinde hic, ut apud ipsos, literis honorem haberi arbitrantur. sed errant, conjectura domestica. quid igitur illis respondendum censeam, nisi, vos nihil horum credere, nisi, id quod est verissimum, adeo nullis me esse auctum opibus atque divitiis, ut etiam, fortunæ injuriæ, iis depulsus sim bonis, quæ Dei ac majorum meorum virtute mihi contigerant? Sed ego me continebo, neque hac responsione, quamvis aptissima, utar; ne quis inde eorum, aliquam vos accusandi ansam arripiat, dicatque; O patriam, civibus suis non æquam! male merenti, bona est; bene merenti, mala: nos illum, alienum, expetimus, diligimus, colimus; illa, natura ac legibus suum, non curat, negligit, in hominum numero fere non habet: nos illum, si hic esset, autoritate, re, opera, juvaremus, qui nulli nobis usui, nulli commodo est; illa, egere eum patitur, qui non cessat, omni opera, studio, ac diligentia, eam populo Rom. gloriam, quam alii ad se transferant esse gloriantur, asserere. Sed magna mihi, in vestra humanitate æquitatque, sita spes est; nempe, hanc vos illi orationem erepturos esse, ac meis simul necessitatibus, de meo, operum auxiliumque allaturos. quæ spes si decolaverit, patiar, feram, ut potero; atque honestius esse putabo, mea me in patria pauperem mori, quam in alia divitem vivere. Sed mihi videntur ii, quibus hæc est tradita provincia ut, re cognita, suum unicuique reddatur, prolatando, ac diem ex die ducendo, aliquam innocen-

tissimo Principi, sanctissimoque Pontifici, invidiam, si fieri possit, velle conflare, cui, orbis terrarum procuratore districto, nihil ferme vacui temporis, ad hæc minora cognoscenda, relinquitur. audebit enim fortasse quispiam, qui ne suspicionem quidem assequi potest, quanto negotiorum pondere prematur is, cui immensa atque incredibilis summi imperii moles incumbit, aliquam illi hujus cunctationis culpam inferre, eumque existimare, ne flocci quidem facere, quid de se homines loquantur ac credant. at, si cuiuspiam id veniat in mentem, quanto eum in errore versari contingeret! nihil enim tam ille vult, quam bene audire; nihil tam ille cupit, quam à suis civibus amari ac diligere. Verum, sæviat fortuna, quantum velit, nulla potest calamitas intervenire tanta, quæ quidquam illi de ea civium caritate ac benevolentia detrahat, quæ magis quam armorum quorumvis præsidio munitur ac tegitur. quis enim, plusquam seipsum, non eum Pontificem diligit, quis eum non in oculis ferat, quem, non patria solum caritas, qua Christianos, ut par est, omnes amplectitur, sed civitatis ejusdem, nobis cum illo communis, societas, necessitudoque conjungat? deinde perfertur ad nos, eos, qui meum, ne ad me commeare possit, impediunt, eximios aliquot ex iis habere, qui eodem, quo ego, calamitatis jure comprehenduntur, (non enim ego solus, in hoc infortunio hæreo, sed multi præterea alii,) perficereque, ut ne nummum quidem unum desiderant ex suorum officiorum fructibus; ex quo numero sunt ii, qui gratia, opibus, ac divitiis, ceteris præstant; quibus etiam si totum illud, quod mecum postulant, detraheretur, incommodi nihil illis accederet, ac perinde esset, ac si rivulus aliquis, ne in mare influeret, averteretur. quæ res quam rationem habeat, non video. aut enim idem omnibus statuendum jus est, aut nemo excipiendus; aut, si mitius cum aliquibus sit agendum, quis est qui non iis subveniendum esse censeat, quibus præterea nihil, quo se tueantur, suppeditat? Quamobrem, P. C. à vobis deimisse ac suppliciter peto, ut me, patrocinio vestro munitum, salvum & incolumem esse velitis, neque patiamini, civem vestrum, qui bene de nomine

nomine populi Rom. mereri studuit, extremo vitæ suæ tempore, inopem, egenum, ad alterius misericordiam confugere, sed totum id, quod, ad hanc usque diem, ex officii mei fructibus me capere oportuit, mihi solvendum curetis, quo æs alienum, quod ex hac mora contraxi, dissolvam.

F I N I S.



Illustrissimo Reverendissimoque

D O M I N O

STEPHANO VAIO,

E P I S C O P O

C Y R E N E N S I,

& Archihospitalis S. Spiritus in Saxia,
quod Romæ est, Præceptori,

S. P. D.

BARTOLDVS NIHSVIVS.



*Q*uantopere veneratus te, Præsul
inclyte, fuerit Ianus Nicus Ery-
thræus, vel è dedicatoria, volumini
huic præmissa, perspicitur. Sed
antea morte est interceptus vir opti-
mus & eloquentissimus, quam in lucem opus istuc
exiisset. Itaque, quod exhibere non potest ipse-
met, id à me tibi nunc, ea qua par est reveren-
tia, exhibitum itur. Quam obrem vero ab ho-
muncione me, transalpino, longe absente, incogni-
tissimo? Quia, & conciliatore quidem FABIO
CHISIO, Neritonensium Episcopo, Sedisque
Apostolicæ Nuncio, viro per Europam univer-
sam laudatissimo illo, ita me dilexit Nicus
tutus, ut non potuerim, quin, grati animi osten-
dendi ergo, magnam partem lucubrationum ejus,
perquam

perquam nobilium, ederem; editurum nec minus
lubens deinceps, quæ fuerint reliqua: immo, id
simul effecit amore mei tanto, ut, quos ipse, dum
viveret, suspexit, eosdem & ego suspiciam in uni-
versum omnes omni merito, præsertim vero te
tuique similes, ita maximis in Dei Ecclesia præ-
cellentes virtutibus. Nec ingratum tibi id fore
confido. Vereor quidem, ne videatur Orationum
Nicianarum produci à me numerus multum exi-
guus: at, non suppetebant plures; non ea quam ad
Paulum V habuit autor in Sacello Pontificio fe-
riâ quartâ Cinerum; non Gregorii Magni lau-
dationes octo, in Humoristarum Academia re-
citatae, quæ perhibentur eminere miris modis;
non ceteræ, ex uberrimi fonte ingenii profectæ
innumeræ, ac, nescio quibus, abditæ latibulis ha-
ctenus. adeoque, dum earum spe lætatus hæsi,
factum inde est unice, ut editionem hanc tam diu
distulerim. Utinam vero sarciri defectus iste
queat. Quicquid ejus futurum sit; meo in te stu-
dio observantiæque summæ ut favere digneris,
etiam atque etiam obsecro. Vale, Antistitum
optime, patrox plurimum honorandæ. Kal.
Januar. CIO IDC XLIX.

I N D E X

O R A T I O N V M.

- | | |
|--------------|--|
| I. | <i>De Episcopo.</i> |
| II. | <i>Ad Academicos Parthenios.</i> |
| III. | <i>De laudibus Geomeiria.</i> |
| IV. | <i>Ad Advocatos Consistoriales.</i> |
| V. | <i>De Spiritu sancto.</i> |
| VI. | <i>De Christi Domini Ascensu.</i> |
| VII. | <i>De Peccato.</i> |
| VIII. | <i>De Rhetorica discenda.</i> |
| IX. | <i>De Christi Matre Assumpta.</i> |
| X. | <i>De diuturna agrotatione toleranda.</i> |
| XI. | <i>In funere Baptista Guerrini.</i> |
| XII. | <i>Ad Card. Alexandrum Perettum.</i> |
| XIII. | <i>De eloquentia.</i> |
| XIV. | <i>In funere Card. Francisci Maria à Monte.</i> |
| XV. | <i>Laudatio Gregorii XV.</i> |
| XVI. | <i>In funere Comitiss Iulii Casaris Stella.</i> |
| XVII. | <i>De Christi Domini Ascensu.</i> |
| XVIII & XIX. | <i>De S. Symphorosa Martyre.</i> |
| XX. | <i>Ad S. R. E. Cardinales , post obitum Urbani VIII.</i> |
| XXI. | <i>Ad Patres Congregationis generalis Soc. Iesu.</i> |
| XXII. | <i>Ad S. P. Q. R.</i> |

F I N I S.